













Ex-Libris
D. Ysabel
Sanchez de Movellan



69

LE
PARADIS
DES PRIERES
DV R.P.F.L. DE GRENADE.

RECUEILLY EN LATIN DES
œuvres spirituelles d'iceluy, & d'autres Auteurs
graves & deuots, par M. ISSELT Allemand.

ET MIS EN NOSTRE LANGVE
par F. FRANÇOIS BOVRDON Celestin de Paris.

Recueu soigneusement & augmenté par le
R.P.D.L.H. Docteur Benedictin.



PARADIS A PARIS, par M. COLET

Chez MARTIN COLET, au Palais, dans la Gallerie
des Prisonniers, près la Chancellerie.

M. D C. XXXI.

AVEC APPROBATION DES DOCTEVRS.

[Faint, illegible handwriting]

modernes



A TRES-NOBLE ET
tres-pieuse Dame, Madame Mar-
guerite Briçonnet, Abbessse de Saint
Remy des Landes, &c.



ADAME,

Ayant depuis peu de
temps mis sous la Presse LE PARADIS DES
PRIERES, œuvre sans doute tres-recōmen-
dable tant pour l'vtilité, excellence & di-
gnité du sujet, que pour le nom tres-illu-
stre de l'Auteur, qui tient, sans contredit,
le premier rang entre tous ceux qui ont
traicté des matieres spirituelles ; i'ay esté
sollicité & induit pour diuerses considera-
tions à prendre la hardiesse de vous l'of-
frir ; m'assurant qu'il ne vous seroit point

EPISTRE.

desagreable, traitant, comme il fait, des matieres saintes, que vous cherissez par dessus toutes les choses du monde; & en particulier de l'Oraison, laquelle, dit S. Antioche en l'Homelie 106. qui se treuve en la Bibliotheque des Peres, est autant necessaire à l'ame Chrestienne, que l'aliment à l'entretien & conseruation du corps; car les fruits qui en prouiennent, sont à la verité infinis & inestimables; puis que, au dire d'un grand Saint, l'Oraison est vn canal celeste, par lequel toute la rosée, c'est à dire la grace diuine descend en nous; & le contentement que l'on sauoure en cette sainte occupatiō ne se peut exprimer de parole; Outre que la pratique continuelle d'icelle est absolument necessaire pour acquerir l'humilité & la māsuetude, & dompter tous les vices & concupiscences. Elle est (disent les Ss. Docteurs) la gardienne de la temperance, le frein de la cholere, l'abbaissement de l'esprit esleué, la medecine de la haine, la droite constitution des loix, la puissance des Royaumes, le trophée & l'estendart de la guerre, la defense de la paix, le seau de la virginité, la foy des mariages, la seureté des voyageurs, la garde de ceux qui dorment, la fertilité des laboureurs, le

EPISTRE.

salut de ceux qui nauigent, l'aduocate des coupables, la consolation des desolez, l'allegresse des personnes qui se resioüissent, le soulas de celles qui sont en deüil, & la sepulture des mourans. Vous sçauiez, Madame, que les prieres estoient les armes du grãd S. Paul, dõt il se seruoit si aduantageusẽment pour terrasser tous ses ennemis. Auec ces armes-là Ezechias, dit S. Chrysostome, surmontoit l'Assyrien, Moyse les Amalecites, Samuel les Ascalonites, Israël les trente-deux Roys : L'Oraison (dit S. Ephrem au traité d'icelle) a donné au Prophete Ionas le ventre d'une Balene pour maison ; a ramené des portes de la mort, à la vie le Roy Ezechias ; & a changé en faueur des trois enfans de Babylone, la flamme du feu en vn vent de rosée : & partant dit le mesme Sainct, il n'y a point en toute la vie humaine de possession plus precieuse que l'Oraison. Le brillant esclat de vos vertus, Madame : le zele ardẽt que vous faites paroistre au seruice de Dieu : la prudente conduite avec laquelle vous gouvernez si sagement en qualité d'Abbesse la Famille religieuse qui est commise à vostre direction : l'exemple que vous luy donnez de la perfection par le modèle de vos actions

EPISTRE.

eminentes, & sainte conuersation: l'exercice continuel de la priere, laquelle, estant detachée de toutes les affections de la terre, vous pratiquez si feruement, suivant le conseil de l'Apostre, qui recommande si souuent aux Chrestiens, de prier en tout lieu, & en tout temps sans intermission, obligent vn chacun au respect & à la reconnoissance de tant de graces diuines & celestes qualitez qu'il a pleu à la souveraine bonté de vous communiquer. Je ne veux point en cét endroit parler de la splendeur & esclat de vostre tres-noble & tres-illustre Maison; puisque vous avez renoncé aux grandeurs de la terre, & ne faites état que de celles du Ciel; de laquelle comme d'une tige feconde & fertilisée par la benediction celeste, sont sortis tant de grands & celebres personages qui ont paru, les vns en l'Estat Ecclesiastique dans les charges & dignitez d'Euesques, Archeuesques & Cardinaux, & qui ont merueilleusement illustré & esclairé l'Eglise de Dieu par leur pieté singuliere, & doctrine incomparable: les autres qui dans l'Estat seculier ont esclaté en celles de Conseillers & Presidens és Cours souveraines de ce Royaume, & qui ont possédé d'autres hon-

EPISTRE.

neurs que i'enveloppe sous le voile du silence : Nous devons tous cét hōmage à la vraie vertu, qui ne consiste qu'en vne pure, ferme & solide deuotion ; puisque mesme selon le Philosophe qui n'auoit autre lumiere que celle de la raison naturelle, l'Etoile du soir & du matin ne sont point si admirables que le iuste. Et en mon particulier le desir que i'ay de vous rendre quelque preuue de mon obeissance , & les bienfaits que i'ay receu de vostre Maison, m'obligent plus estroitement à ce deuoir. Acceptez donc s'il vous plaist , d'un œil fauorable ce petit ouurage, & ie tiendray à singuliere faueur que par ce foible essay de ma bonne volonté ie vous puisse asseurer que ie suis,

MADAME,

De vostre Grandeur,

Le tres-humble & tres-
obeissant seruiteur,

CL. CALLEVILLE.

De Paris le 9.
Aoust 1631.



PROLOGVE DE L'ORAISON.



DNTRE les trois choses, que les Sainctz nous ont enseigné estre necessaires, & d'un profit inestimable à l'homme iuste, pour & à celle fin de se maintenir en sa iustice : à sçauoir, l'Oraison, la lecture, & la bonne action, esquelles il se doit tousiours exercer, & employer son temps : l'Oraison ne tient le dernier lieu, laquelle mesme est continuellement necessaire ; Car comme dit nostre Seigneur & Redempteur Iesus-Christ : Il faut tousiours prier, & ne cesser iamais.

Mais auant que passer outre, il faut sçauoir que c'est que l'Oraison, en quelle sorte nous la voulons prendre en ce lieu, quelles sont ses forces & vertus, & quelles conditions elle doit auoir. Premieremēt quant à la definition, l'Oraison n'est autre chose qu'une demande que nous faisons à Dieu des choses qui nous sont necessaires pour nostre salut : & c'est en ce sēs precisement que nous la prenons en cet endroit ; iacoit qu'elle ait une signification plus ample.

DE L'ORAISON.

Quant aux vertus & priuileges de cette Oraison, il seroit presque impossible de les comprendre, & moins encores les rediger par escrit. Elle illumine, elle purge, elle console, resiouit & eschauffe l'ame : elle fait doux & leger le travail, engendre confiance, chasse la paresse, bannit totalement la nonchalance, espouuante l'ennemy, & surmonte la tentation. L'Oraison profite à obtenir la grace de Dieu, sans laquelle ce n'est rien que de la vie spirituelle.

Et outre ce, il y a trois effets de l'Oraison: Le premier, c'est qu'elle est meritoire : l'autre, c'est qu'elle obtient de Dieu ce qu'elle demande: Et le troisieme, est vne sainte refection & contentement de l'ame: Mais afin que l'Oraison puisse pleinement obtenir ses effets; il faut pareillement qu'elle ayt toutes ses conditions requises.

C'est vne sentence commune de tous les Docteurs, que le merite & valeur de nos œuvres ne procedent pas tant de la substance d'icelles, comme de la maniere avec laquelle elles sont faites. Et iacoit que cela se verifie en toutes les œuvres, si est-il plus particulierement verifié en l'Oraison, laquelle si elle n'est faicte en telle maniere, & avec les circonstances qu'elle doit estre faicte, est de nul, ou de bien peu de fruct. Au moyen dequoy S. Iacques dit : Vous demandez & n'obtenez point, parce que

PROLOGVE DES FRVICTS

vous ne demandez en la maniere deuë & conuenable. L'Oraison a donc besoin d'estre aidée des autres vertus, afin que par leur secours & moyen elle puisse estre agreable à Dieu, exaucée d'iceluy, & paruenir à son entiere perfection: Car elle a besoin de la charité pour estre œuvre meritoire, & de l'esperance pour estre impetratoire, & d'actuelle attention pour obtenir la consolation spirituelle & la deuotion.

Or ce fondement ainsi presupposé, il sera bon de declarer icy plus particulièrement les principales conditions que doit auoir l'Oraison, pour estre parfaicte. Entre lesquelles la premiere est, qu'elle se fasse avec esprit & attention. Nostre Sauueur requeroit de nous cette condition, quand il disoit, que voulans prier, nous entrions en nostre chambre, & que là en secret nous fissions nostre Oraison à nostre Pere celeste. Il veut qu'au temps de l'Oraison nous detachions de nostre ame toutes pensées & imaginations des choses terrestres, afin qu'estans retirez, tous nos esprits & toute nostre attention, estans seuls en repos & silence, nous puissions penser à Dieu: Parce que prier n'est autre chose, que parler à Dieu, & deuiler avec luy des plus grandes affaires qu'on scauroit imaginer à scauoir de nostre salut; il est facile à voir, avec quelle attention & reuerence cela se doit

DE L'Oraison.

faire. Et cette premiere condition est pour la mesme substance de l'Oraison; car l'Oraison faicte sans aucune attention, se doit plustost appeller distraction, que non pas Oraison.

La seconde condition de la bonne Oraison, est l'humilité: de laquelle l'Ecclesiastique parle, disant: L'Oraison de celuy qui s'humilie penetre les Cieux, & ne s'arreste iamais tant qu'elle arriue en la presence de Dieu, & ne s'en depart iusqu'à ce que le Seigneur l'ait regardée. A laquelle vertu nous incite la consideration de nos miseres, lesquelles sont en tres-grand nombre tant de corps que d'esprit, à cause de la premiere cheute, & peché du premier homme. Et la reconnoissance des pauvretes & miseres, fait que l'homme se met en Oraison avec esprit d'humilité; car que peut-il faire autre chose, connoissant sa grande distte, sinon s'escrier au Seigneur, luy demander secours & misericorde? Non seulement cette consideration nous excite à demander humblement: mais aussi celle de sa diuine Maiesté, deuant laquelle nous nous presentons pour inuoker & faire nos Oraisons.

L'humilité est bien à propos suiuite de la foy & de l'esperance, qui est la troisieme condition de la parfaite Oraison, parce que l'humilité demontre que nous ne deuons nous fier en nous-

PROLOGVE DES FRVICS
*mesmes: & la foy nous dit, que nous deuons
nous fier en Dieu.*

*L'humilité nous declare, que le remede n'est
point icy: & la Foy nous enseigne où nous le
trouuerons. L'Apostre S. Iacques requeroit cet-
te condition en nos Oraisons, quand il nous ex-
hortoit de demander au Seigneur sans douter
aucunement, disant: Que telle personne
auec ferme foy demande & fasse priere à
Dieu, sans douter & vaciller en aucune
sorte: Car faisant autrement nous n'obtiendrés
point ce que nous demandons. Et nostre Redem-
pteur nous declare en S. Marc, de quelle impor-
tance est la Foy à cet effect, disant: Tout ce que
priens vous demanderez, croyez que vous
l'obtiendrez, & il vous sera fait.*

*Ce n'est encores assez de prier avec cette foy &
confiance: mais l'Oraison doit estre accom-
pagnée de bonnes œuvres, & d'une bonne vie:
Car encores qu'aucunesfois l'ineffable miseri-
corde de Dieu s'estende iusques à exaucer vn pe-
cheur qui est priné de sa grace, luy octroyant
par misericorde, ce qui ne luy estoit deu de iusti-
ce: neantmoins regulierement la sentence de ce
bon auengle de l'Euangile est veritable, qui dit,
Nous sçauōs bien que Dieu n'exauce point
les pecheurs; mais seulement ceux qui l'ho-
norent, & qui font sa volonté. Or combien*

DE L'O R A I S O N.

que toutes sortes de bonnes œuures puissent aider à l'Oraison : toutesfois il y en a deux qui y profitent , & seruent plus particulièrement : à sçauoir , le Ieufne & l'Aumosne , lesquelles sont comme deux aisles , avec lesquelles elle monte en haut.

La cinquieme condition appartient à la matiere de l'Oraison : c'est à dire , à ce qu'en icelle nous deuons demãder. Quant aux choses temporelles , nous les deuons demander , à celle condition , que nous remettons tout sous la paternelle prouidence de Dieu ; mais quant aux autres choses , nous les pouuons bien demander sans aucune condition. Entre lesquelles , la premiere est le pardõ & remissiõ de nos pechez : La seconde, vne fermeté & constance à ne commettre iamais chose , qui soit peché mortel. Et la troisieme , requerir particulièrement les principales vertus qui nous sont plus necessaires , comme sont la charité , l'humilité , la chasteté , la patience , l'obeïssance , la victoire de nous mesmes , & ainsi des autres choses semblables : entre lesquelles nous deuons aussi demander la grace de demander : c'est à dire , la vertu de l'Oraison , laquelle est vn don de Dieu. La quatrieme , faut prier Dieu pour tous les estats de l'Eglise , pour ses peres & meres , parens & bienfaicteurs , pour tous les pauures , malades , pri-

PROLOGVE DES FRVITS

sonniers, & pour tous les infideles, heretiques & mauuais Chrestiens, & pour tous les hommes tant viuans que trepassez, car telle Oraison est merueilleusement agreable à Dieu, pour l'amour excessif qu'il porte aux hommes. Et celui qui prie ainsi Dieu pour les autres, fait beaucoup pour soy mesme, & merite d'autant plus d'estre exaucé quand il prie pour soy, que plus il a prié pour les autres: C'est la necessité qui nous contraint de prier pour nous: mais la charité nous oblige à prier pour nos prochains. Et entre ces deux sortes d'Oraison, ceste-là qui procede de la charité, est plus prisée de Dieu, & plus agreable deuant sa face, que l'autre qui procede de la necessité.

La derniere condition, est la patience & perseuerance que nous deuons auoir en Oraison, pour ne perdre point cœur, & n'interrompre nostre petition, de quelque longueur & retardement qu'vse le Seigneur à nous exaucer. Cette condition nous est mise deuant les yeux par nostre Sauueur en la parabole Euāgelique, de celui qui à minuiēt va prier vn sien amy de luy prester trois pains: & l'autre s'excusant, parce qu'il estoit au liēt avec ses enfans & toute sa famille, est neantmoins contraint de se leuer par l'importunité de celui qui demande, & luy donner ce qui luy est necessaire. De façon que le Seigneur

DE L'Oraison.

conclud, que si nous perseuerons frappans aux portes de la misericorde diuine, la perseuerance est de telle force & vertu que nous obtiendrons par importunité & perseuerance, ce que par amitié ne pouuons obtenir. Cette vertu donc est tres-necessaire à l'Oraison, car bien souuent le Seigneur retarde & differe les graces que nous luy demandons, ou pour esprouuer nostre foy, afin de voir si à l'occasion de ce retardemēt nous chercherons point autres remedes par quelques voyes mauuaises & illicites: ou à celle fin que connoissions mieux nostre necessité, ou pour enflammer dauantage en nous la ferueur de l'Oraison, en differant de nous accorder nostre requeste, ou bien pource qu'il est ainsi conuenable pour nostre plus grande utilité, ou pour autres raisons que Dieu sçait & connoist: Lequel (comme dit l'Apostre) dispose & ordonne toutes choses pour le profit de ses esleus: Car sçachant bien ce qu'il nous doit bailler, il sçait bien aussi le temps auquel il nous le veut donner.


APPROBATION DES DOCTEURS.

NOus sous-signez Docteurs en la faculté de Theologie à Paris, certifions auoir veu & leu ce present liure du Paradis des Prieres du R. P. F. LOVYS DE GRENADE, & n'y auoir rien trouué qui ne soit Catholique, & de bonne instruction. Fait à Paris le 2. Iuillet 1631.

LE PAGE.

De la HAYE Benedictin.

MEDITATION SUR
L'Oraison Dominicale.





LE PARADIS DES PRIERES Du R. P. F. LOYS DE GRENADE.

CHAPITRE I.

Contenant vne deuote expōsition & Paraphrase sur l'Oraison Dominicale, diuīſée en ſept Meditations, ou Oraisons.

PREFACE. S.

VE que nous ne ſçauons de ^{Rom.} nous meſmes ce que nous de-
uons demander, & ne co-
gnoiſſons le moyen par le-
quel nous deuons prier &
presenter nos Oraisons à
Dieu: noſtre doux Sauueur ſelon ſa bonté accou-
ſtume nous a baillé vne forme & maniere de

prier, laquelle si nous obseruons exactement, il n'y a point de doute que nous serons de luy exaucez: si nous gardons de poinct en poinct la maniere qu'il a institué, il ne faut douter en aucune sorte que nos Oraisons ne luy soient plaisantes & acceptables. Il ne faut pas que nous ayons crainte d'ouyr de luy ce reproche, & qu'il nous dise, vous ne sçauiez ce que vous demandez, si nous sommes obseruateurs de la forme qu'il nous a laissé pour prier. Ceste forme de priere est fort briefue: mais cependant elle est tres-entiere, accomplie & tres-parfaicte, & pleine & seconde de mysteres. Par le moyen d'icelle nous demandons à Dieu toutes sortes de biens, tant spirituels que corporels: & luy supplions estre deliurez de tous maux & dangers. Nous demandons les biens, par les quatre premieres requestes: & d'estre faits quittes de tout mal, par les trois dernieres. Mais attendu que celuy qui prie & fait son oraison à Dieu, doit tousiours prier avec bonne esperance & certaine confiance d'obtenir ce pourquoy il fait sa requeste: ce qui peut engendrer en nous telle confiance n'a pas esté obmis en ceste Oraison. Car ceste esperance & confiance naist ordinairement par la consideration de deux choses: à sçauoir, que celuy de qui nous esperons & attendons estre exaucez en nos prieres, le peut bien faire & le veut bien: c'est à dire,

P R E F A C E.

3

qu'il est en sa puissance de nous donner & accorder nostre demande, & a bonne volonté de ce faire. La volonté se declare en ce qu'il est Pere: & la puissance est manifestée, en tant qu'il est és Cieux assis sur le siege de sa Maiesté. Il est donc tres-necessaire que nous conceuons, & ayons fermement enracinée dans nostre cœur vne tres-grande assurance & confiance en Dieu, lors que nous luy disons: Nostre Pere qui estes aux Cieux. Or toutes les particules & toutes les paroles de ceste Oraison doiuent estre bien considérées & exposées, non seulement les parties & dictions; mais aussi toutes les lettres, poincts & virgules demandent vne singuliere attention & exposition, le tout est remply & abondant en mysteres: ne plus ne moins que la vie & toutes les actions de celuy qui l'a composé, est pleine de Sacremens & mysteres. Plusieurs & diuerses choses ont esté dites & composées par les saincts & doctes personages, pour l'intelligence & explication de ceste priere: & toutes-fois ils n'ont iamais peu espuiser du tout la multitude, abondance & verité des sens mystiques cachez dans icelle. Entre les autres le R. P. F. LOYS DE GRENADE a deuant peu d'annees, escrit & dicté vne tres-belle & tres-docte explication de ceste priere, vne exposition dis-
se, remplie de toute pieté & deuotes affections:

laquelle nous auons tiré de son memorial de la
vie Chrestienne, & l'auons inserée en ce lieu,
comme pour seruir d'entrée & de frontispice à
cestuy nostre liure, non pas que l'ayons couchée
de mot à mot: mais nous y auons retranché ou
adiousté quelque chose, selon qu'il nous sembloit
le plus propre, & mieux conuenir à nostre propos
& suiet: ayant ceste estime que pas vne seule
prière ne se deuoit diuulguer & mettre en lu-
miere; laquelle ne print bon commencement &
tres-heureux succès de ceste sainte & totale-
ment diuine Oraison, comme ayant esté prescri-
te, dictée & instituée par la mesme Sapience de
Dieu.



SVR
L'ORAISON
DOMINICALE.

Meditation premiere.

Nostre Pere qui estes és Cieux.



EIGNEVR qui sera ce-
luy qui és nuages du Ciel
sera esgalé à vous , qui se-
ra semblable à vous entre
les enfans de Dieu ? A la

Grena-
de liure
7. de sō
Memo-
rial.
Psal. 88.

verité les Cieux confessent & racontent
vos merueilles : & la terre voyant les œu-
res admirables de vos mains, est en grand
admiration & pleine d'espouuancement.
Car vous faites des choses admirables ,
grandes & du tout incomprehensibles ,
sans nombre & mesure. Et de vray vous

Iob 9.

A iij

6 PARADIS DES PRIERES,
effectuez des œuvres lesquelles excèdent &
surpassent toute la louange que les hom-
mes vous en pourroient donner. Les œu-
res que vous faites, ô mon Dieu, ne peu-
uent estre dignement recitées par paroles
humaines, elles surmontent toute l'élo-
quence & facondité du plus braue & bien
disant Orateur qui soit parmy les hommes.
Non seulement on ne le peut entierement
exprimer par paroles: mais aussi l'esprit &
entendement humain ne les peut entiere-
ment comprendre. Ce qui ne se doit trou-
uer estrange: car il est bien seant & conue-
nable, que vos œuvres ayent quelque con-
uenance & proportion avec vostre nature.
Attendu donc que vous estes de vostre na-
ture Toute-puissante, immëse, incircôsrit,
incomprehensible, infiny, qu'est-il de mer-
ueille si vous faites des œuvres, desquelles
si quelqu'un en veut estre trop curieux re-
chercheur, il restera tout estonné & per-
turbé en son esprit.

Ysa. 40. Que les autres s'esmerueillent, ô mon
Seigneur, de ce que vous mesurez les eaux
avec la paulme de vostre dextre: de ce que
vous balancez & prenez le poix des Cieux
avec vostre main: que vous tenez de trois
doigts suspendu le gros & tres-pesant far-

deau de la machine terrestre, que vous balancez avec le poix les montagnes, & les colines avec vne balance tres-iuste. Que ceux-là, dis-je, admirent toutes ces choses, & que les autres soient occupez en la contemplation & admiration des œuvres de la creation, desquelles les hommes ne sçauent trouuer le nombre: car elles sont infinies, & outrepassent la raison & l'entendement humain. Quant à moy i'admireray & contempleray très-affectueusement les œuvres de vostre miséricorde: car ceste pieté & miséricorde est par dessus toutes vos œuvres.

Le premier & principal poinct de toutes ces œuvres misericordieuses, est le Sacrement & mystere de l'Incarnation de vostre Fils vnique nostre doux Seigneur & Redempteur IESVS CHRIST: lequel, comme il auoit esté par vous preordonné & predestiné deuant le commencement du monde est descendu du plus haut du Ciel & de vostre sein paternel & par vous Gal. 4. enuoyé en exil de ceste vie mortelle, quand la plenitude du temps est venue: pour & à ceste fin qu'il se formast & print vn corps de nostre chair & de nos os, qu'il se reuetist de nostre nature, qu'il fut fait

8 PARADIS DES PRIERES,

nostre frere selon l'humanité, & que finalement il nous fit ses freres, non pas par nature, mais par grace & adoption. Ie reuereray donc tousiours & adoreray le mystere de ceste diuine Incarnation, ie le precheray & annōceray en tout lieu: car par le moyen d'iceluy m'a esté donné & eslargy vn benefice si noble, rare & excellent, que l'homme ne vous pourroit demander chose plus grande, soit au Ciel, soit en la terre: & cecy n'a esté pour autre occasion, sinon à ce que ie fusse vostre enfant, & que vous fussiez mon Pere. De cecy me donne foy & porte tres-assuré tesmoignage de vostre bien-aimé IESVS-CHRIST, qui en toute l'histoire & discours del'Euangile sacrée vous a nommé & a dit que vous estes nostre Pere. Et c'est aussi l'occasion pourquoy cestuy vostre fils tres-cher n'a point honte de nous appeller ses freres, disant: l'annonceray ton nom à mes freres.

Heb. 8.

Le grand Roy & Prophete Dauid admiroit beaucoup vostre bonté, de laquelle vous vsiez en son endroit, il s'estoit rendu tout estonné de ce que par ceste bonté vostre, luy auiez fait ceste faueur que de l'appeller & esleuer à la dignité Royale: & remply d'espouuantelement en son esprit,

s'escrioit à haute voix, & disoit: Que suis-
ie, Seigneur: & qu'elle est ma maison, veu
que vous tenez si grand conte de moy, que
vous m'avez conduit & conserué iusques à
present? C'estoit neantmoins fort peu de
chose qu'admiroit ce saint personnage, si
ie viens à le conferer avec ce que vous m'a-
uez donné en ceste adoption filiale. Vous
l'auiez constitué Roy & seigneur sur l'une
des Prouinces de ce monde, & luy auiez
fait tres-fidele promesse que ses enfans se-
roient possesseurs & heritiers de ce mesme
Royaume: mais vous me faites bien plus
grande faueur & benefice, vous m'avez fait
le fils du Roy des Roys, le fils du Seigneur
des Seigneurs, auquel seul le Ciel & la ter-
re obeissent: non pas seulement m'avez fait
enfant de ce Roy, qui n'est autre que vous-
mesme: mais aussi m'avez esleu & delegué
heritier de tous vos Royaumes & seigneu-
ries.

Dauantage, attendu qu'il y a plusieurs
noms & tiltres en ce monde, lesquels de-
monstrent plustost le nom que l'effect de
la bonté de la chose, auquel nom les ef-
fects ne se raportent en rien qui soit, &
veu que vous estes si grand & puissant
Seigneur, & que moy ie suis vne si petite,

10 PARADIS DES PRIERES,

vile & abjecte creature, ie pourrois aucunement douter & vaciller en mon esprit, ſçauoir mon, ſi ce nom de Pere & d'Enfant, deſquels il vous plaist vous appeller & nous auſſi, eſt pluſtoſt quelque tiltre d'honneur que l'effet & exhibition de la choſe. Ie pourrois, dy-ie à bon droit & à iuſte cauſe douter de cecy, ſi ce n'eſtoit que voſtre fils nous a fait commandement diſant : Donnez-vous garde d'appeller quelqu'un voſtre pere ſur la terre: car vn ſeul eſt voſtre Pere, qui eſt eſ Cieux. Nous voulant par cela donner à entendre, que telle eſt voſtre prouidence à l'endroit de nous, que vous auez tel ſoin & ſollicitude de nous, que vous nous portez vne ſi grande charité & amour, que vous nous embraſſez de telle affection, que ſi grand & en tel nombre ſont vos graces & benefices, deſquels vous nous ſurchargez tous les iours : que ſi ie viens à les conferer avec tout ce que peut faire & donner vn pere mondain à vn ſien fils charnel, ie trouue que ce Pere, pour auoir donné tant de threſors & richesses temporelles à ſon fils, ſera indigne de porter & d'eſtre honoré du tiltre de Pere, en comparaifon de vous qui

Mat. 13.

CHAPITRE I. II

estes nostre vray Pere & bien-facteur. Car qui est le pere de ce monde qui aye preparé tels biens en si grand nombre à ses enfans ? Qui est celuy qui aye elleué iamais ses enfans à tels & si grands honneurs ? qui est celuy-la qui aye iamais amassé & thesaurisé à ses heritiers si grandes richesses & tres-riches thresors, avec tant de peines, sueurs, trauaux, & douleurs, comme sont grands & incomprehensibles les biens & honneurs que vous nous auez achetez par le prix du tres-precieux sang de vostre fils vnique & bien-aimé ? Nous auons esté par vostre moyen rachetez, lors que nous estions esclaués & captifs : vous nous auez elleu & predestiné pour la vie eternelle & à la gloire celeste : pour à laquelle paruenir vous nous auez ouuert la porte, & donné entrée par la mort tres-angoisseuse de vostre fils.

Je diray donc maintenant, ô mon Dieu, *psal. 3.* avec le Royal Prophete Dauid, Mon pere & ma mere m'ont delaiissé & abandonné, mais le Seigneur m'a receu. Je n'appelleray plus aucun pere sur la terre : mais ie confesseray avec Esaye le Prophete, & di-*II. 63.* ray ; Seigneur, vous estes nostre Pere :

12 PARADIS DES PRIERES,

Isaye
49.

Abraham ne nous connoist point, & Israël ne veut prendre aucune connoissance de nous. Or ie suis certain & tout assuré que vous n'en me delaißerez point: car vous auez dit par la bouche de ce mesme vostre S. Prophete. Quelle mere se pourra trouuer qui aye le cœur si dur & cruel que de mettre en oubly son fils, & qui n'aye compassion du fruit qui a esté engendré en son ventre, & de celuy qui est sorty de ses entrailles? Ce neantmoins, iacoit qu'elle ne s'en souuienne pas, ie me souuiendray de toy, & ie ne t'oublieray iamais: car ie te porte continuellement escrit & graué dās mes mains, & tes mœurs me sont tousiours au deuant, ie les ay sans cesse deuant mes yeux.

Attendu donc, Seigneur, que ceste vostre misericorde est si grande & ineffable, vostre Fils vnique n'a point douté nous donner la licence: & mesme nous a commandé de vous prier, disant: *Nostre Pere qui és aux Cieux*. O parole Royale, parole douce, parole de consolation & deuotion inestimable. Qui eust eu la hardiesse, mon Seigneur, de vous parler en cette maniere, si vostre Fils vnique ne nous en eust donné la licence? Qui estes-vous, mon Dieu, &

qui suis-je , pourquoy ie doive vous appeller Pere? Vous estes celuy qui estes , & ie suis qui ne suis : voire mesme ce monde si grand que vous avez créé , n'est pas au respect de vous.

Or quelle plus grande merueille? quelle plus grande misericorde que celle-cy que vous , Dieu de Majesté infinie , Roy des Roys, Seigneur des Seigneurs , Saint des Saints, Dieu des Dieux , gloire des Anges , & la ioye des bien-heureux , veuillez estre mon Pere , & me veuillez adopter pour vostre Fils , moy qui suis vne fange tres-vile , vn miserable vermisson , vne creature peruerse? O merueilleuse pieté, ô longueur, ô largeur, ô hauteur, ô profondeur de la charité & bonté de Dieu!

Nostre Pere. O parole de consolation, parole d'amour, parole de confiance! Que vous donnerons-nous , Seigneur, pour ceste grace? Avec quelles paroles exalterons nous ceste misericorde? Quel entendement ne restera estonné, considerant vne liberalité telle, & si grande? *Nostre Pere.* Quel miel se trouue si doux, quel lait si suâue, quel baulme si delectable , que fait ceste parole? I'auray donc la hardiesse de vous appeller mon Pere, ô resiouissance

14 PARADIS DES PRIERES.

inestimable, ô douceur ineffable! Quelle chose pouuiez-vous faire dauantage Seigneur? Quelle chose pouuois-je plus desirer que de vous auoir pour Pere? O que le saint Euangeliste entendoit bien cecy quand il disoit: Voy quel est l'amour que Dieu nous porte, puis qu'il nous a oütoyé que nous fussions appelez, & que veritablement nous fussions enfans de Dieu: c'est à dire, il ne s'est pas contenté de nous donner le tiltre de Fils; mais encor il nous a donné l'estre & l'estat de Fils: afin que par ce moyen nous fussions certains qu'il est notoire Pere: puis qu'il n'y a point de Pere sans Fils, ny de fils sans Pere. De maniere que le Pere nous reçoit pour ses enfans: le Fils pour ses freres: & le S. Esprit pour temples vifs, & pour ses sacraires. Quelle gloire, quelle dignité peut estre plus grande que celle-cy?

1. Iean
3.

Iean. 3.

Vn Philosophe disoit que le gain estoit la plus douce chose du monde, parce que pour l'amour d'iceluy tous les traux des hommes sont rendus faciles & doux. Et si le plus grand gain qu'on puisse faire, est d'auoir Dieu pour Pere, non seulement de nom, mais aussi de fait: quelle chose peut estre au monde plus douce & plus suau

CHAPITRE I. 15

que celle-cy : Ceste parole, Pere, blesse le cœur, esmeut les entrailles, flatte l'esprit, conforte le cœur, resiouit l'ame, & fait naistre vne fontaine de larmes.

Nostre Pere. O parole compendieuse, ô parole abbregee que Dieu a faite sur la terre ! L'Apostre disoit qu'il ne sçauoit que Iesus Christ, & iceluy crucifié : & auoit beaucoup de raison, pour autant qu'en ce seul mystere est compris tout ce qu'on peut sçauoir. Moy Seigneur, ie ne veux sçauoir autre chose que ceste science, ie ne veux entendre rien plus que ceste agreable parole : *Nostre Pere.* Ie veux lire en icelle, ie veux estudier en icelle, ie veux mediter en icelle iour & nuict, car elle me suffit.

On dit que l'homme est vn petit monde, pource qu'on void abbrege en luy tout ce qu'on peut voir au grand ; ainsi peut-on encor' appeller ceste parole Sapience abbregee, pour autant qu'en icelle est compris tout ce que la sainte Escriture enseigne. Car elle est restrainte en deux parties principales ; l'vne est Promettre, & l'autre Demander : la premiere s'occupe à pro-
1. Cor.
2.

l'une nous enseigne ce que nous devons faire, & l'autre ce que nous devons esperer. Mais quelle promesse y a-il qui ne soit comprise sous ce nom de Pere? Et quelle obligation auons-nous à Dieu, qui ne soit entendue sous ceste parole de Fils? Quels biens donc, quelles graces, quelle providence n'espereray-je de celuy qui veritablement se nomme Pere?

Certes c'est vne chose asseuree, que puis qu'il est mon Pere il m'aimera; me pouruoirra, me guidera, m'aidera, me defendra, me conseillera, m'enseignera, m'honorera, & me fera son heritier: & quand il sera besoin, il me chastiera comme Pere; car quel est le Fils qui n'est chastié de son Pere; viure donc sous la tutelle & providence d'un Pere tel, est vn doux estat & vne seruitude libre, vne garde parfaite, vne crainte pleine de resiouissance, vn chastimēt agreable, vne riche pauvreté, vne perfection asseurée, car c'est l'office du Pere de prendre sur soy le soing de leurs ennemis, & departir le fruit avec ses enfans.

Dauantage, si ce Pere est Dieu Tout-puissant, & Seigneur de toutes les choses créées, quelle chose me peut manquer ayant vn tel Pere; car on sçait bien que les enfans

ont part à toutes les choses du Pere. Quelle tribulation, quelle tempeste sera suffisante pour me troubler, ayant Dieu pour Pere? Si mes ennemis me poursuivent, il me defendra: s'ils me despoüillent des biens temporels, il me pouruoirá: si ie suis en quelque perplexité, ou en quelque doute, il m'enseignera: si ie chemine au milieu des tenebres, & de l'ombre de la mort, il m'accompagnera: si on m'impose quelque fausseté, il respondra pour moy: si mille esquadrons d'hommes armez viennent contre moy, ie ne les craindray point, pour ce que vous, mon Seigneur, estes en ma compagnie. Et partant, quelle plus grande gloire, quel plus grand honneur, quelle plus grande misericorde y peut-il auoir que celle-cy?

La premiere dignité qui soit au monde, est d'estre fils de Dieu, par nature: & la seconde est d'estre ses enfans par grace. Et pource qu'il n'estoit pas possible qu'il y eust plus d'un seul fils par nature, vous nous auez mis au second lieu, mon Seigneur, nous faisant vos enfans par grace: dignité telle qu'il n'en est point de plus grande. Et par cecy on void que toutes vos promesses vnies ensemble sont comprises

sous ceste parole , ains que celle-cy seule dit plus que toutes ensemble : attendu que c'est plus grãde chose , que vous Seigneur, daignez estre nostre Pere , que tout le reste que vous me pourriez donner , horsmis cecy : pource que vous estant nostre Pere & nous vos Fils, nous sommes heritiers de vos biens , & sommes participans de vos richesses avec vostre fils vnique.

Ceste parole m'enseigne encor ce que ie dois faire, & ce que ie dois esperer : car comme vous estes mon Pere , aussi suis-je vostre fils , non seulement de parole, mais encor d'effect : de maniere qu'on void par là que ie suis obligé de faire les œuures de fils, comme vous faiçtes celles de Pere.

Ces choses dõc estant ainsi, il s'ensuit que ie suis obligé de vous seruir comme mon Pere , de vous honorer comme mon Pere, de vous obeïr comme à mon Pere , & de mettre toute mon esperance en vous comme à mon vray Pere : recourir en toutes mes necessitez à vous comme à mon Pere pitoyable, auoir le zele de vostre honneur, & le procurer comme doit faire vn fils pour son cher Pere : vous seruir avec vne pure intention par amour seulement, comme le fils sert le Pere : me remettre du

tout entre vos mains , comme entre les mains de mon Pere : supporter allaiement tous vos chastimens comme d'un Pere bien-veillant : & finalement remettre & colloquer toutes mes pensées & desseins en vous , comme en mon vray Pere. Le nom de fils recherche iustement toutes ces choses de moy , si que ie vous suis obligé de tout cecy comme à mon vray Pere. Et puis que le sommaire de tout ce que vous m'enseigniez en la sainte Escriture est compris en cela , il s'ensuit que i'ay toute ceste doctrine abbregee en ceste parole, & qu'en icelle i'ay assez qu'estudier tout le temps de ma vie.

Mais on verra cecy plus clairement joignant la seconde parole à la premiere , & disant : *Nostre Pere*. Car vostre Fils unique n'a pas voulu que nous disions mien , & en toute ceste oraison on ne trouue ny mien, ny tien , mais nostre : pource qu'il a voulu communiquer à tous la gloire de ceste dignité , afin que nous fussions tous par grace ce qu'il est par nature. De maniere que disant *Nostre Pere*, nous confessons clairement que nous sommes tous freres , comme fils d'un mesme pere : Et par ainsi, nous deuons aimer chacun comme nostre frere,

20 PARADIS DES PRIERES,

& vous comme Pere vniuersel de tous. On void par cecy qu'en ces deux paroles nous est remis en memoire l'amour de Dieu, & du prochain, & en ces deux commandemens consiste toute la Loy & les Prophetes. Or quelle doctrine pouuoit estre plus excellente & haute, & plus compendieuse que celle-cy, laquelle en deux siennes paroles enseigne si clairement tout ce que nous deuons sçauoir ?

En outre, ces deux paroles m'enseignēt, non seulement tout ce qu'il me faut sçauoir, & ce que ie dois faire & esperer, mais encor elles m'ouurent la voye de la penitence, & les portes de mon esperāce, quand le peché me les a fermé. Car pour cela ie ne perdray pas courage, & n'entreray point en deffiance, ains imitant l'exemple de l'enfant Prodigue, & repentant, ie retourneray à vous mon Pere, avec les mesmes paroles & miseres, avec lesquelles il retourna, & diray : Pere, i'ay peché contre le Ciel, & contre vous. Ce fils ayant receu la part du bien qui luy deuoit escheoir, se deipartāt de vous, la despendit soudain follement : car le bien qu'on possède sans la prouidence du Pere celeste, s'escoule par ceste voye : De maniere que le bien sans

vous despoüilla ce fils, le tira du giron de son pere, le chassa de sa maison, le bannit de son païs, le priua de sa renommée, luy fit perdre la chasteté, & le fit deuenir gardien des pourceaux, afin que sa propre misere luy enseignast, & fist cognoistre comme il auoit tres-mal fait d'abandonner & quitter la maison d'un tel Pere, & afin que par le mal qu'il enduroit il conneust le bien qu'il auoit perdu: Ce miserable donc reuenant à soy, commença à dire: Ah! combien de seruiteurs & mercenaires sont rassasiez & aduancez en la maison de mon Pere, & ie me meurs icy de faim? Pour retourner à son pere, il retourna premierement à soy: pource qu'il s'estoit esloigné de soy, quand il partit de son pere. Et sans doute il s'éloigna grandement de soy, puis qu'ayant perdu la dignité de fils, & d'homme pareillement, il vint à se faire semblable aux bestes, & prendre sa nourriture en leur cōpagnie. De façon que le miserable retournât à soy, resolut de retourner à vous son Pere. Mais avec quelle esperance reuint-il à vous, si ce n'est sçachant bien que vous estes nostre Pere: car iacoit qu'il eust perdu la dignité de Fils, vous n'avez pas toutesfois perdu la pieté & bien-veillance de Pere.

Le pere donc voyant son fils de retour, courut soudain son peché, & dissimula la personne de Iuge, pour faire l'office de Pere: & conuertit l'indignation en pardon, desirant plüstoit le retour de son fils que sa perte. Et le faisant approcher, luy mist les bras au col, luy donna le baiser de paix, & commanda soudain qu'il fust reuestu de la meilleure robbe. Il ne luy demanda pas, d'où viens-tu? où as-tu esté? où est la robe que tu auois emportée quand & toy? Pourquoy as-tu fait eschange d'un si grand honneur à si grande vergongne? Il ne luy demanda rien de tout cecy: pour autant que les forces d'amour ne void pas les defectuositez. Le pere ne sçait pas quelle chose c'est que la misericorde tardiue: il commanda soudain qu'un anneau luy soit mis au doigt: pource que non content de le restituer en sa premiere innocence, il le veut encor annoblir par ce signe d'honneur. Il commande pareillement qu'il soit chaussé, afin que de nouveau il chemine par la voye de Iustice, de laquelle il s'estoit esgaré, & afin qu'on voye à quelle extrême pauureté il estoit deuenü, s'estant departy de chez son pere, attendu qu'il retourna sans auoir des souliers aux pieds. Le pe-

re encore commanda qu'on tuaist vn veau gras; car non content d'un veau, s'il n'estoit encores gras, il voulut honorer ceste feste du retour de son fils, & declarer par ce moyen la grandeur de sa charité enuers luy.

Or moy Seigneur, estant esmeu par cét exemple, & attiré par vne si grande monstre de charité, apres auoir tant tournoyé errant, vagabond çà & là, rouge de honte, confus & humilié autant qu'il m'est possible, ie retourne à vous, mon Dieu, disant avec cét enfant Prodigue & perdu. Pere, i'ay peché contre le Ciel, & contre vous: ie ne suis plus digne d'estre appellé vostre fils: & partant traictez-moy comme l'un de vos seruiteurs mercenaires. Ie diray ces paroles, Seigneur, & si ie les dis avec tel cœur qui les a dictes, i'espere qu'auant que i'aye paracheué de les dire, vous me viendrez au deuant, jetterez vos bras sur mon col, & me donnerez le baiser de paix; car on espere cecy des entrailles paternelles: à sçauoir moyenner de retirer à soy son fils desia perdu.

Vn Docteur dit fort à propos, que comme quand vn oyseau voit vn de ses petits cheu hors du nid, où il estoit seurement, il

24 PARADIS DES PRIERES,
se traueille & se met en peine de l'y rapporter : & si d'auenture il voit quelque animal qui s'approche pour le manger , il volle promptement & soigneusement tout à l'entour, s'escriant & faisant tout ce qui luy est possible pour le deliurer ; ainsi le Pere eternal procure le salut de ses enfans, & medecine leurs infirmittez , poursuit l'audacieuse beste, qui est le diable , & remet son fils au nid, oublie l'iniure passée , & tasche de le retirer à penitence. Mais sur tout , il ne cesse iamais de nous admonester cōme vray Pere, de nous conseiller , & remettre en la voye de salut. Car comme celuy qui veut voir la lumiere du iour , n'a pas beaucoup de peine à la chercher, pource que de foy-mesme elle se represente à celuy qui la regarde : ainsi celuy qui veut esleuer ses yeux au Ciel, & regarder le Pere, n'a iamais faute de ceste claire lumiere , laquelle se communique à tons.

Qui es és Cieux.

Ps. 44. **O** Createur du Ciel & de la terre , la grace s'est espanduë par vostre bouche sacrée , & par vos lèvres diuines a decoulé la douceur : c'est pourquoy vos saintes paroles sont plus douces que le miel, plus delectables que le diuin Nectar , & la

douce Ambrosie. que si les precedentes sont remplies de douceur & suauité, les subsequentes ne sont moins douces, moins riches, moins compendieuses que les premieres: Car si vous mon Seigneur, qui estes mon Dieu, & mon Pere, & mon heritage, estes és Cieux, qu'est-ce que i'ay affaire en terre, ayant tout mon thresor au Ciel? Et si vous mon Pere estes au Ciel, il s'ensuit que ie suis pelerin estrange, & passager en ce monde, & n'ay point çà bas vne cité perdurable & ferme, ains cherche mō vray pais. Et pour autant que le passager qui est Heb. 13. en chemin, y est seulement quant au corps, pource qu'il a continuellement le cœur & la pensèe de retourner à son pais, où il a sa maison: ainsi moy qui suis passager, tandis que ie suis éloigné de vous, où dois-ie tenir mon cœur, & tout mō desir, sinon en vous? Ceste parole fortifie encor ma confiance, & m'asseure le party: car si vous mon Pere estes és Cieux, i'ay desia que faire en ce lieu, i'ay desia vn pied en ceste demeure, puis que vous estes là dedās, & en estes Seigneur. Où demeurerons les fils sinō où leur pere demeure? où doiuent estre les mēbres, sinō avec la teste? où les aisles, sinō où sera le corps? Le Pere ne deschassera iamais

26 PARADIS DES PRIERES,
de sa maison vn, auquel il a donné le tiltre
de fils & d'heritier.

D'auantage, ceste parole aggrandit &
hausse mon ame par dessus toutes les cho-
ses du monde. Car quel plus grand con-
tentement d'esprit, & quelle plus grande
gloire peut-on desirer, qu'estans en terre,
auoir son pere au Ciel, & par le moyen
d'iceluy deuenir Roy du mesme Ciel? O
vous qui estes desireux d'honneur & de
gloire, à quel propos allez vous cherchant
vne gloire semblable à la fumée que le
vent emporte? Pourquoy laissez-vous
vne gloire & honneur si grand, comme est,
estre enfans du Roy du Ciel? Et si vous ne
croyez pas cecy, comment estes vous
Chrestiens, & si vous le croyez veritable-
ment, comme est-il possible que vous al-
liez cherchant les vains honneurs qui vous
fuyent, avec vne anxieté si grande; vaut-
il pas beaucoup mieux recevoir cét hon-
neur vray, qui veritablement vous est of-
fert? Resiouïssiez-vous tous en Dieu. O
iustes, & vous qui auez le cœur net & pur,
glorifiez-vous: puis que vous auez vn ga-
ge si cher au Ciel, & auez Dieu pour Pere.
Je prendray donc mon Seigneur, les aisles
de l'aigle, & laissant ceste bassesse & vileté

de la terre, ie voleray à vous en haut : car comme pourray-je plus faire estime de chose qui soit en terre, me voyant heritier du Ciel ? En quelle maniere pourray-je tourner la face aux delectations bestialles de ce monde, ou aux richesses transitoires & terrestres, estant desia fait possesseur du Ciel, par vostre moyen, mon Pere ? Ce me seroit vne honte plus grande, que si vn fils de Roy alloit curer les estables, ou estriller & nettoyer les cheuaux. Et si le fils aîné d'un Roy, iacoit qu'il n'aye pas encor herité, est toutesfois tant estimé par tout le Royaume de son pere, pour le droit & autorité qu'il y a : moy qui ay la meisme pretension & autorité par la parole du Dieu viuant, non pas au Royaume transitoire & mondain, mais au Royaume du Ciel : pourquoy ne me tiendray-je pas pour riche, & bien fortuné avec ceste expectatiue, & avec ceste esperance ? Et jacoit que ceste mienne esperance soit plus long-temps differée : ie tiens asseurement que quelque iour i'en seray pleinement possesseur, pour autant, ô mon Dieu, que vous estes fidele & veritable en vos promesses : & qu'en aucune sorte vous ne romprez l'accord que vous avez

faict avec nous; mais vous essuyerez toutes les larmes de nos yeux, & nous ferez asseoir avec vous en vostre throsne, nous regnerons avec vous eternellement & sans fin, par tous les siecles des siecles, Amen.

MEDITATION II.

Ton nom soit sanctifié.

VEu que vous auez créé toutes les choses qui sont tant au Ciel comme en la terre, pour nostre vsage & seruice, ô nostre Pere tres-bening & debonnaire, & que vous nous auez créé pour vostre vsage (iaçoit que n'ayez besoing de nous, ou de nos biens) afin que nous vous seruions & donnions louange, afin que nous viuions en telle sorte que vostre saint nom soit loué & glorifié en tout lieu: fort à propos, & d'un ordre tres-conuenable, vostre Fils bien-aymé nous a enseigné de demander en premier lieu, & deuant toute autre chose, ce qui est le plus souuerain, le plus grand & excellent: c'est à sçauoir, qu'il nous a montré de dire en nos prieres & oraisons. *Vostre nom soit sanctifié.* Pource que si des-

ja i'ay esté receu pour vostre Fils , y a-il chose qui me soit plus conuenable que de procurer la gloire de vostre saint Nom , la gloire de vostre Royaume , & l'obseruance de vostre volonté ? Que signifie la demande que ie vous fais de toutes ces choses ? Qu'est-ce rien plus sinon , apres auoir receu ceste nouuelle dignité de Fils , en prendre soudain la possession , & mettre en effect les choses qui conuiennent raisonnablement aux enfans ? Car tout ainsi comme celui qui est esleu en quelque dignité de Roy , de Prelat , ou autre , prend incontinent la possession d'icelle , & commence à penser à toutes les choses qui appartiennent à son office : Ainsi moy, Seigneur , ayant receu de vostre Diuine grace ceste nouuelle dignité, ie commence soudain à prendre la possession d'icelle , & à l'effectuer , faisant & demandant ce qui conuient au fils d'un tel Pere : à sçauoir , desirer & moyenner la sanctification de son Nom , & la gloire de son Royaume : c'est à dire , qu'il soit conneu par tout le monde, & adoré, & glorifié , attendu que l'homme faisant cecy fait ses propres affaires , sçachant bien

30 PARADIS DES PRIERES,

que la gloire du Pere, est semblablement l'honneur du Fils, comme dit le Sage. Et si la nature & propriété du bon fils, est aimer le Pere, & l'amour transforme l'aimant en la chose aymée : de maniere, que s'oubliant luy-mesme, il employe tout son estude à moyenner, & desirer ce que l'aymé desire pour soy, ne plus ne moins que s'il estoit vn autre luy-mesme, que dois-je desirer pour vous, mon Seigneur, puis que ie suis transformé par amour en vous, si ce n'est tant seulement ce que vous mesmes desirez. Et comme il n'y a chose que vous desiriez d'auantage que la gloire de vostre saint Nom, (car il n'y a chose plus digne d'estre desirée que celle-cy) que dois-je faire, sinon desirer & procurer ceste gloire?

Ie voy bien, Seigneur, que vous n'avez pas besoin de cecy; car iagoit que la langue mortelle ne dise mot, toutes les creatures crient & annoncent vostre gloire, & nous inuitent à faire le mesme, comme dit le Psalmiste. Si nous regardons les esprits Angeliques, ils celebrent tous continuellement vne feste de gloire, & perpetuelle loüange. Si nous iettons nostre regard sur la merueilleuse compo-

sition des Cieux, & considerons d'un œil clair leurs merueilles, la concorde de si differens elemens, le flux & reflux ordinaire de la mer, la perpetuelle source des fontaines, le cours continuel des riuieres, vne si grande varieté d'arbres, vne telle diuersité d'herbes, tant d'especes d'animaux, & tant d'autres choses sans nombre, & chacune avec sa propre vertu naturelle, telle qu'il vous a pleu leur donner, qu'est-ce que toutes ces choses que nous auons continuellement deuant les yeux, disent & annoncent, sinon la gloire & magnificence de vostre Nom? Elles toutes à haute voix vous nomment seul vray Dieu, seul Tout-puissant, sage, bon, & misericordieux: seul iuste, veritable, admirable, seul digne d'estre loué infiniment.

Mais entre toutes ces creatures, l'homme est celuy qui est le plus obligé de sanctifier & celebrer vostre saint Nom: pour ce qu'il a receu en luy seul toutes les facultez & perfections de toutes les autres creatures, à raison dequoy il est appellé petit monde. Si chacune est obligée de sanctifier vostre Nom pour sa part, quelle obligation aura celuy qui a receu le tout, & pour qui tout ce qu'il est possible de voir

32 PARADIS DES PRIÈRES.

en ce monde visible a esté créé.

Parquoy, Seigneur, ie desire de tout mon cœur que vostre Nom soit sanctifié par tout le monde, de telle sorte que toutes les langues, nations, tous les aages, & toutes les qualitez des personnes soient conformes en tout lieu pour louer & glorifier vostre saint Nom. Ie ne vous demande pas, mon Seigneur, des richesses terrestres, ny les honneurs du monde, ny les plaisirs de la chair, seulement ie vous demande que vostre Nom soit sanctifié, & glorifié au monde. Que celle-cy soit la premiere, & la plus grande de mes demandes, que ce soit mon principal soin, le plus efficace, & affectueux de tous mes desirs: puis que l'amour qui vous est deu, doit estre le plus grand de tous les amours. Et si ie vous demande vostre gloire apres celle-cy: faictes Seigneur, que ie ne la demande pas seulement pour mon vtilité, mais pour vostre gloire, & repete bienheureux les habitans de vostre Royaume, pour autant qu'ils vous loueront sans fin, Amen.

MÉDITATION III.

Ton Royaume aduienne.

VOUS voyez, Seigneur, que plusieurs Roys, ou pour mieux dire, plusieurs Tyrans se sont faits maistres de nous, le Diable par son orgueil, le Monde par ses pompes, la Chair par ses tromperies & delices, & nostre propre Volonté par ses appetits. Tous ces tres-cruels Tyrans nous ont tyrannisé, & nous ont esloigné de vostre iurisdiction & Royaume, nous incitant continuellement à faire leur volonté, & à viure selon leurs loix, abandonnant les vostres.

Et pourtant, Roy du Ciel, pouruoyez à ce desordre pour vostre honneur, & n'endurez plus ceste tyrannie en vostre Royaume. Que ces tyrans soient mis dehors, que vos ennemis soient dissipés, & que tous ceux qui vous haïssent fuyent de vostre presence. Regnez seul mon Seigneur, gouvernez nous seul, & seul vostre sceptre, & vostre Royaume soit reconnu de nous. Que vostre volonté soit nostre loy, que vostre parole soit nostre lumiere, vos commandemens nostre resioüissance, estre

34 PARADIS DES PRIERES,
à vous soit nostre richesse, & souffrir pour
l'amour de vous soit nostre gloire.

Regissez nous par vostre prouidence,
defendez nous par vostre dextre, gui-
dez nous par vostre esprit, enseignez-
nous par vostre parole, gouuernez-nous
par vos loix, faites-nous riches par vos
dons, & chastiez-nous par vostre main
misericordieuse. Puisse aduenir que le
monde, la chair, le diable, & la propre vo-
lonté, n'ayent plus que faire avec nous.
Que le Prince de ce monde se desparte de
nous : ô Seigneur regnez seul en moy,
gouuernez moy vous seul, habitez vous
seul en mon ame, & que vostre Royaume
occupe entierement mon cœur.

Faites que vous seul soyiez la lumiere
de mon entendement, la refection de ma
volonté, ie ne cherche rien que vous,
ie ne demande que vous seul, & mon
ame ne desire autre chose que vous tant
seulement : pourquoy vay-ie discourant,
& pourquoy me laissay-ie distraire en di-
uerfes parties, puis que vostre seul Royau-
me suffit ?

Accordez moy donc Seigneur, ceste
grace, que pour l'aduenir ie ne pense à
rien plus, ny ne desire riē plus, ny ne pour-

chasser rien plus, sinon vostre Royaume: qu'il soit mon occupation, & que toute ma conuersation soit en luy. Vous seul estes bon, vous seul estes beau, vous seul estes aimable & amoureux de nos ames. Et pource, Seigneur, régissez moy vous seul, gouuernez moy vous seul, & radressez moy selon vostre volonté. Que ma poitrine se recrée seulement en vous, que mon cœur se repose en vous: faites que i'accoure vers vous, qui estes ma dernière fin, mon centre & mon Royaume, où se reposent les ames pures & saintes.

Aduienne encor en nous vostre Royaume, la fin de toutes nos esperances, & le port commun de nos desirs: où nous vous puissions voir, Seigneur, qui estes nostre Roy & Pere en vostre beauté, & puissions iouir eternellement de vostre presence. Car quel desir est plus propre & plus naturel aux enfans, que de voir leur Pere en s^{on} Royaume? O mon Dieu, quand viendra ceste heure? Quand est-ce que ce iour viendra? Quand verray-ie ceste lumiere? Quand est-ce que ie viendray & comparoistray deuât vostre face mon Dieu? Quand verray-ie ces beaux palais d'or? ces iardins pleins de fleurs eternelles? ces fontaines de vie? ces

portes & murailles faites de pierres précieuses ? ces chœurs des Anges & Vierges qui suivent l'Agneau immaculé par tout où il va ? ces chantres & chanteresses, qui avec des hymnes perpetuels, celebrent & loüent le Roy souverain, & le Pere commun de tous ?

O Ierusalem nostre mere, quand te verray-ie ? quand viendra le iour que ie heurteray à tes portes d'or ? verray-ie tes murs élabourez de iaspes ? & ouïray-ie les voix des loüanges qui ressonnent-là ? O Seigneur Dieu des vertus, combien sont aimables vos Tabernacles ! mon ame deuiét seiche, & s'amoindrit pour le desir qu'elle a d'arriuer à la demeure & habitation du Seigneur, ne plus ne moins que le cerf traouillé par les chasseurs, desire les fontaines d'eau, ainsi mon ame desire de vous voir, mon Dieu. C'est vn desir naturel aux enfans, & vne propriété de ceste eau qui jailloit vers la vie eternelle, esleuant le cœur de l'homme de la terre au Ciel.

C'estoit elle qui faisoit dire ces paroles à saint Ignace, lors qu'il estoit conduit au martyre : Mon amour a esté crucifié, & n'est plus avecques moy ; mais il y a vne certaine eau qui est demeurée en moy, la-

quelle me dit continuellement : Va à ton Pere. C'est doncques le Pere commun que nous desirons, & pour lequel nous soupirons en cét exil, criant & disant: Seigneur, vostre Royaume aduienne en nous, lequel connoistre est la vie eternelle, lequel voir & contempler est beatitude parfaicte : laquelle vous supplions humblement nous vouloir donner par vostre bonté ineffable & misericorde accoustumée, ô Pere tres-clement, & ce par les merites de vostre Fils bien-aimé Iesus-Christ nostre Seigneur, lequel avec vous est benit & glorieux à iamais. Amen.

MEDITATION IV.

Ta volonté soit faite en la terre comme au Ciel.

Q Vi sera celuy qui resistera à vostre volonté, ô Pere de misericorde; car vous avez fait toutes choses, ainsi que vous l'avez voulu : & toutesfois nous trouuons en nous mesmes vne volonté si peruerse & meschante, que bien souuent nous nous opposons directement, & resistons à vostre diuine volonté. Le soleil, la lune & les estoiles, la mer, & tous les elemens, & generalement tout ce qui a esté créé, obeyt

38 PARADIS DES PRIERES,
promptement & sans contradiction à vo-
stre volonté: & les hommes tât seulement,
qui sommes creatures capables & douées
de raison, ne voulons obtemperer à icelle.
Que vostre volonté donc soit faite en la
terre, ô Seigneur, qu'elle soit faicte, dis-ie,
en nous qui ne sommes autre chose que
cendres, que poussiere & que terre: tout
ainsi qu'elle est faicte au Ciel, en ces es-
prits celestes & Angeliques, qui sont
toufiours disposez pour accomplir vos
saincts Commandemens, & ententifs
pour connoistre quel est vostre bon plai-
sir. Mais quelle est ceste vostre volon-
té, ô Pere souuerain? Ceste volonté, dit
sainct Cyprien, est celle que vostre Fils
vnique a faite, & nous a enseignée: laquel-
le requiert que nous soyons humbles en
nostre conuersation, fermes en la foy, ver-
gongneux en nos œuures, misericor-
dieux és necessitez d'autrui, & honne-
stes en nos mœurs: qu'on ne fasse iniure
à personne, qu'on la supporte patiem-
ment quand elle est faite, qu'on demeure
en paix avec ses freres, aimant Dieu de
tout son cœur, l'aimant comme Pere, &
le craignant comme Dieu, & ne prefe-
rant chose quelconque à l'amour de Iesus-

Christ, qu'il n'a preferé rien au nostre: ce sont iusques icy les paroles de S. Cyprian.

Et pource, Seigneur, c'est ce que ie veux, & que ie desire: ie ne cherche autre chose, sinon que vostre volonté soit faicte en moy, & par moy, & que ie sois tout vostre, & m'occupe du tout à vostre seruice. Je ne desire plus me laisser transporter à mon appetit, ny ne veux plus auoir esgard à mon profit, ny à l'affection particuliere de mes parens & amis, ny aux paroles du monde, ny aux affections de la chair & du sang; ie ne penseray plus quelle chose est amere, quelle douce, quelle honorée ou vergongneuse, facile ou difficile: que tout mon soin pour l'aduenir soit seulement de faire vostre sainte volonté. Que cecy tant seulement me resiouisse, que cecy me semble doux, que ce soit toute la consolation de mon cœur; bref, que ie n'aye iamais autre soin, que de faire vostre volonté. Je voudrois pouoir faire moy seul tout ce qui conuient à vostre diuine Majesté.

Veritablement, Seigneur, si i'auois esté mis en pieces pour vostre amour, ie me deuerois plus contenter de cecy, que si

40. PARADIS DES PRIERES,

ie iouïssois de tous les plaisirs qu'on peut desirer ; pourueu toutesfois que ces plaisirs ne redondassent pas à vostre plus grande gloire ; car alors ie ne desirerois pas tels plaisirs & delectations pour le plaisir , mais seulement pour vostre seruice , pource que ie ne dois pas auoir esgard à ma volonté , mais à la vostre. Quelle chose me peut estre plus douce & plus aimable que me resigner à vostre volonté , & me resoudre totalement en vostre honneur ? O quelle resjouissance seroit la mienne , si ie pouuois endurer quelque chose qui fust aspre pour vostre amour , & pour vostre honneur !

C'est l'allegresse des Anges, le desir des Saints, & la resjouissance des iustes , que vous seruir parfaictement , se conformer en tout à vostre sainte volonté , & auoir tousiours esgard à vostre honneur. Je ne doute pas Seigneur , que les Anges & les ames saintes ne se resioüissent d'auantage de la magnificence de vostre honneur , que de la grandeur de leur gloire propre. Et partant, comme vostre volonté est obseruée & accomplie parfaictement au Ciel : ainsi soit-elle accomplie & faite en terre : de sorte que nous la suiuiions trestous, avec vne grande ferueur de cœur , par les hon-

1. Cor.
6.

neurs, & par les deshonneurs aussi, par l'infamie, & par le bon renom, par l'aduersité & par la prosperité, reiettant toutes les autres volonte & respects, qui ne sont pas selon vous, & pour vous : attendu que vous estes seul nostre Dieu, vous seul par excellence estes nostre Pere, vous seul estes le Roy des Roys, & le Seigneur des Seigneurs, & à vous pour ceste cause est deuë souueraine obeïssance, parfaicte reuerence, & perpetuelle gloire, avec eternelle louange, Amen.

MEDITATION V.

Donne nous aujourd'huy nostre pain quotidian.

ON void bien, Seigneur, que vous auez esté le maistre de ceste parfaite oraison, puis que toutes ces demandes viennent si bien à propos l'une apres l'autre. Quelle chose doiuent desirer d'auantage les enfans, que l'honneur de leurs peres, la prosperité de leur Royaume, & l'obseruance de leur volonté? C'est pareillement vne chose fort familiere & propre aux enfans (principalement quand ils sont petits) de demander du pain à leur pere. Ceste parole est redite & repliquée bien

souuent par eux, principalement quand ils ont faim : car ils font lors ceste demande avec vne voix pitoyable , par laquelle ils esmeuent les entrailles du pere , & luy font departir le pain.

A raison dequoy , Pere celeste , moy comme l'un de vos enfans , grand quant à l'aage : mais petit quant aux merites , me sentant trauaillé de la faim , & de quelques autres miennes necessitez : ie vous demande du pain avec la hardiesse que les enfans ont : c'est à dire , ie vous requiers & demande l'entretienement de ceste vie que vous m'avez donnée. Et pourtant , qu'en moy il y a deux substances ; l'une corporelle , l'autre spirituelle : pour ceste cause , ie vous demande du pain pour l'une & pour l'autre. Pour la corporelle , ie vous demande le pain terrestre ; & pour la spirituelle , ie vous demande le pain du Ciel , qui est le pain des Anges , lesquels comme creatures spirituelles ne vivent point d'autre nourriture que de vous , qui estes la pasture des substances spirituelles. Et par ainsi , mon Pere , moy qui l'espace de quelque temps ay demeuré en Egypte parmy les pots & marmites puantes pleines de chair des

delices du monde , mesprisant desormais
 ceste viande bestiale , ie souspire pour
 auoir du pain des Anges qui vient du Ciel.
 C'est ce que ie cherche , c'est ce que ie
 veux, c'est ce que ie vous demande hum-
 blement : O grace inestimable , ô miseri-
 corde inouïe , le Dieu des Dieux , le Sei-
 gneur des Seigneurs , le loyer des Saints,
 la ioye des Anges , le Verbe du Pere , la
 Sapience eternelle , la Lumiere du mon-
 de, le Soleil du Ciel est deuenu ma viande
 & ma nourriture.

Quelle chose puis-je dauantage desi-
 rer, ou priser' dauantage? Qu'il n'aduien-
 ne donc point que ie me delecte aux cho-
 ses du monde; puis que i'ay trouué vne
 viande si precieuse, delectable & salutai-
 re , laquelle puis que ie ne la puis pas
 tousiours receuoir sacramentellement : ie
 la deuerois au moins receuoir tousiours spi-
 rituellement , logeant mon esprit en elle
 par amour , & par vne continuelle souue-
 nance. Veritablement c'est vne grande
 merueille, que le cœur humain ne s'esclat-
 te pour la douceur & grande suauité qui est
 en ceste viande: Mais puis que , ô bon Ie-
 sus, vous estes fait ma viande & ma refe-
 ction , ie vous veux manger vous seul , &

44 PARADIS DES PRIÈRES,

veux auoir faim de vous seul avec vn desir insatiable. Car si vostre odeur seulement est suffisante pour maintenir tout le monde; combien plus le sera vostre refection? Si nous viuons tous par la parole de vostre bouche, & en sommes sustentez: combien plus viuront les ames par la refection sacramentelle de vostre corps?

Mais comment est-il possible Seigneur, que nos cœurs ne rompent en vostre presence? Comment est-ce que mon ame ne prend tant de plaisir en vous, qu'elle ne se souuienne plus de soy-mesme, ny de chose du monde pour l'amour de vous? Si les choses terrestres, voire mesme par fois leur seule image & figure m'occupent si fort le cœur, qu'elles me font oublier moy mesme: comment ne se saisira de moy vostre royale presence de telle sorte, qu'elle me fasse oublier entierement le monde pour vostre amour? Et partant, Pere celeste, donnez nous aujourd'huy ce pain, afin que nous le possedions maintenant & toujours: Souuenez vous Seigneur, que vostre fils appelle ce pain, pain de chaque iour, & nous commande de le demander aujourd'huy.

Dites moy, bon Iesus, pourquoy desi-

rez-vous tant d'estre avec nous, que vous nous commandiez de faire nostre demande aujourd'huy, & ne voulez pas attendre iusques à demain? quelle chose auez-vous apperceuë en nous pour laquelle vous soyez si plein de nostre amour, que vous ne voulez pas attendre vn seul iour? Si l'amour que vous nous portez vous contraint si fort, que vous ne voulez pas prolonger tant soit peu vostre venue, mais soudain vous desirez vous retrouver avec nous, iacoit que vous ne gagniez rien à cecy: combien deurions-nous estre plus soigneux: nous dis-ie, qui sommes vne vermine contemptible, & qui gagnons tant à cecy, de nous ioindre avec vous nostre souuerain bien, miroir sans tache, resiouissance des Anges? Et puis que vous bon Iesus, comme vous demostrez icy, ne voulez pas prolonger cét affaire, encores moins le voulons-nous prolonger.

Et puis que vous nous commandez que nous demandions, non pas pour vn autre iour; mais pour aujourd'huy, nous vous demandons pour aujourd'huy ceste grace, & l'esperons obtenir ce iourd'huy: car autrement ceste doctrine icy que vous nous

46 PARADIS DES PRIÈRES,
donnez n'auroit point de consequence, si
commandant de faire pour aujourd'huy
nostre demande, nous ne la pouuions pas
obtenir. Parquoy, puis que nous desirons
de vous posséder presentement, & vous
auez le mesme desir, venez & entrez pre-
sentement en nos cœurs.

Vous estes tout enflammé de nostre
amour, Seigneur, & nostre cœur brusle
parcillement pour le vostre. Et veu que le
poids de l'amour vous conduit à nous, &
nous transporte à vous, faites Seigneur,
que cessant tout empeschement, mon ame
vous embrasse avec vn si grand amour,
qu'elle s'amoindrisse & se fonde parmy
vos embrassemens; à raison du grand goust
de vostre ineffable douceur & suauité. Et
puis qu'il vous plaist que nous vous de-
mandions chaque iour: pource que vous
estes content d'estre sans cesse avec nous,
nous sommes aussi contens d'estre avec
vous, & ne nous despartir iamais de vous,
qui estes la viande tres-suaue, & l'Espoux
tres-doux des ames pures. Amen.

MEDITATION VI.

*Et nous remettez nos debtes , tout ainsi que
nous les remettons à nos debiteurs.*

O BON IESVS , iàçoit que benigne-
ment & avec grande instance vous
vous offriez à nous en ce pain iournalier , ie
crains toutesfois de m'approcher de vous.
Ie crains le banquet de la Royne Hester, *Esther.*
de peur qu'il ne m'aduienne ce qu'il suruint 7.
à Aman , lequel ayant esté inuité par elle à
son banquet , fut peu apres pendu pour ses
crimes : Mais encores bien mon Seigneur ,
que ce ne soit pas vostre intention , ce
neantmoins ie crains ma disposition
mauuaise , pour cause de la multitude
de mes pechez qui se sont multipliez plus
que l'arene de la mer. Car qui pourra ia-
mais conter la multitude de mes vai-
nes pensées , de mes mauuaisés œu-
ures , & de mes paroles desordonnées,
puis qu'à peine les iustes sçauent refre-
ner leur langue ? Mais qui pourra com-
pter les pechez de mes transgressions &
negligences ? que feray-je donc , mon
Seigneur en ce conflict ? Ie voy que
d'une part vous m'inuitez à vostre table,

48 PARADIS DES PRIERES,
les Anges m'y appellent, & la faim me
contraint de la desirer, mais ie sens d'au-
tre part la multitude de mes pechez qui me
retire, & me fait perdre courage; Mais
puis que vous me donnez licence de vous
appeller Pere, i'iray à vous avec vne re-
pentance & cœur de fils, & vous deman-
deray pardon de mes pechez, lesquels ie
nomme debtes à iuste raison.

Car celuy qui desrobe ce qui appartient
à vn autre, est son debteur: & nous avec
tout ce que nous auons estans vostres, de-
uons employer chasque chose à vostre ser-
uice (ce que tant s'en faut, que nous ayons
fait, que mesme nous vous auons offensé
en chasque chose:) il appert clairement
que nous vous sommes debteurs du serui-
ce & honneur que nous vous refusons.
Pardonnez nous donc Seigneur, ces deb-
tes, puis que vous commandez que nous
vous en demandions pardon.

O merueilleuse clemence de nostre
Dieu: apres qu'il a esté mesprisé par nous,
& postposé à des choses si basses & viles, il
nous commande luy mesme avec tout ce-
la, que nous luy demandions pardon, &
luy estant offensé nous presente la paix. Il
n'a pas fait ceste misericorde aux Anges
qui

qui pecherent ; car ils demeurent & demeureront perpetuellement en leur iniquité. Mais vous , Seigneur , ayant eu vne satisfaction si grande de nos debtes, comme est le sang de vostre Fils unique , nous commandez que nous vous demandions pardon : pardonnez-nous toutes nos offences , comme nous les pardonnons à ceux qui nous ont offensé.

O bien-heureuses offences , ô heureuse debte , laquelle apres auoir esté pardonnée & remise , merite d'estre alleguée au iugement de Dieu pour nostre pardon. Raison dequoy nous ne deuons pas nous contrister , lors que les hommes nous offensent , nous persecutent, & nous font du mal , ains nous deurions nous en resiouir & desirer choses telles, pource que pardonnant ces offences, nous pouuons obtenir plus facilement pardon des offences que nous faisons à Dieu. Et ne faut pas douter , ains nous deuons tenir pour certain , que ceste allegation que nostre iuge & aduocat nous enseigne , est de tres-grande importance deuant luy. C'est pourquoy le Roy Dauid supportoit de bonne volonté tou-

50 PARADIS DES PRIERES,
tes les mauuaises paroles & iniures de Se-
mei, qui le maudioit; car il sçauoit bien
que cecy luy seruoit pour se reconcilier
auec Dieu. Amen.

M E D I T A T I O N
D E R N I E R E.

*Et ne nous induy point en tentation, mais
deliure nous du mal, Amen.*

QVe me seruira, Seigneur, de sortir
des vieilles debtes, si i'en retourne
faire de nouuelles? que me sert-il de me
lauer pour auoir touché vn mort, si for-
tant de me lauer ie le retourne toucher?
Partant, Seigneur, si vous permettez que
nous soyons tentez pour nostre humilité
& pour nostre exercice, & pour nostre
patience, & pour nostre couronne, & fina-
lement afin que nous voyans affligez,
nous recourions à vous comme à nostre
Pere: ne permettez pas au moins que
nous soyons vaincus en tentation. No-
stre fragilité est si grande, que nous ne
pouons pas nous garder de cheoir
sans vostre grace: apres la reception de

laquelle nous ne pouuons pas perseuerer sans vostre aide particuliere, attendu que nous voyons la grace estre concedée à plusieurs, mais non pas la perseuerance à tous.

Vous voyez les contradictions, & les ennemis que nous auons. La chair est vn ennemy domestique, continuel & familier : le monde est trompeur, abuseur, & traistre ; le diable est cruel, fort rusé, & bien excité à combattre. Or me retrouvant parmy les escadrons de tant d'ennemis parmy tant de partisans de nostre chair, & parmy tant de persecuteurs de l'esprit, que fera-ce de moy, Seigneur, si vous vous en esloignez ? que fera vne pauvre brebis parmy tant de loups, vne creature si foible parmy tant d'espées ennemies ? Que dois-je faire Seigneur ? Je ne trouue autre recours, sinon m'escrier à vous, comme le fils de l'arondelle, & gemir & soupirer comme la colombe. Que dois-je faire, sinon esleuer les yeux aux montaignes, d'où le secours me viendra ?

I'esleue donc mes yeux à vous qui habitez és Cieux, i'esleue mon ame à vous, mon Dieu, i'espere en vous : ne vueillez

52 PARADIS DES PRIERES,

pas faire que ie reste confus , soyez attentif à mon aide , Seigneur , & ne tardez point à me secourir. Iusques à quand ne vous souuiendrez-vous point de moy ? iusques à quand destournerez-vous vostre face de moy ? iusques à quand triompheront de moy mes ennemis ? Quel est le nombre des iours , qui restent à vostre seruiteur ? Quand ferez-vous iustice de ceux qui me persecutent ? Quand me verray-je entierement deliuré d'eux pour venir à vous ? Quand sera-ce que personne ne me pourra esloigner de vous ? Quand seray-je mort à toutes les choses du monde , & à moy-mesme pour m'enfuir vers vous ? Quand mettray-je en oubly toutes choses pour tous mes sens , & toutes mes pensées fichées en vous ? Quand sera-ce que toute chose me semblera vile & nuisible , excepté vous ? Quand seray-je tout vostre du consentement de ma volonté , puis que ie le suis de droict & par iustice ?

Pf. 69.
Pf. 112.

Pf. 118.

O Pere de misericorde , & Dieu de toute consolation ; faiçtes moy ceste grace que ie meure à tous mes appetits , & meure encor à moy-mesme , & à tous mes ennemis , & viue seulement

à vous & pour vous. O Pere, ô Roy, ô Seigneur, ô mon souuerain bien, ô centre de mon ame, faictes que i'habite en vous, que ie repose en vous, & que ie n'aye autre gloire ou thresor que vous seulement. Nous vous demandons toutes ces graces, pour l'amour de vostre Fils vnique, qui est nostre Aduocat, nostre Prestre, & nostre Sacrifice, deuant vous. Car nous n'auons pas la hardiesse de faire nos demandes, nous confiant en nostre iustice, comme dit le Prophe- te : mais nous esperons seulement en la grandeur de vostre misericorde, & es merites de vostre Fils nostre Seigneur, puis que tout ce qu'il a faict & souffert en ce monde, a esté pour l'amour de nous, parquoy nous vous demandons par luy, qu'il vous plaise nous faire la grace, que nous soyons deliurez & secourus.

Vous auez créé par iceluy toutes choses, & les auez recourées par son moyen, lors qu'elles estoient perduës. Par luy vous auez créé l'homme à vostre Image & semblance, & luy auez rendu par son moyen la mesme image. Il est le fondement de nostre iustice, la

54 PARADIS DES PRIERES,
cause de nos merites , l'intercesseur de
nos oraisons , l'aduocat de nos causes, &
le principal appuy de nostre esperance.
Au moyen dequoy nous vous deman-
dons pour l'amour de luy toutes ces gra-
ces ; puis que ce qui n'est pas deu à no-
stre iustice , est deu à sa grace. Si vous
ne trouuez à considerer en nous , rien
de bon , en luy vous ne trouuerez rien
de mauuais. Si de nostre costé les meri-
tes nous defaillent , voyez de son costé
comme ils nous aduancent. Et partant,
nous vous demandons pour l'amour de
luy , nous vous supplions par luy , qu'il
vous plaise l'honorer en nous ; car ce que
vous nous donnez , vous le donnez
à luy , & tout ce qui est donné aux mem-
bres , est donné au chef duquel ils sont
les mebres. Et si de nostre costé nous
n'auons rien à vous offrir , pour ne com-
paroistre pas vuides en vostre presence,
nous le vous presenterons avec tous les
trauaux , & seruices qu'il vous a faicts
depuis la Creche iusques à la Croix,
puis que nous en sommes participans.
De maniere que nous venons en a-
uant & nous presentons avec ces asseu-
rances , & avec telles oraisons , & vous

CHAPITRE I. 55

demandons misericorde par iustice, si vous auez esgard à vostre fils; & humblement misericorde, si vous auez esgard à nous. Mais sur tout, Pere eternal, confidez que nous venons de la part de vostre fils, lequel nous a commandé que nous demandions en son nom, & nous a donné des paroles intelligibles & conuës: à sçauoir celles que nous auons prononcées. Reconnoissez-les, Seigneur; car ce sont les paroles de vostre fils, lequel par icelles procure & pourchasse nostre remede.

Souuenez-vous que quand cette sage ^{2. Reg. 14.} Dame de Tecua, demanda pardon au Roy Dauid pour Absalon fils du mesme Dauid, aussi tost qu'il entendit que ceste demande auoit esté ordonnée par Ioab, Capitaine general de son armée, il s'appaïsa, & accorda tout ce qui luy fut demandé: à raison dequoy le mesme Ioab le remercia, confessant que cette grace estoit faicte à luy, & non à la Dame qui la demandoit. Ainsi moy, Seigneur, ie suis enuoyé icy par vostre Fils vnique, c'est luy, qui m'a mis ces paroles en la bouche, afin que ie les vous dise; c'est luy qui vous le demande pour moy; ce que

56 PARADIS DES PRIERES,
vous me concedez , vous le concedez
à luy , & il vous en rendra graces eter-
nelles.

Souuenez-vous encor , Seigneur , que
vous ne condamnaſtes pas , ains loüaſtes
le mauuais meſnager & diſpensateur de
vos biens , pour autant qu'il ſ'auoit pour-
chaffé des amis qui le ſecouruſſent , &
& le retiraffent en leurs maiſons au be-
ſoin. Et c'eſt pourquoy pareillement ,
moy qui ſuis la plus pauvre de toutes les
creatures , & qui ay le plus mal employé
voſtre bien , ie taſche de m'accoster de
voſtre Fils , pour me preualoir de luy ,
aſin qu'eſtant ſi pauvre & deſnué de me-
rites , ie ſois ſecouru & aidé par les ſiens.
Et pource qu'il nous importe tant de ne
comparoître point en voſtre preſence ,
& deuant voſtre face , ſans noſtre frere
ſpirituel Benjamin : (c'eſt à dire voſtre
Fils vnique) Voyez , nous l'auons icy , &
le preſentons deuant vous , aſin que par
ſon moyen nous ſoyons benignement
exaucez.

Et vous vnique Fils de Dieu , qui eſtes
ſemblablement Fils de l'homme : eſten-
dez ſur nous voſtre bras , puis que vous
eſtes noſtre protecteur , & couurez de

vostre manteau nostre nudité & pauvreté , & ne vueillez pas priuer de vostre grace ceux que vous auez faits compagnons & freres de vostre nature. Qui vivez & regnez avec le Pere , & le saint Esprit , és siecles des siecles , Amen.



MEDITATION
SVR LA SALVTATION
ANGELIQUE.





DEVOTE MEDITATION

DE S. BONAVENTURE,

sur l' AVE MARIA.

Je te saluë Marie pleine de grace.

IE vous rends graces, Seigneur mon Dieu, telles que ie puis, & du plus profond de mon cœur de ce qu'il vous a pleu, pour l'amour de nous (indignes que nous sommes) prendre nostre nature, & estre porté dans le ventre virginal, & naissant d'une Vierge estre nourry de son saint lait, vous reposer en son giron, & vous soubmettre à son obeïssance: Vous dis-je, qui conseruez toutes choses & les gouvernez, m'avez (qui ne suis que sale & orde bouë & detestable vilennie, plein d'abomination, voire indigne de la vie & de l'estre que m'avez donné) voulu de vostre grace, tât illustrer, que de me faire sca-voir & connoistre que vous avez vne mere, outre cela m'avez donné licence, combien que i'en sois indigne, de la pou-voir & oser saluër: faueur que n'avez ellar-

60 PARADIS DES PRIERES,
gie à tout le monde, ny leur auez manifesté ce souverain benefice. Et où est, Seigneur, ce peuple particulier, que d'une dextre puissante, & d'un bras estendu, vous tirastes d'Egypte, & le conduisistes par les deserts, en la terre que vous leur auez promise, avec tant de signes & de prodiges admirables de vostre magnificence? N'est-ce pas cestuy peuple à qui vous auez promis un benefice? Pourquoi donc n'avez-vous pas réservé ce souverain & grand benefice à ceux qui vous reue-roient & seruoient selon la loy à eux donnée, mais à nous idolatres & infideles? Pourquoi à nous si peu en nombre, veu que tant de peuples & presque infinis, n'en ont pas la connoissance? N'estes-vous pas Seigneur & Createur de toutes choses, & n'avez vous pas fait à vostre image & semblance tous les humains? N'a-on pas de coustume, Seigneur Dieu, de manifester ses secrets à ses amis? Pourquoi d'oc maintenant les communiquez vous à vos ennemis, & singulierement à moy qui suis tout infect depuis le sommet de la teste iusques à la plante des pieds, & ne tends à autre chose, qu'à ce qui est contraire à vostre volonté? Pourquoi ô mon Dieu, auez

vous eslargy vn don si noble, & vn thresor si excellent à vostre infidele & tres-meschant seruiteur ? Ne vous semble-il pas que ie deshonore vostre mere, ou plustost que ie me mocque d'elle, quand ie presume orgueilleux que ie suis : mais pour mieux dire au vray, tres-orgueilleux, saluër celle qui est tres-humble, moy pauvre, remply de vanité, & ne sauourant rien que la terre; celle qui est toute celeste & diuine, le tres-immonde, celle qui est tres-chaste; l'impie, celle qui est tres-saincte: & l'enfant du diable, la mere de Dieu ? Où est maintenant (ô debonnaire Seigneur) la reuerence & le respect deu à vostre mere ? Pourquoy permettez-vous telles gens la saluër ? Mais (ô bon Iesus) il ne vous a esté assez pour la grande & excessiue charité & amour que vous nous auez porté, de vous seruir à nostre occasion, à toute derision & contemnement : mais encores vous endurez, que vostre mere, laquelle maintenant se sied à vostre dextre, est traitée avec des lévres ordes & sales, afin que par quelque moyen vous puissiez enflammer nos cœurs de vostre amour & du sien : Et ne faut point douter que nous ne soyōs tres-indignes de le faire : & croy ferme-

62 PARADIS DES PRIERES,

ment qu'il n'y a Ange au Ciel qui la puisse saluer, comme elle le merite : Combien plus, creature tres-vile que ie suis, en feray-je trouué indigne ? C'est vne chose merueilleuse, comme l'homme miserable ne tremble, & ne s'espouuante, quand il vient à saluer vne si grande Dame. Car il parle en icelle à la mere de Dieu : & là il y contemple comme Dieu a esté fait homme en elle. Là il voit comme les choses souueraines, à son occasion, ont esté conjointes en vnité, aux basses, & les choses inferieures, avec les superieures. Comment ie vous prie nostre esprit ne se liquefie-il en la douceur de ceste salutation, là où nous descouurons Dieu nous auoir tant aimé, qu'il a bien voulu estre fait nostre frere dès le ventre virginal ? car il est nostre os & nostre chair. O merueilleuse & ineffable diffusion de la diuine bonté. De quelle deuotion, ie vous prie, deuroit estre espris nostre cœur enuers vne telle & si digne Vierge, par laquelle auons mérité que la diuinité s'est diffusée en nous, voire mesme par son moyen, nous a rendu dignes d'estre les freres de Dieu, & ses coheritiers en son Royaume ? Nostre bouche deuroit estre toute confite de

douceur merueilleuse, quand nous venons à saluër cette tant douce & benigne Dame: & lors que nous benissons le fruit de son ventre, car son fruit est tres-doux & tres-suaue. Il apporte vne singuliere douceur en la bouche & au cœur du sage: ô que merueilleuse est la fecondité de cette Vierge, laquelle fait écouler vn fruit tant doux, dedans le cœur de celuy qui deuotement la saluë: Et d'autant plus qu'il prendra de plaisir & de saueur en ce fruit, d'autant plus amplement & en abondance luy en fera-il donné, & s'il ne dit c'est assez, iamais ne cessera de le communiquer de plus en plus. O Dame n'ompareille, c'est bien merueille, comme nous ne nous delectons tant à vous saluër, que pour l'amour de vous nous mettrions en oubly toute autre chose. Mais comment (ô vous qui doucement rauissez & absorbez les cœurs) se peut-il faire, que l'homme ayant senty la grande suauité qui est en vous, n'a tellement ses affections colloquées en vous, que tout trāsporté hors de soy, il ne sente point quel il est? Mais d'où vient que vous estes si desiruse de nous rendre affectionnez enuers vous, tant soigneuse de nous engendrer en nostre Dieu? Pourquoi voulez

64 PARADIS DES PRIERES,
vous remplir de fiante les Cieux , & rendre tous diuins ceux qui ne sont que pure vanité ? Pourquoy, de grace, nous enyurez vous ainsi de l'amour de vostre fils, veu que nous ne vous pouuons rien donner digne de vous ? Quel bien vous en peut-il venir ? O amoureuse des ames, ne trouuez pas estrange si nous vous aimons d'un amour extreme ? les choses celestes ne vous sont-elles pas assez ? pourquoy cherchez vous des cœurs terriens, veu qu'ils sont tant puants & abominables ? Receuez-les de grace, ô venatrice des ames, & les rechauffez dedans le sein de vostre grace. Et qui est celuy qui se pourra soustraire de la splendeur de vostre clarté des rayons de vostre pieté ? Personne à la verité, ne se peut retirer de vostre Amour, d'autant que les Cieux & la terre sont pleins de vos benefices. De quelque costé que nous allions, incontinent s'offre à nos yeux celuy qui s'est diffus dedans vostre ventre virginal. Voila donc, comme vous nous auez enchainez de vos bien-faits, & auez tendu les lacs de vostre benignité de toutes parts, afin de nous oster toute occasion de fuir de vous, ains que tousiours nous puissions reposer dedans le giron de
vostre

vostre douceur. Maintenant donc , mes freres , de tous endroits , accourez avec moy pour saluër tous d'une mesme affection cette tant gracieuse & tant noble Vierge, en luy disant AVE : Mais vous, ô VIERGE SACREE , prenez de bonne part, si moy, qui ne vis pas Angeliquement: mais diaboliquement ie presume vous offrir la salutation quel' Ange vous presenta: Qui suis horrible & detestable , & neantmoins ie presume vous saluër. I'ay confiance nonobstant , ô tres-douce Vierge, en vostre tres-grande bonté, & enflammé de vostre amour, ie n'auray point de honte, combien que i'en sois tres-indigne, de vous saluër : Je vous saluë donc. Et qui a-il, qui plus doux me soit que vostre AVE ; ô merueilleux AVE, lequel enyure de ie ne sçay quelle douceur celeste le cœur de ses deuotieux ? Certes toute personne qui se mette en deuoir de vous deuotement saluer , peut bien dire , mon ame s'est liquesfiée & coulée en moy , si tost que ie me suis mis à saluer ma benigne Dame, le cœur me defaut , & la chair , quand ie parle à elle. Et qui est l'homme qui ne faudroit en vous ; Vierge sacrée, quand il considere qu'au seul message de ceste sain-

66 PARADIS DES PRIERES,
Ôte salutation , vous deuintes tout à l'in-
stant grosse du Fils de Dieu? Qui est celuy,
qui ne se pafme d'admiration , quand il voit
le Fils de Dieu estre porté dedans vos
flancs , & nourry de vostre precieux lait?
Quelle chose pouuez-vous ouïr plus vo-
lontiers , que cette diuine salutation , par
laquelle vous estes reconneuë & aduoüée
pour mere de Dieu? Et certes vous vou-
lez que les hommes se resioüissent en
vous , de sorte que leur affection se trans-
mette à celuy dont vous estes mere ; car
ie ne pense pas que vous vueillez estre au-
trement salüée, ny reconneuë , que sous
le tiltre de mere de Dieu. Vous estes la
porte Cristaline, & vous voulez que nous
soyons ioincts par vous à vostre cher en-
fant: Ie vous saluë donc, du vray AVE.
Car c'est cettuy AVE, qui a ouuert nostre
cœur. O admirable, & sur-admirable AVE,
par lequel les demons sont mis en fuite,
les pecheurs mis en liberté, les enfans ré-
jouis, les Anges remplis de lieffe, le Verbe
Diuin incarné, & la Vierge sans aucune le-
sion de sa virginité rendue enceinte. AVE,
dis-je, par le fruiet duquel , la creature rai-
sonnable est regenerée , les hommes ra-
chetez , & l'ordre Angelique réparé &

remply en ses sieges vuides. Que toute creature donc , sans intermission , vous presente & offre sans fin cét AVE , cette douce & suaue salutation , laquelle donne ließe aux choses terrestres , & remplit d'une ioye inenarrable les celestes. AVE , qui d'un clair rayon illumine tout entendement , rassasie nos affections , esleue nos pensées , illustre nos esprits , adoucit nos cœurs , dompte & macere l'insolence de nostre chair. AVE donc : O AVE , qui comme d'une chaisne , estrains estroitement nostre cœur avec la sacrée Vierge , & le separe des choses terrestres & caduques : & qui lie les pauvres miserables d'un tres-ferme lien avec la mere de misericorde , l'esclaue avec sa dame & maistresse , & le fils semblablement avec la mere. O aimable AVE , Que celuy approche pour vous saluër , qui desire estre prins dans les liens de vostre amour ; car s'il vous saluë de cœur & d'affection , de tant plus estroitement se trouuera-il enchainné & aggraphé de vostre amour. Et d'autant plus qu'il se trouuera estraint , d'autant plus librement il vous saluëra : De maniere que l'amour & l'AVE ensemble s'accroi-

stront reciproquement , iusques à tant
que le cœur du salüant vienne à defaillir,
pour la grande douceur qu'il sentira. O
amour virginal, vous rendez diuin celuy
que vous possédez, & tout vierge celuy
qui estoit tout pollü & souillé d'ordure.
Ie vous salüe donc, ma maistresse, ma me-
re, voire mon cœur & mon ame: O Vier-
ge Marie, ô matres-aimée, Marie, ô tou-
te mienne, ie vous salüe: O nom tres-
suaue, nom tres-plaisant, nom tres-doux,
nom de Marie: Qu'ay-je fait? Quelle
presomption, quel excez est-ce là, que d'o-
ser vous nommer? Qui a iamais oüy telle
chose? Qu'un enfant perdu, qu'un sac
de pechez, qu'un ministre du diable soit
si presomptueux, que de vous nom-
mer? O amour de moy-mesme: C'est
cét amour, qui ne sçait reuerer comme
il faut le nom de la mere de Dieu: Par-
donnez moy, maistresse, de ce que i'ose
dire que ie vous aime: Car combien que
ie sois indigne de colloquer mon amour
en si haut lieu, vous n'estes indigne pour
cela d'estre aimée. Et qui est celuy, sain-
cte dame, qui voudra desister de vous
aimer, veu que par le moyen de vos bien-
faits nous obtenons grace & gloire?

Par vous sont rompus nos liens , par vous remises nos debtes ; nous vainquons le vice , les choses rompües sont resouldées , retrouué ce qui estoit perdu , les choses vieilles renouvelées , les choses foibles renforcées , ce qui estoit petit magnifié & aggrandi : ce qui estoit bas esleué , nos commencemens auancez & promeuz : ce qui est imparfaict mis à perfection , & ce qui est parfaict conduit iusqu'à sa fin , le cœur purgé , l'entendement illuminé , l'esprit enflammé , l'ame liquefiée & amollie , le goust remply de douceur , nostre face embellie , l'estrangere est prise à espouse , & menée à la maison de l'espoux : & l'ame est mise en liberté , tout cela est fait par vostre moyen , ô Vierge Marie. Je voue salué donc , ô Marie , vrayement Marie estes vous : car vous estes l'estoille de la mer , vous estes la mere amere , & aussi vous estes nostre souueraine dame & maistresse : estoille de mer , pour autant que vous auez produit au monde , constitué en amertume , & plongé és tenebres , le rayon d'eternelle lumiere : mere amere , lors que vostre cœur fut transformé en amere douleur , en la possession de vostre

70 PARADIS DES PRIÈRES,
Fils, pendant en Croix pour nous, dame & maistresse, quand vous auez esté esleuée par dessus les chœurs des Anges, iusqu'à la dextre de vostre Fils, au dessus de tous les Angeliques ordres. Estoille de mer, derechef, pource que vous nous dressez & conduisez en toutes nos voyes : mer amere, lors que vous auez pitié & compassion de nous ; & dame & maistresse, en ce que vous nous prenez sous vostre protection. Vous estes l'estoille de mer, à raison de vostre modestie & honnesteté : Mere amere pour vostre pieté, & Dame à cause de la puissance que vous auez. O Seigneur, que vous pouuons-nous retribuer pour tout ce qu'il vous a pleu nous donner ? Que vous ferons-nous, ou que pouuons-nous faire, de ce qu'il vous a pleu nous donner & octroyer vn si pitoyable secours, vn si excellent reconfort, vne assistance si gracieuse, vne ayde de telle efficace que la Vierge Marie, estoille lumineuse & resplandissante ? à nous, dis-je, qui sommes reduicts en l'amertume, environnez de toutes parts de tenebres espoisses, qui sommes tant esloignez du port de salut, agitez d'orages & furieux tourbillons, iuf-

qu'à faire naufrage, voire sur le point d'estre engloutis dans la tourmente? Certes bien-heureuse se peut dire la nuit, & bien fortunées les tenebres, & glorieuse l'obscurité, qui ont merité d'estre esclairées d'une estoille si admirable. Et certes ie tiens cette nuit-là pour mon illumination en mes delices. O Vierge glorieuse, si vous estes estoille de mer; ie veux tousiours tandis que ie seray en cette vie estre en la mer, afin que vous soyez mon estoille à tousiours, & que ie sois en la mer de parfaicte amaritude, tousiours gemissant pour mes pechez intimement, compatissant à Iesus Christ crucifié, & m'affligeant pour les miseres & les vices de mes prochains. Ie veux donc tousiours, & sans cesse nauiger en cette triple mer, afin que i'aye cette estoille pour ma conduite: Malheur sur ceux qui viuent en delices, & ne veulent point entrer en cette mer; car ils seront priuez de la clarté de cette belle estoille. Que de toutes parts viennent sur moy les tribulations de ce monde, pour m'inuestir d'amertumes non ouïes: certes ie ne craindray point tout cela, pour ce qu'estes

72 PARADIS DES PRIERES,
avec moy. Mais qui plus est , c'est lors
vrayement que vous me luisez & esclairez
dauantage de vostre grace ; lors , dis-je,
que ie suis oppressé d'angoisses , & desti-
tué de tout aide & secours humain , voi-
re lors que les eaux seront entrées iusques
au plus profond de mon ame , & que ie
seray le plus méprisé , honni & reprou-
ué de toutes creatures. Que toute la ma-
chine du monde s'esleue contre moy mi-
serable pecheur, digne de tout mal & pu-
nition tant qu'elle voudra, ie ne m'en don-
neray point de peine , pourueu que ce-
ste estoille de mer Marie, soit avec moy :
heureux moy , & trop plus qu'heureux,
si estant rejeté d'un chacun , abhorré,
detesté , méprisé , ie suis receu de ceste
estaille de mer, qui reluit consolatiuement
à ceux qui sont constituez en amertume.
O combien doux & delectable doit estre
à nos yeux , de voir ceste celeste lumie-
re ! Quelle heureuse eschange , d'abhor-
rer toute consolation mondaine , & irre-
cuperablement la reietter de soy , pour
ceste tres-luisante estoille de mer : Car
trop mieux vaut la moindre illustration
de ceste estoille , que tous les plaisirs &
contentemens mondains. Qui est-ce donc

qui ne se doive allegrement embarquer en la mer d'amertume , compassion & passion où reluit ceste tant desirée estoille, pour l'adresse des nauigeans ? Il ne faut point que le cœur parfait aye crainte ; car il est du tout impossible de faire naufrage , là où ceste estoille luira , ny aucuns nuages ne se peuuent interposer , sinon à celui qui y consent. O ma singuliere dame & maistresse, vous estes la barque en ceste marine tant perilleuse qui nous porte l'ancre , qui nous tient fermes & assurez , que nous ne donnions à trauers les escueils, le gouuernail qui conduit & dresse la route que nous deuons tenir, le voile qui nous fait aller deuant , & nous sert d'ombrage , l'estoille luisante où regarde & tend nostre aiguille , & qui nous monstre & enseigne le port de salut , & en somme nous conduit & conserue. Qui est-ce donc qui bien volontiers n'entrera en ceste mer de compunction , de compassion & passion , là où vous subuenez & ministrez à tous ? voire afin de parler plus hardiment ; vous estes Marie , qui auez esté faicte Mer amere en la Passion de vostre Fils , & pour la compassion que vous auez eu de nos iniquitez , non que

maintenant vous endurez rien de tristesse ; mais ie considere quel estoit vostre esprit , lors que vous viuiez en cette vie, pres de la Croix. Entrons donc en cette double Mer : à sçauoir , prenant compassion de vostre Fils crucifié , & de vostre cœur percé & navré de ses angoisses & tourmens , nous contristans de nos iniquitez , qui ont esté occasion d'une si precieuse mort , ainsi voulons-nous entrer en vostre cœur , qui a esté faict vne tres-grande, & plus que spacieuse Mer. Qui est celui donc qui volontiers n'entrera en cette mer , afin de pouuoir entrer dedans le cœur de la Vierge ? A la verité ceux-là entrent bien dedans vostre cœur , & demeurent continuellement dans iceluy, qui ruminent continuellement la Passion de vostre Fils : Car il est impossible (ô mere toute bonne) d'entrer dedans les playes de vostre Fils , que l'on n'entre dans vostre cœur, pour ce que ces playes sont perpetuellement empreintes & colloquées dans vostre cœur. Et comme leurs marques & vestiges seront tousiours imprimées au corps de vostre Fils , tout de mesmes seront-elles dedans le cœur de la Mere. Qui est-ce donc qui tardera plus,

& differera de s'embarquer dans cette nef? C'est chose bien douce & pleine de consolation d'ouïr parler de vous, ô Vierge des Vierges: Mais plus douce encore de penser de vous, & tres-douce d'entrer par les playes de Iesus-Christ en vostre cœur. Et pourtant que l'homme ne se retire de la Passion de Iesus-Christ, ny de ses contumelies & opprobres & navreures, s'il ne veut quant & quant sortir de vostre cœur tres-doux & tres-suaue. Car là l'homme deuiant tout virginal, tout saint, tout diuin; là l'homme s'oublie soy-mesme, se ressouuenant de ce qui est de la mere & du fils. Ce que nous octroye par sa sainte grace celuy qui vit & regne és siecles des siecles.

MEDITATION

DEVOTE,

En laquelle est déclaré qu'encores que Dieu soit incomprehensible, si est-ce que l'on apprend quelque chose de luy, par la consideration des œuvres de ses mains.

O Dieu tres-haut & tres-clement, Roy des Roys, & Seigneur des Seigneurs: ô eternelle sapience du Pere, qui assise dessus les Seraphins, penetrez avec la clar-

Louys
de Gre-
nade en
son Ca-
techis-
me.

76 PARADIS DES PRIERES,
té de vostre veüe les abysses , & n'y a
chose quelconque qui ne soit descouuerte
& nüe deuant vos yeux : vous , Seigneur,
qui estes si sage , si puissant , si debonnaire,
& qui aimez tant ce que vous avez créé ;
mais sur tout, l'homme que vous avez ra-
cheté , lequel vous avez fait Seigneur de
tout : inclinez maintenant ces yeux tres-
pitoyables & clemens , ouurez ces oreilles
diuines pour ouïr les clameurs de ce tres-
vil & pauvre pecheur. O Seigneur mon
Dieu , mon ame ne desire & ne souhaite
autre chose plus que de vous aimer : pour
n'y auoir chose quelconque qui vous soit
mieux deüe , ou à moy plus necessaire que
cét amour. Vous m'avez créé , afin que ie
vous aime : vous avez mis & colloqué tou-
te ma felicité en cet amour : vous m'avez
commandé de vous aimer ; vous m'avez
enseigné qu'en cela consiste tout le merite,
l'honnesteté , vertu , la suauité , la liberté ,
la paix , la felicité : & finalement tous au-
tres biens : d'autant que cet amour est vn
petit sommaire , comprenant tout le bien
qui est en la terre , & grande partie de celuy
que nous esperons au Ciel : Vous m'avez
aussi appris , ô mon Sauueur , que ie ne vous
puis aimer si ie ne vous connois , nous ai-

mons naturellement la bonté & la beauté; nous aimons nos peres & meres, & ceux qui nous font du bien: nous aimons nos amis, & ceux avec lesquels nous auons quelque ressemblance & conformité: & finalement toute perfection & bonté, est le blanc & le but de nostre amour. Mais qui me fera la grace, que ie vous connoisse de ceste façon; & que i'entende comme en vous seul, sont toutes les causes & occasions d'amour? Qui est meilleur que vous? qui est plus beau? qui est plus parfait? qui plus pere? plus amy? plus grand & liberal bien-faïcteur? finalement, qui est l'espoux de nos ames? le port de nos desirs? le centre de nos cœurs? Et comment vous connoistray-je, si ie ne vous puis voir? comment pourray-je vous regarder avec des yeux si foibles & debiles, vous estant vne lumiere inaccessible? Mais que fera celuy qui ne peut viure sans vous aimer, & qui ne vous peut aimer sans vous connoistre, puis que vous estes logé en si haut lieu, & si difficile à connoistre? Toute nostre connoissance naist de nos sens, qui sont les portes par lesquelles les images des choses entrent en nos ames, moyennant lesquelles elle les connoist. Vous, Seigneur, estes

78 PARADIS DES PRIERES,
infiny, & ne pouuez entrer par ces si petites portes, & ne pourray former aucune image pour representer chose si haute, comment donc vous connoistray-je; ô tres-haute substance! ô tres-noble essence! ô incomprehensible Majesté! Qui est celuy qui vous connoistra? Toutes les creatures ont leurs natures & vertus finies & limitées, par ce que vous les auez créées de nombre, de poids & mesure, & leur auez marqué les bornes de leur iurisdiction: Mais vous, Seigneur, estes infinny, & n'y a cercle qui vous puisse comprendre. Il n'y a entendement qui puisse arriuer iusques aux premiers riuages de vostre substance, par ce que vous n'en auez nul. Vous estes par dessus tout genre, toute espee, par dessus toute nature créée, d'autant que comme vous ne connoissez point de superieur, aussi n'avez-vous point de iurisdiction limitée. Vous estes eternal en matiere de durée, infinny en vertu & puissance, souuerain en matiere de iurisdiction. Vostre estre n'a pris commencement sous aucun temps, & ne se termine point au monde: Vous estes auant tout temps, & commandez au monde, & hors du monde, par ce que vous nom-

mez les choses qui ne sont point, comme celles qui sont.

Estant donc si grand que vous estes, qui est celuy qui pourra atteindre à vostre connoissance ; Qui est-ce qui pourra connoistre la hauteſſe de vostre nature, puis que nous ne pouuons pas connoistre la petiteſſe & infirmité de la nostre ? Si est-ce neantmoins, mon Dieu, que pour tout cela ie ne puis, ny ne dois deſiſter de cette entrepriſe, bien qu'elle ſoit ſi haute, par ce que ie ne puis, ny ne deſire de viure ſans cette connoissance, qui eſt le principe de vostre amour. Ie ſuis de trop courte veuë pour vous connoistre, mais à cette cauſe la grace m'aidera au deſaut de la nature. Il n'y a point d'autre ſageſſe, que vous ſçauoir : il n'y a aucun repos qu'en vous, il n'y a point d'autres delices, que celles qui ſe reçoient en contemplant vostre beauté, encore que ce ſoit par le moyen des creatures. Et encore que tout ce que nous pourrions connoistre de vous ne ſoit que bien peu ; ſi eſt-ce que c'eſt plus de connoistre quelque peu de choses tres-hautes, (bien que ce ſoit avec obſcurité) que de connoistre beaucoup des baſſes avec grãde clarté.

Si nous ne vous connoissons tout, si est-ce que nous en connoissons ce que nous en pourrons, & aimerons tout ce que nous en connoissons: & de cela seul nostre ame demeurera contente, comme le passereau se contente de ce qu'il puise aues son bec, bien qu'il ne puisse espuiser toute la fontaine. Et d'autant plus, Seigneur, que vostre grace aidera à nostre infirmité, & que si nous commençons à vous aimer quelque peu, vous nous en donnerez pour ce peu d'amour, vn autre beaucoup plus grand, avec plus de connoissance de vostre gloire, ainsi que vous le nous avez promis par vostre Euangile, disant: Si quelqu'un m'aime, mon Pere l'aimera, & ie me decouuriray à luy: qui est luy donner vne plus parfaite connoissance, à ce qu'il s'aduançe tousiours en cét amour.

Nous sommes encores aydez à cét effect, de la sainte foy Catholique, & des saintes Escritures, esquelles vous avez bien voulu: Seigneur, vous donner à connoistre, & de nous reueler les merueilles de vostre grandeur, afin que ceste si haute connoissance caust en nostre volonté l'amour & reuerence de vostre saint Nom. Toutes les creatures encores nous y aydēt,
lesquelles

lesquelles crient à haute voix, que nous vous aimions : & nous enseignent pourquoy nous vous deuons aimer : d'autant qu'en la perfection d'icelles reluit vostre beauté : & en l'usage & seruice que elles nous font, l'amour que vous nous portez. Et ainsi nous incitent de toutes parts à ce que nous vous aimions, tant pour ce que vous estes en vous-mesmes, que pour ce que vous estes enuers nous : Qu'est-ce de tout ce monde visible, Seigneur, sinon vn miroir que vous aués mis deuant nos yeux, afin que nous puissions en iceluy contempler vostre beauté ? Car il est certain que comme au Ciel vous ferez le miroir, auquel nous verrons toutes les creatures, ainsi en cét exil nous seruent-elles de miroir, à ce que nous vous connoissions. Qu'est-ce donc, suyuant cela, de tout ce monde visible, qu'un grand & admirable liure, que vous, Seigneur, auez escrit & offert aux yeux de toutes nations, afin qu'ils estudient en iceluy, & qu'ils connoissent qui vous estes ? Que sont donc toutes les creatures de ce monde si belles & si bien acheuées, sinon comme certaines lettres enluminées, qui declarent apertement la sagesse & l'excellence de l'Autheur ? Que

font-elles sinon des prescheresses des perfections de leur facteur? des tesmoins de sa noblesse? des miroirs de sa beauté? des enonciatoires de sa gloire? des esueilleresses de nostre endormissement, des aiguillons de nostre amour, & des Iuges condannans nostre ingratitude? Et d'autant, Seigneur, que vos perfections estoient infinies, & qu'elles n'eussent nullement peu estre toutes representees par vne seule creature, il a esté necessaire d'en créer plusieurs, à ce que par pieces chacune d'icelles pour sa part nous en declarast quelque chose. De maniere que les belles creatures, preschent vostre beauté: les fortes, vostre force: les grandes, vostre grandeur, les artistielles, vostre sagesse, les reluisantes, vostre clarté; les douces, vostre suauité: les bien ordonnées & disposées, vostre prouidence. O tesmoigné par tant & si fideles tesmoins! Qui est celuy, Seigneur, qui se desferoit de vous auec tant de bons certificateurs & respondans? Qui est celuy qui ne prendra plaisir en la musique si bien accordée de tant & de si douces voix, qui par tant de differences de tons, nous preschent la grandeur de vostre gloire? A la verité, Seigneur, celuy qui n'entend point

telles voix est sourd, celuy qui avec si merueilleux éclairs & splendeurs ne vous void point, est aueugle: celuy qui voyant toutes ces choses ne vous loüe point, est muet: celuy qui avec tant d'argumens & tesmoignages de toutes les creatures, ne connoist la noblesse de son Createur, est priué de sens & d'entendement. Il semble, Seigneur, que tous ces defauts tombent en nous autres: puis qu'entre tant de tesmoignages de vostre grandeur, nous ne vous connoissons point. Nous sommes comme les petits enfans, qui quand on leur montre vn liure où il y ayt quelques lettres enluminées & dorées, prennent grand plaisir à les regarder, & se ioüent d'icelles, sans lire ce qu'elles disent, ny se soucier de ce qu'elles signifient: Ainsi nous plus enfans que les mesmes enfans, ayans deuant nos yeux ce liure si merueilleux de tout l'Vniuers, qui nous est présenté, à ce que par les creatures estans en iceluy, comme par le moyen de certaines lettres viues, nous lisons & connoissons l'excellēce du Createur, qui a fait telles choses: & à la grande amour & affection que nous porte celuy qui les a fait pour nous: nous comme enfans sans entendement, ne faisons que

84 PARADIS DES PRIERES,
prendre plaisir en veüe de si belles choses,
sans nous aduifer de ce que le Seigneur en-
tend nous signifier par icelles. O peruer-
tisseurs des œuures diuines ! ô enfans &
plus qu'enfans, en matiere d'entendement !
ô preuaricateurs & renuerseurs de tous les
desseins & conseils de Dieu. Il y en a (dit
S. Augustin) assez de ceux , Seigneur , qui
se delectent de voir les choses qui nous si-
gnalent & remarquent ; mais qui s'oublent
de considerer ce que par icelles vous leur
voulez signifier & enseigner, qui est la con-
noissance de leur Createur : Ne permettez
donc pas par vostre bonté infinie , ô Sei-
gneur tres-clement & tres-debonnaire, re-
gner en moy vne telle ingratitude & aueu-
glement , ains illuminez mes yeux , à ce
que ie vous voye , ouurez ma bouche , à ce
que ie vous louë : esueillez mon cœur , à ce
que ie vous reconnoisse en toutes les crea-
tures , que ie vous aime, que ie vous adore,
& que ie vous rende les graces que ie vous
dois pour le benefice de toutes icelles : à ce
que ie ne tombe au vice d'ingratitude &
mescognoissance, Amen.



CHAPITRE II.

CONTENANT LES PRIERES

et Oraisons quotidiennes, que l'on pourra faire à certaines heures, tant du iour comme de la nuit.

Admonition pour le matin, & pour l'Oraison suyuant.

LE temps de la nuit & du matin est principalement commode pour vaquer à Prieres & Oraisons. C'est pourquoy le saint Prophete faisoit ceste exhortation à l'ame Chrestienne & deuote. Leue-toy, dit-il, durant la nuit, dès le commencement du iour & des veilles, & estant ainsi leué, espand ton cœur, tout ainsi comme l'eau en la presence du Seigneur: Car c'est alors que toutes les puissances de nostre ame sont plus allaigres & mieux préparées pour executer leurs offices & naturelles fonctions. La veüe est plus nette & clair-

voyante, l'estomac plus leger & mieux disposé, la teste est en meilleur repos par le sommeil, le cœur est libre de toutes imaginations, le temps est plus calme & tranquille; le lieu plus solitaire, sans estre pour lors pertroublé par les visites & salutations des amis. Au matin quand la rosée du Ciel descend sur les fleurs des champs, & arrouse la face de la terre, le benoist S. Esprit a de costume descendre sur ceux, & dans le cœur de ceux qui sont occupez dès le poinct du iour à penser à Dieu, & à mediter les choses diuines: c'est sur ceux-cy qu'il fait distiller la douce pluye & rosée de sa grace. Il est donc bien conuenable & tres-utile de s'occuper plus longtemps en Oraison, & parler avec Dieu au matin, qu'en autre temps de la iournée: c'est au matin principalement qu'il faut traicter avec Dieu, & avec nostre ame des affaires qui concernent & appartiennent à nostre salut.

A cette occasion, nous auons mis en ce lieu l'Oraison suyuante, assez longue de soy: mais elle se pourra abbreger ou estendre encores davantage selon la deuotion & volonté d'un chacun. Elle contient quatre parties, lesquelles sont la souuenance & recordation des benefices receus de Dieu, l'action de graces, l'offrande, & la petition de nouueaux benefices. Si ta deuotion se veut plus amplement dilater en l'action

de graces ; tu pourras dire tout au long le beau
 & deuot Cantique des trois enfans de la four-
 naise Babylonienne : & apres que tu l'auras Dan. 3.
 acheuë, si tu ne te contentes, tu pourras dere-
 chef discourir en la mesme façon par tous les
 Ordres Hierarchiques, Angeliques, par tou-
 tes les bandes & compagnies des Saincts, ou
 en general, ou en particulier : & adionsteras à
 la fin de chacun verset ces paroles : Loüez &
 surhaussez ce Seigneur par tous les siecles : Car
 ces paroles ont vne force & energie admirable :
 elles causent vne douceur ineffable au cœur de
 ceux qui aiment Dieu. En la partie nommée pe-
 tition tu pourras demander & requerir à Dieu
 toutes choses necessaires pour l'vne & l'autre
 vie : à sçauoir, pour la vie temporelle & spiri-
 tuelle. Quant à la premiere & troisieme partie,
 nous en laisserons disposer à vn chacun selon son
 arbitre, deuotion & volonté.

Oraison pour le matin.

MOn Dieu, mon Dieu, à vous ie veil- Grena-
de li. 5.
du Me.
mor. de
la vie
Chre-
stienne.
Psa. 62.
 le dès le point du iour, dit le saint
 Roy & Prophete Dauid, en l'vn de ses
 Psalmes, auquel puis apres il adiouste, di-
 sant : I'ay eu memoire & souuenance de
 vous dessus mon liët : & tous les matins ie
 penseray à vous, par ce que vous m'auiez
 secouru & aidé : Je veux donc, Seigneur,

88 PARADIS DES PRIERES,
ensemble avec ce saint Roy m'esueiller le
matin à bonne heure, & vaquer à vos
louanges. Je veux que cela soit mon pre-
mier affaire, & ma premiere cogitation;
puis que i'y suis particulièrement obligé, &
que cela est la fin, pour laquelle i'ay esté
créé, ayans esté encor à cette mesme fin
créées toutes autres choses: à sçauoir, pour
louër, glorifier, & exalter vostre Nom:
Car vous estes, Seigneur, le principe, & la
fin de toutes choses; principe sans princi-
pe, & fin sans fin. Par ce que tout ainsi
qu'autre que vous n'a eu puissance de les
créer, aussi n'ont-elles peu estre créées
pour autre, que pour vous: c'est à dire, afin
que toutes icelles iouissent de vous, & vous
louassent, & que toutes preschassent vo-
stre gloire.

*La commemoration & denombrement des
benefices de Dieu.*

VOUS estes vniuersel donateur & di-
stributeur de tous biens, puis qu'il n'y
a aucun bien, ny de nature, ny de grace, ny
de corps, ny d'ame, qui n'ait son origine
de vous, qui estes seule fontaine & source
de tous biens. Vous estes vne mer de tou-
tes les perfections, vn abyfme de toutes les

grandeurs, vne infinie profondeur de bonté & miséricorde, image de beauté incomprehensible. Vous estes Dieu des Dieux, & Seigneur des Seigneurs, cause des causes, substance des substances, vie des viuâs, ordre de l'Vniuers, beauté du monde, gloire du Ciel.

Vous estes mon Createur, qui de rien m'avez créé à vostre image & semblance. Vous estes mon conseruateur, qui tousiours me conseruez à ce que ie ne retourne au mesme rien. Vous estes mon Sanctificateur, qui m'exaltez & constituez par grace à vn estre & estat plus grand & plus parfait : & estes mon glorificateur, qui m'avez créé pour vn estre plus haut, qui est l'estre de la gloire. Et outre ce, vous estes mon instigateur, protecteur, défenseur, preseruateur, pasteur, bien-faïcteur, mon Roy, mon Seigneur, mon Pere, l'espoux & centre de mon ame & ma derniere fin, en laquelle consiste toute ma felicité & beatitude, & la derniere perfection de ma vie. Et m'estes tout cela, Seigneur, entant que vous estes Dieu.

Mais entant que vous estes homme, vous estes mon Redempteur, mon Sauueur, mon Libérateur, & (comme dit vostre

Apostre) vous estes ma sapience, ma iustice, ma sanctification, ma redemption, mon sacrifice, mon Agneau, mon Prestre, mon Aduocat, mon Intercesseur, mon Pasteur, mon Maistre, mon exemple, ma force, ma consolation & Medecin vniuersel de mes maux: Car vous auez remedié à mon orgueil par vostre humilité; à mon auarice, par vostre pauureté; à mes delices, par vos douleurs; à mon ire, par vostre benignité; à mon enuie, par vostre charité, à ma gourmandise, par le fiel & vinaigre que vous beustes pour moy: à ma paresse, par les traualx infinis que vous supportastes. Pour moy vous auez ieusné, cheminé & fué; pour moy vous auez veillé, prié & pleuré; pour moy vous fustes en exil; pour moy vous fustes de craché, deshonoré, flagellé, couronné d'espines: Pour moy finalement vous fustes crucifié & affligé plus que tous les hommes du monde.

Action de graces.

TOutes ces choses, Seigneur, sont vos bien-faits & tiltres, par lesquels vous me tenez obligé: & causes, pour lesquelles ie suis tout vostre: & liens, avec lesquels vous me tenez captif, prins & lié: Que vous pourray-je donc, Seigneur, bailler

pour tant de benefices? Avec quoy pourray-je remunerer tant de graces? Car c'est chose certaine, que quand i'auray tous les cœurs de tous les hommes, & qu'avec tous iceux ie vous aimasse; ie ne sçauois seulement satisfaire à la moindre de ces obligations. Comment donc pourray-je satisfaire aux plus grandes, & qui sont en si grand nombre? ou bien pourquoy ne vous donneray-je ce seul cœur, que i'ay pour toutes icelles, vous en deuant tant pour chacune? Que feray-je donc, Seigneur, que feray-je? Je ne puis faire autre chose sinon vous rendre graces infinies, pour l'infinie multitude de tant de benefices: & conuier avec moy toutes creatures du Ciel & de la terre, à ce qu'elles m'aident à vous louer, & à vous rendre les graces que de moy seul ie ne sçauois dignement vous rendre. Je les appelle donc, avec le mesme Cantique que vous chanterét ces trois ieunes enfans en la fournaise de Babylone, disans ainsi: O toutes les œuvres du Seigneur, benissez-le Seigneur: louez-le, & l'exaltez par tous les siècles. O vous Anges du Seigneur, benissez le Seigneur: louez-le, & l'exaltez par tous les siècles. O Cieux benissez le Seigneur: louez-le, & l'exaltez par tous

92 PARADIS DES PRIERES,
les siecles. Que le Seigneur soit benist de
toutes les eaux qui sont sur les Cieux: qu'el-
les le louent & l'exaltent par tous les sie-
cles. Que le Seigneur soit benist de toutes
ces vertus: qu'elles le louent & l'exaltent
par tous les siecles. Que le Soleil & la Lune
benissent le Seigneur, qu'ils le louent &
l'exaltent par tous les siecles. Que toutes
les estoilles benissent le Seigneur, qu'elles
le louent & l'exaltent par tous les siecles:
Que la pluye & la rosée benissent le Sei-
gneur: qu'elles le louent & l'exaltent par
tous les siecles.

Offrande de soy-mesme.

IE ne vous suis pas seulement redeuable
de toutes ces benedictions & loüanges,
attendu que ie suis tout vostre, & vostre par
tant de iustes tiltres & raisons: car en quel-
ques lieux les hommes estans vendus sont
achetez à bien vil prix: & celuy qui est ainsi
vendu, demeure sujet & esclau. de celuy
qui l'a achepté, qui n'en est maistre seule-
ment que pour vn peu de temps, ou pour
le regard de quelque petite partie de ce qui
est sien, ains s'il luy plaist le fait enfermer
en vne chambre, ou demeurer debout
sur vn vaisseau, & aduenant l'occasion, le
bat, le tourmente, & en fait ce qu'il luy

plaist. Si donc ie suis vostre pour tant de raisons : vostre, pour m'auoir créé : vostre, pour m'auoir racheté avec vostre precieux sang : vostre , pour me conseruer en tous les poinçts & momens de ma vie , de telle façon, que ie n'ouure la bouche , ie ne remue la langue , ie ne scaurois mouuoir ny pied ny main, sans vous. Si par tant de titres & raisons (Seigneur) ie suis vostre, comment me pourray-je soustraire de vostre seruice ? Comment vous deniray-je tout mon bien ? comment pourray-je estre maistre de moy-mesme , pour viure à ma volonté , estant tout vostre pour tant de causes & occasions ?

Et pour-ce, mon Dieu, & Seigneur tout-puissant, reconnoissant humblement cette si grande obligation , ie me rends à vous pour tousiours, & m'offre du tout pour vostre esclauue perpetuel. Et ainsi ie vous offre & presente toutes les choses que ce iourd'huy, & tous les iours de ma vie, ie feray, ie diray, ie penseray , & que i'endureray: le boire, le manger, le dormir , & toute autre chose, à ce que le tout soit à vostre loüange & gloire. Et sur tout, ie m'offre moy-mesme, pour n'estre plus mien, mais vostre : ne viure plus pour moy, ne trauail-

ler plus pour moy, & ne chercher plus mon interest particulier: mais en tout & par tout chercher vostre seruice & accomplissement de vostre diuine volonté: de sorte que toutes les fois que ie feray le contraire, ie me reconnoisse larron & vsurpateur du bien d'autrui: puis que ce faisant, ie desrobe le seruice & obeissance deüe à vous mon Dieu, pour tant de iustes tiltres & occasions.

Petition des nouvelles graces & benefices.

MAis par ce que ie ne pourrois pas de moy-mesme satisfaire à si grande obligation sans vostre grace; ie vous supplie, Seigneur, aidez-moy, & créez en moy vn cœur nouveau, lequel ne retienne vne seule heure, sans l'employer & despendre tout en vostre amour. Créez encores en moy vne volonté nouvelle qui ne vueille autre chose, qu'exécuter la vostre, vn entendement & memoire, qui iamais ne vous mettent en oubly.

Donnez-moy pareillement, Seigneur, vne bride, pour regir & gouverner ma langue: vne garde pour mes yeux, vne pureté en mon cœur, rigueur enuers ma chair, & mortification de tous mes appetits & propre volonté. Oütroyez-moy profonde hu-

milité de cœur, patience, obeïſſance, gracieuſeté, benigneté, pureté d'intention, vraye diſcretion, pauureté d'eſprit, zele de voſtre honneur, amour enuers mes prochains, & compaſſion interieure de leurs trauaux, Qui viuez & regnez és ſiecles des ſiecles. Amen.

*Tu ſaluëras au matin ton bon Ange en
cette ſorte.*

IE vous ſalue Ange de Dieu, fidele & ſoigneux gardien, tant de mon ame, que de mon corps, par le cœur tres-doux de Ieſus-Chriſt fils de Dieu, pour l'amour de celuy qui vous a créé, & moy pareillement pour l'amour de celuy qui à l'heure de mon baptême m'a recommandée entre vos mains : receuez-moy au giron & ſauuegarde de voſtre tres-fidele paternité, à ce que ſecouru par vous ie paſſe droit, & ſans m'embourber ie nage le torrét impetueux de cette vie humaine, iuſqu'à tant que ie paruienne avec vous, au lieu où ie puiſſe contempler cette face & beauté indicible, (laquelle dès à preſent vous voyez à decouuert) & regarder celle tres-gracieuſe image de la diuinité Imperiale, qui ſurpaſſe la douceur de toute autre ſouuefueté.

Oraison pour dire au matin, en laquelle nous demandons à Dieu, tout ce qui est nécessaire à nous & à nos prochains.

Grenadeli. 5.
du Memorial.
A la sainte Trinité.

IE vous adore, ie vous reuere & glorifie, Ô tres-saincte Trinité Dieu tout-puissant, Pere, Fils, & saint Esprit. Je m'humilie totalement deuant vostre diuine Majesté, & m'abandonne irreuocablement à vostre tres-saincte volonté. Ostez & chassez loing de moy Seigneur, & de tous les fideles tout ce qui vous desplaist, & donnez-nous ce qui est agreable & plaisant à vos yeux bien-heureux. Et faites que nous soyons tels, que vous voulez que soyons.

Je vous recommande mes peres & meres, freres & sœurs, enfans, parens, familiers & amis, & tous nos bien-faicteurs, toute cette nostre compagnie, toutes les choses de ce lieu, tous les affaires spirituels & temporels. Je vous recommande tous ceux pour lesquels ie suis tenu de prier, & ceux qui se sont recommandez ou se recommandent à mes oraisons.

Je vous recommande toute vostre Eglise: faites que tous vous seruent, que tous vous reconnoissent, & que tous ensemble vous aiment. Reduisez les errans en la
bonne

bonne voye, esteignez les heresies, conuertissez à la Foy tous ceux qui n'ont encores connoissance de vostre saint Nom. Donnez-nous la paix, & nous conseruez en icelle, comme vous le voulez, & comme il nous est necessaire. Consolez & recreez tous ceux qui vivent en trauaux, tentations, disgraces & afflictions spirituelles & corporelles : & finalement ie recommande toutes les creatures à vostre protection & faueur, à ce qu'il vous plaise octroyer grace aux viuans, & repos eternal aux trespassez, Amen.

A tous les Saints.

IE vous saluë tres-clair & tres-beau lys A la
 de la belle & douce primevere, Marie Vierge
 Vierge tres-sacrée. Marie. Ie vous salüe rose tres-
 fraische des delices celestes : ie vous salüe
 odoriferante fleur de la suauité diuine, de
 laquelle voulut naistre & estre allaieté Ie-
 sus-Christ, splendeur de la gloire du Pere,
 & figure de sa substance. Impetrez de vo- Heb. 11.
 stre Fils vnique, ce que vous sçauiez estre
 necessaire à mon ame. Aidez (mere pi-
 toyable) & secourez à la débilité & foi-
 blese de mon esprit, en toutes mes tenta-
 tions & necessitez : secourez-moy à l'heu-
 re de ma mort, afin qu'avec vostre faueur

98 PARADIS DES PRIERES,
& secours, ie puisse estre asseuré en ce
grand & si extreme danger.

A tous
les An-
ges.

O bien-heureux esprits Angeliques, qui
d'une mesme voix en douce & agreable
melodie, glorifiez nostre commun Sei-
gneur, & iouïssiez perpetuellement de ses
delices, ayez pitié de moy.

A
l'Ange
gardie.

Et vous particulierement Ange saint,
gardien de mon ame & de mon corps, au-
quel ie suis specialement recommandé, soi-
gnez de moy specialement & fidelement.
Conseruez-moy ce iourd'huy de tout mal,
visible & inuisible : gardez-moy de tout
peché, enseignez-moy à faire la tres-sain-
cte volonté de mon Dieu, & m'entretenez
en la grace d'iceluy.

A tous
les
Saints.

Et vous, ô Saints & Saintes de Dieu,
qui apres la nauigation de cette mer turbu-
lente & impetueuse, estans rappelez de cet
exil, estes arriuez au port de la Cité cele-
ste. Soyez mes aduocats & intercesseurs,
prians pour moy le Seigneur, à ce qu'il luy
plaise en faueur de vos merites & oraisons,
me fauoriser, non seulement à present, mais
aussi iusques à la fin de ma vie. Obtenez
pour moy entier pardon & remission de
mes offences, la grace de mon Dieu, aman-
dement de ma vie, à ce qu'à luy seul ie

puisse estre plaissant & agreable : que ie puisse en ceste vie imiter vos sainctes vertus, & qu'en fin ie puisse estre fait participant de vostre gloire. Amen.

Admonition, de ce que l'on doit faire deuant que sortir de la maison pour aller en public.

Lors que tu voudras sortir de ta maison, & aller au lieu public, souuienne-toy que tu t'en vas parmy le monde. Qu'est-ce autre chose de ce monde, sinon vn bois & forest remplie d'ennemis, enuironnée de perils & dangers; n'est-ce pas comme vn parc ceinēt & entouré de toutes parts de veneurs spirituels, qui ne cherchent que la prinse & ruine totale des ames; lequel a autant de pieges & filets comme il y a de voyes, il a autāt de retz comme il y a d'hommes, autant de peines, comme il a d'obieets diuers des sens, comme sont differens les estudes, actions & affaires des hommes? Desires-tu estre à seureté, & sans redouter ces filets? Veux-tu retourner en ta maison avec la mesme integrité, si d'auanture tu ne peux avec plus de deuotion & saincteté, avec laquelle tu es sorty? munie & fortifie ton cœur de deuotes prieres & oraisons. Que l'Oraison te soit comme vne armure tres-forte, que l'oraison te serue de bon-

100 PARADIS DES PRIERES,
*clier: en l'oraison tu trouueras tout secours &
deffence, l'oraison te seruira de bouleuers &
rempart; Tu vseras donc de cete ou autre sem-
blable priere.*

Oraison deuant que sortir de la maison.

Le Col-
lecteur. **S**Eigneur Dieu tout-puissant, & eter-
nel, qui estes la vraye voye, la verité
& la vie: il est besoin maintenant que ie
chemine parmy tant de pieges & embus-
ches dressées par le diable mon ennemy, &
par les mōdains ses seruiteurs & ministres:
ie porte aussi tousiours & en tout lieu avec
moy les aiguillons de ma chair trop lubri-
que & chatoüilleuse; il est tres-difficile,
voire mesme impossible, que ie puisse pas-
ser au trauers de tant de dangers & vagues
tempestueuses, de tant de fosses & preci-
pices que cēt ennemy malin a preparé, sans
me blesser, & sans receuoir quelque playe
au corps ou en l'ame, si ie ne suis aidé de
vous, & si vous ne me prestez vostre main
fauorable. Conduisez-moy donc, ô con-
ducteur tres-fidele, ô guide tres-certaine
& assurée: desillez & ouurez mes yeux,
& me faictes marcher par la voye royale, à
celle fin que ie ne puisse m'esgarer ou de-
stourner à dextre ou à senestre.

Monstrez-moy vos voyes, & m'ensei- Ps. 147.
 gnez les plus asseurez chemins pour par-
 uenir à vous. Faictes que mes pas soient
 droicts, & ne glissent au mal : & conduisez
 toutes mes voyes en paix. Seigneur mon Prou. 4.
 Dieu, dressez toutes mes sentes en vostre Psal. 5.
 iustice, & faictes-moy marcher en la voye
 de salut ; à cause des embusches de mes en-
 nemis, faictes que mes voyes soient con-
 tinuellement en vostre presence, Enuoyés-
 moy pour compagnie l'un de vos saints
 Anges, lequel me puisse conduire & diri-
 ger en la voye de vos saints commande-
 mens, & au chemin qui vous est le plus
 agreable : vous qui auez autresfois enuoyé
 vos Anges pour accompagner le Patriar-
 che Iacob, & le ieune Tobie. Et encores
 que ie sois de vertu & merite beaucoup in-
 ferieur à iceux : si est-ce toutesfois que i'ay
 mis en vous mon esperance, & ay cette
 confiance tres-assurée, que vous ne me
 delaisserez au besoin. Que l'Ange donc
 député pour garde vienne, de grace, avec
 moy maintenant, qu'il me conduise en tou-
 tes mes affaires, & que finalemēt il me fasse
 arriuer au port de Ierusalem celeste, ou Pa-
 lais eternal, & à la gloire des bien-heureux.
 Au nom du Pere, & du Fils, & du S. Esprit,
 Amen.

Commençant quelque chemin. Oraison.

DIeu, qui auez conduit sans peril & danger vostre fidele seruiteur Abraham, qui estoit sorty du milieu du peuple Chaldeen, & de la ville de Chaldée, en tous les voyages & peregrinations de cette vie presente; ie vous supplie, qu'il vous plaise maintenant me conduire, & diriger mes pas en cette voye, par laquelle ie me dispose de cheminer: Soyez-moy toujours, ô Seigneur, comme vne forteresse à l'entour de moy, & comme vne tres-forte munition: soyez-moy soulas & consolation parmy la voye, seruez-moy d'ombrage & couuerture contre la chaleur: de vestement, contre la froidure & la pluye: de chariot, quand ie seray lassé du chemin. Soyez mon protecteur & defenseur en toute tribulation & aduersité: soyez mon baston & appuy, quand ie seray prest de tomber: seruez-moy de port desiré contre le naufrage. Faictes-moy donc cette grace, Seigneur, à ce que ie puisse arriuer sans danger au lieu proposé, vous estant mon conducteur & tres-fidele guide, & que finalement ie puisse par vostre mesme conduite retourner en ma propre demeure en toute prosperité & santé, Amen.

ADMONITION.

Estant sorty de ta maison, & ayant pour un peu de temps delaiissé toute sollicitude des affaires mondaines & seculieres : sois deuant toute autre chose soigneux de satisfaire au commandement de nostre Seigneur & Redempteur Iesus-Christ, disant: Cherchez premiere-ment le Royaume de Dieu, & la Iustice d'iceluy: Et toutes ces choses; à sçauoir, corporelles & mondaines, vous seront à suffisance. Car nostre Dieu selon sa bonté accoustumée départit la nourriture, le vestement, la garde & protection de tout mal, & toutes autres choses utiles & nécessaires à ceux qui deuant toute autre chose sont soigneux de le seruir & honorer, & aiment sa iustice. C'estoit pourquoy Dieu auoit commandé en l'ancienne Loy, de luy offrir tous les iours un sacrifice appellé matutinal, lequel se faisoit dès le matin au poinct du iour, afin que le peuple deuant toute autre affaire exterieur, peust traicter avec Dieu, de ce qui estoit du salut de l'ame. En cette mesme façon au nouveau Testament les premiers Chrestiens auoient de coustume faire des assemblées au poinct du iour, esquelles ils s'employoient tous à chanter Hymnes & Cantiques de loüanges à Dieu.

On doit grandement louer & imiter l'ancienne façon de faire des premiers fideles & Chrestiens lesquels d'une deuotion grãde & amour de la vraye religion, se donnoient bien garde de mettre la main à quelque œuvre manuel, & aux occupations seculieres, deuant que d'auoir assisté au saint sacrifice de la Messe. Et encores moins osoient-ils mettre la main au pain materiel, deuant que d'auoir receu & mangé le pain supersubstantiel & celeste: c'est à sçauoir le pain Eucharistique, pour le moins spirituellement (ce que les premiers Chrestiens de la primitive Eglise receuoient tous les iours sacramentellement) si d'auanture pour quelque indisposition ou empeschement, ils se sentoient moins propres & idoines de le prendre reallement. Et sur tout ne prenoient iamais la viande du corps, le iour des festes, qu'ils n'eussent premierement ouïe la sainte Predication, la vraye viande & pain tres-sauoureux de l'ame.

Les Oraisons pour dire deuant la Messe sont mises au chap. 3. les suyuanes sont, pour deuant & apres la sainte Predication.

Oraisons pour dire deuant que d'ouïr la
sainte Predication.

Seigneur & Redempteur Iesus-Christ,
qui estes descendu de vostre Palais

Royal, & du sein de vostre Pere, & estes venu en ce monde pour nous enseigner, & faire l'office de Docteur, afin de declarer aux miserables mortels la tres-saincte volunté de vostre Pere, afin de leur enseigner la voye de salut, & de leur annoncer la pure verité: me voicy, que maintenant ie me dispose & m'approche pour ouïr vostre sainte parole: I'ay desia tant de fois & par tant d'années assisté aux saintes predications: mais (helas!) i'en ay rapporté fort peu de fruit pour le salut de mon ame. Ie me suis approché de la lumiere & clarté, & ie n'ay pas esté illuminé; ie suis tant de fois venu à cette table, & me suis approché de ce pain spirituel, & cependant ie meurs de faim. I'ay tant souuent accédé près du feu, & me voicy encores tout gelé & roide de froidure. Ie suis desia venu tant de fois au medecin, & cependant ie me sens totalement opprimé de diuerses maladies & langueurs de mes vices. La rosée & la tres-douce pluye de vos diuines paroles est tombée sans intermission sur la terre de mon cœur: & neantmoins il n'a produit iusques à maintenant que ronces, chardons & espines. Que diray-je dauantage, Seigneur? Tant de iours, de mois, & d'an-

106 PARADIS DES PRIERES,
nées sont desia passées, & toutesfois ie demeure tousiours au mesme estat, & en l'ordure de mes vices.

C'est vn tres-grand benefice, ô mon Seigneur, de ce que vous nous auez delaisfé la semence de vostre sainte & diuine parole; car autrement si nous estions prieuez d'icelle, nous serions tout ainsi que Sodome, sans ce Verbe celeste nous ne differerions en rien d'auec Gomorre. C'est aussi encores vn benefice ineffable, de ce que continuellement vous enuoyez des ouuriers & laboureurs en vostre vigne pour la cultiuer avec les outils de vostre sainte parole: de ce que vous nous auez laissé des Docteurs & Predicateurs Catholiques: mais ce seroit bien en vain qu'ils nous enseigneroient par l'exterieur, si ce n'estoit que vous incitez & esmouuez nostre cœur interieurement: C'est pourquoy ie vous prie tres-humblement, ô mon tres-doux & debonnaire Redempteur Iesus-Christ, qu'il vous plaise de me faire cette grace, que d'ouurir les oreilles de mon cœur, afin que ce qui est espandu & distillé par les oreilles corporelles, puisse penetrer & paruenir iusques au plus interieur, & iusques aux moëlls de mon ame, que vostre

sainte & tres-salutaire doctrine puisse operer en moy choses grandes, & produire des effects admirables, de peur que cette vostre sainte parole ne s'en retourne vers vous vuide & sans rien faire.

Donnez-moy, dis-je, ô Seigneur, que ce qui tombera maintenant de semence celeste sur le champ de mon cœur, ne soit suffoqué par les ronces & espines des affaires de ce monde, qu'il ne soit desseiché par faute de la pluye & rosée du saint Esprit, & qu'il ne vienne à flestrir au temps de la tentation & tribulation par l'absence & défaut de cette rosée celeste: qu'il ne soit deuoré & emporté par les oyseaux du Ciel: mais qu'estant eschauffé de la chaleur & des rayons du saint Esprit, il puisse germer en terre bonne, & rapporter vn fruit de la vie eternelle. Faites-moy, de grace, cette faueur, ô mon Dieu, que ie vous connoisse, que ie vous aime, que ie vous honore & louë d'une loüange perpetuelle à iamais: vous qui estes tres-loüable & glorieux en tous les siecles, Amen.



SENTENCE D'ORIGENE
sur l'Exode : comment il faut soigneusement escouter la parole de Dieu.

Prenez soigneusement garde, mes freres, que la sainte parole qui vous est annoncée, & que tout ce qui vous est dit ne s'escoule de vostre cœur, & qu'il ne soit perdu. Je veux bien vous aduertir & admonester de cecy par les exemples de nostre sainte religion. Vous n'estes pas ignorans, vous qui avez acoustumé d'assister aux saincts & sacrez mysteres, avec quelle diligence, soin, deuotion & reuerence vous deuez garder le precieux corps du Seigneur, toutes les fois que le receuez, de crainte que tant soit peu d'iceluy ne tombe par terre, de peur que quelque petite particule & fragment ne puisse vous eschapper des mains : Car s'il aduient que par negligence quelque chose vous eschappe & tombe par terre, vous croyez & estimez que vous estes coupable, & à tres-bon droit vous croyez telle chose, car il est ainsi. Que si vous vsez de telle diligence & soin pour conseruer son corps (comme il est bien conuenable d'vser de cette prudence en telle affaire) comment, pensez-vous que ce soit moindre offence & peché de negliger

& recevoir avec peu de soin & deuotion la parole de Dieu, que de traiter son corps avec moins d'honneur & reuerence qu'il seroit requis ?

Oraison pour dire apres la Predication.

SEigneur Iesus-Christ, Sauueur & Redempteur du monde, ie vous rends humbles actions de graces, de ce que vous m'avez refectionné & nourry du pain & viande tres-suaue de vostre sainte parole, m'en ayant donné en toute abondance autant que mon cœur en pourroit desirer: ie prie vostre clemence & bonté, que la reception de cette vostre sainte & celeste doctrine ne soit en moy sans effets, & que cette semence diuine ne perisse en moy, sans rapporter quelque fruit. Gardez soigneusement mon cœur, enuironnez mon ame du fort rāmpart de vostre grace: empeschez par le ministere de vos Anges bien-heureux, que les oyseaux d'enfer ne rauissent & emportent de mon cœur, cette semence celeste. Mais preparez tousiours mon cœur, à ce que vostre sainte parole puisse estre conseruée dans iceluy, & que continuellement vostre doctrine celeste soit imprimée en ma memoire, & que tousiours elle me semble nouuelle & de meil-

110 PARADIS DES PRIERES,
leur goust. Vous estes celuy, ô Seigneur,
qui auez prononcé par la bouche de l'un
de vos Prophetes: la parole qui sortira de
ma bouche, ne retournera vers moy vuide
& sans porter fruit; mais elle prosperera
& fructifiera dans ceux ausquels ie l'auray
enuoyée. Que cette vostre parole, Sei-
gneur, (laquelle i'ay receu maintenant
de la bouche de vostre ministre & messa-
ger) prospere & fructifie en mon cœur:
donnez-moy les forces & la grace que de-
formais ma vie & conuersation correspon-
de à cette vostre doctrine.

Donnez fructification & croissance à
cette vostre semence & sainte parole: ô
laboureur & vigneron celeste, afin qu'elle
croisse & augmente dans moy, afin que
par la predication de vostre doctrine ie
paruienne non seulement à la connoissan-
ce de vostre volonté; mais aussi que ie fas-
se & accomplisse ce que vous commandez
& voulez que ie fasse. Et que iusques à la
fin ie puisse perseuerer en icelle, iusques à
tant que ie paruienne en vostre Royaume
celeste & eternal, Amen.

*Oraison pour dire deuant commencer
quelque chose.*

Nous auons esté deiectez par la faute de nostre premier parent en l'obscurité de ces tenebres, ô fontaine de clarté & sapience eternelle: à l'occasion dequoy nous ignorons quelle chose vous est agreable, ou non: nous ne sçauons pas ce qui nous est vtile & necessaire, ou ce qui nous peut apporter nuisance. Neantmoins ie propose maintenant de commencer & entreprendre, ô Dieu de bonté & misericorde, cét œuure tres-ardu & difficile, si ie regarde seulement à mes forces; mais leger & facile, si ie viens à tourner ma consideration vers vostre secours; ie l'entreprends, dis-je, sans sçauoir & connoistre si telle est vostre volonté, & si vous voulez que telle chose soit executée de par moy, sans pouoir discerner si elle me fera plus profitable que nuisible. O splendeur & clarté de la diuine Majesté! ô blancheur & beauté de la gloire paternelle! ô collateur de tous biens, Iesus-Christ mon doux Sauueur! faites que maintenant les ruisseaux de vos graces decoulent & s'espandent dessus moy; donnez-moy, ie vous prie, que la rosée de vostre saint Esprit tombe à present

112 PARADIS DES PRIERES,
dans mon cœur, à ce qu'en cét affaire ie
puisse discerner & connoistre quelle est
vostre tres-saincte volonté.

Vers vous ie me tourne maintenant, ô
Pere celeste & eternal, qui habitez Dieu
tout-puissant au plus haut du Ciel : à vous
j'ay mon recours, & d'un cœur parfaitem-
ment humilié, d'une affection sainte, &
avec priere deuote ie me retourne vers
vous, demandant instamment vostre aide
& secours, à ce que ie puisse deuëment en-
commencer cét œuvre : Car vous enten-
dez trop la profondeur & grandeur de mon
ignorance, le peu de force qui est en moy,
le defaut de ma puissance & vertu, ma ne-
gligence & tardiueté à bien faire, & sur-
tout la tres-grande deformité & impureté
de mes mœurs : toutes lesquelles choses
me rendent indigne, incapable & impuis-
sant pour faire & executer telle chose.
Donnez-moy donc la Sapience qui vous
assiste continuellement & en tout lieu : en-
uoyez-là moy du haut de vostre Ciel, à
celle fin qu'elle soit tousiours avec moy, &
qu'elle traueille avec moy. Confirmez &
corroborez-moy, ô Seigneur Dieu d'Is-
raël : regardez à present sur les œuvres de
vos mains : donnez-moy force, baillez-
moy

moy secours, & me prestez ayde & faueur, afin que le malin esprit (mō ennemy mortel) ne me donne aucun empeschement de parfaire & accomplir cēt œuure, que les mocqueries & mesdisances des hommes meschans & peruers ne puissent m'en destourner, afin que ie ne peche & vous offense deuant le parfaict accomplissement de cēt œuure, que ie propose encommencer: mais que vous ayant pour recteur, guide & modérateur, ie puisse disposer, commencer & parfaire toutes choses selon droit & equité: vous me seruant continuellement de mediateur & ayde, ô Iesus-Christ mon Seigneur, qui estes Dieu benist & glorieux eternellement en tous les siecles, Amen.

Aspirations cependant que l'on commence ou fait quelque chose.

TRes-doux Iesus mon Seigneur, ie vous offre & presente mes labeurs, mes traux & mes sueurs en l'vnion de toutes les peines, sueurs, labeurs & traux que vous auez endurez pour moy, & en l'vnion de cette diuine charité, par laquelle vous auez entrepris tant de peines & fatigues pour l'amour de nous, lesquels vous auez patiemment endurez &

Lā sper-
ge en
son li-
ure in-
titulé
Phar-
tra.

114 PARADIS DES PRIERES,
supporté l'espace de trente & trois ans.

O bon Iesus, mon Sauueur, que tous les
labeurs, peines, estudes & exercices de
tous vos esleuz, qu'ils ont fait & executé
pour l'amour de vous, vous rendent main-
tenant ce mien œuvre & labeur agreable &
plaisant. Car les vnissant tous ensemble
auec vostre cœur diuin remply de suauité
& douceur, ie vous les presente, & en fais
offrande à vostre Pere, à vostre plus gran-
de gloire & honneur, Amen.

Action de graces apres la fin de l'œuvre.

Can-
sius en
son En-
chiri-
dion.

Dieu eternel, à vous soit louange &
gloire, de ce que par le moyen de
vostre grace, i'ay acheué l'œuvre : vous
prient qu'il vous soit agreable, & à moy
salutaire. Non à nous, Seigneur, non à
nous; mais à vostre nom donnez gloire,
afin que en toutes choses, & sur toutes cho-
ses, vous foyez tousiours benist en nous &
pour nous. Par Iesus-Christ nostre Sei-
gneur.

Quando on veut s'addonner à l'estude.

Oraison.

Nous tous tant que nous sommes, ô
Seigneur Dieu, auons par instinct
naturel occult & inconneu, vn desir & af-
fection d'apprendre & de sçauoir : mais

nous sommes enuoloppez de si obscures & espoisses tenebres, que nous ignorons non seulement les choses que nous deuons necessairement sçauoir, mais aussi les moyens par lesquels nous les deuons apprendre nous sont incertains & inconneus. Car c'est pour la peine & satisfaction du premier peché que la lumiere & clarté naturelle, de laquelle nostre entendemēt estoit illuminé durant l'estat de la premiere iustice & innocence, est maintenant esteinte, & a perdu sa clarté: de sorte que nous comme aueuglez, nous allons tastonnans à la muraille, & tout ainsi comme si nous estions priuez de la veuë & des yeux, ne sçauons où nous allons, & quel chemin deuons tenir.

A vous donc est nostre recours, ô sapience diuine & eternelle, qui faites vostre demeure au Ciel tres-haut, & auez constitué vostre residence dans le sein paternel. Ie me retire par deuers vous, ô sagesse infinie: ie vous supplie tres-affectueusement qu'il vous plaise illuminer mon esprit, & luy darder vn rayon de vostre diuine clarté, donnez-moy vn cœur docile, & vne viuë memoire, afin que ie puisse connoistre la verité, qui n'est autre chose que vous.

116 PARADIS DES PRIERES,
mesme, que l'ayant conneuë, iela suiue &
retienne à tousiours inseparablement avec
moy.

Veritablement ie sens en moy vn appetit & desir desçauoir, ie souhaitte grandement d'apprendre : car i'ay leu que vous rejettez & mesprisez ceux qui contemnent & repoussent la science ; i'ay leu aussi que ceux qui seront doctes reluiront comme la beauté & splendeur du firmament, & ceux qui enseigneront aux autres la vertu & la iustice, seront clairs & luisans comme les estoilles eternellement & à perpetuité : mais pour autant que ie n'ay pas connoissance du moyen par lequel il faut apprendre & sçauoir ; ie vous supplie affectueusement mon Seigneur, me declarer l'ordre & le moyen que ie dois tenir pour apprendre. Faites-moy la grace que premieremēt ie sçache & connoisse ce qui est le plus conuenable & necessaire à salut : que i'apprenne avec plus grand desir & ardante affection, ce qui me peut inciter dauantage à vous aimer. Donnez-moy vne bonne volonté en cecy, à ce que mon intention ne soit d'apprendre pour vne vaine gloire, par curiosité, ou pour en retirer quelque mauvais profit temporel : mais que ie fasse cecy

seulement pour l'edification de moy-mesme, ou de mon prochain.

Vous connoissez, ô Createur de toutes choses, ô lumiere tres-ardente du Midy, ô recompense & tres-suffisant salaire de tous les elleuz : vous sçavez, dis-je, ô Seigneur, & connoissez fort bien la grandeur & profondeur de mon ignorance, l'imperfection de mon sçauoir, le peu d'experience que j'ay de pouuoir bien discourir & parler : l'indigence & defaut des vertus qui est en moy, & la negligence de vouloir apprendre les choses sainctes, bonnes & salutaires, ne vous est aucunement cachée. Toutesfois, ô eternelle sagesse, ô sapience increée, qui pouuez faire selon vostre bon plaisir, toutesfois & quantes que voudrez, d'un pecheur & impie, vn homme iuste, qui pouuez tout incontinent & sans aucun delay rendre l'homme idiot & ignare, tres-docte & bien disant: enuoyez-moy du siege sublime de vostre Majesté, vostre lumiere & vostre verité, à celle fin qu'elle esclaire les tenebres de mon ignorance, & qu'elle me donne, encores que j'en sois indigne, l'intelligence de vos sainctes & tres-chastes paroles. Rendez-moy plus sage & meilleur que ie ne suis pour le present : afin

que ie puisse, par vostre grace, espandre sur les autres quelque chose du rayon de cette clarté & lumiere qu'il vous aura pleu me départir. Je ne veux rien attribuer de tout cela à mon industrie, à mon esprit, & à mes propres forces (car ie sçay & le confesseray tousiours, que tous ceux qui sçauent quelque chose, le sçauent & l'ont appris par vostre moyen, leurs ayant appris & enseigné) mais de vous seul i'atens avec ferme esperance que vous fassiez l'ouuerture des thresors de vostre sapience pour m'en distribuer & départir quelque chose.

Assistez-moy, aydez-moy donc, ô splendeur & clarté de la Majesté diuine, ô blancheur & lumiere de la gloire paternelle, ô distributeur de toute grace & present. Assistez-moy ie vous prie, descendez à moy maintenant de la gloire & excellente hauteur de vostre siege diuin, & entrez avec la clarté & les rayons de vostre grace dans le cœur de vostre seruiteur : declarez-moy les secrets & choses plus occultes de vostre sapience : de sorte que me seruant de Docteur & maistre, & m'enseignât interieurement, ie puisse entendre & connoistre, non les choses que persuade & enseigne la prudence de la chair, & la sagesse

de ce monde; mais ce qui est approuué & enseigné par la sapience celeste & eternelle. Faictes, ie vous supplie, que ie connoisse & entende en toute sobriété, de crainte que voulant endoctriner les autres & les rendre vertueux, ie ne vienne à empirer à demeurer en ma meschanceté, & à me rendre arrogant & superbe: Mais faites en sorte que ie puisse vser de ce que vostre faueur & grace m'aura donné, premieremēt à mon profit, & par apres à l'vtilité & edification de mon prochain, afin que par le moyen & benefice de cette sagesse imparfaite, ie puisse finalement arriuer à la contemplation de la sapience tres-parfaicte & eternelle, que vous estes, qui vivez & regnez eternellement, Dieu par tous les siècles des siècles, Amen.

*Quando on entend sonner l'horloge, brieue
Oraison.*

Que beniste soit l'heure en laquelle mon Seigneur & Redempteur Iesus Christ voulut prendre chair humaine, naistre & mourir pour l'amour de nous. O mon Seigneur, ayez souuenance de moy à l'heure de mon trespas, Amen.

Par apres, pense que pour lors ta vie est abregée & plus courre d'une heure qu'elle

120 PARADIS DES PRIÈRES,
*n'estoit auparavant : & considere qu'en cette
façon peu à peu ta vie se passe, & la toile de ta
vie se coupe fil à fil.*

Oraison deuant le repas.

O Mon tres-doux Seigneur, ô bon Ie-
sus, faites-moy la grace que sainte-
ment & sobrement ie puisse prendre ma
refection, bien vser de ces dons & biens
corporels qu'il vous a pleu me départir
sans aucun mien merite, & que tout ce que
ie prendray en ce repas me puisse estre sa-
lutaire, & pour l'ame, & pour le corps :
donnez Seigneur, que ie puisse executer
tout cecy à la gloire & louange eternelle
de vostre nom tres-sainct, en l'vnion de
l'amour par lequel vous, mon Dieu pour
moy faict homme, auez beu & mangé en
ce monde à l'honneur de vostre Pere, &
pour le salut de tout le genre humain,
Amen.

Aspiration durant le repas.

Q Ve ton amour, ô doux Iesus, rem-
plisse mon cœur, & enyvre mon
ame : de façon que hors de toy, ie ne desire
& affecte chose aucune, que rien de ce
monde ne me plaise & delecte sinon toy
seulement. Que toy seul sois & contente
mon desir, que toy seul sois ma ioye, ma

refection, mon plaisir & ma delectation,
Amen.

*Saincte Gertrude vsoit de cette aspiration
en mangeant.*

Q Ve la vertu de ton amour diuin
m'incorpore totalement en toy, ô
mon tres-doux & bien-aimé Iesus, Amen.

En beuuant, aspiration.

Q Ve la vertu de mon amour m'em-
brase, ô bien-aimé Iesus, m'attire &
me transporte totalement en toy : & que
cette mesme charité retienne, esteigne &
amortisse parfaictement en moy toutes les
ardeurs des concupiscences charnelles, &
la soif des richesses, honneurs & vaine
gloire, Amen.

Conseil du Sage pour le repas.

V Se comme homme sobre & attrempé des
viandes que l'on met deuant toy, à ce que
tu ne sois hay & mal-voulu des hommes apres
que tu auras mangé. Cesse de manger premier
que les autres; car l'ordre le requiert de disci-
pline, la reigle de temperance le veut ainsi. Et
donne-toy bien garde de manger par trop, & de
tenir vne trop longue table, de peur que tu n'of-
fence Dieu, & scandalise les assistans. Si tu es
assis au milieu de plusieurs autres, ne sois pas

122 PARADIS DES PRIERES,
*le premier qui mette la main au plat, ny qui de-
mande le premier à boire.*

Oraison apres le repas.

MOn Dieu & Seigneur, ie vous rends
toutes les humbles actions de gra-
ces que ie puis, pour cette refection corpo-
relle, que vous m'avez donnée de vostre
pure bonté & largesse sans aucun mien me-
rite. Je vous offre, ô doux Iesus mon Re-
dempteur, tous les morceaux & gouttes
que i'ay prins en ce repas: ie vous les offre,
dis-je, en loüange eternelle, en l'vnion de
la charité par laquelle vous, mon Dieu &
Sauueur, pour moy faict homme, auez beu
& mangé en ce monde à l'honneur de
Dieu vostre Pere, & pour le salut de tous
les humains, Amen.

*Oraison & eslevation d'esprit à Dieu sur la fin
du iour, au coucher du Soleil.*

Le Col-
lecteur.
Prou. 2.

Seigneur mon Dieu, la voye & les sen-
tiers des iustes se declarent & manife-
stent comme vne tres-claire & reluisante
lumiere, la voye d'iceux croist & s'aug-
mente iusques à vn iour parfait de l'eter-
nité: Mais au contraire, les impies & mes-
chans n'ont pas conneu quel est le bon che-
min, ils ne l'ont pas entendu; c'est pour-
quoy ils cheminent tousiours en tenebres,

ils iront dis-je des tenebres interieures d'esprit & d'ignorance aux tenebres exterieures & palpables d'enfer. O combien sont miserables ; combien deux & trois fois miserables & remplis de malheur ceux auxquels cettuy vostre Soleil est desia esteint & couché : ce Soleil, dis-je, qui ne se couchera iamais pour les Saints bienheureux , qui leur seruira tousiours d'une clarté & chaleur tres-claire & feruente, qui gardera tousiours la beauté, splendeur & clarté d'un tres-doux & printannier midy. Pareillement une nuit tres-sombre & tenebreuse a saisi & offusqué leur entendement en plein midy, & l'obscurité accablé l'esprit de ceux qui vous delaissent & se separent de vous, Seigneur. Ils attendent la lumiere & le iour, & voila les tenebres les ont environnez ; ils pensent voir la splendeur du Soleil, mais tout aueuglez & esblouis ils cheminent en tenebres. Ils vont tastonnant à la muraille comme les aueugles, & comme ceux qui ont les yeux creuez, ils choppent & tombent tres-lourdement en plein midy, comme s'il estoit nuit, & qu'ils fussent en tenebres : ils sont environnez de broüillars, & d'obscurité, comme ceux qui sont morts & enfermez

124 PARADIS DES PRIÈRES,
dans les sepulchres. Mais ceux qui vous
seruent & vous suyuent, sont tousiours en
plein iour, en clarté & lumiere tres-agrea-
ble : iamais les tenebres & l'obscurité de la
nuit ne leur peut offusquer & esteindre
cette tres-reluisante splendeur.

Ce Soleil celeste & temporel a ses reuo-
lutions & changemens, il tourne & reuire
incessamment, il se monstre, & puis il se
cache, il se leue & manifeste sa clarté : par
apres, il se couche & retire de dessus nous
les rayons de sa douce lumiere, par vicissi-
tude de temps il s'approche près de nous ;
mais tost apres il se retire, & s'en esloigne.
Mais vous, ô nostre Dieu & Seigneur,
vraye lumiere & Soleil de iustice, vous
n'avez point toutes ces mutations & di-
uers changemens : si nous vous aimons
parfaitement & en verité, vous espondrez
continuellement sur nous les rayons de
vostre diuine lumiere. Vous estes tou-
sious, comme vn beau Soleil leuant, qui
iette de grand matin les traits de sa cheue-
lure dorée sur la face de la terre: vous estes
tousiours nouveau, & ne defaillez iamais,
vous vous approchez de nous, & demeu-
rez avec nous iusques à la fin & consom-
mation des siecles.

O Orient celeste, & qui venez d'enhaut, Mat. 27.
illuminez mes yeux, & esclairez-moy
maintenant qui suis gisant & assis en tene-
bres, & environné de l'ombre de la mort.
O clarté diuine, ô splendeur du Pere, ô
Soleil eternal, esclaire mes tenebres inte-
rieures, & l'obscurité de mon esprit,
de crainte que demeurant & gisant plus Luc. 12.
long-temps en icelles, ie ne sois rauy & em-
mené aux tenebres exterieures, eternelles
& infernales. Demeurez avec moy, ô tres-
clement & tres-benin Seigneur : faiçtes
plus longue demeure avec vostre serui-
teur, ô mon tres-doux Sauueur, ô Iesus
mon Redempteur & ma lumiere : vous
voyez bien Seigneur, qu'il s'en va tard,
que le iour est desia failly, & que la nuit
s'approche : car cependant que vous estes
avec nous, nous sommes en lumiere, tandis
que nous iouïssons de vostre diuine pre-
sence, & de vostre grace, nous sommes en-
uironnez de clarté & splendeur : que si
vous vous esloignez & retirez d'avec
nous, nous serons en tenebres. Car priez
de vostre presence & de vostre clarté,
quelle chose nous pourroit estre ioyeuse &
agreable ? Qu'est-ce qui ne nous feroit fas-
cheux, triste, ennuyeux & moleste, lors

126 PARADIS DES PRIERES,
que vous ferez absenté de nous ? Quand
vous estes present, nous sommes nourris
& rassasiez de vostre douceur, nous iouis-
sons & auons fruition de vostre familiari-
té, nous nous reposons doucement sous
l'ombre de vos ailles, & entre vos bras :
nous nous delectons de parler familiere-
ment avec vous, comme feroit vn amy
avec vn sien amy, estant par vostre grace
libres & deschargez de tout soin & empes-
chement, des concupiscences & voluptez
terrestres : nous estimons que vous estes
nostre principal & souuerain bien, nous
desirons habiter avec vous, nous voulons
viure & mourir en vous. Or tous ces biens
icy nous viennent à manquer & defaillir, si
vous vous retirez & absentez de nous, ô
lumiere eternelle. Demeurez donc avec
nous, Seigneur, & repoussez loin de nous
tous les empeschemens & obstacles de nos
pechez, qui peuuent retarder & obscurcir
les rayons de vostre lumiere diuine, afin
qu'en nous, & sur nous soit vn iour perpe-
tuel, & que dans nos ames vn clair midy
espanse sa feruente clarté. Demeurez, de-
meurez ie vous prie mon Seigneur, & ha-
bitez avec nous.

ADMONITION POVR LES
prieres du soir.

TV dois te souuenir qu'en la Loy sont souuentefois loiez & recommandez deux sacrifices, qui se faisoient tous les iours comme les principaux de tous les autres sacrifices: c'est à sçauoir, celuy du matin & celuy du soir: lesquels tous fideles Chrestiens doiuent spirituellement sacrifier & offrir à Dieu, se retirans à ces heures en quelque lieu secret, & se depestrans de toutes affaires temporelles & de toute occupation exterieure, à celle fin de pouuoir mieux entrer en soy-mesme, & vacquer plus librement aux choses celestes & diuines.

Et tout ainsi comme nous donnons la refection corporelle deux fois le iour à nostre corps: & pour ce faire, nous y employons quelque temps: à sçauoir, à l'heure du disner & du souper: de mesme façon nous deuons bailler sa nourriture & refection à nostre ame, pour le moins deux fois le iour, & employer quelques heures pour ce faire, attendu que l'ame n'est de moindre dignité, mais d'une bien plus grande excellence que le corps: & ven pareillement, que nostre ame n'a moins de besoin de sa vian-

128 PARADIS DES PRIERES,
de & nourriture spirituelle, que le corps a neces-
sité de refection corporelle.

Il seruira de beaucoup pour le sacrifice & oraison du matin, si l'homme s'est bien disposé au soir deuant se coucher, & s'il a employé quelque temps en oraisons & prieres, s'il s'est soigneusement examiné la conscience, s'il a remercié Dieu, & s'il a soigneusement en toute deuotion reCOMMANDÉ son esprit entre les mains de son Seigneur, au prealable que se mettre au liét pour prendre son repos: car s'il s'est comporté diligemment en cét affaire, il trouuera sans doute le fruit qu'il rapportera cette semence spirituelle en son cœur, il connoistra au matin que son labeur n'aura esté perdu, & que ce n'a esté en vain qu'il a trauaillé en cette discussion & preparation du soir. Ne plus ne moins que celui qui au soir se voulant coucher, desireux de bon matin de trouuer du feu, afin de se pouuoir chauffer, & subuenir à quelques autres necessitez, amasse soigneusement les tisons & charlons, & les couure, de peur qu'ils ne viennent à s'esteindre: ainsi doit faire celui qui souhaite trouuer quelque estincelle de feu d'amour & de deuotion en son cœur, lors qu'il se vouldra leuer au matin.

Deuant que d'entrer donc en ton liét, pour reposer, sois soigneux de permettre & accomplir ce qui s'ensuit.

L'examen

L'examen de ta conscience, l'action de grace des benefices receus, la demande des nouveaux benefices, & te recommander deuotement à Dieu.

Premierement, auant que l'homme se voise coucher, il doit diligemment esplucher & examiner sa conscience avec la plus grande & soigneuse recherche qui luy sera possible. Qu'il regarde & reconnoisse en quoy il peut auoir peché, & offensé son Dieu le long de cette iournée passée, soit par æuures, en paroles, en pensées, ou par quelque autre moyen que ce soit. Qu'il considere premierement s'il n'est point tombé en peché par sa langue, s'il n'a pas menty, s'il n'a pas voué & donné les creatures de Dieu au diable, s'il n'a pas proferé quelques blasphemes, s'il n'a point dit quelques iniures, detractions & calomnies contre son prochain, s'il n'a pas recité quelques choses sales, vilaines & deshonestes, s'il n'a pas perdu son temps en paroles inutiles & odieuses.

Secondement, qu'il regarde avec combien peu de soin & de diligence il a resisté aux cogitations mauuaises: qu'il recherche sans flatterie, s'il s'est trop amusé en icelles, s'il a prins quelque plaisir & delectation en telles pensées, ou bien s'il les a repoussé & reietté arriere de soy & de sa conscience promptement, ne plus ne

130 PARADIS DES PRIERES,
moins qu'il repousseroit hastiuement les estincel-
les ou charbons du feu infernal.

Tiercement, qu'il prenne soigneusement gar-
de en quelle sorte & maniere il aura gourné
ses sens extérieurs toute cette iournée, & prin-
cipalement qu'il regarde avec quelle diligence
& prenoyance il aura gourné les sens de la
vue & de l'ouïe.

En quatriesme lieu, il se doit ressouuenir de
ceux, avec & en la compagnie desquels il a con-
uersé ce iour-là, de quelles affaires il a traicté
avec eux, quelles paroles il a dit & proferé en
leur compagnie, qu'il regarde s'il leur a point
donné quelque occasion & matiere de scandale,
s'il les a pas offensé, s'il les a point destruit &
troublé au lieu de les edifier.

En dernier lieu, qu'il face diligente recher-
che & examen de ses œuvres, tant de ce qu'il
peut auoir commis, que de ce qu'il pourroit auoir
obmis: qu'il considere comment, & en quelle
façon il aura employé tout le temps & les heures
de cette iournée, s'il a correspondu & satisfait
à son estat & vacation, s'il a eu soin de ce qui
appartient à sa maison & famille, si en tout &
par tout il a accompli ce qui estoit de son deuoir,
&c. Ce conseil est fort approuué de plusieurs
saincts personnages. Voy de cecy l'Homelie 9. de
ce grand Eusebe d'Emissene qu'il a fait pour les

Religieux. Il a esté aussi fort reCOMMANDÉ par les Philosophes Ethniques & Payens. Tu pourras voir & consulter de cecy Senecque au liure 3. de l'Ire, qu'il a escrit à Nouatus, chap. 36.

Ne reçois le doux & paisible sommeil sur tes yeux, auant que tu ayes recherché & fait reueüe de toutes tes actions du iour, non vne seule: mais deux ou trois fois, en faisant bon examen d'un chacun de tes œuvres à part soy, & puis en general. Dy à toy-mesme; Comment & en quoy ay-ie transgressé ce iourd'huy? Qu'ay-ie fait? Pour quelle raison n'ay-ie pas accompli & parfait ce qui m'estoit tres-vtile de faire, bien decent & conuenable de ma personne: en cette sorte, tu discourreras en toy-mesme de tes actions, commençant dès la premiere œuvre & occupation du iour, iusques à la derniere. Que si tu as fait & perpetré quelque mal, ayes douleur & repentance d'iceluy: que si tu as fait quelque chose bien à propos, resioüis-toy de ton bon œuvre. Trauaille soigneusement en cecy; en cecy occupe toy, medite continuellement telles choses.

En quelle sorte il faut examiner la conscience, tu le pourras voir au 5. chap. des Meditations de S. Bernard.

Après que tu auras de cette façon examiné & surté ta conscience, represente-toy deuant tes yeux tous les pechez que tu as commis ce

iour-là, & les confesse avec douleur & amertume de cœur en la presence du Seigneur, luy en requérant pardon par cette autre semblable priere.

Confession pour le soir, apres l'examen de conscience.

IE vous confesse mes pechez & offenses, ô Dieu eternal, Prestre & Euesque souuerain, ministre du vray Tabernacle: ie m'accuse deuant vostre Majesté diuine, moy qui suis le plus miserable; chetif & abominable pecheur de la terre, ie vous declare tous mes pechez, lesquels pour leur multitude sont sans nombre, tant pour leur grauité sont enormes & detestables. Ie vous confesse, non seulement mes pechez, mais aussi toutes les circonstances d'iceux, toutes mes negligences, toutes mes passions & affections vicieuses, mon ingratitude à l'endroit de vos benefices, lesquelles i'ay commises depuis mon ieune aage iusques à maintenant: mais principalement ie m'accuse de telle & telles fautes tresgriefues & enormes, (on pourra reciter & faire en ce lieu vn dénombrement des fautes & offenses les plus lourdes & mortelles) & de ce que i'ay offensé ou obmis cet-

te presente iournée sciemment , ou par ignorance , par œuures , par paroles , par pensées , ou par obmission. Non seulement de mes fautes propres , ie me rends coupable deuant vostre celeste Majesté : mais aussi ie me confesse des pechez esquels ie pourrois auoir participé , ou donné quelque occasion. Car ie sçay bien , mon Dieu , & Seigneur , & le declare deuant vous qui connoissez toutes choses , que i'ay attiré plusieurs à peché , tant ce iourd'huy que tous les iours de ma vie , par paroles mauuaises , par ma conuersation déprauée , par mauuais exemples , & par plusieurs autres occasions : & par ce moyen i'ay faict offencer ceux , pour lesquels vous auez espandu vostre sang precieux & innocent ; ie les ay en cette façon retiré de vous , & les ay fait tomber en peché & damnation.

Pour toutes lesquelles offenses , tant miennes propres , que pour celles d'autrui , ie supplie tres-humblement vostre paternelle & infinie bonté , que pour la mort tres-angoisseuse , & pour toutes les passions que vous auez souffert & enduré pour l'amour de nous & vous , effaciez entiere-ment ces offenses , & nous pardonniés tous nos pechez , ô nostre tres-benin & miseri-

134 PARADIS DES PRIERES,
cordieux Seigneur : car à la verité il appartient à vous seul , comme à celuy qui est tres-pieux, tres-puissant , tres-benin , tres-misericordieux, & tres-pitoyable , de départir & donner ample & tres-grāde communication de vostre tres-liberale misericorde à ceux qui sont tres-miserables, pauvres & necessiteux, qui n'ont rien fors que vous, & que ce qui vient de vous , comme d'une fontaine tres-copieuse & abondante: Et d'autant plus que nous sommes infirmes, indigens & miserables, de tant plus se declare & manifeste grande, vostre largesse & bien-veillance en nostre endroit. Et de tant plus que nous en auons de besoin, de tant plus doit estre inclinée vostre misericorde à nous bien faire , à estendre vostre main tres-liberale dessus nous , & nous départir plus abondamment vostre benediction celeste , & faire decouler dans nos cœurs la rosée de vos graces diuines , afin que les chaisnes & liens de nos pechez estans brisez & rompus, vous nous attiriez à vous , pour faire à iamais en tout & par tout vostre sainte & tres-agreable volonté, qui estes viuant & regnant par tous les siecles des siecles, Amen.

Aduertissement de ce qu'il faut faire apres
l'examen de Conscience.

IL fera tres-bon & profitable d'adiouster à
l'cet examen de conscience quelque penitence
speciale & particuliere à ce propos, en satisfa-
ction des offences commises, selon la qualité &
grauité du peché, afin que par ce moyen l'homme
soit plus craintif & sur ses gardes, de peur que
par apres il ne vienne à encourir telle faute, &
commettre derechef le mesme ou sèblable peché.

Il faut aussi proposer, & renouueller vn tres-
ferme propos & volonté de surmonter toutes les
sepmaines vn vice pour le moins, & se des-ac-
coustumer totalement d'iceluy.

Que s'il arrive durant la iournée, que ie
viene à tomber en quelque peché, donne-toy
bien soigneusement garde de perdre esperance,
& te desesperer de la bonté & misericorde de
Dieu, iacoit mesme que tu fusses tombé mille fois
en vn iour: car sè tu tombois mille fois la iour-
née, tu dois autant de fois te releuer, esperant
toujours en la bonté incomprehensible & ineffa-
ble misericorde de nostre Dieu.

Si tu trouues dans toy quelques passions tant
dures, familières, puissantes & rebelles, que
mesmes elles te semblent inuincibles, & sans

136 PARADIS DES PRIERES,
pouuoir estre surmontées, garde-toy bien de
perdre cœur: mais renouuelle tousiours tes forces
& ton courage, car il arriue bien souuent, que
soudainement l'on surmonte apres plusieurs an-
nées, ce que l'on n'auoit peu vaincre par vn long
temps: & cecy se fait ordinairement, afin que
l'homme connoisse mieux & plus clairement
d'où procede vne telle victoire.

Après tout cela, tu rendras graces à Dieu, de
ce que par sa grace & bonté il t'a conserué &
gardé cette iournée de tout mal, tant du corps
comme de l'ame: disant en cette sorte.

ACTION DE GRACES POVR LE
soir, par laquelle nous rendons graces à
Dieu pour les benefices receus le
long du iour.

VOila, mon Seigneur, telles si grandes,
& en si grand nombre sont mes of-
fences, par lesquelles i'ay offencé ce iour-
d'huy vostre diuine Majesté: voila com-
ment i'ay tant inutilement employé, ou
pour mieux dire, vainemēt perdu le tēps
(chose si precieuse) lequel vous m'auiez
donné de vostre misericordieuse bonté
pour faire penitence, & fruiets dignes d'i-
celle, ne m'estant souuenu que ce iour pre-
sent pouuoit estre le dernier de ma vie. I'ay

adiouſté derechef peché ſur peché, accumulation des offences nouuelles, faites ſur les anciennes & paſſées; ie me ſuis comporté en voſtre preſence, & ay cheminé deuât vous, qui voyez & conſiderez toutes choſes, ſans aucune crainte & frayeur, ne plus ne moins que ſi i'euffe eſté en la preſence de quelque idole mort & inſenſible. A raiſon dequoy i'auois bien merité pour mes offences, & pour le peu de reuerence, que ie vous porte, que la terre vint à s'ouurir, i'eſtois bien digne, que l'enfer m'engloutiſt, & deuoraſt: Mais en ce qu'un tel & horrible ſupplique ne m'a point accablé & faiſi, cela vient & procéde tant ſeulement de voſtre miſericorde infinie, comme ie le confeſſe maintenāt de cœur & de bouche, vous en rendant humbles actions de graces de toute ma vertu, force & puiſſance.

Car ç'a eſté vous, mon Seigneur, & non autre, qui m'auiez conſerué benignement ce iourd'huy de tout infortune & danger, tant du corps que de l'ame: car à la verité il n'y a aucun mal & peril en tout le monde, qui ne me peuſt arriuer & accabler ce iourd'huy, ſoit corporel, ou ſpirituel, ſi ie n'euffe eſté gardé & preſerué de voſtre dextre & protection. Pourquoi ne pouuoit tom-

138 PARADIS DES PRIERES,
ber sur moy, ce qui est tombé sur vn autre
homme? Que si cettuy-là est enfant d'A-
dam, aussi suis-je: s'il est conçu en peché
originel, & moy aussi: s'il est enuironné &
embarassé de plusieurs offences actuelles,
aussi suis-je, si son corps a esté faict & for-
mé de diuerses humeurs, & des elemens
qui se contrarient, & se font continuelle-
ment la guerre les vns contre les autres, le
mien a esté créé de la mesme matiere, & en
la mesme façon. Si l'vn est deuenue ce iour-
d'huy contrefait & entrepris de ses mem-
bres, si l'autre a esté rendu ethique ou pul-
monique, ou forcené, dysenterique, rate-
leux, ou paralytique: pourquoy ne m'est-il
aduenu le semblable? Si celuy-là a perdu
ce iourd'huy la lumiere & douce clarté des
yeux, pourquoy n'ay-ie pas esté aueuglé
comme luy? Si celuy-cy a esté suffoqué &
noyé parmy les ondes marines, ou dans
quelque fleuve: si cettuy-là a esté brulé
& consommé par le feu: si l'vn est mort
d'une mort subite & inopinée; si l'autre a
esté esteint & estranglé par quelque autre
maniere que ce soit: pourquoy ne l'ay-ie
pas esté aussi bien comme luy, attendu que
i'estois en la mesme damnation, & au mes-
me danger comme luy? Pourquoy dis-ie,

tout cela ne m'est-il arriué, ô mon Seigneur tres-clement, ô mon Dieu tres-pitoyable, pourquoy, sinon pour autant que vostre grace m'a conserué, sinon que vostre bonté & misericorde m'a defendu & sauué? De ce que ie suis donc en bonne santé; plein de vie & de force: de ce que mon corps est encores sain, entier & robuste; ie vous en remercie, car ie confesse librement que cela vient de vous: & que ie l'ay receu de vous: & pour ce benefice vous rendray à iamais loüanges & graces immortelles.

Pareilles & semblables graces, voire encore mille fois plus grandes ie vous rends, ô mon Pere & Seigneur, de ce que vous n'avez moins pitoyablement preserué mon ame d'infinis vices & pechez, que ie pouuois commettre, comme vous avez contregardé mon corps ce iourd'huy de tout peril, infortune & danger, & de plusieurs genres de mort, par lesquels la vie me pouuoit estre rauie. Je vous remercie derechef, de ce que vous avez par vostre lumiere esclairé & illuminé celle qui estoit. aueugle, & l'avez conduite seurement en la voye de vos saincts commandemens. Vous l'avez redressée, lors qu'elle estoit proche de tomber, & quand elle estoit

140 PARADIS DES PRIERES,
droicte & esleuée, vous l'avez soustenuë de
vostre main qu'elle ne vint à tomber.

Je vous rends tres-humbles actions de
graces, de ce que vostre misericorde m'a
deuancé & preuenü, me deliurant de tout
mal, en me sauuant de ceux qui sont passez,
me corroborant & armant contre les pre-
sens, & me fortifiant contre ceux qui sont
à aduenir.

Vous auez rompu & brisé deuant moy
les lacs & filets, que mes ennemis auoient
tendus pour me surprendre: vous auez par
vostre vertu coupé les cordes & liens des
pechez qui me tenoient captif: non seule-
ment vous auez retranché les pechez, mais
aussi vous auez osté de deuant moy toutes
les occasions & motifs qui me pouuoient
allecher: que si vous ne m'eussiez fait
cette faueur, si vous n'eussiez chassé loing
de moy toutes les causes & occasions qui
me pouuoient attirer, sans doute i'eusse ac-
comply & perpetré tous les pechez du
monde: Car ie sçay veritablement, ô mon
Seigneur, qu'il n'y a aucun peché si grand
& enorme perpetré par vn homme, qui ne
puisse pareillement estre fait & commis
par vn autre homme: que si celuy-là a fait
tel peché, sans doute ie puis commettre le

mesme, si ie ne suis assisté de vostre diuine grace.

L'homme donc, mon Seigneur, peut tomber au mesme peché qu'un autre homme est tombé, si vous ne luy assistez, qui estes le Createur de l'homme. Mais ô mon Dieu, vous auez fait, que ie ne l'ay pas fait: à ce que ie m'abstinisse de peché, vous me l'avez commandé: & à ce que ie vinisse à croire en vous, vous m'en auez donné la grace: car c'estoit pour vous-mesme, mon Seigneur, que vous me gouverniez, vous me gardiez pour vous, & pour moy, à ce que ie ne me fusse tant oublié que de commettre le crime d'adultere, ou quelque autre peché: & par Iesus-Christ vostre Fils unique, vous m'avez donné grace & lumiere, non seulement d'éuiter le peché, mais aussi de bien faire. A vous soit loüange, action de grace, gloire & honneur à iamais, en tous les siecles des siecles, Amen.

Après cette action de grace recommande toy à Dieu, en cette ou autre semblable maniere.



*ORAISON POUR LA NVICT
deuant que d'aller coucher & se mettre au
liet, en laquelle l'homme se recom-
mande à Dieu.*

Seuerus
Patriar-
che
d'Ale-
xandrie
en ses
prieres
des Pe-
res Sy-
riens.

MOn Dieu, donnez-moy la grace que
i'assiste en vostre diuine presence
avec vn cœur tousiours vigilant : & toutes
les fois qu'il m'adiendra de dormir , que
mon somme soit sans peché. Que si lors,
que ie m'esueilleray ie donnois en mon
cœur quelque entrée au mal , par vostre
grace & misericorde , donnez-moy par-
don. Et si en dormant ie commettois quel-
que offence enuers vous , que vostre cle-
mence me reçoie à mercy , ô mon Dieu,
par icelle Croix en laquelle vous vous estes
tant abaissé & deprimé : permettez-moy
que ie repose en assurance : & me deliurez
des mauuais songes & sales imaginations.
Toute cette nuit , donnez-moy vn som-
meil doux & tranquille , & faictes que le
mal n'aye point de pouuoir sur moy, ny les
pensées peruerfes. Donnez-moy vostre
Ange de lumiere , lequel prenne soigneu-
sement garde sur moy , & qu'il conserue
tous mes membres.

O bonté infinie, par ce corps viuant lequel s'est liuré à la mort pour nous, deliurez-moy de toutes concupiscences execrables, faites que ie couche & dorme en paix: Que vostre sang precieux me prenne en sauilegarde: qu'il defende mon corps & mon ame en laquelle vous auez mis vostre image. Que vostre dextre tienne en sa protection ce corps que vos mains ont fait & formé: tenez-moy enclos dans le mur de vostre misericorde, comme en lieu d'assurance & franchise, afin que quand mon corps se reposera, il soit preseruié par vostre vertu, & que mon somme soit deuant vostre diuine Majesté, comme vn parfum soüef fleurant, que le maling n'approche point de mon liét, par l'intercession de celle qui vous a conceu & enfanté. Faiçtes-moy connoistre, ô mon Seigneur, quelle est vostre volonté, & me donnez les moyens & la force de l'effectuer, vous qui comblez la nuit de cette tranquillité, laquelle principalement reluit en la iustice de Iesus-Christ nostre Redempteur: car c'est vous qui estes la vraye lumiere, qui manifeste vostre gloire en lumiere, & les vrais enfans de lumiere vous adorent en cette clarté, là où vous faiçtes vostre de-

144 PARADIS DES PRIERES,
meure. O bon Iesus, Verbe de Dieu eter-
nel & sapience du Pere, conseruez la vie
aux viuans, & faictes misericorde aux de-
functs, & ce par le merite de vostre Croix
& de vostre mort. A vous & à vostre Pere,
qui vous a enuoyé, & au saint Esprit soit
donnée loüange, honneur & gloire à tou-
siours, Amen.

ADVERTISSEMENT.

Grena-
de en la
preface
du 4. li.
de l'O-
raison
& Me-
ditatiō. **Q**uand tu te mettras au liēt, sois soigneux
de te munir & armer du signe tres-salu-
taire de la Croix : & estant couché, dispose-toy
en la sorte & maniere que tu seras gisant au se-
pulchre, faisant comparaison de ton liēt avec le
tombeau d'un homme mort. Medite quelque
peu, & regarde des yeux de l'esprit quelle sera
ta situation, & quelle figure tu auras en ce lieu,
car sans doute lors que tu seras enferré dans la
terre, ton corps se pourrira & sera rongé & con-
sommé de vers. Recite alors considerant ces
choses quelque Respons ou Antienne, l'Oraison
Dominicale, ou la Salutation Angelique, tout
ainsi que l'on a coustume de faire sur les sepul-
chres des defuncts.

Le mes-
me au
liu. 2. de
l'Orais.
ch. 14. Ce sera tres-bien fait à l'homme, s'il se va
coucher tous les iours, & se met au liēt avec
quelque bonne & sainte cogitation : car tout
ainsi

ainsi que celui qui au soir deuant se coucher, a soigneusement amassé les charbons & couuert le feu, le trouue promptement le matin lors qu'il se veut leuer, pour suruenir à ses neceßitez; ainsi pareillement celui-là trouue au matin facilement affection & matiere de prier, qui au soir a bien muny son cœur des saintes & deuotes prieres, & s'est endormy avec quelque bonne pensée.

Toutes les fois que tu t'esueilleras durant la nuit, esleue deuotement ton cœur à Dieu, luy disant en cette sorte: Gloire soit au Pere, & Fils, & au saint Esprit: Comme a esté dès le commencement, & est encores à present, & sera tousiours par tous les siècles des siècles, Amen. Ou bien tu diras quelque autre verset remply de deuotion & pieté, & lequel tu connoistras t'esmouuoir dauantage en l'amour de Dieu. Car telles aspirations & oraisons briefues ont tres-grande puissance, & sont grandement profitables pour chasser les illusions du diable, & pour bannir du cœur toutes mauuaises cogitations: car durant la nuit le diable a accoustumé de molester & tourmenter dauantage les hommes qu'en autre temps, ou durant la iournée. Le diable, dit monsieur saint Hierosme, a eu accez & entrée avec toutes ses pompes, delices & voluptez au liét du grand

Aspiration
tion
quand
on se
refueille.
Gloria
Patri &
Filio, &
Spiritu
sancto.
Sicut
erat in
princi-
pio, &
nunc &
semper,
& in
secula
seculorum,
Amen.

Roy & Prophete David, lequel ce saint person-
nage lavoit & baignoit de ses larmes toutes les
nuicts, que mesme il confesse que ses pleurs luy
seruoient de pain iour & nuict, & ses yeux
estoyent comme deux ruisseaux de fontaine.





CHAPITRE III.

Contenant les Oraisons Liturgiques,
 lesquelles on pourra reciter de-
 uant le sacrifice de la sain-
 cte Messe.

PROLOGVE.



I le Temple de Salomon estoit
 en telle reuerence & honneur,
 dans lequel estoit contenuë &
 gardée l'Arche de l'Alliance
 du Seigneur: en quelle reue-
 rence l'homme doit-il auoir les Temples &
 Eglises de Iesus-Christ, & du nouueau Testa-
 ment, là où le mesme Seigneur est realement &
 de fait & substantiellement, c'est à sçauoir au
 tres-sainct & venerable Sacremēt Eucharisti-
 que: où on n'offre & n'immole plus des boucs &
 taureaux: mais le sang tres-precieux de Iesus-
 Christ nostre Redempteur, qui a vne fois esté of-
 fert & espandu sur l'Autel de la Croix: où no-
 stre Seigneur Iesus-Christ s'est présenté & of-

fert soy-mesme à son Pere celeste & eternal, en holocauste parfaict, en vray sacrifice, & en hostie viuante pour la redemption de tout le genre humain. Ce que mesme figure & represente le Prestre toutes les fois qu'il celebre la sainte Messe.

Or pour imprimer en l'esprit de l'homme cette reuerence requise au mystere de la Messe, & aux lieux saints servira la Meditation suivante.

MEDITATION DEVOTE POUR
preparer l'esprit à deuotion & reuerence
enuers le saint & redoutable sacri-
fice de la Messe.

QVe fais-tu, ô mon ame, où vas-tu maintenant? Oste, oste les souliers de tes pieds; car le lieu auquel tu entres est saint & consacré. Attens encores quelque peu, & tu considereras en ce lieu vne tres-grande & admirable vision. Ayes encores quelque peu de patience, & le Dieu tout-puissant fera en ce lieu choses grandes, merueilleuses & incomprehensibles au sens humain, sans poids & sans nombre. Attens encores quelque peu, & les Cieux seront ouuerts, les Anges seront tout

estonnez & remplis d'admiration ; les Saints chanteront gloire & loüange, les iustes se resiouïront, les esclaués & captifs seront visitez, les prisonniers seront absous & desliez, l'enfer criera & hurlera : & au contraire, nostre sainte Mere l'Eglise se resiouïra en esprit.

A peu de temps d'icy sera immolé & offert en ce lieu vn holocauste & sacrifice, par dessus lequel il n'y en a point de plus grand & excellent, de plus vtile & profitable, de plus aimable & plaisant, de plus meritoire & acceptable deuant les yeux de la diuine Maïesté.

En ce lieu sera présenté vne hostie, laquelle donne loüange & gloire à Dieu, société & compagnie aux Anges, le Ciel aux exilés & bannis, l'ornement & beauté à la religion.

Et sans doute toutes les douleurs, toutes les iniures, mocqueries, peines & trauaux faits à Iesus-Christ nostre mediateur & Sauueur, tous les coups de fouets deschargez sur son corps tres-delicat, toute l'amertume du breuuage de vinaigre & de fiel, toutes les blessures des cloux, & la nature du fer de la lance seront representez & reduits en memoire par la ce-

150 PARADIS DES PRIÈRES,
lebration de ce vif & tres-auguste sacri-
fice !

Grena-
deli. i.
des ad-
ditions
du Me-
morial.
Esd. 66.

Ces choses, ô mon ame seront faictes & accomplies en ce lieu , & dés l'heure presente, en ce tres-sainct mystere , desquelles tu pourras estre tesmoin fidele & oculaire : si tu veux assister en ce lieu avec vne foy vraye & sincere. Avec quelle deuotion, avec quelle reuerence, avec quelle humilité & dilection dois-tu te représenter & assister à ces tres-saincts & sacrez mysteres, ô mon ame ? Car quelle chose y a-il plus admirable , que de voir & contempler vn Dieu de si haute & excellente Majesté , le siege duquel est le Ciel, & son marchepied la terre, deuant lequel se tiennent debout tous les Seraphins , auquel tous les Anges font tres-humble seruice , & auquel toutes les creatures rendent obeïssance ? Quelle plus grande merueille, dis-ie , que de voir ce Seigneur descendre vne autre fois du Ciel en cette vallée de pleurs & de miseres , de le voir faire sa demeure avec nous, estre tousiours present en nos Temples , & sur nos Autels , afin que par sa presence il embraze nostre deuotion, qu'il assiste à nos larmes, & les effuye, qu'il entende & exauce nos clameurs & prieres ?

Rien autre chose n'auoit esté baillé aux Iuifs en l'Arche de l'Alliance, que l'ombre de ce benefice, & la figure de ce Sacremēt, & toutesfois le Sage Salomon estoit entré en si grande admiration de cela qu'il disoit : *Faut-il donc penser & croire que veritablement Dieu habite, & fasse sa residence avec les hommes sur la terre?* Car si le Ciel & les Cieux des Cieux ne vous peuuent comprendre, ô Seigneur, combien moins vous pourra comprendre cette maison que ie vous ay bastie & edifiée? O mystere de grande veneration, ô benefice digne d'une reconnoissance inestimable! ô si les hommes, mon Seigneur, sçauoient bien estimer & connoistre la valeur & la dignité de ce benefice si excellent, avec quelles sortes de reconnoissance vous pourroient-ils remercier? avec quelle promptitude & diligence seroient-ils soigneux de vous servir comme ils sont prompts à se servir de vos benefices? Mais ie ne sçay en quelle sorte nos yeux sont si esbloüis & aueuglez, que vous nostre Seigneur, estant au milieu de nous, nous ne vous connoissons point.

O Seigneur, en quelle maniere est-il toujours arriué au monde, que les hommes

152 PARADIS DES PRIÈRES,

ne vous connoissent point: veu mesme que le bœuf beste sans iugement, reconnoist son maistre, & que l'asne a bien la connoissance de l'estable & rattelier de son Seigneur? Vous estes venu au monde, & le monde ne vous a point conneu, & à cette heure mesme vous estes encore au monde, & à peine le monde vous connoist-il. Nous miserables & chetifs, blasmons & accusons les Juifs, pour ce que vous avez esté & cōuersé au milieu d'eux, & ils ne vous ont pas conneu, vous voyant en forme d'homme, & cependant ne nous accusons pas nous-mesmes de ce que vous demeurez parmy nous, sans que nous vous connoissions, pour ce que nous vous voyons comme caché & voilé sous la forme de pain.

Esleue-toy, esleue-toy, mon ame, romps les chaines & liens qui t'ont enuironné le col, & te tiennent captiue. O fille de Sion, purifie-toy, nettoye & sanctifie ton cœur, & sois bien preparée: car maintenant le Seigneur tout-puissant & dominateur arriuera en son tēple, il s'appelle par son nom Emanuel, c'est à dire Dieu avec nous: dès à present les montagnes decouleront & distilleront la douceur, & les collines espan-dront le lait & le miel. Tu verras bien-tost

que les Cieux seront ouuerts , & que d'iceux l'espoux celeste sortira & viendra vers nous comme de sa chambre & couche nuptiale : tu considereras le Verbe estre fait chair, & habiter au milieu de toy. Va en diligence au deuant de luy, marche pour le receuoir en toute reuerence & honneur, avec tres-profonde humilité, & avec vne pureté entiere & tres-parfaicte. Deuance-le, & attens son aduenement en esperance, & avec vn doux silence, avec prieres deuotes, & desirs embrasez d'amour, iusques à tant que le tout soit parfait & accomply dans toy, & dans tous les fideles de Iesus-Christ, Amen.

Oraison & adoration à Iesus-Christ, & à tous ses membres, laquelle pourra estre deuotement recitée & meditée durant vne Messe basse, ou bien en attendant que le Prestre accede à l'Autel.

IE vous adore, ie vous louë & glorifie, ô mon Seigneur Iesus-Christ : ie vous benis & remercie, ô Fils de Dieu viuant. Et puis que vos tres-dignes membres ont esté en diuerfes sortes affligez à mon occasion, ie ne scaurois avec tant d'honneur & d'amour les saluër, comme ie dois, & que ie le desire.

Grena-
de li. 5.
du Me-
morial
de la
vie
Chre-
stienne.

Je vous saluë toutesfois (ô pieds de mon Seigneur) pour moy trauallez , lassez , affligez , & percez de cloux , qui pour moy tant de fois fustes mis en terre , desrompus & recreuz de cheminer pour moy.

Je te saluë , ô poictrine flestrie pour moy , ternie & découleurée de battures & de coups tres-cruels & sanglans.

Je te saluë , tres-sacré costé de mon Sauueur , qui à mon occasion fus frappé & percé d'vne lance.

Je te saluë , ô cœur tres-aymable , pour moy ouuert & transpercé.

Je vous saluë , reins tres-saincts , pour moy flagellez , deschirez & teints en sang.

Je vous saluë , bras tout-puissans & tres-saincts , pour moy estendus en la Croix.

Je vous saluë , ô tres-sainctes & delicates mains , pour moy percées de gros cloux & aigus.

Je vous saluë , tres-dignes espaules , pour moy froissées & courbées sous le pesant faix de la Croix.

Je vous saluë , bouche diuine , & gorge pleine de suauité , pour moy abreuuée de fiel & de vinaigre.

Je vous saluë , ô tres-gracieuse face , pour moy souillée & gastée de vilains crachats ,

& frappée de soufflets cruels & inhumains.

Je vous salue, tres-doux & pitoyables yeux, qui fustes pleins & baignez de larmes pour l'amour de moy.

Je vous salue aureilles tres-benignes, pour moy pleines d'iniures, blasphemes & mocqueries.

Je vous salue venerable chef pour moy couronné d'espines, navré de tant de playes, tant de fois battu & frappé du roseau.

O doux & gracieux Iesus, ie saluë tout vostre corps tres-precieux pour moy flagellé, crucifié, mort & enseuely.

Je saluë vostre sang espendu pour l'amour de moy.

Je saluë vostre ame tres-noble, pour moy affligée & angoissée.

Je vous supplie, ô mon tres-cher Seigneur, par vos membres tres-saincts vouloir sanctifier les miens, lauer les taches & macules que ie leur ay faictes vsant mal d'iceux: & pour cette occasion ie vous supplie que vous me pardonniez, vous qui vivez & regnez és siecles des siecles, Amen.



156 PARADIS DES PRIERES,
*Oraison pour dire pendant que le Prestre fait la
confession generale : ou bien si vous aimez
mieux faire la mesme confession
avec luy.*

IE vous ay grandement offensé, Seigneur
mon Dieu, ie reconnois mes lourdes &
par trop euidentes fautes, & vous prie bien
humblement me vouloir pardonner. Fai-
tes-moy pardon, mon Dieu, afin que vous
ne me perdiez avec mes iniquitez, & qu'à
iamais me soient imputées mes offences,
ains que par vostre tres-grande misericor-
de & pieté vous me sauuez, combien que
i'en sois indigne. Et pour cela ie vous loue-
ray sans cesse tous les iours de ma vie, com-
me aussi vous donnent loüanges toutes
les biens-heureuses vertus des Cieux : à
vous, dis-ie, Seigneur, auquel seul appar-
tient gloire infinie, & honneur souuerain
és siecles des siecles, Amen.

*Al' introite de la Messe, Oraison
& sospirs.*

NOUS ne nous separerons de vous,
Seigneur, nous nous donnerôs bien
garde de vous quitter, car nous serons vi-
uifiez par vous, & par ainsi nous inuoke-
rons vostre tres-sainct Nom. Ayez souue-
nance de nous, Seigneur, selon vostre bon

plaisir, & selon la bonne affection que vous portez à vostre peuple : visitez-nous , & nous consolez en vostre salutaire. D'une tres-grande affection, & d'un desir embrasé, nous crierons & hauserons nostre voix iusques au Ciel, à la façon de nos Peres , & dirons : O Cieux, distillez maintenant vostre rosée d'enhaut, que les nuages découlent & espandent le iuste : que la terre ouvre son sein , qu'elle germe & produise le Sauueur. Seigneur, enuoyez-nous l'Agneau, Roy & dominateur de la terre, mō-
If. 16.
Psa. 84.
 strez-nous, & nous manifestez vostre misericorde, mon Dieu, & nous donnez vostre salutaire.

A celuy qui est assis sur le throsne & l'Agneau soit honneur, gloire & benediction, vertu & puissance, empire & seigneurie, és siecles des siecles, Ainsi soit-il.

Nous ne nous separerons aucunement de vous, Seigneur, vous nous donnerez la vie, & nous inuoquerons vostre tres-sainct Nom.

Oraison que l'on pourra reciter tandis que l'on chante le Kyrie eleison.

PEre tres-benin, Pere tres-pitoyable & misericordieux , ayez pitié & misericorde de moy, qui pour tous mes pechez,

158 PARADIS DES PRIERES,
& pour tous les pechez du monde, vous
offre la vie, la passion & la mort de vostre
Fils vnique. Je vous offre tout ce qu'il a
enduré en ce monde à mon occasion ; ie
vous offre son cœur tres-sainct, & conuer-
ty en miel pour la grandeur & suauité de
son amour. Je vous offre les merites de sa
tres-saincte mere, & de tous les Saincts, à
ce qu'en faueur d'iceux vous me pardon-
niez mes pechez, & que vous ayez pitié &
misericorde de moy, & qu'à vous en reuiē-
ne gloire és siecles des siecles, Amen.

Tres-doux Iesus, mon Seigneur & Re-
dempteur, ayez pitié de moy chetif & mi-
serable pecheur, par l'infinie multitude de
vos misericordes. Je vous rends graces
pour les bien-faits innumerables que i'ay
receus de vous, & que i'en reçois tous les
iours. Je vous rends graces pour vostre
tres-sacrée Incarnation, pour vostre tres-
pure natiuité, pour vostre tres-cruelle pas-
sion, pour les effusions de vostre sang pre-
cieux, & pour vostre honteuse & doulou-
reuse mort. Je vous supplie, tres-pitoya-
ble Seigneur, qu'il vous plaise me faire par-
ticipant de tous vos merites, à ce qu'estant
incorporé en vous, & fait vne mesme cho-
se avec vous par amour & imitation de vo-

estre tres-saincte vie, ie merite despendre & estre substanté de vous comme vn rameau de la vigne, puis que vous estes la vraye vigne, & la vie de tous vos fideles, dont vous appartient louange & empire par tous les siecles des siecles, Amen.

O saint Esprit, mon consolateur, aidez-moy, Seigneur, ie vous recommande mon ame, mon corps, & tout ce qui est mien: ie laisse & remets entre vos mains le progres & la fin de ma vie. Oâroyez-moy que iusques à l'extremité d'icelle ie perseuere à vostre iustice, faisant vraye penitence de mes pechez, & que ie prenne grandissime douleur & desplaisance d'iceux, auant que mon ame parte de ce miserable corps. Je connois fort bien Seigneur, que pendant que ie vis en ce monde ie suis aueugle, infirme, & que ie tombe avec grande facilité és lacs de mes affections, i'erre facilement & me fouruoye du droit chemin de vertu; ie suis aisément trompé & abusé. Et pour ce ie commets tout entre vos mains, me mettant totalement sous vostre protection & diuine sauuegarde. Defendez, Seigneur, ce pauvre seruiteur vostre de tous maux & dangers. Illuminez mon entendement, gouuernez mon ame,

160 PARADIS DES PRIERES,
dirigez mon corps, redressez mon inten-
tion, fortifiez mon courage contre la las-
cheté desordonnée de mon cœur, & con-
tre les scrupules innumerables qu'il ren-
contre. Oûtroyez-moy que ie vous aime
auec toute suauité & douceur, & qu'entie-
rement ie vous sois affectionné seruiteur,
accomplissant en tout temps & en tout lieu
vostre sainte & tres-agreable volonté. Et
vous soyez tousiours benit & remercié és
siecles des siecles, Amen.

*Al' Hymne des Anges, Gloria in excelsis
Deo.*

S. Aug.
liure de
les Me-
ditat.
ch. 33.

Tous les saints & humbles de cœur,
tous les esprits & ames des iustes, tous
les citoyens celestes & chacuns ordres des
bien-heureux esprits, humblement vous
adorans ô Dieu eternal, sans fin vous don-
nent honneur, gloire & loüange. Ces ci-
toyens celestes, ô Seigneur, vous loüent
en grande magnificence, & honorable-
ment deschantent vos grandeurs. L'hom-
me aussi pareillement, qui est vne grande
partie de vos creatures, vous donne loüan-
ge, comme maintenant ie fais le sembla-
ble, pauvre miserable pecheur que ie suis,
qui d'un extrême desir, & d'un amour sin-
gulier que ie vous porte, vous magnifie,
vous

vous loüe & fouhaitte ardemment de vous aimer d'un amour entier & parfait. O mon Dieu, ô ma vie, ma force, mon los & honneur, faites-moy digne, & me rendez capable de vous louer: Illuminez mon cœur, & donnez paroles à ma bouche, à celle fin que ce mien cœur ne pense qu'en vostre gloire, & que tout le iour ma langue ne chante que vos perfections & grandeurs.

Mais pour autant que la louange n'est ny bien seante, ny belle en la bouche de moy pauvre miserable pecheur, & à raison dequoy ie suis pollü & entaché de mes lèvres, ie vous supplie nettoyez mon cœur dedans & dehors: de sorte qu'en luy ne demeure & reste aucune souilleure, & me sanctifiez (ô tout-puissant sanctificateur) afin que ie sois rendu digne d'exalter & hautlouër vostre saint Nom. Receuez benignement, & ayez pour agreable ce sacrifice de mes lèvres, & de ma bouche, que ie vous presente de tout mon interieur, de tout mon cœur, & de toute ma pensée: & faites, ie vous supplie, qu'il paruienne à vous en odeur de souëfueté. Que vostre sainte memoire & bien-heureuse douceur possede toute mon ame, & la ravisse en l'amour des choses inuisibles, par Iesus-

162 PARADIS DES PRIERES,
Christ nostre Seigneur, qui est viuant & re-
gnant avec vous, & le S. Esprit és siecles
des siecles, Amen.

Aux Oraisons ou Collectes.

Grena-
de au 5.
liu. de
son
Memo-
rial.

Seigneur Dieu tout-puissant, Pere de
misericorde, Dieu de toute consolation
& douceur, ie vous rends graces infinies de
ce que vous nous auez donné la hardiesse,
& nous inuitez à vous demander miseri-
corde, disant par la tres-sacrée bouche de
vostre Fils bien-aimé: *Demandez, & vous
Mat. 2. obtiendrez; cherchez, & vous trouuerez; frap-
pez à la porte, & il vous sera ouuert.*

Psa. 46.

Esmeu donc de cét admirable & pitoya-
ble commandement, & appuyé sur cette
confiance, ie m'approcheray du throsne
de vostre Majesté & misericorde, & auray
recours à vous, vous priant humblement,
& suppliant de tout mon cœur, qu'il vous
plaise m'octroyer tout ce que ie vous de-
mande: c'est à sçauoir, que ie vous adore,
craigne & reuere. Je vous requiers pareil-
lement pardon & remission de tous mes
pechez, vraye contrition & entiere confes-
sion d'iceux. Faiçtes-moy aussi la grace de
n'y plus retouërner, & de n'en commettre
plus d'autres: & que par cy apres ie ne re-
tombe plus en peché, soit en ceux qui ius-

ques à present m'ont esté par trop accoustumez & familiers , soit en quelque autre maniere de peché que ie puisse estre. Et particulièrement ie vous requiers la force & vertu de pouuoir chastier mon corps, & dompter ma chair, brider ma langue, mortifier les appetits de mon cœur, recueillir & retirer les distractions & vagabondes pensées de mon imagination , afin qu'estant ainsi renouuellé & reformé, ie merite de vous estre temple vif, & logis bien préparé, auquel il vous soit agreable faire vostre demeure.

Octroyez-moy pareillement, Seigneur, toutes les vertus par lesquelles cettuy vostre temple & habitation puisse non seulement estre purifié, mais encore enrichy & bien orné: à sçauoir la crainte de vostre S. Nom, esperance tres-ferme & inuincible, tres-profonde humilité, perpetuelle patience & tolerance inseparable, claire discretion, pauureté d'esprit, parfaicte obeïssance, continuelle force, & diligence tres-prompte en toutes choses, pour supporter toutes peines & traux quelconques pour vostre seruice, & sur tout vne tres-ardente charité, tant enuers vous, comme à l'endroit de mon prochain.

Donnez-moy, Seigneur, la grace que finalement ie puisse perseverer iusques au dernier periode de ma vie en toutes ces choses, afin que vous estant l'autheur, le promoteur, & la consommation de mon salut; ie puisse en fin paruenir au lieu, où vous vivez & regnez avec vostre Fils, & avec le S. Esprit, en tous les siecles des siecles, Amen.

Al' Epistre, Oraison.

S. Aug.
en son
liure
appellé
l'Es-
chelle
de Pa-
radis.

Seigneur Dieu, Pere celeste & eternal, qui ne pouuez estre veu & contemplé, sinon de ceux qui ont le cœur monde, qui sont purs & nets de tout peché: i'ay soigneusement recherché en lisant, & ay mis peine de trouuer par vne frequente & assidue meditation, en quelle sorte ie pourrois acquerir cette pureté & mundicité de cœur, afin que moyennant icelle ie puisse pour le moins en partie vous connoistre. **Pl. 38.** Je cherchois vostre face, Seigneur, & par vne longue espace de temps ie meditois en mon cœur, & en cette mienne Meditation le feu de deuotion & d'amour s'est embrasé: pour cela mon desir est creu encores dauantage, mon affection s'augmente tousiours de plus en plus de vous voir & connoistre: car lors que le pain de la sainte

Escripture nous est decoupé & départy par vostre liberalité, en la fraction duquel vous estes entendu & conneu: de tant plus que par cette diuine & sainte Escripture, ie vous connois, de tant plus encores ie desire vous connoistre: non pas maintenant en l'esforce & couuerture de la lettre; mais au sens mystique, & par certaine experience.

Ie ne requiers toutesfois cela, par aucun merite de vertu qui soit en moy dauantage qu'en quelque autre; mais appuyé & me confiant en vostre bonté & misericorde: Car ie me confesse vrayement coupable, & proteste que ie suis grand pecheur, & indigne de cette vostre faueur: si est-ce toutesfois que les petits chiens amassent & recoiuent les miettes qui tombent de la table de leurs maistres & Seigneurs. Ostroyez-moy cette grace, Seigneur, comme les arres & gages de l'heritage futur & eternal, pour le moins distilez sur moy vne petite gouttelette de cette pluye & rosée celeste, par le moyen de laquelle ie puisse refrigerer ma langue, & appaiser la soif vehemente de mon ame, car ie suis tout embrazé & languissant de vostre amour, Amen.

An Graduel & au traitt, si on le recite.

O Dieu Pere de nostre Seigneur & Redempteur Iesus-Christ, vostre Fils vnique & bien-aimé, Dieu des Patriarches, Dieu des Prophetes, Dieu des Apostres, Dieu des Martyrs, Dieu des Vierges, & Dieu de tous les fideles & croyans: le vous supplie, ô Seigneur & Pere de Maiesté eternelle, qui sur la fin & consommation du monde, viendrez iuger les viuans & les morts; qui en la fin de temps auez eu pitié & misericorde de nous, nous enuoyant Iesus-Christ vostre Fils nostre Seigneur & Sauueur, conceu du saint Esprit, & né de la Vierge Marie, par le moyen duquel Redempteur, vous nous auez deliuré du peril tres-eminent de la mort qui nous estoit prochaine.

Je vous supplie, mon Seigneur, de me porter ayde & faueur: secourez-moy mon Dieu, & ne vueillez point me iuger & condamner selon mes œuures & demerites: car à la verité ie n'ay pas obey, comme ie deuois, à vos saints Commandemens, c'est pourquoy maintenant i'en ay douleur & repentance, & en fais la confession en la presence de vostre diuine Maiesté, ie m'accuse de tous mes forfaits & pechez, afin

que vous, qui estes amateur de penitence, me vueillez pardonner. Et tout ainsi que Dauid Prophete Royal vous prie, disant : Seigneur, pour l'amour de vostre nom effacez tous mes pechez ; ainsi pareillement ie vous supplie moy chetif & miserable pecheur, & prie vostre Majesté qu'il vous plaise nettoyer & abolir mes offences.

Faites-moy de grace cette faueur, ô mon Dieu, qu'avec vne foy ferme & entiere, avec vn esprit pur & impollu, avec vne deuotion ardente, avec vne delectation embrasée, & d'une operation continuelle, ie puisse constamment perseuerer en vostre Eglise sainte & sans macule, & me deliurez des peines eternelles, & des tourmens que vous auez preparé pour les meschans. Au nom de Iesus-Christ nostre Sauueur, par lequel est à vous honneur, loüange, vertu, puissance & gloire és siecles des siecles, Amen.

Au Cantique Alleluya, si on le dit.

NOUS vous rendons graces immortel- Ap. r.
les, Seigneur Dieu tout-puissant, qui estes, qui estiez, & qui serez par icy apres à iamais : pour autant que vous auez receu grâde puissance, force & vertu, & auez obtenu le Royaume & l'Empire du monde.

Vous estes bien digne, ô nostre Dieu & Seigneur, de prendre & receuoir gloire, honneur & vertu, car ç'a esté vous qui auez fait & créé toutes choses : à cause que par vostre volonté tres-sainte elles estoient & ont esté créées par vostre bon plaisir.

A l'Euangile.

*Iean le
Febure
en ses
prieres
Chre-
stiennes.*

TRes-benin & tres-doux Sauueur Iesus-Christ, c'a esté de vostre pure grace & singuliere bonté que vous nous auez enseigné & monstre la volonté de vostre Pere, & nous auez reuelé les secrets de vostre sainte doctrine : & par la mesme clemence & misericorde, vous auez fait exprés commandement à vos Apostres de prescher & annoncer vostre sainte Euangile à toutes les nations & peuples de la terre, pour la consolation & pour le salut des hommes. Car cettuy vostre saint Euangile est la vertu de Dieu, laquelle peut conseruer nos ames en la vie de grace, & les faire arriuer au port salutaire de la patrie eternelle. C'est le pain vis & nourrissant, qui conforte & corrobore nostre esprit : c'est le glauiue par lequel nous repoussons & pouuons vaincre nostre ennemy infernal : c'est la guide pour conduire nos pieds, & pour nous faire marcher par la bône voye.

Tres-humblement ie vous prie , mon
tres-doux & bening Sauueur , qu'il vous
plaife illuminer les tenebres de mon cœur,
par cette vostre sainte doctrine : esclairez
mon entendement, ouurez & rendez en-
tentiues mes oreilles interieures aussi bien
que celles du corps , par la grace du benoist
saint Esprit, afin que ie puisse entendre vo-
stre sainte parole d'un cœur compunct &
humilié , & qu'avec vne promptitude &
obeissance d'esprit ie la puisse comprendre
& accomplir, à cellē fin que finalement en
toute patience cēte semence celeste puisse
germer en mon ame, & rapporter vn fruit
grand & inestimable, afin que mon enten-
dement soit illustré & instruit en verité,
pour faire & executer les choses bonnes &
vertueuses , pour fuir & éuiter celles qui
sont mauuaises, damnables & vicieuses, de
façon que par moy, vostre honneur & vo-
stre gloire soit promulguée & multipliée,
que mon ame obtienne salut , que le diable
nostre ennemy mortel soit terrassé, & par-
faitement vaincu, que sans coulpe & pe-
ché ie puisse paruenir , & me représenter
deuant le throsne de vostre iuste & redou-
table iugement , & que par vous ie puisse à
iamais iouir de la gloire eternelle, Amen.

Dieu eternal & tout-puissant, ie (pauvre & miserable pecheur que ie suis) viens vers vous, à celle fin que ce iourd'huy ie renouuelle l'alliance & l'accord que i'ay faict avec vous au Baptisme, & que derechef ie repete, deuant la presence de vostre diuine Majesté, la foy donnée, receüe & promise.

Ie croy donc tres-fermement de cœur, & confesse de bouche tout ce que vostre Fils bien-aimé Iesus-Christ, & son Espouse l'Eglise instruite & enseignée par le S. Esprit, m'ont proposé & commandé de croire, soit les choses que desia expressément ie sçay, connois & entens, soit celles qui me sont encores inconnues.

Ie confesse de bouche, & proteste que ie croy indubitablement tous les articles du Symbole Apostolique, & croy en l'Euangile de Iesus-Christ qui a esté presché & annoncé par tout le monde vniuersel: en laquelle foy par vostre grace i'ay esté appelé, né & baptisé. Ie renouuelle derechef ce iourd'huy cette croyance de foy; ie me soufmetts & oblige maintenant encores à icelle: & promets que par cy-apres ie ne pourray estre en rien qui soit séparé &

retiré d'icelle, iacoit que tout le monde avec tous ses tyrans & tourmens se bandast vnanimement contre moy, iacoit que les diables & les hommes s'elueassent d'vn mesme consentement contre cette vostre fidele creature: Je ne me separeray iamais d'icelle, iusques à tant que vous, mon Empereur & mon Roy, me fassiez commandement de delaisser & quitter la station, en laquelle vous m'avez constitué, & iusques à tant que vous m'avez parfaitement quitté & absout de cette promesse & Sacrement, iusques à tant que vous m'avez appelé à vous, & introduit en la celeste patrie, où il n'y a plus aucune foy, mais vne pleine & claire vision de ce que nous tenons maintenant par la foy. Partant, ô mon Seigneur, ie vous offre mon esprit & mon entendement en sacrifice perpetuel, & en seruice de cette foy vniuerselle.

Que s'il aduenoit, ou par tentation du diable, ou par mon ignorance que ie dise quelque chose au preiudice de cette foy, ou que ie pense quelque chose contraire à icelle: ie le reuoque dès à present, comme si telle chose n'auoit esté dicté ou pensée; ie veux & entens que cela soit nul; car ie ne donne à iamais consentement a tel dit &

172 PARADIS DES PRIÈRES,
penſer, le ſçachant & voulant bien d'un
vouloir & ſcience entiere & raifonnable:
non pas que ie vueille preſumer cecy de
moy-meſme; mais m'appuyant ſur voſtre
grace de laquelle ſecouru & aidé, ie pour-
ray toutes choſes, à voſtre plus grande
gloire & honneur. Qui vivez & regnez
eternellement Dieu en Trinité, és ſiecles
des ſiecles, Amen.

*Quand le Preſtre ſe preſentera à l'oblation,
priez ainſi:*

Can-
ſius en
ſon En-
chiri-
dion.

SEigneur Ieſus-Chriſt, Fils du Dieu vi-
uant, & de la pure Vierge, en memoire
& loüange de l'immènſe charité, laquel-
le a fait que vous vous eſtes du tout em-
ployé & offert pour nous ſur l'Autel de la
Croix. Je vous offre ce preſent ſacrifice de
la Meſſe, comme auſſi tous autres, qui ſe
doiuent aujour d'huy celebrer en tout le
monde, par les mains des Preſtres, afin que
vous les recommandiez à voſtre Pere eter-
nel, comme vous-meſme mourant en la
Croix, vous avez offert voſtre ſacré corps,
& précieux ſang pour le ſalut du monde, &
l'avez recommandé au meſme Pere cele-
ſte, pour le ſalut & vtilité de l'Egliſe. Que
l'oblation de voſtre meſme corps & ſang,
laquelle en myſtere eſt icy renouuellée, &

qui se fait d'une maniere non sanglante, sous les especes du pain & du vin, obtienne, s'il vous plaist, son fruit : afin que de là les viuans impetrent grace, les fideles trespassez repos : & ceux pour lesquels l'on offre ce sacrifice, misericorde, & la vie eternelle, & vous prie que ce mesme sacrifice de l'Eglise, lequel ne s'offre iamais sans le certain fruit de vostre Passion & mort, soit pour les innumerables bien-faits que nous auons receu de vous en action de graces, & pour nos infinis pechez commis, & les biens que nous auons iusques icy negligé, & pour les peines qui nous sont deües, propitiation & satisfaction salutaire.

Admonition deuant la Preface.

Lors que nous assistons au lieu saint pour S. C. y.
 faire nos oraisons (freres tres-chers & prieai.
 bien-aimez en Iesus-Christ) nous devons soigneusement estre vigilans, & nous employer à faire nos prieres de tout nostre cœur, & avec la plus grande attention & sollicitude qu'il nous sera possible. Que toute cogitation charnelle, que toute pensée mondaine se separe & s'esloigne bien loing de nous : & prenons bien garde, que

174 PARADIS DES PRIERES,
*nostre esprit ne pense & ne soit occupé en autre
chose, sinon seulement à ce qu'il prie & requiert
à Dieu.*

*C'est pourquoy le Prestre deuant son oraison
& consecration des saincts mysteres, usant d'une
exhortation & preface, prepare les esprits, &
l'attention des fideles assistans, quand il dit.
Sursum corda : afin de nous admonester d'esle-
uer en Dieu nostre cœur & nostre esprit. Et lors
que l'assistance du peuple respond : Habemus
ad Dominum, ils protestent tous, qu'ils ne
veulent, & ne doivent penser autre chose sinon
à Dieu, & ce qui appartient au seruice du Sei-
gneur.*

A LA PREFACE.

S. Iean
Chry-
sostome
en sa
Lytur-
gie.

VRayement c'est chose digne & tres-
iuste de vous louer, de vous benir, de
vous rendre graces, & de vous adorer en
tout lieu de vostre puissance & domina-
tion; car vous estes vn Dieu ineffable, in-
uisible, incomprehensible; vous estes tou-
siours le mesme Dieu sans mutation &
changement; vous estes en existence tou-
siours mesme, & vostre Fils vnique & le
sainct Esprit. Vous nous auez tiré & pro-
duit du non estre à vn estre parfait: & lors
que nous estions tombez, vous nous auez
releué, & n'aez aucunement cessé de

chercher tous les moyens, & de faire tout ce qu'il vous a esté possible, iusques à tant que vous nous auez reconduits au Ciel, fait entrer en gloire, & donné le Royaume aduenir, de si long-temps désiré. Pour toutes ces choses nous vous rendons deuotes actions de graces, à vous, & à vostre Fils vnique, & au saint Esprit.

Nous vous rendons pareillement graces pour ce Sacrement, lequel nous vous supplions vouloir accepter & receuoir en odeur de suauité des mains du Prestre, qui s'est présenté à vostre saint Autel, ne l'ayez à mespris: mais que vostre dignation & Majesté soit si fauorable que de le receuoir, jaçoit que vous soyez assisté & enuironné de mille millions d'Ange & Archanges, iacoit que les troupes des Cherubins, & que les bandes innumerables des Seraphins qui ont six aisles, qui avec leurs plumes spirituelles sont esleuez & volent sans cesse, aillent chantans & recitans vos diuines louanges, & criers à haute voix vn Hymne de triomphe, & vn Cantique de victoire, disent.

Al'Hymne des Anges.

VOus estes Sainct, ô Roy de tous les S. Ger-
siecles: & si vous estes le donateur de main,
Arche-

uesque
de Cō-
stanti-
nople
en ses
Theo-
rites.

toute sainteté; car vous estes puissant en toutes choses, qui distribuez à vos creatures & seruiteurs fideles les dons & graces de sainteté.

Aussi est Saint vostre Fils vnique nostre Seigneur & Redempteur Iesus-Christ, ineffablement & incomprehensiblement engendré de vous deuant tous les siecles.

Saint est pareillement vostre S. Esprit, qui est totalement remply de sainteté, qui recherche & penetre toutes choses, mesme les plus profonds Sacremens & mysteres de vostre Diuinité, qui est Dieu, par lequel vous sanctifiez toutes les choses vniuerselles, soit celles qui sont au Ciel, soit celles qui sont sur la terre.

Durant le sacré Canon.

Tiré de
diuers
Au-
teurs.

Seigneur Dieu, viuificateur de toutes choses, distributeur de tous biens, qui auez donné aux hommes nostre Seigneur Iesus-Christ, esperance bien-heureuse de la vie eternelle: faites-nous dignes, à ce qu'en toute sainteté nous puissions accomplir & paracheuer ces saints mysteres, & les vous offrir en odeur de suauité eternelle, & que par ce moyen nous puissions en fin auoir iouissance de la felicité & beatitude immortelle. Faites que nous soyons
toufiours

tousiours couverts de vostre toute-puissance, & comme à l'ombrage de vos aïles, & par vous conduits en la lumiere de verité, afin qu'à iamais nous puissions vous rendre gloire & action de grace.

Ie vous supplie, pere tres-bening & pitoyable, par celuy qui est le souuerain Prestre, le Sacrificateur, & le sacrifice de cette action tres-sainte, & de ces mysteres terribles & effroyables : ie prie, dis-je, vostre clemence & bonté, que cette presente oblation me soit vn remede tres-efficace & souuerain contre toutes les playes de mon ame, & contre toutes les blessures encouruës par mes pechez, vne medecine singuliere, qu'elle soit l'accomplissement parfait de toute grace & vertu, qu'elle me soit tant en la vie comme en la mort, vn tres-fort rempart & munition tres-assurée, contre toute sorte de perils & dangers : finalement qu'elle me soit vn appuy bien solide & force inuincible, pour en fin me faire arriuer apres la victoire de mes ennemis, au port de la vie eternelle.

Ie ne demande pas ces choses tant seulement pour moy ; mais aussi ie vous supplie, Saint Iacques en sa Lyturgie. mō Dieu, que cette hostie soit en remission des pechez, à la vie eternelle, pour sanctifi-

cation des ames, & des corps de tous vos fideles, & qu'elle nous serue de semence, à ce que nous puissions produire & rapporter les fruiçts de bonnes œuures.

Oraison pour toute sorte de personnes.

Sainct
Basile
en sa
Lytur-
gie.

Ayez souuenance, Seigneur, de vostre sainte Eglise Catholique & Apostolique, laquelle est depuis l'un iusques à l'autre bout du monde: & pacifiez celle que vous auez faite, acquise & sanctifiée par le sang tres-glorieux de vostre Fils Iesus Christ.

Par apres, souuenez-vous, Seigneur, de nostre saint Pere le Pape N. de nostre Archeuesque ou Euesque N. baillez-les & les donnez à vostre sainte Eglise, & à leurs troupeaux fideles, entiers, venerables, sains & bien dispos, tant du corps que de l'esprit, de longue vie, s'aquittans deuëment de leurs charges, & administrans vostre sainte parole de verité en toute fidelité & diligence.

Ayez pareillement souuenance de nostre tres-pieux, tres-fidele, & tres-Christien Roy N. lequel vous auez ordonné pour regner & auoir domination sur nous, & aussi de son Palais, de toute sa maison & famille Royale, & de ses armées: coron-

nez-le de la couronne de bonne volonté, & l'armez des armes de vertu & verité. Donnez-luy vn Royaume pacifique, & vn Empire enuironné de paix, afin qu'en la tranquillité de paix d'iceluy, nous puissions mener vne vie paisible en repos, & souuerainement tranquille.

Souuenez-vous, Seigneur, de tous vos fideles : ayez pitié, & faites misericorde à tout vostre peuple Chrestien. Defendez le Clergé, qu'il vous vienne à plaisir de conferuer & maintenir les personnes Religieuses & Monastiques en vostre saint seruice: aidez à ceux qui trauaillent, & confortez ceux qui sont en grand labeur: donnez consolation à ceux qui sont tristes, restituez la santé, & du corps & de l'esprit aux malades: distribuez aux pauvres & necessiteux toutes les choses necessaires à l'entretene-
ment de l'homme interieur & exterieur: faictes que les Pelerins, exiles & bannis puissent en prosperité & santé retourner en leur douce patrie: donnez cette faueur à tous ceux qui sont au peril des eaux, & parmy les furieuses tourmentes de la mer courroucée, d'arriuer heureusemēt au port de salut par eux desiré, selon leur souhait & volonté: & eslargissez aux femmes encein-

Saint
Martin
Pape.

tes, & qui sont en trauail par vostre clemence & misericorde, la ioye de leur fruit.

Desliez ceux qui sont captifs & enchaînez, & deliurez ceux qui sont detenus estroittement prisonniers: Pardonnez selon vostre bonté accoustumée, ô Pere saint & tres-misericordieux, à tous ceux avec lesquels nous auons offensé, & lesquels nous auons induits & attirés à peché: & nous faictes pareillement à tous misericorde. Rendez, ô Pere tres-gracieux & benin, à ceux auxquels nous pouuons auoir defraudé & pris quelque chose: pacifiez ceux que nous auons troublé, resiouïſſez ceux que nous auons fasché & contristé: guerissez ceux que nous auons blessé, enseignés ceux que nous auons mal instruit & scandalisé.

Corrigez les errans, ramenez au droit chemin les desuoyez: conuertissez les infideles à la foy, faictes retourner les Schismatiques à l'vnité de nostre mere sainte Eglise, & leur monstrez la lumiere de vostre verité: donnez aux pecheurs vraye & entiere penitence, & faictes que les iustes puissent finalement perseuerer en leur iustice, en leur bon propos & actions vertueuses.

Donnez abondance de tout bien à tous nos parens, amis & ennemis, à nos confreres, alliez, familiers, bien-faïcteurs, & à tous ceux qui prient Dieu pour nous, & à tous ceux qui se sont recommandez à nos prieres, qui ont esperance en nos oraisons. Donnez à tous ceux-là tout bien & grace, tant du corps que d'esprit, & les defendez de tout mal : faïctes qu'ils perseuerent constamment & fidelement en vostre saint service iusques à la fin, & apres le cours de cette miserable vie, faïctes-nous tous paruenir à vous qui estes nostre vraye patrie, nostre recompense, nostre salaire eternal, nostre gloire, nostre souuerain bien, & nostre derniere beatitude, Amen.

ORAIISON DE S. THOMAS
d'Aquin, à l'eleuation du saint Sacre-
ment de l'Autel.

S Ecrette Deité qui vous cachez vrayment
Sous ce pain, ie vous louë & adore humble-
ment,

*A vous s'assubiettit de tout mon cœur le temple,
Car il defaut du tout alors qu'il vous contemple.
En vous se trompe l'œil, le goust, l'attouchement,
Mais par l'onïe seule on croit assurement :*

182 PARADIS DES PRIERES,

*Je croy tout ce qu'a dit le Fils de Dieu supreme,
Il n'y a rien plus vray que la verité mesme:*

*En la Croix se cachoit la seule Deité,
Elle se cache icy avec l'humanité.*

*Croyant & confessant les deux, comme il com-
mande,*

Ce que le bon larron demanda ie demande,

Ainsi que saint Thomas les playes ie ne voy:

*Je vous tiens toutesfois pour mon Dieu & mon
Roy.*

En vous de plus en plus i'aye ma confiance,

*Qu'en vous soit mon amour, en vous mon espe-
rance:*

O vray Memorial de la mort du Seigneur,

Qui du vray pain de vie est à l'homme l'auteur.

Mon ame de vous seul vivant, rendez heureuse,

Soyez-luy, s'il vous plaist, pasture sauoureuse:

*Saint Pelican Iesus, mon Dieu & mon Sau-
ueur,*

*Vostre pur sang me lave immunde & plein
d'horreur.*

Je dy vostre pur sang, dont une seule goutte

Pourroit des vils pecheurs laver la race toute.

Iesus lequel ie voy à cett' heure latent

Et voilé, quand seray-ie en mon desir content,

Que vous voyant un iour à face descouverte,

Vostre gloire me soit heureusement ouuerte?

Adoration du S. Sacrement.

IE vous salue, & vous adore vray corps, Esheures du Concile de Trente.
 Inay de la Vierge Marie, qui vrayement
 auez souffert & enduré pour moy, qui real-
 lement & de fait auez esté immolé en la
 Croix pour le salut des hommes. Le costé
 duquel ayant esté transpercé d'une lance, a
 espādū sang avec eau pour la Redemption
 du genre humain. Soyez-nous tres-doux,
 clement & fauorable à l'examen tres-ri-
 goureux & estroit, qui sera fait à l'heure de
 nostre mort. O doux Iesus, qui estes la mes-
 me douceur : ô tres-piteux & debonnaire,
 ô Iesus fils de Marie, ayez pitié de moy, &
 me faictes misericorde, Amen.

*Oblation du Fils au Pere pour nos pechez, la-
 quelle se pourra faire apres l'elevation
 du saint Sacrement.*

TRes-clement & souuerain Createur Grena-
 de li s.
 du Me-
 morial,
 prinse
 des Me-
 ditar.
 de S.
 August.
 du Ciel & de la terre, ie, qui suis le
 plus vil & chetif de tous les pecheurs, en-
 semble avec l'Eglise vous offre ce tres-pre-
 cieux sacrifice, par dessus lequel il n'y en a
 point qui vous soit agreable, c'est à sçauoir
 vostre Fils vnique Iesus-Christ nostre Sei-
 gneur, pour tous les pechez que i'ay com-
 mis depuis mon enfance iusques à present,

184 PARADIS DES PRIÈRES,
& pour tous les benefices que i'ay receu de
vous.

Regardez (Roy tres-misericordieux)
celuy qui endure. N'est-ce pas cét enfant,
que vous offristes à la mort , pour le reme-
de de l'ingrat seruiteur ? N'est-ce pas cét
amour immortel de la vie , lequel estant
conduit comme vn petit agneau à la bou-
cherie , ne refusa d'endurer vne si cruelle
mort ?

Ah, ah, mon Dieu & Seigneur, tournez
les yeux de vostre Majesté vers cette œu-
re d'ineffable charité & pieté. Regardez
vostre tres-cher enfant estendu sur ce dur
bois, qui espond le sang de ses mains inno-
centes : & vous plaîse pardonner les mes-
chancetez que les miennes ont commises.
Considerez sa poictrine nuë , & cruelle-
ment navrée du fer d'vne lance : & me re-
nouvellez en la fontaine sacrée, que ie croy
fermement saillir de cette playe. Regardez
ses pieds tres-sacrez , qui iamais n'ont che-
miné par la voye des pecheurs, percez avec
durs cloux : & vueillez adresser les miens
à celle de vos commandemens.

Ie vous supplie, ô Roy des Saints , par
ce Saint des Saints , par ce Saint mien
Redempteur, que ie sois vny avec son es-

prit, puis qu'il n'a pris à ennuy de s'vnir avec ma chair. Ne confidez-vous, ô Pere pitoyable, la teste enclinée de vostre Fils tant aimé? son blanc col courbé par la presence de la mort? Regardez, ô tres-clemēt Createur, en quel estat est tout le corps de vostre tres-cher enfant: & ayez misericorde de vostre pauvre seruāt par luy racheté.

Voyez comme sa poiſtrine nuë est paille & liuide, son costé vermeil & sanglant, son costé vermeil & sanglant, son estomach sec & retiré, ses yeux lassez & trauaillez, sa royale figure blesme, ses bras estendus & tirez, ses iambes pendantes: & voyez finalement comme ses pieds transpercez arrousent la terre des ruisseaux de sang diuin.

Regardez, Pere glorieux, les membres froissez de vostre tres-aimé Fils, & ayez recordation des miseres de moy vostre tres-vil seruiteur. Regardés le tourment du Redempteur, & pardonnez la faute de celuy qui est racheté. Il est nostre fidele Aduocat deuant vous, ô Pere tout-puissant. Il est ce souuerain Prestre qui n'a besoin d'estre sanctifié par le sang d'aucune chose, puis qu'il reluit assez baigné au sien. Il est ce sacrifice parfait & agreable, offert & accepté en odeur de suauité. Il est cēt Agneau

sans macule, qui s'est tousiours tenu en la presence de ceux qui luy ostoient la vie, lequel tourmenté de verges & battures, chargé de vilains crachats, iniurié & persecuté d'opprobres, n'a iamais ouuert la bouche. C'est celuy qui n'ayant commis peché, a enduré pour les nostres, & a guéry nos playes par les siennes.

Ah, ah, & vous, ô homme sur tous, beau, ieune, parfaict & accomply, qu'avez-vous fait pour estre ainsi mal traicté? Qu'avez-vous commis, ô Agneau tres-innocent, pour estre ainsi iugé? Quelles ont esté les fautes qui ont causé vostre condamnation? A la verité, Seigneur, ie suis la playe de vostre douleur: ie suis l'occasion de vostre mort, ie suis la cause de vostre condamnation: ô miserable iugement & dispensateur de Dieu! l'homme meschant fait le peché, & le bon emporte & reçoit le chastiment: le coupable, qui fait l'offense, est absous, & l'innocent est puny, la peine que merite le seruiteur, est soufferte par le maistre.

O Fils de Dieu, iusqu'où est descenduë vostre humilité? iusqu'où s'est estenduë vostre charité? iusqu'où a penetré vostre amour? iusqu'où est arriuée vostre compassion? I'ay fait le mal, & vous en estes

chastié : c'est moy qui ay commis le peché, & vous vous submettez au tourment, & à la peine qui luy est deuë. Je me suis enorgueillly, & vous vous estes humilié : i'ay esté désobeïssant, & vous obeïssant iusques à la mort, auez payé la coulpe de ma désobeïssance. Voila (ô Roy de gloire) voila vostre pieté & mon impiété, voila vostre iustice.

Voyez donc, Pere eternal, comme vous deuez auoir misericorde de moy, puis que si deuotement ie vous ay offert la plus precieuse chose qui se pourroit offrir. Je vous ay présenté vostre tres-cher Fils, & choisi & retenu pour mon fidele Aduocat.

Receuez de vos yeux gracieux & sereins le bon Pasteur, & regardez la brebis esgarée, qu'il vous rapporte dessus ses espaules. Je vous supplie par cette oraison, ô Pere pitoyable, me faire la grace que ie merite l'auoir pour Aduocat, puis que de vostre grace sans aucun mien merite, vous le m'auiez donné pour Redempteur, Amen.

A l'Oraison Dominicale.

PEre celeste, tout-puissant & eternal, Bothé-
 qui par vostre Fils vnique nostre Sei- sis en
 gneur Iesus-Christ, nous auez donné la son En-
 forme & maniere de prier, lors qu'il pres- chiri-
 dion.

188 PARADIS DES PRIÈRES,
crit & bailla à ses bien aimez Disciples vne
certaine methode de vous inuoyer en
toute necessité, laquelle forme de prier
est parueni iusques à nous : & qui aussi
nous auez appris par la bouche du mesme
Redempteur, que vous cherchez des vrais
Orateurs, qui vous adorent & supplient en
esprit & verité.

Et nous maintenant pauures & misera-
bles pecheurs, remplis de mensonge, &
vuides d'esprit de verité, nous vous prions
comme nostre Pere celeste, par le mesme
vostre Fils Iesus-Christ, qui est la vraye &
parfaicte verité, à ce que pour l'amour de
luy vous espondiez sur nous en toute abon-
dance vostre saint Esprit, lequel prions
nous adopter & mettre au nombre des en-
fans, desquels vous estes le Pere, à ce qu'il
subuienne par sa faueur à nostre imbecilli-
té trop infirme, à ce qu'il nous enseigne ce
que nous deuons prier, & la maniere en la-
quelle nous deuons la demander, selon vo-
stre tres-sainte & plus agreable volonté,
& ce par Iesus-Christ nostre mesme Sei-
gneur & Sauueur, avec lequel, & avec le
mesme saint Esprit, vous est deuë toute
gloire & benediction és siecles des siecles,
Amen.

Oraison tres-deuote de sainte Gertrude, qu'elle auoit de coustume reciter tous les iours.

MOn Seigneur Iesus, donnez-moy la grace d'aspirer à vous de toute mon affection, d'un desir entier & parfait: & avec vne ame sitibonde, & en vous respirer, qui estes tant doux & suau. Faites aussi (de grace) que tout mon esprit, & tout ce qui est dedans moy souspire sans cesse apres vous. O Iesus-Christ tres-misericordieux: effigez dedans mon cœur vos sacrées playes, & les y escriuez de vostre precieux sang: à ce qu'en icelle ie lise les douleurs que vous avez endurées pour moy, & l'amour extrême que vous m'avez porté: & que la memoire d'icelle continuellement demeure au plus secret de mon cœur, afin que par ce moyen ie sois excité à auoir compassion de vos douleurs, & aussi que le feu sacré de vostre dilection soit allumé en moy. Donnez-moy pareillement qu'en toute creature ie ne trouue goust ny faueur: mais que en vous seul mon cœur trouue tout plaisir & douceur.

A l'Agnus Dei.

Agneau de Dieu, qui ostez & effacez
les pechez du monde, regardez sur

D'un
Missel
Gothi-

que, ef-
crist à la
main.

nous de l'œil de vostre misericorde, & selon la multitude d'icelle, octroyez-nous pardon & remission de nos offences. Vous qui estes le Prestre & Sacrificateur souverain, auez voulu estre l'hostie & le sacrifice: & vous qui estes nostre Sauueur & Redempteur, auez pareillement voulu estre nostre recompense & salaire. Preseruez donc de tout mal & danger, ceux que vous auez racheté par le prix de vostre sang precieux.

Au baiser de la paix.

Du
mesme
Missel.

ACcomplissez parfaitement, Seigneur, les vœux & desirs de ceux, qui d'affection de cœur vous supplient: exaucez les larmes, & souspirs des pecheurs & penitens.

Baisez-nous du baiser de vostre bouche pacifique, ô nostre vray Maistre & Seigneur, afin que nous qui receuons spirituellement ce sacrifice & holocauste, nous puissions en ce monde auoir la paix, que nous esperons obtenir eternellement,
Amen.



ADVIS POVR LA COMMV-
nion spirituelle.

IL estoit expressement commandé du temps des Apostres, & de la primitive Eglise, que tous ceux qui assisteroient au redoutable & diuin sacrifice de la Messe, eussent à communier sacramentellement, & n'estoit permis de s'y trouuer, à celuy qui ne vouloit communier. C'est pourquoy le Pape Anaclete auoit fait cette ordonnance. La consecration estant paracheuée, dit-il, que tous ayent à communier: & ceux qui ne voudront point communier seront priuez de l'entrée des lieux saincts & sacrez. Car ainsi l'ont ordonné les Apostres, ainsi l'a tenu & obserué, tient & obserue la sainte Eglise de Rome.

Or cecy estoit bien conuenable au petit nombre des fideles & Chrestiens qui estoient en ce temps, afin qu'ils fussent plus forts pour planter les premieres racines & fondemens de cette nouvelle Eglise. Mais apres le nombre des Chrestiens venant à croistre, & s'augmenter de iour à autre, & la deuotion feruente venant à diminuer, ce qui estoit auparauant exprez commandement, a commencé à n'estre plus que conseil, & ce qui au precedent estoit accompli tous les

192 PARADIS DES PRIERES,
iours, a esté puis apres en usage seulement les
iours du saint Dimanche.

Après cela, il fut ordonné du temps du Pape
Fabian, que pour le moins tous les fideles com-
munieroient trois fois tous les ans: auquel com-
mandement & ordonnance n'estant par apres
plainement satisfait par les fideles, à raison que
la charité & amour de Dieu se refroidissoit de
plus en plus, il fut derechef arresté & fait com-
mandement au Concile de Latran, qui fut cele-
bré sous le Pape Innocent 3. que tous & vn cha-
cun des fideles de l'un & l'autre sexe, si tost
qu'il auroit atteint l'aage de parfaite raison &
discretion, eust à communier en toute reueren-
ce, tout au moins vne fois tous les ans, & rece-
voir deuotement à Pasques le saint Sacrement
de l'Eucharistie, si ce n'estoit que telle personne
voulust totalement, durant sa vie estre debou-
tée de l'Eglise, & priuée de l'entrée d'icelle, &
mourant estre frustrée de la sepulture Chre-
stienne.

Neantmoins en tout temps l'on admettoit les
Chrestiens, & leur permettoit-on d'entrer en
l'Eglise, iacoit qu'ils ne fussent preparez pour
communier sacramentellement, à celle fin
qu'ils fissent prieres & oraisons à Dieu,
qu'ils peussent recevoir la paix, qu'ils re-
ceussent la benediction avec les autres, &
qu'ils

qu'ils communiasent au moins spirituellement.

Or ceux-là communient spirituellement, qui oyans la Messe, faisans deuotement prieres, & adorans en toute reuerence Iesus-Christ, au tres-sainct & admirable Sacrement de l'Autel, pensent sans intermission à iceluy, meditent de luy, & d'un esprit embrasé d'amour, & de deuotion, desirent ardemment le receuoir : & qui avec une sainte emulation, portent enuie au Prestre, & aux autres qui reçoient sacramentellement la sacrée Eucharistie, estans des-plaisans en eux-mesmes de ce qu'ils ne se sont disposez pour le receuoir en la mesme sorte comme les autres.

ORAISON DEVANT LA COMMUNION spirituelle.

S Eigneur Iesus-Christ, qui auez bien Le Col-
lecteur. daigné venir vers nous, par le moyen de cestes-saincts, tres-augustes & redoutables mysteres: qui n'auetz desdaigné estre mis sur la table, & présenté pour viande à tous ceux qui vous voudront receuoir & manger à l'Autel, & sur la table de ce sacrifice non sanglant, & qui de vostre douceur & clemence accoustumée, nous inuitez de vostre voix gracieuse à ce terrible & tres-delicieux banquet: me voicy assistant &

194 PARADIS DES PRIERES,
present, moy miserable & pauvre pecheur,
comme le bouc entre les oüailles, atten-
dant si par aduenture de grace il tomboit
quelque petite miette de cette table sacrée,
de laquelle ma faim peust tant soit peu estre
assouuie & rassasiée.

Le vous desire tres-ardemment, ô mon
tres-doux Iesus, & à la verité mon ame
vous souhaitte de toutes ses forces & puis-
sances, mon cœur aspire apres vous, pain
celeste qui contenez en vous toutes sortes
de douceur & contentement. Le desirerois
grandement, mon Seigneur, & mon vray
Dieu, de vous receuoir en toute reueren-
ce, & avec l'honneur deu à vostre Maiesté
dans l'habitation de mon pauvre cœur,
avec Zachée, à celle fin qu'estant entré dās
mon logis, il vous pleust souper & banque-
ter avec moy, & moy avec vous, qu'il vous
vint à plaisir d'essire & faire vostre demeu-
re dedans moy : mais à raison de ma vilité,
de mon indisposition, & de ma trop gran-
de indignité, j'ay crainte de vous introdui-
re, & mesme j'ay honte de vous inuiter.

Toutesfois, mon Seigneur, & tres-pi-
toyable Iesus, ie sçay bien que vous ne re-
gardez pas tousiours aux actions : mais le
plus souuent, vous prenez garde aux de-

sirs & affections des hommes, & les receuez quelquesfois de meilleur cœur que les actions mesmes. Me voicy present maintenant deuant vous, ie desire pour le moins receuoir spirituellement, ce que ie n'ay la hardiesse de faire Sacramentellement. Voila, mon Dieu, i'ouure ma bouche & mon ame, afin de vous receuoir, i'estens les bras de mes desirs, afin de vous embrasser: Venez, ô bon Iesus, venez ô viande celeste, venez, ô douceur de mon ame, venez avec toutes vos vertus & merites, avec toutes vos graces & thresors, à celle fin que mon ame qui vous desire tres-ardement, qui a vne faim extrême de vous manger, & vne soif qui ne peut estre esteinte & rassasiée, sinon par vous vraye fontaine de vie, puisse estre contentée & assouuie, Amen.

Oraison à l'heure de la sainte Communion.

SEigneur, ie ne suis aucunement digne Matt. 8.
que vous entriez chez moy, en la maison de mon cœur; mais dictes tant seulement, & à vostre seule parole mon ame sera guarie & nettoyée. Regardez-moy des Luc. 18.
yeux de vostre misericorde, & voyez comme de loing i'assiste en vostre presence, frappant rudement ma poitrine avec le

196 PARADIS DES PRIÈRES,
Publicain Euangelique, & vous disant :

S. Tho-
mas.

*Mon Dieu soyez propice à moy tres-vil & mi-
serable pecheur.*

Ame de Iesus-Christ, sanctifiez-moy :
Corps de Iesus-Christ, sauuez-moy : Sang
de Iesus-Christ, enyvrez-moy : Eau qui
auez decoulé du costé de mon Sauueur Ie-
sus-Christ, lauez-moy : Passion & Mort
de Iesus-Christ, consolez-moy, & me re-
confortez.

O bon Iesus exaucez-moy, cachez-moy
dedans les pertuis de vos sanglâtes playes,
& ne permettez en aucune sorte que ie sois
separé de vous : defendez-moy contre
mon ennemy, appelez-moy à l'heure de
ma mort, & faites commandement que ie
viennne par deuers vous, afin qu'en la com-
pagnie de tous les saints bien-heureux, &
auec iceux ie puisse louer & raconter vos
diuines loüanges, par tous les siecles des
siecles, Amen.

*À l'heure de la Communion du Corps & Sang
tres-precieux.*

S. Bo-
nauen-
ture en
son ai-
guillon
d'a-
mour
diuin.

IE vous supplie, ô mon Seigneur Iesus-
Christ, puis que vous n'avez point vou-
lu pardonner à vous-mesmes, pour l'a-
mour de moy, qu'il vous plaise toucher
mon cœur en telle maniere de vos playes

& blessures, & enyvrer mon ame de vostre Sang, qu'en quelque part que ie iette les yeux, ie vous voye crucifié, que toutes les choses que ie verray, me semblent teinctes de vostre Sang, à ce que transformé en vous, ie ne trouue aucune chose hors de vous, & n'en puisse voir d'autres que vos playes: Que cette-cy soit (ô Seigneur) toute ma consolation, d'estre crucifié avec vous: & que ce me soit vne extrême affliction de penser quelque chose hors de vous, Amen.

*Aux Oraisons ou Collectes qui se disent apres
la Communion.*

IE vous inuoque, ô mon Dieu & Seigneur
tres-pitoyable, & vous inuite de venir
en mon ame, laquelle ie vous supplie net-
toyer & preparer, afin de vous receuoir,
avec le plus feruent & amoureux desir
qu'il vous plaira luy inspirer. Entrez ie
vous prie en icelle, & la rendez habitation
propre & conuenable à vous, à celle fin
que vous soyés le possesseur de ce que vous
auez créé, que vous auez refectonné &
remply de vos tres-sacrez mysteres, à ce
que ie vous aye tousiours comme vn si-
gnacle & marque de souuenance sur mon
cœur.

Je vous supplie, ô tres-bening & fauorable, ne delaissez celuy qui vous inuoque & appelle en ses necessitez : car deuant que i'eusse commencé à vous inuoquer, vous m'avez appelé & donné commandement de ce faire ; vous m'avez cherché, lors que ie ne penso is à vous, afin que ie vous cherchasse, moy qui suis vostre seruiteur, qu'en vous cherchant ie vous peusse trouuer, & qu'en vous trouuant ie vous aimasse.

Je vous ay cherché, Seigneur mon Dieu, & ie vous ay trouué, & maintenant ie desire affectueusement de vous aimer. Augmentés de plus en plus ce mien desir, & me donnés ce que ie vous demande : car i'aoit que vous me donniés toutes les choses créées que vous aués faites, cela n'est encores assés & suffisant à vostre seruiteur, si vous ne vous donnés vous-mesme. Donnés-vous donc vous-mesme à moy, ô mon Dieu & Seigneur : baillés-vous vous mesme à vostre seruiteur, qui vous desire. En verité, mon Seigneur, ie vous aime : que si cela vous semble peu, donnés-vous à moy, & ie vous aimeray encore dauantage & plus ardemment. Je suis donc detenu & captif de vostre amour, ie suis du tout embrazé en vostre dilection, ie me delecte &

prens vn souuerain plaisir à me ressouuenir de vous.

Que mon esprit donc & mon ame prenne des aisles comme l'Aigle, qu'elle volle & ne se lasse aucunement, qu'elle prenne sa vollée, & paruienne iusques à la splendeur & beauté de vostre maison celeste, & iusques au throsne de vostre gloire & Majesté, à ce qu'elle soit refection en ce lieu à la table des Anges & citoyens celestes, des viandes plus exquises, & des mets delicieux de vostre banquet eternal, en vn lieu de bon pasturage, le long du doux coulant bruit de quelque fleue & ruisseau tres-fertile.

Soyez nostre ioye & exaltation, vous qui auez voulu estre nostre esperance, nostre salut & redemption. Soyés nostre liefse, vous qui ferez par cy-apres nostre recompense & salaire. Que mon ame vous cherche continuellement & sans cesse : & luy donnez, cette faueur que vous cherchant d'vn tres-affectionné desir, elle ne se lasse iamais de vous chercher, & ne perde aucunement courage, lors que pour quelque iuste occasion elle ne vous pourra promptement & selon son affection trouuer, Amen.

200 PARADIS DES PRIERES,
A la Benediction.

Que Dieu le Pere nous benisse, † Que Iesus-Christ nous garde & conduise: † Que le saint Esprit nous illumine & esclaire tous les iours de nostre vie †: Que la vertu de Iesus-Christ nous confirme & corrobore, par l'intercession de la tres-glorieuse Vierge Marie, & que par le merite & prieres de tous les Saints & Saintes de Paradis, il nous pardonne entierement tous nos pechez, Amen.

*Action de grace pour dire apres auoir euy
la Messe.*

Seigneur Iesus-Christ, Roy du Ciel & de la terre, qui estant Dieu & homme, auez conuersé entre les hommes l'espace de trente & trois ans pour mon salut & redemption, qui pour moy auez souffert plusieurs traualx & grandes angoisses, en preschant & annonçant vostre sainte doctrine. Qui auez aussi patiemment enduré pour l'amour de moy, la faim, la soif, le chaud, le froid, & tous autres labeurs, pour tous lesquels ie vous rends toutes les humbles & deuotes actions de grace qu'il m'est possible.

Receuez ce mien petit labeur, jaçoit qu'infructueux & inutile, & l'assistance

que i'ay fait à ce saint & sacré mystere de la Messe, que ie vous offre en memoire & souuenance de tous vos labeurs & travaux; que i'offre, dis-je, à vostre souveraine & diuine Majesté, en recordation de vostre tres-sainte & douloureuse Passion. Faites que ie vous plaise en l'vnion de l'amour & charité, par laquelle tous vos labeurs & travaux ont esté plaisans & agreables à Dieu vostre Pere eternal.

Doux Iesus, ie vous offre le sacrifice de cette Messe, & de toutes les Messes qui se disent par tout le monde : ie vous offre l'Hostie de vostre corps & sang precieux, en memoire de vostre incomprehensible charité & de l'amour immense, par lequel vous auez voulu naistre en ce monde pour nous, endurer estre crucifié, & mourir pour nous : vous suppliant tres-affectueusement par les entrailles de vos misericordes, receuoir cette offrande, & la presenter à vostre Pere en la mesme vertu, par laquelle mourant en Croix, vous luy recommandastes vostre esprit, & luy fistes present de vostre ame. S'il y a eu de ma faute, & si i'ay trop negligemment assisté à ces redoutables mysteres, ie vous prie me le vouloir pardonner : ie recommande

202 PARADIS DES PRIERES,
le tout à vostre cœur diuin pour le corriger
& amender.

Receuez, ie vous prie, ô mon doux
Sauueur Iesus-Christ, ces sacrez myste-
res, & l'obligation de vostre corps pre-
cieux, laquelle ie vous offre premiere-
ment à l'éternelle gloire de vostre Nom
tres-sainct, à l'honneur de vostre tres-
douce & bien-heureuse Mere la glorieu-
se Vierge Marie, la gloire de tous les
Saints & Saintes, & de tous vos Anges
bien-heureux, pour mon salut, pour le
salut de N. & N. pour le salut de tous
les fideles, tant viuans que trespassez.
Receuez ce Sacrement tres-excellent en
pleine emendation, expiation & satisfac-
tion de tous mes pechez & negligences,
& de tous les pechez du monde.

Par iceluy reparez en moy tous mes
defauts, par iceluy restaurez toutes les
ruynes & defectuositez de ma pauvre
ame : & suppléez par iceluy à ma pau-
reté & indigence. Par iceluy mortifiez
en moy tout ce qui desplaist à vos yeux
bien-heureux, & me faictes homme se-
lon vostre cœur. Par iceluy conformez
mon esprit, mon ame, & mon corps à l'es-
prit, à l'ame, & au corps de vostre sacrée

humanité : & m'illuminez totalement par le rayon & lumiere de vostre incomprehensible Diuinité.

Par iceluy faites-moy cette grace que ie sois perseueramment stabilité en vous, que ie vous aime en toute perfection, & avec perseuerance : que ie sois vny estroitement à vous, & que ie sois du tout transmué en vous, à la gloire & loüange de vostre nom tres-sainct.

Seigneur, conuertissez à vous les miserables pecheurs : rappelez les heretiques & schismatiques à l'vnion de vostre sainte Eglise, illuminez les Infideles & Payens, qui n'ont encores la connoissance de vous, & leur donnez la lumiere de vostre saint Euangile. Assistez à tous ceux qui sont en necessité, affliction, angoisse, tribulation, maladie & tentations : donnez-leur secours & deliurance. Faites assistance à tous ceux qui se sont recommandez à mes prieres, ou desirent y estre recommandez. Aidez & assistez à tous mes parens, amis & bien-faiteurs. Ayez pitié de tous ceux pour lesquels ie dois prier & vous presenter mes oraisons, & pour lesquels vous de-

204 PARADIS DES PRIERES,
ferez estre prié. Donnez pardon & grace
aux viuans : donnez repos & lumiere eter-
nelle aux pauvres ames des defuncts. A
vous soit gloire & louange eternelle à ia-
mais, & en tous les siecles des siecles, Je-
sus mon doux Sauueur, Amen.

*Litanie tres-deuote pour dire à la fin de la
Messe, extraicte des exercices de
saincte Gertrude.*

SEigneur mon Dieu, ayez pitié de
moy.

O Christ & oingt de Dieu, regardez-
moy de vos yeux pitoyables.

O mon Dieu, soyez-moy misericor-
dieux.

Saincte & sacrée Trinité, vn seul Dieu,
faites que mon cœur vous craigne, vous re-
uere, vous aime & suiue, car vous estes mon
vray amour.

Saincte Marie, paradis de sainteté, lys de
pureté, auancez-moy : & donnez-moy
entrée avec vn cœur pur, & corps immacu-
lé, en la compagnie plaisante & gracieuse
de vostre Fils Iesus, pour ce qu'en vous
habite plénitude de grace, vie & verité.

Voustous glorieux Anges & Archan-
ges, foyez-moy fauorables : à ce que d'un
cœur parfaict , de toutes mes forces , tant
du cœur que de l'ame , ie m'employe vo-
lontiers au seruice de celuy Roy tant ex-
cellent, auquel seruir est regner , & auquel
sans aucun ennuy vous assistez.

Sainct Iean Baptiste, impetrez-moy par
vos prieres , que ie puisse estre illustré de
cette excellente lumiere, de laquelle vous
estes venu porter tesmoignage.

O mon Pere Abraham , faictes que
i'obtienne la vraye foy & obeïssance qui
vous ont donné accez à l'amitié de Dieu
viuant.

O cher amy de Dieu , & grand Legis-
lateur Moyse , obtenez que ie puisse
auoir celuy esprit de mansuetude , paix
& charité , lequel vous a rendu digne
de parler bouche à bouche avec le Dieu
de souveraine Majesté , & de le voir face
à face.

O Roy Dauid & Prophete venerable,
impetrez-moy integrité , fidelité , prom-
ptitude & humilité , par lesquelles ver-
tus vous auez merité d'estre faict hom-
me selon le cœur de Dieu : de sorte que ve-

206 PARADIS DES PRIERES,
ritablement vous avez esté trouué plai-
fant & agreable à Dieu , Roy celeste &
eternel.

O vous tous saincts Patriarches &
Prophetes , foyez-moy intercesseurs , a-
fin que i'obtienne l'esprit de capacité &
d'intelligence.

Sainct Pierre Prince des Apostres , par
vostre souueraine & pastorale authori-
té , deliurez-moy des liens de tous mes
pechez.

Sainct Paul vaisseau d'election , im-
petrez-moy le don de vraye & sincere di-
lection.

O mon bon amy & Seigneur monsieur
sainct Iean , Disciple que le Seigneur ai-
moit vniquement , obtenez-moy cette
pieté, sincerité, sanctimonie, laquelle de-
sire de moy celuy qui est la fleur & le fils
du lys odoriferant , duquel vous avez esté
constitué gardien delicat.

O vous tous glorieux Apostres , freres
& amis de Iesus-Christ , faictes-moy tant
de grace que ie sois vny par vos prieres à
iceluy mon Seigneur d'une charité &
amour indissoluble.

Sainct Estienne premier Martyr , esleu

pour confesser publiquement sans aucune crainte de mort, le nom de Iesus, soyez-moy tant benin & fauorable, que par vos prieres i'aye ce desir de souffrir martyr pour l'amour de mon Redempteur Iesus-Christ, afin que celuy me soit en aide, qui durant vostre victorieuse mort vous a consolé & fortifié.

Sainct Laurent soldat inuincible, obtenez-moy vn amour plus fort que la mort, par lequel vous auez surmonté la flamme, les tourmens & bourreaux.

Sainct George, fleur noble & excellente des Martyrs, impetrez-moy du courage viril & indomptable au seruice de mon Dieu.

Vous tous Saincts & victorieux Martyrs, faites que i'obtienne vne douce patience, à ce que pour l'amour & gloire de mon Sauueur Iesus-Christ, ie sois prest à exposer à tous dangers & perils, ma vie, mon corps & mon ame.

Sainct Gregoire souuerain Pasteur, & successeur des Apostres, soyez mon intercesseur enuers nostre Seigneur & Redempteur Iesus-Christ, à ce que iusqu'au dernier soupir de ma vie ie perse-

208 PARADIS DES PRIÈRES,
uere vigilamment en l'obseruance de ses
saincts commandemens.

Sainct Augustin clair miroir de l'Eglise,
faictes tant pour moy par vos prieres &
merites, que ie viue totalement affection-
né à ce qui est de l'honneur de Dieu.

O venerable Pere sainct Benoit, tres-no-
ble fondement de toute religion, impe-
trez-moy telle constance d'esprit en tou-
tes les difficultez, fascheries & ennuis qui
se presentent en cette vie, que ie sois digne
de recevoir avec vous le loyer de la vie
eternelle.

Vous tous saincts & glorieux Confes-
seurs, ie supplie que par vostre intercession
ie merite estre vestu de confession & beau-
té: à ce que toute ma vie & action annon-
ce au Seigneur les misérations d'iceluy en
toutes ses œuvres.

Saincte Catherine navrée en vostre
cœur chaste de charité diuine, obtenez que
ie mesprise toutes choses terrestres & tran-
sitoires, & que ie ne souhaitte rien, fors
mon Seigneur Iesus-Christ.

Saincte Agnes delicate seruante de
l'Agneau immaculé, impetrez que i'ayme
d'une feruente charité mon Sauueur Ie-
sus,

sus, de l'amour duquel vous vous glorifiez d'auoir esté embrazée, liée & obligée à luy par le gage de vostre foy.

Saincte Marie Magdeleine tres-feruente amatrice de Iesus-Christ, impetrez que ie fasse vne si entiere penitence en ce monde, que ie puisse obtenir cette paix & misericorde que vous auez obtenuë aux pieds de vostre maistre & espoux Iesus-Christ.

Vous toutes saintes Vierges & Veufues, obtenez-moy par vos bonnes & continuelles prieres, que ie profite tellement en toute vertu & sainteté, que i'en puisse tirer quelque fruit & salaire inestimable.

Vous tous Saints & Esleuz de Dieu, impetrez-moy vne telle & si affectionnée obseruance de tout ce qui est plaisant & agreable à Dieu, qu'en vertu d'icelle ie paruienne en vostre noble compagnie, à la patrie de la vie eternelle, qui ne sçait rien autre que ioye & resioüissance, en laquelle Dieu est seul assouuissement des desirs.

Soyez, soyez propice à mes pechez & nonchalances, & par vostre tres-que par-

faicte conuersation, vueillez supplier les ruines, simplicité & fautes de ma miserable & inutile conuersation.

Delivrez-moy Seigneur, de toute pusillanimité & troublement d'esprit, de toute peruersité de cœur & de charnalité, de toute cécité & sterilité d'esprit, de toute negligence & prauité de mœurs.

Par les entrailles de vostre paternelle misericorde: donnez-moy vn vif & prudent entendement, & m'instruisez en tout ce qui concerne vostre sainte volonté, en l'obeïssance de laquelle ie proteste deuant vostre Maïesté, perseuerer tout le reste de ma vie: Car veritablement ie confesse n'estre rien, ne sçauoir chose quelconque, ny moins pouuoir rien sans vous.

Pour l'amour de vostre bien-heureuse Mere, guidez-moy au sentier immaculé, à ce que ie sois fait plaisant & acceptable, tant de corps que d'esprit, à vous mon Dieu, moy vostre indigne, prodigue & miserable enfant, qui hélas! à raison de mes énormes pechez, ay perdu ce nom tant gracieux d'enfant, assuré de vostre pa-

ternelle douceur & clemence, vous supplie, que selon la multitude de vos misérations, vous iettiez vostre regard sur ma calamité, & me lauant de toute iniquité, vous exauciez mes lamentables prieres.

Je vous prie qu'il vous plaise me donner vn esprit inuincible, cœur contrit & affligé, affection prompte, & corps habile & idoine à vostre seruice.

Je vous prie de me faire la grace d'auoir le peché sur toute chose en horreur, & d'une entiere deuotion estre conjoint à vous.

Je vous prie que vous m'aidiez à fidelement executer vos saints commandemēs & sacrées ordonnances de vostre Eglise, & perseuerer en vne ferme deliberation iusqu'à la fin.

Je vous supplie qu'il vous plaise donner à tout le peuple Chrestien & Catholique, pour vous seruir & louer, vnité, concorde, charité, & paix conglutinée d'un amour parfait, & apres cette vie transitoire nous conduire au prix & loyer proposé à vos esleus.

Je vous prie que par l'autorité de vostre souveraine diuinité vous me vueillez

deliurer de tous pechez, me confermer en mon bon propos, & de toute l'affection de vostre humanité vous monstrez doux, placable & benin en mon endroit.

Je vous prie fils de Dieu viuant (ô bon Iesus) qui estes ce scrutateur de mon cœur, qui seul connoissez la cause & source de mes desirs, de le diriger & conduire selon le bon plaisir de vostre cœur.

Je vous prie Agneau de Dieu, souleuez ma main en ce fascheux & difficile pelerinage de ce monde, auquel il me conuient cheminer: de peur que ie ne me fouruoye & defaille.

Agneau de Dieu, donnez-moy la grace de connoistre quelle est vostre sainte volonté, & de fidelement l'effectuer.

Agneau de Dieu, n'ayez esgard à mes pechez, & qu'ils n'empeschent en sorte quelconque les biens que me voulez donner; mais en toutes aduersitez & traualx vostre miseration & bonté me conforte.

Iesus-Christ, exaucez-moy, & à l'heure de ma mort resioüissez-moy par bonnes & salutaires nouuelles.

Seigneur Dieu, ayez pitié de moy: Iesus-Christ, pardonnez-moy.

Seigneur Dieu, foyez-moy misericordieux.

O Dieu tres-industrieux cultiueur, & tres-soigneux conseruateur de toutes vertus, faites-moy ce bien & cette grace, que jaçoit qu'indigne, toutesfois ie m'esuertuë en l'obseruance de vos saints Commandemens, & ainsi qu'un fort menu grain de vostre semence, ie germe, croisse & fructifie, iusques à rendre un grain mille fois, ou double de vie tres-saincte, & perseuere fidelement & infatigablement en vostre saint seruice.



ORAISONS POUR LES
PENITENS.



Homme qui voit dedans la cressche.
Jesus, couche si durement.
Fais t's dedans ton cœur Un bresche
Pour le loger plus mollement.

Ioan Valet. exaudir.

CHAPITRE IV.

Contenant les Oraisons des Penitens, pour impetrer la vertu de contrition & remission de leurs pechez.

P R E F A C E.



ATTENDV que nostre Dieu est le Dieu de misericorde (dit Monsieur saint Clement) il a dès le commencement appelle toutes les generations à conuer-

sion & penitence, par les hommes iustes qui nous ont denancez, & par la voix de tous ses Prophetes. Nous ne deuons pas faire la sourde oreille, & mespriser ce à quoy nostre Dieu nous a inuité & exhorté par tant de messagers: Car la penitence est la seconde table apres le naufrage. Embrassons donc la Penitence, ne plus ne moins que celuy qui a fait naufrage à son recours à quelque table, sur laquelle il se met en toute

confiance: Car ce sera elle qui nous esleuera, quand nous serons engloutis & submergez par les flots & vagues de nos pechez: & en fin par l'aide & secours de la diuine clemence, nous portera & fera arriuer à bon port.

Or les parties de penitence, entant que Sacrement, sont trois en nombre, assez conueniës à vn chacun, à sçauoir Contrition, Confession & Satisfaction: & en toutes les parties susdites l'oraison est grandement requise & necessaire.

Quant est de la Contrition, elle n'est pas en la puissance du pecheur, de sorte qu'il se puisse donner à soy-mesme cette affection de desplaisance & douleur: mais c'est vne grace speciale, & vn don que Dieu baille gratuitement: il le faut toutesfois importunément demander, & humblement requierir avec larmes, prieres & autres diuers exercices de pieté & deuotion.

En la Confession nous auons tellement affaire de la diuine misericorde & pieté de nostre Dieu: veu qu'estans enuironnez d'obscurité & tenebres tres-espoisses d'ignorance, sans cette grace & lumiere celeste nous ne pouuons auoir aucun iugement asseuré, & discerner vrayement entre le peché & ce qui n'est pas peché: & mesme il n'est en nostre puissance de fureter & rechercher soigneusement tous les cachots & recoins de nostre conscience, sans l'aide & tres-

necessaire secours de cette clarté diuine: & encores moins pourrons-nous commodément proferer de bouche ce que nous auons conceu & trouué sur nostre cœur, si ce n'est que Dieu, qui ouure la bouche des muets, nous fasse parler, & nous fasse par sa grace ouurir la bouche pour declarer nos pechez, & ietter hors le venin par trop mortel & infect, qui s'est glissé dans nos ames. Or toutes ces choses ne se peuuent autrement impetrer de Dieu, sinon par frequentes prieres & oraisons deuotes.

L'Oraison nous est aussi tellement necessaire pour la satisfaction, que mesme l'Oraison n'est pas la moindre & derniere partie d'icelle.

Veu donc qu'en toutes & vne chacune de ces parties, nous deuons auoir nostre recours & dernier refuge à l'Oraison, nous auons à cette occasion ordonné à chacune partie ses Oraisons propres & peculieres, afin que l'homme deuot, & celuy qui aime l'exercice de l'Oraison, ayt promptement & tousiours à la main tout ce qui luy sera requis & de besoin en toutes les parties & actions de penitence.

Premiere Oraison, pour mettre en l'ame la compunction de ses pechez.

O Fils vnique de Dieu, combiẽ grands & ineffables sont les biens que i'ay

receu de vous! Vous m'avez tiré de la poudre & fange de la terre, & de rien avez créé mon ame à vostre semblance, & l'avez fait capable de vostre gloire. Vous m'avez donné entendement, memoire & volonté, liberal arbitre, ensemble avec tous mes autres sens & membres, afin que par leur moyen & vertu ie vous peusse connoistre & aimer. Vous m'avez conserué dans l'estroite prison du ventre de ma mere, afin que ie ne vinssé à mourir sans l'eau salutaire du Baptisme. Vous m'avez toleré tant de temps, apres tant de pechez, iusques à l'heure presente, en ayant plusieurs autres, lesquels pour n'auoir esté tolerez & attédus si long-temps, sont possible maintenant tourmentez en enfer.

Et outre tout cela, Seigneur, vous avez bien voulu vous faire homme, & conuerfer entre les hommes à mon occasion, vous avez bien daigné estre pour moy angoissé, affligé, contristé, couuert de sueur sanglante, estre prins lié, frappé, craché, iniurié, mocqué, blasphémé, souffleté, & vestu d'une robe blanche & rouge.

Pour moy vous avez bien voulu estre battu, foüetté, couronné d'espines, vn roseau en la main, les yeux couuerts d'un voi-

ie, condamné à mort, & mené iusques au lieu où vous deuiez mourir, avec vostre croix sur le dos, en laquelle vous fustes attaché avec cloux rudes & aigus, & mis entre deux larrons, & réputé entre les meschans, & vous fut présenté du fiel & du vinaigre pour vostre dernier breuuage, & finalement demeurastes esteint d'une tres-cruelle mort. En cette façon Seigneur, & avec tous ces traux vous m'avez racheté, & moy tres-vil & tres-inique pecheur, estant ingrat de tant de benefices, ie vous ay tant d'autres fois crucifié par mes pechez, dont ie meritois que toutes les creatures du monde s'esleuassent à l'encontre de moy, & fissent vengeance de vos iniures.

Diray-ie encores outre ce combien i'ay abusé de vos Sacremens, & des medecines qu'avec vostre precieux sang avez ordonné pour moy? Vous m'avez lauë & receu pour vostre au saint Baptesme, & m'avez là aduoüé pour vostre enfant, & consacré comme vostre temple, & oïnt comme Prestre, comme Roy, & comme combattant à la luitte, qui deuois tousiours luitter contre l'ennemy. Là vous avez prins mon ame pour espouse, & m'avez donné tout

ce qui appartenoit à cette dignité. Qu'ay-
ie fait donc de toutes ces richesses que vous
m'avez données? quel soin ay-ie eu de gar-
der tant de biens? Vous m'avez prins pour
vostre enfant, & ie me suis fait serf & escla-
ue du peché: Vous m'avez consacré pour
vostre temple, & ie me suis fait habitation
du diable; Vous m'avez armé Cheualier, &
ie me suis mis de la partie de vostre enne-
my: Vous m'avez fait Roy, & ie me suis
rebellé contre le Royaume que vous m'a-
vez donné. Vous avez aimé mon ame en
charité perpetuelle, & i'ay plus aimé la va-
nité que la verité; & les creatures, que le
Createur.

Il seroit donc temps d'oresnauant, Sei-
gneur, que celuy qui a fait toutes ces cho-
ses, eust desia commencé à pleurer: & c'est
ce que vous attendez de moy tousiours de-
puis le temps que vous me donnastes la
vie. Pour cét effect, vous m'avez tant de
fois appelé, vous m'avez toleré, chastié,
flatté, & m'avez voulu conduire à vous par
toutes voyes.

Vous m'avez attendu, & i'ay abusé de
vostre patience: vous m'avez appelé, &
i'ay fait le sourd: vous m'avez donné tēps.
& loisir de faire penitence, & ie ne l'ay pas

employé par mon orgueil : vous m'avez touché, & ie ne l'ay senty : vous m'avez affligé, & ie n'ay pas voulu receuoir vostre discipline : vous avez trauaillé & sué pour moy, & toutesfois ie n'ay iamais voulu sortir de moy, ny delaisser l'ordure de mes vices : & me suis endurcy tant contre vos chastimens, que contre vos douceurs & caresses, ingrat aux vnes, & obstiné aux autres. Mais pour tout cela, Seigneur, puis que vous avez tant fait pour moy, & que m'avez commandé, que ie ne me desfie de vous, ie me retourne tout à vostre misericorde, & vous supplie de me donner la grace de m'amender, afin que pour l'aduenir ie vous puisse plaire & seruir de telle façon que iamais ie ne sois esloigné de vous, és siecles des siecles, Amen.

Ensuit vne autre Oraison pour demander pardon des pechez, & acquerir parfaicte contrition d'iceux.

O Souuerain Createur de toutes choses, pēant en moy-mesme combien i'ay offencé vostre Maiesté infinie, ie m'esmerueille de ma folie, considerant quel bening & magnifique Pere i'ay abandonné. Je maudy mon ingratitude, me souuenant de combien grande & noble liber-

Grena-
de au
traicté
de son
Memo-
rial.

220 PARADIS DES PRIÈRES,
té, ie suis tombé en si grande misere & ser-
uitude.

Ie condamne ma sottise, & ne puis re-
presenter autre chose deuant mes yeux,
que l'enfer & le iugement : Car d'un costé
vostre iustice, laquelle ie ne puis euader, es-
pouuante ma conscience : mais quand ie
confidere à l'encontre, vostre grande mi-
sericorde, laquelle selon le tesmoignage de
vostre Prophete marche deuant toutes vos
œuvres, incontinent vne gaye refrigera-
tion d'esperance vient à recréer & renfor-
cer mon ame affligée.

Car pourquoy n'espereray-ie de trouuer
pardon en celuy, qui par l'Escripture de ses
Prophetes inuite tant de fois les pecheurs
Esa. 18. à penitence, disant : *Ie ne veux pas la mort
du pecheur, mais qu'il se conuertisse, & qu'il
vive* ? Et outre ce, vostre Fils vnique nous
a bien demonstté par plusieurs comparai-
sons, combien vostre pardon est prest
& appareillé à tous les vrayes repentans. Il
nous monstra cela par la pierre precieuse
perdue & retrouvée : par la brebis esga-
rée des autres, & rapportée par le Pasteur
sur ses espaulles. Et beaucoup dauantage,
par la comparaison de l'enfant Prodigue,
par la similitude & image duquel ie me re-

Connois moy-mesme: car ie suis celuy qui tres-iustement vous ay abandonné, tres-riche & tres-aimable Pere, ayant meschamment despendu toute ma substance: & obeïssant aux appetits de la chair, ay fuy la subiection de vos commandemens, & suis tombé en l'infame captiuité des pechez, & suis demeuré constitué en extrême misere, de laquelle ie ne sçache autre qui m'en puisse retirer, sinon celuy que i'ay abandonné.

Permettez donc Seigneur, que vostre misericorde recoiue ce pauvre pecheur humilié & abbaissé, qui vous requiert pardon, & lequel vous auez iusques à cette heure si doucement & humainement attendu. Ie ne merite pas de leuer les yeux vers vous, & moins encores vous appeller Pere: mais vous qui estes veritablement Pere de toutes choses, vueillez-moy regarder de vos yeux de Pere: car vostre seule veüe ressuscite les morts, & faict retourner ceux qui sont perdus: de sorte que iusques à cette contrition & repentance que i'ay pour le present, ie ne l'eusse peu auoir, s'il ne vous eust plu me regarder, quand i'estois esloigné de vous. Vous m'auiez regardé de la hauteur de

222. PARADIS DES PRIERES,
vostre Ciel, & m'auez ouuert les yeux, afin
que ie me regarde moy-mesme, & que ie
me trouue plein de tant de maux.

Venez-moy donc maintenant receuoir,
ô mon Dieu, me donnant la connoissance
& memoire del'innocence perduë. Je ne
demande pas vos embrassemens & baisers,
ny les riches vestemens dont ie me soulois
vestir, ny l'agneau de mon ancienne digni-
té: & ne vous supplie de me faire cét hon-
neur de me reprendre au nombre de vos
enfans: ce sera bien trop pour moy, si vous
me faites cette grace, que de me retenir
entre vos esclaves marquez de vostre
marque, & liez de vos chaines, afin que
ie ne puisse plus m'enfuir.

Je n'auray point de regret d'estre en
cette vie, l'un des plus petits & abandon-
nez esclaves de vostre maison, moyennant
que ie ne me voye iamais plus separé ou es-
loigné de vous. Exaucez-moy donc, Pere
tres-misericordieux & pitoyable, & me
donnez la faueur de vostre Fils vnique, &
le remede de sa mort: donnez-moy vostre
esprit, à ce qu'il nettoye & purifie mon
cœur, & qu'il le confirme en sa grace,
afin que par mon ignorance ie ne retour-
ne plus en cét exil, qui me sera remis par
vostre

vostre clemence, vous qui vivez & regnez
au siecle des siecles, Amen.

Troisiesme Oraison, pour demander con-
trition & pardon des pechez.

*Tu dois, Lecteur Chrestien, reciter par quelques
iours cette Oraison avec le plus grand loisir,
& la plus grande deuotion que tu pourras, si
tu as enuie d'obtenir la contrition & remis-
sion de tes pechez: Car en icelle tu verras
combien tu es obligé à Dieu, & combien dois
estre grand le regret d'auoir offensé un tel
Seigneur.*

Q Vi donnera de l'eau à ma teste, &
des fontaines de larmes à mes yeux,
& ie pleureray nuit & iour mes pechez &
mon ingratitude enuers Dieu mon Crea-
teur? Plusieurs choses se trouuent, Sei-
gneur, fort puissantes à poindre les cœurs
des hommes, & les conduire à la vraye
connoissance de leurs pechez: mais il n'y
en a aucune de telle efficace, que la confi-
deration de la grandeur de vostre bonté &
douceur, & la multitude de vos bien-faits,
mesme encores enuers les pecheurs.

Le mes-
me Au-
teur
au mes-
me li-
ure.
Hier. 6.

Et pour ce, afin que mon ame miserable
& infortunée, sente par ce moyen quelque

confusion ; ie commenceray , Seigneur , à raconter quelque chose de vos biens & de mes maux , afin que de là se voye plus clairement , qui vous estes , & qui ie suis : & comme vous vous estes porté enuers moy , & comme ie me suis gouverné enuers vous.

Il a esté vn temps que ie n'estois point : vous , Seigneur , me donnastes l'estre & la vie , & me tirastes de la pouldre de la terre , me faisant semblable à vous. Vous estes mon Dieu depuis le ventre de ma mere ; car dès le premier commencement de mon estre iusques à maintenant , vous avez toujours esté mon Pere , mon Sauueur , mon protecteur , & tout mon bien. Vous formastes mon corps avec tous ses sens , & creastes mon ame avec toutes ses puissances , & iusques à cette heure m'avez toujours conserué en vie par les benefices & caresses de vostre prouidence.

Tout cela ne fut rien à vostre grandeur , encores qu'en soy cela fust trop , pour estre le tout : mais comme le tout ne vous coustoit rien , vous m'avez voulu donner vne chose qui vous couste beaucoup , afin que ie vous en demeure plus obligé.

Vous descendistes du Ciel en terre , pour

me chercher par tous les lieux où ie m'estois perdu : vous auez annobly ma nature par vostre humanité, & m'aeuz deliuré de captiuité par vos liens, & tiré du pouuoir de l'ennemy, vous mettant entre les mains des pecheurs, destruisant & ruinant le peché, prenant l'image & semblance de pecheur. Et m'aeuz voulu obliger par cette grace, enamourer par ces benefices, fortifier mon esperance par tels merites, & me faire haïr le peché, pour me monstrier ce que vous auez fait à l'encontre d'iceluy. Vous auez ietté des braziers de feu sur les charbons esteincts de mon froid cœur, afin que par si grande multitude de benefices, qui sont compris en cettuy seul, i'aymassé celuy qui a tant fait pour moy, & qui m'a demonstéré si grande affection.

Et bien, Seigneur, me voila retrouvée : mais que m'importeroit d'estre tel, si ie n'eusse esté baptizé ? Entre si grande multitude d'infideles, qui sont espars parmy le monde ; vous auez voulu que ie fusse du nombre des fideles, & de ceux ausquels est aduenue cette si heureuse cōdition, que d'estre de vos enfans regenerez par l'eau du saint Baptisme, auquel ie suis receu pour vostre, & auquel fut faict l'accord & pact

226 PARADIS DES PRIERES,
merueilleux, que vous seriez mon Dieu &
Seigneur, & que ie serois vostre seruiteur,
vous seriez mon Pere, & ie serois vostre
enfant : & qu'ainsi nous marcherions d'ac-
cord : vous me faisant ceuvre de Pere : &
moy vous rendant les seruices & obeïssan-
ces d'enfant. Que diray-ie des autres Sa-
cremens, que vous auez ordonnez & insti-
tuez pour mon remede, faisant medecine
à mes playes du sang des vostres ? Neant-
moins avec toutes ces manieres de secours,
ma mauuaistié & malice a esté si grande,
que i'ay perdu cette premiere grace d'in-
nocence, & a esté si grande vostre miseri-
corde, que vous m'avez toleré & attendu
iusques à present.

O esperance & remede mien, comment
pourray-ie sans larmes me souuenir, com-
bien de fois la mort m'eust peu surprendre,
en tous ces temps, ainsi mal employez ?
Combien de milliers d'ames ardent main-
tenant en enfer, possible pour moindres
fautes que celles que i'ay commises par le
passé, & moy ie suis encor icy ? Que seroit-
il maintenant de moy, si alors vous m'euf-
siez appelé à vous, comme vous auez ap-
pellé les autres ? Quel rude iugement m'e-
stoit appareillé, si la mort m'eust prins avec

le larcin en la main, & que la iustice m'eust trouué en flagrant delict ? Qui fut celuy donc qui lia les mains alors à vostre iustice ? Qui vous pria pour moy lors que ie dormois ? Qui arresta le cours de vostre chastiment & fureur, au temps que plus ie l'irritois par mes pechez ? Qu'avez-vous veu en moy qui vous ayt donné occasion de vouloir, que ie fusse de meilleure cōdition que ceux lesquels la mort a ravis au milieu des ardeurs & dangers de la ieunesse ? Mes pechez crioient à l'encontre de moy, & vous faisiez le sourd. Ma mauuaistié s'augmentoient chacun iour contre vous, quand plus le terme de vostre misericorde se prolongeoit enuers moy, moy à pecher, & vous à m'attendre ; moy à fuir, & vous à me chercher ; moy las & recreu de vous offenser, & vous iamaïs las de m'attendre. Et tout ainsi que si mes pechez vous eussent esté seruices, & non offenses, encores au milieu d'iceux receuois-je de vous plusieurs bonnes inspirations.

Combien de fois m'avez-vous appelé, me criant à haute voix : *Tu as adulteré avec qui il t'a plu : mais retourne à moy, & ie te recouray.* Combien de fois avec telles & autres amiables paroles m'avez-vous appelé ?

& autresfois avec menaces & espouuante-
mens m'avez-vous faict peur, pour la me-
moire des dangers de la mort, & de la ri-
gueur de vostre iustice? Combien de for-
tes de bons Predicateurs & Confesseurs
avez-vous ordonné & estably, à ce que
par leurs paroles & conseils ils m'admone-
stassent & me resueillassent? Combien de
fois, non seulement avec paroles, mais en-
cor avec les œuvres, m'avez-vous pour-
suiuy, m'inuitant par benefices, & me cha-
stiant par affliction, me coupant tous les
chemins, comme font les chasseurs, quand
ils suiuent leur chasse, à ce que ie ne peusse
fuir de vous?

Que pourray-ie donc vous rendre, Sei-
gneur, pour tant de benefices? Pour m'a-
uoir créé, ie vous dois tout ce que ie suis:
& pour auoir fait toutes choses pour ma
conseruation; ie vous dois & ce que ie suis,
& ma vie. Puis donc que tout est vostre, &
qu'encores tout est nourry & sustanté de
vous, & que nous avez tous acheptez par
le prix de vous-mesme; que vous donne-
rois-je, quand toutes les vies des Anges &
des hommes feroient miennes, & que ie
les vous offrirois toutes en sacrifice? Que
seroit-ce de tout cela, au regard de la

moindre goutte de sang, que vous avez espendu pour moy ? Qui fournira donc maintenant assez de larmes à mes yeux, afin que ie puisse pleurer la mauuaise reconnoissance, & peu de satisfaction que i'ay faite de si grands benefices ?

Aydez-moy maintenant, Seigneur, & me donnez grace de pouuoir confesser, & m'accuser moy-mesme de mon iniustice. Je suis ce mal-heureux, qui encores que ie fois fort desfiguré, si suis-ie vostre creature, faicte à vostre image & semblance. Refigurez en moy, Seigneur, cette figure, qui est vostre : nettoyez & ostez de dessus ce que i'ay faict, & vous trouuerez au dessous ce que vous avez faict de vostre main industrieuse & liberale. I'ay employé toutes mes forces à vous faire iniure, & vous ay offensé par les mesmes œuures de vos mains. Mes pieds sont courus à la meschanceté : mes mains s'en sont allées apres l'auarice : mes yeux ont passé par toutes les vanitez, & ont esté mes oreilles tousiours ententiues aux paroles vicieuses & d'oisiueté. Cette tres-noble partie de mon ame qui auoit des yeux pour vous voir, les a retirez de vous, & les a mis en obscurité & tenebres de cette vie miserable. Celle qui

deuoit rechercher vos commandemens, cherchoit nuit & iour de les enfreindre. Estant donc ainsi gouuerné mon entendement, en quel estat deuoit estre ma volonté ? Vous luy auiez, ô mon Dieu, offert les delices du Ciel, & elle a laissé le Ciel pour la terre, ouurant les bras que vous auiez consacrez pour vous à l'amour des creatures. Voila Seigneur, le payement de vos bien-faits : & voila le fruit qu'ont apporté les sens que vous auez créés.

Que pourray-ie donc vous respondre, quand vous entrerez en iugement avec moy, & que vous me direz : *Je t'ay planté comme vne vigne choisie entre plusieurs bonnes plantes, comme t'es-tu faicte ainsi sauuage & infructueuse ?* Et si ie ne sçay que respondre à cette premiere demande, que respondray-ie à la seconde, touchant le benefice de vostre conseruation ? Vous conseruiez avec vostre prouidence, Seigneur, celuy qui ne pensoit à autre chose qu'à rompre vostre Loy, à persecuter vos seruiteurs, à scandaliser vostre Eglise, & à establir & fortifier le regne du peché à l'encontre de vous. Vous donniez mouuemens à la langue qui vous blasphemoit, vous gouuerniez les membres qui vous offensoient, &

nourrissiez ceux qui seruoient vos ennemis à vos despens : de façon que non seulement i'ay esté ingrat à vos benefices : mais encores ie me suis armé d'iceux à l'encontre de vous.

Vous avez ordonné toutes les creatures pour mon seruice ; & ie me suis enamourré d'icelles, & ay adulteré avec toutes , puis qu'à l'occasion d'icelles ie vous ay tant de fois offensé. I'ay plus aimé les dons , que le donneur : & là où ie deuois prendre occasion de connoistre vostre beauté, ie me suis aveuglé de ce que ie voyois, ne leuant mes yeux, pour voir combien estoit plus beau le facteur que la facture.

Vous m'avez donné toutes choses , afin que ie me donnasse à vous , & i'ay prins le profit & plaisir de toutes icelles , sans iamais vous en rendre ny la gloire , ny le tribut qui vous en estoit deub. Elles vous ont obey en me seruant , parce que vous leur avez ainsi commandé, & ie n'ay entendu à autre chose qu'à offenser celuy , par le moyen duquel toutes choses me seruoient. Vous me donniez la santé, & le diable en auoit le fruit. Vous me donniez les forces, & ie les employois au seruice de vostre ennemy.

Que diray-ie, que tant de sortes de trauaux & de miseres que i'ay veu aux autres hommes, n'ont esté suffisantes pour me faire entendre que tous les maux d'autrui estoient autant de vos bien-faits enuers moy, puis qu'il vous plaisoit me deliurer ainsi de tous? Estes-vous celuy seul enuers lequel il nous soit permis d'vser de si grande ingratitude, & duquel il soit licite ne reconnoistre aucunement les benefices? Et qui est celuy qui se tienne obligé à vn autre, quand il a receu de luy quelque bien-fait? Si la fiereté des lyons & des serpens se dompte par bien-faits, comment est-ce que les vostres n'ont esté suffisans à me dompter, à ce qu'au moins ie dise avec le Prophete: *Craignons le Seigneur, qui nous enuoye la pluye du Ciel, ou tost ou tard en son temps, & nous enuoye tous les ans tant de biens.*

Ce seroit vn assez grand argument, pour connoistre que vous estes, Seigneur, de m'auoir si longuement tolleré & paty tel que ie suis, sans qu'il fust besoin d'autres demonstrations, ou tesmoignages de vostre bonté. Et si le compte que ie vous dois rendre de ces choses icy, qui vous ont peu cousté, doit estre si rigoureux: quel sera celuy que vous me demanderez, de celles qui

vous ont cousté vostre sang ? Comment ay-ie ainsi abandonné & perdu tous vos conseils ? Comment en ce qui a esté en ma puissance, ay-ie aneanty & defait le mystere de vostre Incarnation ? Vous vous estes fait homme pour me faire Dieu : & moy trop amy de ma perdition, me suis fait beste & enfant de Satan.

Vous vous estes abbaissé iusques en terre pour me porter au Ciel : & moy trop indigne de ce bien, ainsi que ie le meritois, aussi ne l'ay-ie conneu, & ainsi ie suis demeuré submergé en la fange de mes ordures. Vous m'avez deliuré, & ie suis retourné en ma captiuité. Vous m'avez ressuscité, & ie suis retourné à embrasser la mort. Vous m'avez incorporé avec vous, & ie suis retourné à me conioindre avec le diable, & n'ont esté tous ces benefices assez puissans pour m'inciter à vous connoistre, ny ces signes d'amour, pour m'induire à vous aimer, ny ces merites, pour me faire auoir esperance en vous, ny si rigoureuse iustice, qui fut executée en vous, pour me faire auoir peur. Vous vous estes humilié iusques à la poudre de la terre, & moy ie suis demeuré en mon orgueil : vous avez esté nud estendu sur la Croix, & tout le monde

ne suffit pas à mon avarice. A vous, estant Dieu, ont esté donnez les soufflets, & ie n'endurerois pas qu'on me touchast la robe, qui ne suis qu'un vilain ver de terre.

Que diray-je, ô mon Sauueur, sinon que si grande & merueilleuse a esté l'amour & la misericorde dont vous auez vsé enuers moy, que vous vous estes liuré à mort pour tuer le peché: & moy trop assuré & confiant de cette bonté & grand' amour, ay prins la hardiesse de pecher contre vous? Quel blasphème peut-estre plus grand que grand que cettuy-là? I'ay pris occasion en vostre bonté, pour perseuerer en ma mauuaitié: i'ay pris argument de pecher, du mesme moyen que vous pristés pour tuer & destruire mon peché. Voila comment i'ay peruertiy & negligé vos conseils, & comment i'ay osté & chassé par ma mauuaitié ce que vous auiez fait par vostre misericorde: Pour ce que vous estes ainsi bon, il m'a semblé que ie pouuois bien estre mauuais; & pour ce que vous m'auiez fait tant de biens, ie me suis proposé de vous faire de si griefues offences. Tellement que la mesme medecine que vous auiez donnée contre le peché; ie l'ay fait chef & principe de mon peché: & l'espée que vous

m'auiez donnée pour luy faire la guerre, ie la luy ay mise és mains, afin qu'il m'oste la vie.

Et finalement, vous auez voulu par le moyen de la mort, vous faire Seigneur des viuans & des morts, afin que (comme dit l'Apostre) ceux qui viuent ne viuent plus pour eux; mais pour vous, qui estes mort pour tous: mais moy, comme enfant de Iezabel, i'ay pris le moyen & occasion de vostre mesme mort pour nous despoüiller de vostre possession, me retirant & m'enfuyant de vostre seruice, & me faisant esclau de l'ennemy. Que merite donc celuy, lequel s'est ainsi gouuerné? Si les chiens deuoreroient le corps de Iezabel pour ce peché, comment est-ce que le mien est entier, puis que i'ay commis le mesme? Et si l'Apostre fait si grand cas de la malice du cœur humain, pour auoir pris occasion de la mesme loy; pour rompre la loy, combien plus grande doit estre la malice, qui prend argument de la grace, pour rompre la mesme grace?

O Seigneur tres-patient à endurer des soufflets pour les pecheurs, & beaucoup plus à supporter les mesmes pecheurs: combien durera cette patience? I'ouï que

236 PARADIS DES PRIÈRES,
vous dites par vostre Prophete : *Je me suis
teu, & ay longuement observé le silence, & ay
trop supporté : mais maintenant ie parleray aussi
haut que la femme qui est es douleurs de l'en-
fantement.* Je voy que la terre laquelle est
arrousee de plusieurs douces pluyes, ne
rapporte point de fruit, est excommuniée
& maudite : & que la vigne bien labourée
& cultivée, rendant seulement du verjus
au lieu de bon vin, est par vostre comman-
dement destruite & laissée deserte. Com-
ment donc, ô vigne sotte & infructueuse,
comment ne crains-tu la serpe de ce sage
vigneron, qui coupe les vignes steriles,
& les met dedans le feu ? Où estoit le iuge-
ment de celuy qui n'auoit crainte de tels
iugemens ? Où estoient les oreilles de ce-
luy qui n'entendoit cette voix ? En quel
profond sommeil estoit-il enseuely, ne
se pouuant esueiller par le grand bruit de
ces horribles menaces ? Je me plaisois en
cette habitation terrestre, indigne de
mon ame, & estois bien-aise de coucher
entre les espines, i'estois brulé par le feu
de mes passions, & picqué des espines de
mon auarice : le soin de mes negoces me
diuisoit & deschiroit, & me remordoit
le ver de ma conscience : Et cela me sem-

bloit repos & liberté , & appellois paix toutes ces guerres : de sorte que ie n'estois moins abusé à me connoistre , que rebelle à vous servir.

Que feray-ie donc mon Dieu , que feray-ie ? Je connois certainement que ie ne merite pas comparoir iamais deuant vous , & moins hauffer les yeux pour vous regarder. Mais quoy , où iray-je pour me cacher de vous ? n'estes-vous pas mon pere , & pere des misericordes , lesquelles n'ont ny terme , ny mesure ? Et combien que i'aye delaisfé d'estre enfant , auez-vous pourtant delaisfé iusques à present d'estre pere ? Et combien que i'aye fait choses pour lesquelles vous me pouuez condamner , auez-vous pourtant quelque chose de la puissance que vous auiez de me sauuer ? Que puis-ie , ou dois-ie donc faire autre chose , que de me ietter à vos pieds , & vous demander misericorde ? Qui appelleray-je à mon aide ? A qui demanderay-ie secours , sinon à vous ? N'estes-vous pas mon Createur , mon gouuerneur , mon Redempteur , mon liberateur , mon Roy , mon Prestre , mon Sacrifice ? A qui me retireray-ie d'oc ? où iray-ie , sinõ à vous ? Si vous me refusez qui me receura ? si vous

238 PARADIS DES PRIERES,
m'abandonnez, qui me gouvernera? Re-
connoissez, Seigneur, cette brebis perdue
& esgarée qui s'en reuient à vous.

Si ie suis plein de playes, vous me pou-
uez guarir: si ie suis aueuglé, vous me pou-
uez illuminer; si ie suis mort, vous me pou-
uez ressusciter; si ie suis ord, vous me pou-
uez nettoyer. Vous m'aspergerez, Sei-
gneur, avec l'hysope, & ie seray nettoyé;
vous me lauerez, & ie seray fait plus blanc
que la neige. Plus grand est vostre miseri-
corde, que n'est ma faute; plus grande vo-
stre pieté, que ma mauuaistié: & auez plus
de puissance de me pardonner, que ie n'ay
de pecher. Ne me reiettez donc, Seigneur,
& ne prenez garde à la multitude de mes
pechez, mais à l'abondance de vostre mi-
sericorde, vous qui vivez & regnez aux sie-
cles des siecles, Amen.

ADVERTISSEMENT.

Voila les Oraisons & considerations qui
peuvent nous aider à obtenir la contrition
& desplaisance de nos pechez & offenses, laquel-
le nous cherchons en ce lieu, ce qui est vne grace
tres-excellente & bien necessaire au pecheur:
Chacun

Chacun doit lire ces oraisons precedentes avec la plus grande deuotion & attention qu'il luy sera possible, en temps conuenable, & en lieu secret & retiré : Car tout ainsi qu'il aduient souuentefois qu'un homme entrant en oraison sans deuotion en priant, puis apres il la trouue, aussi en lisant l'une ou l'autre de ces oraisons, il pourra estre qu'estant au milieu ou sur la fin d'icelle, il trouuera ce qu'il cherche.

L'homme donc ayant trouué par ces oraisons ce qu'il cherchoit en icelles, à sçauoir la contrition, se doit preparer & disposer à la Confession, laquelle preparation ne se doit aussi faire sans quelque priere peculiere en forme de Confession generale à Dieu pour luy demander pardon. A quoy pourra bien à propos seruir l'oraison suivante.

Oraison pour demander à Dieu pardon des pechez commis, laquelle se doit reciter deuant la Confession sacramentalle.

PEre tout-puissant, pitoyable & misericordieux, ie, miserable pecheur, avec toute humilité qu'il m'est possible, & avec ferme esperance de vostre bonté & misericorde, prosterné à vos pieds, vous confesse mes griefs pechez, avec lesquels i'ay iusqu'à ceste heure offensé, vous, mon

Grena-
de li. 5.
du Me-
morial.

Q

240 PARADIS DES PRIÈRES,
tres-doux & benin Pere. Je confesse en-
cor ma tres-grande ingratitude enuers vos
infinis benefices : à ſçauoir, enuers vn ſi
grand amour & benignité, dont vous auez
touſiours vſé en mon endroit, non ſeule-
ment à m'attendre ſi long-temps à peni-
tence, me pouuant condamner & enuoyer
en enfer, ainſi que ie meritois par ma meſ-
chanceté: mais à me preuenir & prouoquer
le plus ſouuent par voſtre grace.

O combien de fois, Seigneur, auez-vous
frappé à la porte de mon cœur avec plu-
ſieurs ſainctes inspirations ? combien de
fois m'auetz-vous prouoqué & incité par
bien-faits ? combien de fois m'auetz-vous
flatté & mignardé de vos careſſes & dou-
ceurs ? combien de fois m'auetz-vous tou-
ché & chaſtié de vos fleaux, que pour tout
cela ie n'ay fait que vous chaſſer loing de
moy, & vous tourner les eſpaules ? mais
vous neantmoins m'auetz touſiours ſouſte-
nu & enduré avec vne inuincible patience.
O combien iuſtement me pouuiez-vous
condamner & enuoyer en enfer : & ſeule-
ment par voſtre clemence auez retiré la ri-
gueur & impetuoſité de voſtre ire, que ie
meritois.

Je m'eſmerueille certainement (ô Pere

tres-bening) comme mon cœur pensant à ces choses , ne sorte hors de moy de grande douleur. C'est chose bien claire , que l'enfer n'a point tant de tourmens , qu'en merite la coulpe de mes pechez. Je suis indigne de me nommer vostre creature , & que la terre me sustente & nourrisse de ses fruits. Et ne m'esmerueille moins , que toutes les creatures , & tous les elemens n'ont prins vengeance de moy , pour les iniures & deshonneurs que i'ay commises à l'encontre de vous. Ayez pitié de moy , Pere misericordieux , & ouurez les entrailles de vostre infinie pieté . Pardonnez moy , Seigneur , d'auoir si long-temps differé ma conuersion.

Descouurez-moy , Seigneur , cette douce poitrine paternelle , & me donnez ce pain & cette viande , que vous auez accoustumé donner à vos enfans. Effectuez (ie vous supplie Seigneur) en moy , ce que vous auez cherché & désiré si long-temps , & ce qu'eternellement vous auez déterminé de moy. O moy miserable , d'auoir abandonné vn Pere si benin & pitoyable , qui ne m'a iamais demonstré autre chose qu'amour , que bien-faits , que grace & fidelité. Ah , ah , pourquoy vous ay-je refusé

242 PARADIS DES PRIERES,
le cœur où vous auiez delibéré de fonder
& edifier vostre temple & habitation : &
l'ay fait vase de malice & d'ordure? Je con-
fesse librement, Seigneur, que ie suis plus
vicieux que tous les vices qui se trouuent
au monde : mais neantmoins avec tout ce-
la i'espere en vostre bonté. Car encor que
mes pechez soient innumerables, aussi est
infinie la multitude de vos misericor-
des.

O Pere tres-aimable, si vous voulez
vous pouuez me nettoyer. Guarissez-
moy, Seigneur, & ie feray guary; puis
que ie confesse clairement auoir peché
contre vous. Souuenez-vous de cette
parole pleine de si grande consolation,
que vous avez proferée par l'un de vos
Prophetes : *Tu as commis fornication avec
plusieurs amoureux : mais retourne à moy, &
ie te receuray.* Au moyen dequoy, Pere
tres-pitoyable, me confiant de cette pro-
messe, ie retourne à vous de tout mon
cœur, comme si vous m'auiez appelé &
inuité de vostre voix gracieuse. Et sçay que
ie suis cette ame sale & desloyale, cet en-
fant Prodigue, destruit & consommé qui
m'estois séparé de vous, Pere de lumiere,
duquel tout bien deriue : & comme pauvre

ouïaille mal caute & esgarée, m'estois esloignée de vostre troupeau, mesprisant les riches dons, desquels m'auiez si abondamment doüé.

Ie vous ay laissé, ô fontaine d'eau viue, & m'en suis allé boire au puits insipide des ameres consolations, qui se tarit en vn moment, s'éuanoüissans toutes les delices sensuelles plus viste que fumée. Ie vous ay laissé ô pain de vie, & suis allé manger des glands, delaissez & froissez des pieds des porcs, suiuant mes vicieuses affections & appetits bestiaux. Ie vous ay abandonné, ô souuerain & tresparfait bien, suiuant les biens terrestres & inconstans, & me suis perdu avec iceux; parce que ie nasquis nud, pauvre, miserable, & immonde, & me suis consommé en l'immondice de mes vices & pechez: mais maintenant ie vous supplie (ô Pere de misericorde) vouloir oublier toutes ces iniures passées, non pour ma penitence, mais en faueur de ce que vostre Fils vnique a fait pour moy.

Et vous, ô tres-doux Fils mon Sauueur, ayez misericorde de moy. Ie descharge dessus vostre benigne clemence, & sur vostre diuine grace, & iette dans

244 PARADIS DES PRIERES,
ces tres-sacrées playes , que pour moy
vous auez receuës, mes vices & pechez,
toutes les ingrattitudes, les deshonestetez,
les ires, l'orgueil, l'auarice, les desobeis-
sances, les dissolutions, les audacieuses &
eshontées presomptions, & tous les autres
maux que i'ay commis. Vous estes toute
mon esperance, tout mon refuge, toute
ma consolation. D'autant que mes pechez
me troublent & affoiblissent, d'autant me
console & fortifie vostre bonté, & les me-
rites de vostre passion: parce que tout ce
que i'ay fait par ma coulpe est defait par
vostre mort, & tout le defaut qui est en
moy, est abondamment reparé & resta-
bly par la valeur de vostre tres-sacrée
Passion.

Et bien que mes pechez soient grands
& sans nombre, ils sont neantmoins bien
peu & legers comparez à vostre misericor-
de infinie: partant ie confie en vostre
bonté, que vous ne me laisserez point pe-
rir, puis que vous m'auiez créé à vostre
image & semblance, & vous estes pour
moy fait participant de nostre chair & no-
stre sang. Et finalement i'espere que ie ne
seray point condamné de vous, puis qu'a-
uec si grand trauail & si grand prix m'auiez

võulu racheter. Vous qui viuez & regnez
par tous les siecles des siecles, Amen.

*Autre Oraison plus briefue pour dire deuant
la Confession sacramentale.*

REceuez ma Confession, Seigneur <sup>Es Heu-
res de
l'vſage
de Ro-
me ſelõ
le S.
Cõcile.</sup>
tres-clement & tres-pitoyable Ieſus,
la ſeule & vnique eſperance de mon ſalut
& redemption de mon ame, & me don-
nez ie vous prie vne parfaite contrition de
cœur, & vn ruiſſeau de larmes à mes yeux,
à ce que ie déplore iour & nuit, à toutes les
heures & momens de ma vie, toutes mes
negligences & pechez, avec la plus grande
humilité & pureté de cœur qu'il me ſera
poſſible.

Que mon oraiſon s'approche de vous,
Seigneur, que ma priere ayt telle entrée &
acceſſez par deuers vous, qu'elle puiſſe ſans
frayeur ſe preſenter deuant voſtre throſne
& Maieſté diuine. Si vous eſtes courrou-
cé contre moy, quel ayde pourray-je cer-
cher, ainſi de me donner ſecours? Qui ſe-
ra-ce qui me fera miſericorde, & me par-
donnera mes pechez? Ayez ſouuenance
de moy, Seigneur, qui auez par voſtre
ineffable miſericorde appellé à penitence
la Chananée, & le Publicain, & auez re-
ceu à mercy ſainct Pierre pleurant & lar-

246 PARADIS DES PRIERES,
moyant, qui vous auoit renié par trois fois.

Seigneur mon Dieu, receuez mes humbles prieres. O doux Iesus Sauueur du monde, qui vous estes liuré à la mort tant ignominieuse de la Croix, afin de racheter & sauuer les pecheurs, iettez la veuë de vostre misericorde sur moy miserable pecheur, & me regardez benignement qui à present inuoque vostre nom tres-sainct: ne prenez pas tant garde à mon mal & à mes offences, que vous veniez mettre en oubly le bien de vostre bonté & clemence.

Que si i'ay commis choses pourquoy vous me pouuiez damner & reprouuer: vous n'avez pas perdu ce pourquoy vous me pouuiez sauuer. Pardónez-moy donc, mon Seigneur, veu que vous estes mon Sauueur, faictes misericorde & pardon à mon ame pechereffe. Rompez les chaînes, par lesquelles elle est detenuë captiue: desliez les cordages & liens dont elle est estroittement liée; guarissez les playes mortelles & blessures d'icelle. O mon Seigneur & Sauueur Iesus, ie vous desire ardemment, ie vous cherche en toute diligence, ie ne veux & souhaitte que vous seul: monstrez vostre benigne face, & ie feray sauué. Enuoyez donc maintenant,

Ô mon Dieu, par les merites de vostre tres-pure & incontaminée Mere, tousiours Vierge Marie, & par l'intercession de tous les Saints, vostre verité & vn rayon de vostre tres-claire lumiere en mon ame, laquelle me manifeste & face voir toutes mes defectuositez & defences, desquelles il faut que ie me confesse & accuse, que cette mesme vostre lumiere & verité m'enseigne & m'aide à expliquer pleinement & parfaictement d'un cœur contrit & humilié, tous mes pechez, desquels ie me dois accuser. Qui vivez & regnez, &c.

Oraison briefue apres la Confession.

FAictes moy grace, Seigneur, que par les merites de la tres-pure & immaculée Vierge Marie vostre mere, & de tous les Saints, cette mienne confession vous soit plaisante & acceptable: & que vostre misericorde & pieté supplée tres-abondamment à ce qui me peut auoir defaillly & manqué presentement, & toutes les autres fois de contrition, de pureté de conscience, & integrité de confession. Plaise vous, Seigneur, selon vostre bonté & misericorde, me tenir plus amplement & parfaictement absolu au Ciel. Qui vivez, & regnez és siecles des siecles, Amen.

248 PARADIS DES PRIERES,
*raison en laquelle tous les travaux & merites
de Iesus-Christ sont offerts au Pere celeste,
pour obtenir pardon des pechez, & la gra-
ce, par le moyen d'iceux: elle se pourra dire
apres la Confession.*

Grena-
de li. 5.
du Me-
morial.
Ps. II.

Que rendray-je au Seigneur pour tou-
tes les choses qu'il m'a données ?
Avec quoy m'acquitteray-je envers luy de
tant de benefices ? Quelle chose luy offri-
ray-je pour tant de misericordes ? O com-
bien i'ay esté ingrat à vn si benin & libe-
ral bienfaicteur, duquel i'ay receu tant de
biens : m'estant tousiours opposé à ses in-
spirations, adioustant coulpe sur coulpe, &
peché sur péché. Je confesse, Seigneur,
que ie ne merite pas estre appellé vostre
enfant: mais toutesfois, quoy qu'il en soit,
si vous reconnois-je pour pere; car vous
estes veritablement mon pere, & toute ma
fiance & appuy.

Vous estes fontaine de misericorde, qui
nerciettez les immondes, qui ont recours
à vous, ains les receuez, les lauez, & leur
donnez consolations. Voyez-moy donc
icy (ô mon tres-doux secours) venant à
vous comme le plus pauvre de toutes les
creatures, sans porter autre chose avec
moy, que la charge & fardeau de mes pe-

chez, & me jettant humblement aux pieds de vostre pieté, & vous demandant en toute humilité misericorde. Pardonnez-moy donc (ô ma tres-certaine esperance) & me sauuez par vostre clemence infinie.

Doux Iesus, ie vous offre en remission de tous mes pechez ceste admirable charité par laquelle vous Dieu d'infinie majesté, n'avez desdaigné prendre chair humaine pour nous, & viure en ce monde trente & trois ans, avec tant de traux, persecutions, contradictions, lassitudes & ennuis. Ie vous presente cette angosse mortelle, cette sueur de sang, cette agonié, qui lors que vous estiez à genoux au iardin, priant vostre pere, affligoit & tourmentoit vostre cœur.

Ie vous offre ce tres-ardent desir que vous auiez d'endurer, quand si volontairement vous vous mistes entre les mains de vos ennemis, pour vous faire sacrifice pour nous. Ie vous offre la prison, les verges, les mocqueries, les iniures, les blasphemes, les soufflets, les crachats des bouches immondes de vos ennemis, avec toutes les autres sortes de tourmens, que toute cette douloureuse nuit vous endurastes en la maison d'Anne & Cayphe : Ie

250 PARADIS DES PRIERES,
vous presente toutes ces choses, suppliant
vostre pieté immense que pour tous ces
merites vous me vueilliez pardonner mes
fautes, purifier mon ame, & la conduire en
la vie eternelle.

Je vous offre encores cette ineffable hu-
milité & patience que vous eustes, quand
vous fustes couronné d'épines, & quand
pour plus grand mespris ils vous vesti-
rent d'une robe-rouge, & vous bouffe-
tans, vous saluoient, decrachotent, & frap-
poient de la canne qu'ils tenoient en leur
main. Je vous offre cette penible & dou-
loureuse lassitude de vostre tres-sainct
corps, ces pas si recrüz de vos pieds, & cet-
te si lourde & dure charge de la Croix que
vous portastes sur vos espaulles. Je vous
offre cette sueur & cette soif que vous en-
durastes en Croix, avec plusieurs autres an-
goisses que vous supportastes en vostre
cœur tres-patient. Je vous offre toutes ces
choses ensemble, avec toutes les tres-hum-
bles graces que ie vous puis rendre, sup-
pliant vostre infinie pieté, que pour tous
ces merites il vous plaise me pardonner
tous mes pechez, purifier mon ame, & la
conduire en la vie eternelle.

O doux Iesus, pour tous mes pechez & of-


fenses, ie vous offre les douleurs tres-cruelles que vous endurastes, quand vous ostant la robbe qui estoit attachée à vostre chair, les playes de vos battures se renouellerent, quand vos pieds & vos mains furent percez de cloux: quand vos membres furent estendus & desloincts: quand vostre sang precieux cōme vn ruisseau d'une fontaine failloit coulant de vos playes: ie vous offre toutes les gouttes de ce sang precieux.

Ie vous presente cette douceur & benignité, avec laquelle vous supportastes les contradictions & vituperes de ces meschans, qui secoians la teste vous buffetoient, & se mocquoient de vous: & vous les excusans, priez vostre Pere pour eux: Ie vous offre toutes ces choses ensemble, avec toutes les plus humbles & deuotes actions de graces que ie vous puis rendre, à ce que par ces merites vous me pardonniez mes pechez, purifiant mon ame, & la conduisant à la vie eternelle.

O doux Iesus, pour toutes mes vanitez & negligences, ie vous offre ces incomprehensibles tourmēs que vous endurastes, quand abandonné de tous costez aux forces des miseres & angouisses, & esloigné de toute consolation, vous estiez pendant

en Croix entre deux larrons. Je vous offre la grande soif que vous eustes en la Croix: cette pieté & reuerence avec laquelle vous inclinastes le chef, recommandant vostre esprit à vostre Pere.

Je vous offre ce sang salulaire & precieux, qui avec telle abondance sortit de vostre costé percé d'une lance: & cette eau salubre qui decoula parmy ce mesme sang de la mesme ouuerture avec toutes les tres. humbles graces que ie vous puis rendre. Vous suppliant par tous ces merites, qu'il vous plaist me pardonner tous mes pechez, purifier mon ame, & la conduire en la gloire, où vous vivez & regnez és siecles des siecles, Amen.





CHAPITRE V.

Contenant les Oraisons de ceux qui
se veulent amender & corriger
leur vie, par lesquelles ils de-
mandent à Dieu ce qui est
requis pour la nouveauté
de vie & meilleure
conuersation.

P R E F A C E.

LA nouveauté & changement de
vie, n'est pas la moindre & der-
niere partie de la vertu de Peni-
tence : car c'est vn sacrifice tres-
sainct & salutaire, dit le Sage, regarder soi-
gneusement aux Commandemens de Dieu, &
se separer de toute sorte d'iniquité & peché.

Or il est impossible de faire cecy sans l'ai-
de & secours de nostre Dieu : Car iacoit que le
vouloir soit en nous, nous n'auons toutesfois
les moyens & les forces de l'accomplir, si ce
n'est que cette volonté soit admonestée de se re-

leuer, & parfaitement guarie, à ce qu'elle puisse se hausser. Mais afin que nous puissions impetrer ce secours & faueur, il nous faut prier Dieu avec toute ferueur & deuotion: C'est donc fort à propos que dit saint Augustin: Nous croyons que personne ne vient à salut, si Dieu ne l'appelle & inuite: personne qui soit inuite ne peut faire son salut, si Dieu ne luy ayde, & personne ne peut meriter & obtenir l'ayde & secours de Dieu, sinon celui qui prie & inuoque Dieu en sa necessité. Bien à propos donc nous auons mis en ce lieu, apres la Penitence, les Oraisons de ceux qui se conuertissent & retournent à Dieu, par lesquelles luy demandons ayde & secours, afin de commencer à amender nostre vie, & la changer en vne meilleure conuersation: & finalement persueuer en icelle. Il m'a donc semblé bon de mettre & inserer les Oraisons suivantes à ce propos.

S. Augustin
aux
Docu-
mens
de l'E-
glise.

P R E M I E R E O R A I S O N , EN
laquelle la creature se presente & resigne es
mains de son Createur, luy rend parfaite
obeissance, & luy demande ce qui est requis
pour la correction & nouveauté de vie.

Grena-
de li. 5.
du Me-
morial.

O Mon Dieu, ô mon amour, ô mon
esperance, ô tout mon refuge & le
desir

desir de mon cœur , ô Pere de misericorde, & Dieu de toute consolation: toutes les fois que ie pense en moy-mesme quel i'ay esté par le passé, combien i'ay euadé de perils & dangers de perdition ; de combien de maux vous m'avez deliuré ou preserué, lors que mort en peché , enseuely & couuert de la pierre d'une vieille & mauuaise coustume de vous offenser , i'estois gisant au tombeau de mes ordures & iniquitez: & toutesfois parmy tant de pechez , vous avez incité en mon triste cœur vne telle esperance, que ie ne puis faire autrement par cy-apres, que ie ne vous demande toutes les choses necessaires pour mon salut : car ie suis vostre creature, ç'ont esté vos mains qui m'ont fait & formé: ne mesprisez donc, l'œuvre & facture de vos mains.

Mais pourquoy douterois-je aucunement que vous me ferez present, & me donnerez vos biens , puis que vous avez bien daigné prendre mes maux ? Je diray donc avec vostre Prophete : *J'espereray au Seigneur*, ie me resiouiray & consoleray en sa misericorde. Et comment n'espereray-je en luy , veu tant de signes & marques de l'amour incomprehensible qu'il me porte, & qu'il m'a porté lors que i'estois encores

fon ennemy ? mais pour autant que ie ſçay l'eſperance n'eſtre aucunement aſſeuree ſans l'obeïſſance, attendu ce que dit le Pſalmiſte : Sacrifiez vn ſacrifice de iuſtice , & puis eſperez au Seigneur. Mon Dieu , faites-moy la grace , qu'avec l'eſperance de voſtre miſericorde , i'vniſſe l'obeïſſance de vos commandemens , puis que ie ne vous ſuis moins redeuable de ceſte obeïſſance, que de toutes autres choſes , vous eſtant mon Roy, mon Seigneur, mon Empereur; auquel le Ciel & la terre, la mer, & toutes les autres creatures obeïſſent, duquel elles ont iuſques icy obſervé & obſerveront touſiours le commandement : que ie vous ſois donc obeïſſant plus que toutes icelles, puis que ie vous ſuis beaucoup plus obligé, qu'elles ne ſont toutes, que ie vous obeïſſe (ô mon Roy, mon Seigneur) & que i'obſerve entierement toute voſtre tres-ſaincte Loy.

Regnez en moy , Seigneur , & que le monde n'ait plus deſſus moy aucune ſeigneurie ny domination, & moins encores le Prince du mōde, ny ma chair, ny ma propre volōté, mais la voſtre ? que ie voye ſortir hors, & ſ'en aller bien loin de moy, tous ces tyrans uſurpateurs de voſtre ſiege, lar-

rons de vostre gloire, & peruertisseurs & infracteurs de vostre iustice: & que vous seul, Seigneur, cōmandiez & ordonniez: & que vous soyiez seul reconneu & obey avec vostre Sceptre, afin que vostre volonté soit aussi bien faicte en terre comme au Ciel.

O quand viendra le iour, que ie me verray deliuré de ces tyrans? Quand sera-ce, qu'en mon ame ne sera ouïe autre voix que la vostre? Quand sera-ce, que les armes & les forces de mes ennemis se rendront tellement, que ie ne sente plus en moy aucune contradiction à executer vostre sainte volonté? Quand verray-ie cette mer si tranquille; & le Ciel si serain? Quand verray-je mes passions si appaisées & mortifiées, qu'il n'y ait plus ny vague, ny nuee, ny tempeste, ny autre perturbation, qui trouble ou interrompt cette paix & obeïssance, & qui empesche en moy vostre regne? Dōnez-moy vous mesmes, Seigneur, cette obeïssance, ou pour mieux dire, donnez-moy telle Seigneurie dessus mon cœur, que ie le me puisse assubiectionner, en sorte qu'il vous soit du tout soumis.

Et tout ainsi encores, que ie suis obligé à vous obeïr, aussi suis-je tenu de m'offrir entierement à vous, & de me resigner du

tout entre vos mains, puis que ie suis entierement vostre, pour tant de si iustes tiltres & enseignemens. Vostre, parce que vous m'avez créé, & m'avez donné l'estre que i'ay: vostre, parce que vous me cōseruez & maintenez en iceluy, par les biens-faits & gracieufetez de vostre prouidence: vostre, parce que vous m'avez racheté de seruitude, non avec or ou argent; mais avec vostre precieux & propre sang: & vostre, parce que vous m'avez autant de fois racheté, que vous m'avez deliuré de peché.

Si donc ie suis vostre pour tant d'occasions, & vous pour tant de iustes causes estes mon Roy, mon Seigneur, mon Redempteur, & mon Libérateur: voyez-moy icy retournant à vous de nouveau, & vous offrant tout ce qui est vostre, c'est à dire, moy-mesme.

Maintenant ie m'offre pour seruiteur & esclau: maintenant ie vous offre entierement la clef & possession de ma volonté, à ce qu'à l'aduenir ie ne sois plus à moy, ny à autre; mais seulement & totalement vostre, afin que plus ie ne viue pour moy: mais pous vous, & que plus ie n'execute ma volonté, mais la vostre; de façon que ie ne mange, ny ne boiue, ny dorme, & ne face

aucune chose, sinon pour vous : & conformément à vostre volonté.

Icy ie me presente à vous , afin que vous disposiez de moy à vostre plaisir , comme de ce qui vous appartient. Si vous voulez que ie viue , que ie meure , que ie sois sain , malade , riche , pauvre , honoré , deshonoré ; en tout & par tout ie m'offre & me resigne en vos mains ; ie me deposse de moy-mesme , afin que ie ne sois plus mien , mais vostre ; afin que ce qui desia est vostre par iustice , le soit encore par ma volonté. Et ce non pour ceste heure seulement , mais pour tousiours , & par tous les siecles des siecles , Amen.

*Deuxiesme Oraison , en laquelle est demandé à
nostre Seigneur tout ce qui appartient
à nostre salut.*

IE vous rends graces infinies (ô mon Dieu , & Seigneur tout-puissant , & Pere de misericorde) de ce que vous-mesmes nous auez incitez à vous demander misericorde disant par la tres-sacrée bouche de vostre Fils. Demandez , & vous obtien- Matt. 2.
drez : cherchez , & vous trouuerez , frappez à la porte , & il vous sera ouuert.

Nous ayant pareillement donné hardiesse de faire , quand vous auez dit par vo-

Is. 45.

stre Prophete: Il n'y a autre que moy, qui soit Dieu iuste, & qui sauue. O toutes nations & bornes de la terre, conuertissez-vous à moy, & vous serez sauuez; car ie suis Dieu, & n'y en a point d'autre.

Or Seigneur, puis que vous-mesmes nous appelez, puis que vous-mesmes nous inuitez, & nous ouurez les bras, afin que nous recourions à vous: & pourquoy n'aurons nous esperance d'estre receus & recueillis en iceux? Vous n'estes pas semblable aux hommes, qui deuiennent pauures en donnant ce qu'ils possèdent: & pource, se sentent importunez & faschez quand on leur demande quelque chose.

Vous n'estes pas de mesme Seigneur; car tout ainsi que vous ne deueniez pas pauure quand vous donnez, aussi ne vous ennuyez-vous d'estre requis: & partant vous requerir misericorde, n'est pas vous importuner: mais plustost vous obeir, puis que vous commandez, que nous vous requerrions. Et par ce moyen mesmement nous vous honorions & glorifions, puis qu'en ce faisant nous rendons tesmoignage, que vous estes Dieu, Seigneur vniuersel, & distributeur de tout, auquel se doiuent demander toutes choses, attendu que vous

estes celuy seul, qui les pouuez donner. Et aussi vous mesmes nous demandez ceste maniere de sacrifice, disant : *Inuoque moy Ps. 49. au iour de la tribulation, ie t'en retireray, & tu me feras honneur.*

Esmeu doncques de cét amiable & pitoyable commandemēt, ie recours à vous, vous priant & suppliant, qu'il vous plaise m'octroyer tout ce que ie vous demande: c'est à sçauoir, que ie vous adore, craigne & reuere, que ie vous louë, & vous rende graces de tous vos benefices; que ie vous aime de tout mō cœur: que ie remette cōstamment toute mon esperance en vous, que i'obeisse à vos saincts Cōmandemens, que ie m'offre & resigne du tout en vos mains, & que ie vous sçache demander toutes ces graces & autres semblables, autant qu'il est deu & conuenable à vostre gloire, & à mon salut. Je vous requiers semblablement, Seigneur, que vous m'octroyez pardon de mes pechez, & vraye contrition & confession d'iceux. Faites-moy la grace de n'y plus retourner, & de n'en commettre plus d'autres. Et particulièrement ie vous requiers vertu, pour chastier & dompter ma chair, brider ma langue, mortifier les appetits de mon cœur, recueillir & retirer les

262 PARADIS DES PRIERES,
distractions & vagabondes pensees de
mon imagination, afin qu'ainfi renouuellé
& reformé, ie merite de vous estre temple
vif, & logis bien préparé.

Oùtroyez-moy pareillement, Seigneur,
toutes les vertus, par lesquelles cestuy vo-
stre temple & habitation puisse non seule-
ment estre purifié; mais encores bien orné
& enrichy: à sçauoir, la crainte de vostre
sainct Nom, tres-ferme esperance, humi-
lité tres-profonde, perpetuelle patience,
claire discretion, pauureté d'esprit: parfai-
cte obeïssance, continuelle force & diligen-
ce, pour supporter toute peine quelconque
pour vostre seruice: & sur tout tres-arden-
te charité enuers vous, & enuers mes pro-
chains. Et pource que ie sçay bien, que ie
ne merite aucune de ces choses: Souuenez-
vous, Seigneur, de vostre misericorde,
pour l'exécution de laquelle souuentefois
est suffisante la seule misere. Souuenez-
vous, que vous ne voulez la mort du pe-
cheur, comme vous-mesmes auez dit: mais
plustost qu'il se conuertisse, & qu'il viue.

Souuenez-vous que vostre Fils vnique
n'est venu au monde (ainfi que luy-mesme
l'a tesmoigné) pour chercher les iustes, mais
les pecheurs.

Souuenez-vous de tout ce qu'il a fait & enduré en ce monde, depuis le iour qu'il naquit, iusques au iour qu'il expira en la Croix: puis qu'il n'a pas enduré toutes ces choses pour luy; mais pour moy. Je vous offre donc tout cela en sacrifice, pour mes pechez & necessitez: & par ses merites, non par les miens, ie vous demande cette misericorde.

Et parce qu'il est dit de vous, que vous honorez les peres en leurs enfans, octroyans graces aux vns pour l'amour des autres (comme fit Dauid à Misiboseth, pour l'amour de son pere Ionathas) honorez vostre fils vnique, me faisant bien pour l'amour de luy, attendu qu'il est mon pere, & mon second Adam, & que ie suis son fils, encores que tres-indigne & meschant. Souuenez-vous, Seigneur, que i'ay recours à vous, & que i'entre par vos portes, & comme à vray Medecin & Seigneur, ie vous descouure mes playes & necessitez: & ie vous inuoqueray, estant pourueu de cet esprit, avec l'oraison, que le Prophete Dauid composa, disant: Tournez à moy vostre oreille, Seigneur, & m'exaucez; car ie suis pauvre, & denué de tous biens: conferuez mon ame, car à vous ie suis dedié.

264 PARADIS DES PRIERES,
Sauuez ô Seigneur vostre seruiteur, lequel met en vous son esperance: O Seigneur ayez de moy misericorde, qui n'ay cessé tout le iour de vous inuoyer. Consolez & recreés desormais l'ame de cestuy vostre seruiteur, laquelle il a esleuée & adressée à vous. Vous estes doux, benin, & grandement misericordieux à ceux qui vous craignent.

Oyez mon oraison, Seigneur, & entendez la voix de mes prieres. Je vous ay inuoyé au iour de la tribulation, & vous m'avez exaucé. Je ne trouue entre tous les Dieux vn Dieu semblable à vous, & n'y en a aucun qui se puisse esgaler à vos œuvres. Toutes les gens que vous avez créées viendront en vostre presence, & vous adoreront, glorifiant vostre saint Nom, parce que vous estes ce souverain ouurier des choses admirables, & vous seul estes le souverain Dieu. Conduisez-moy, Seigneur par vostre sentier, & j'entreray en vostre verité. Que mon cœur se console & se resjouisse, afin que je craigne & reuerse vostre saint Nom. Je vous louëray, Seigneur, de tout mon cœur, & glorifieray vostre saint Nom eternellement, es siecles des siecles, Amen.

Troisième Oraison pour le mesme ſujet.

IL eſt raifonnable, Seigneur Dieu tout S Aug.
ch. 40.
de ſes
Medit.
puiffant, qui eſtes Trinité en vnité, qui eſtes touſiours en toutes choſes, eſtiez devant icelles, & ſerez Dieu benit à iamais, & par tous les ſiecles des ſiecles, que ie vous recommande aujourd'huy, & en tout temps, & vous prie prendre en voſtre ſauuegarde, mon ame, mon corps, ma veüe, mon ouïe, mon gouſt, mon ſentiment & attouchement, voire toutes mes penſées, affections, paroles, actions, mon interieur & exterieur, mon entendement, ma memoire & volonté, ma foy, mon eſperance, & ma perſeuerance, afin que les preſeruiiez & gardiez iour & nuit, à toutes heures & momens, & pendant le cours de ma pauvre & miſerable vie.

Exaucez-moy (tres-haute & tres-sainte Trinité) & me defendez de tout mal, ſcandale & peché mortel, de toutes embuſches & ſeductions diaboliques, de tous mes ennemis viſibles & inuiſibles. Oſtroyez-moy cela mon Dieu, par les merites de la tres-glorieufe & immaculée Vierge Marie, par les prieres des Patriarches, par l'interceſſion des Prophetes, & par les ſuffrages des Apoſtres, par la conſtance des

266 PARADIS DES PRIÈRES,
Martyrs, par la foy des Confesseurs, par
la chasteté des Vierges, & par les supplica-
tions de tous les Saints bien-heureux, qui
vous ont pleu & feruy dès le commence-
ment du monde.

Chassez aussi bien loin de moy, ô Sei-
gneur tout-puissant, tout orgueil d'esprit,
& augmentez la contrition de mon cœur
en diminuant mon arrogance, parfaissant
en ma personne vne vraye & parfaicte hu-
milité, excitant en elle vn continuel gemis-
sement, & addoucissant ce cœur mien
plus dur que la pierre & rocher. Sembla-
blement deliurez-moy, ô vray Seigneur
de mon cœur, de toutes les fineses & ma-
lices de l'ennemy infernal, & m'entrete-
nez en vostre tres-saincte & sacrée volon-
té. Et d'autant que vous estes mon Dieu &
souuerain Seigneur: enseignez-moy d'ac-
complir vostre saint & celeste vouloir.

Donnez-moy eternelle bonté, vn sens
& entendement accompli & consommé,
afin que ie puisse comprendre vostre pro-
fonde benignité. Ne permettez que ie
vous fasse autre demande, sinon de ce qui
vous fera delectable, & à quoy vous pren-
drez plaisir, & me fera plus utile & neces-
saire. Chassez bien loing de moy tout ce


que vous y trouuerez de mauuais, & au lieu de ce, faictes y naistre vn esprit de chasteté & de continence, à celle fin que ie ne vous puisse aucunement offenser en requérant ce que ie vous demanderay. Ostez de ma personne tout ce qui me nuit, & introduisez en icelle ce qui me fera bon & profitable. Donnez-moy telle medecine, Seigneur, que mes playes en puissent estre guaries & consolidées. Par mesme moyen octroyez moy vne crainte de vous, vne contrition de cœur, vne humilité d'esprit, avec vne conscience pure & nette.

Accordez-moy semblablement que ie puisse tousiours auoir vne fraternelle charité, avec vne oubliance de mes maux, sans point me soucier de rechercher ceux d'autrui. Faictes ie vous supplie, mon Dieu, pardon à ma pauvre ame; pardonnez mes delicts, effacez mes pechez, & oubliez toutes mes offenses & iniquitez. Visitez-moy qui suis debile, guarissez-moy qui suis malade, pensez-moy qui suis languissant, & me ressuscitez qui suis mort. Esslargissez moy, Seigneur, vn cœur qui vous craigne, vn esprit qui vous aime, vn sens qui vous entende, des oreilles qui vous oyent, & des yeux qui vous puissent voir. Fauori-

sez-moy iusques-là, Dieu debonnaire, que de donner vne discretion avec vn sens vigilant & attentif, pour sçauoir discerner tousiours le bien d'auec le mal: vn cœur & vne bouche pour vous louer maintenant en ce monde, & à iamais au Ciel, Amen.

Vous avez plusieurs autres Oraisons pour ce mesme sujet au chapitre 14. lequel contient les Oraisons pour demander les vertus.





CHAPITRE VI.

Comprenant les Meditations & Oraisons desquelles l'ame deuote se pourra seruir deuant & apres la sainte Communion.

P R E F A C E.

Laquelle enseigne les moyens comment la personne pourra dignement & auec vtilité communier.



DES les Sacremens de la Loy nou-

uelle, requierent & demandent vne soigneuse preparation & disposition en ceux qui les recoignent, pour les receuoir dignement: mais les vns demandent vne plus grande diligence, plus grande & excellente preparation, selon qu'est plus grande & plus noble l'excellence d'iceux, & leur dignité de plus ample merite; car quelques-uns requierent seulement vne douleur des pechez comme le Baptisme: quelques autres, outre la contrition & desplaisance des pechez

Grenai-
de li. 3.
du Mc-
morial.

demandent necessairement l'accusation & confession d'iceux comme la penitence. Mais le saint Sacrement de l'Autel, entant qu'il est le plus noble & le plus digne de tous les autres, requiert aussi une tres-parfaicte & tres-soigneuse disposition & preparation. Et cette preparation n'est parfaicte & accomplie par la seule contrition & confession des pechez: Mais plusieurs autres choses y sont requises & necessaires, afin que la personne n'accede & se presente indignement à ce tres-noble & digne Sacrement: & à celle fin qu'il puisse estre fait participant des biens, graces & richesses qui sont contenuës & distribuées en ce saint & tres-auguste Sacrement.

Or ce Sacrement, pour vray dire, est d'une vertu infinie, ayant en soy Iesus-Christ, qui est la source & fontaine de toutes graces & vertus: il contient aussi dans soy, tous les merites de la Passion de nostre Sauueur & Redempteur, lesquels semblablement sont sans mesure & sans nombre, n'ont aucune fin & terme; car ils sont incomprehensibles. Et d'autant que la preparation sera plus diligente & soigneuse que nous ferons de nostre costé pour acceder à ce Sacrement: tant plus grande sera la grace & le fruiet que nous en retirerons, en la reception d'iceluy qui vient au puy, ou
à la

à la fontaine, afin de puiser de l'eau, en puisé tout autant que son vaisseau en peut tenir; & de ce qu'il n'en puisé d'auantage, il faut imputer cela au vaisseau, & non pas au puy, lequel donneroit l'eau en plus grande abondance, si le vaisseau estoit plus grand, & en pouuoit contenir d'auantage. Ainsi est-il de ceux qui viennent à ce saint Sacrement, ils puisent & reçoient autant de grace, que leur deuotion & preparation est grande; car la cause opere & fait ses effets selon la disposition du suiet.

L'excellence & la dignité de ce Sacrement admirable, requiert les choses qui ensuiuent. Premièrement vne pureté de conscience & purification de tout peché mortel, & de veniel, en tant que faire se pourra: C'est la raison pourquoy il faut faire la Confession deuant la sainte Communion, si celuy qui doit sacramentellement communier se sent coupable en sa conscience de quelque crime & peché.

Secondement, est requise en ce Sacrement, vne pureté d'intention: c'est à sçauoir, que l'homme accede à ce sacré mystere & tres-auguste Sacrement pour vne bonne fin, n'estant à cecy prouoqué & attiré pour quelque sienne commodité & profit particulier, n'estant contraint par aucune crainte d'encourir quelque peine ou dommage, non pas vne accoustumance, non

pas afin qu'il recoiue en iceluy quelque deuotion suauité, & delectation sensible: mais d'une intention droicte & pureté.

La troisieme chose necessaire & requise à ce Sacrement, est la deuotion actuelle. Or cette deuotion actuelle n'est autre chose qu'une affection generale & spirituelle, composée de plusieurs autres saincts desirs & spirituelles affections, desquelles nostre ame doit estre remplie, toutes-fois & quantes qu'elle s'approche de ce venerable Sacrement. Surquoy dit fort à propos saint Ambroise, avec quelle contrition & repentance, avec quelle fontaine de larmes, avec quelle crainte & reuerence, avec quelle pureté d'esprit se doit celebrer (ô mon Dieu) ce diuin mystere, où vraiment ta chair ce mange, & vraiment se boit ton sang, où les choses hautes s'unissent avec les basses & les diuines avec les humaines: où est la presence des saincts Anges, & où toy mesme es le Sacrificateur & le sacrifice, par une maniere admirable, & du tout incomprehensible?

Pour faire cette preparation, il sera bien necessaire de prendre quelque temps & iours auant la Communion, de peur que comme font quelques-uns, & en trop grand nombre, nous ne nous presentions à ce tres-saint & redoutable Sacrement, avec une toute recente & nouvelle

recordation de nos pechez lesquels sont encores tous puans & fumeux d'une puanteur tres-grande, & la fumee d'iceux n'estant encores du tout esteinte & assoupie. Il fut commandé au peuple Israëlitique, de se preparer par l'espace de trois iours, afin de recevoir la Loy que Dieu donna à Moïse. A plus forte raison donc ce Sacrement requiert de nous une preparation de trois ou plusieurs iours, à ce que nous le recevions dignement: Car c'est le mesme Seigneur qui vient nous donner une nouvelle Loy; non de mort, mais de vie; non de lettre, mais d'esprit; non de crainte, mais d'amour.

Toute cette espace de temps, celui qui se dispose pour communier, s'occupera à quelques exercices pieux & deuots, à sçauoir à examiner sa conscience; à confesser au Prestre ses pechez, & apres la confession s'abstenir de tout peché mortel, & des pechez veniels, tant que faire se pourra, à fuir & éuiter toutes les occasions d'offencer Dieu, & se retirer soigneusement de tout bruit & occupation des choses mondaines, & sur tout se faire libre de la conuersation & frequentation du monde. Deuant toute autre chose, celui qui veut communier, doit en toute diligence garder son cœur de crainte que dans le liēt de l'Espoux celeste Iesus-Christ, lequel il demande bien orné &

274 PARADIS DES PRIERES,
diapré de diuerses fleurs odoriferantes , on ne
trouue que des espines & chardons. Il con-
uient donc durant ces iours employer le plus du
temps aux exercices spirituels de l'Oraison &
Meditation : en saintes & deuotes leçons ; car
ce sont les encens & parfums , avec lesquels
doit estre preparée la maison qui doit receuoir
cette Hostie celeste.

Le soir auant la Communion , il sera bon
s'abstenir de soupper , ou pour le moins man-
ger fort peu , & euitier les conuersations & de-
uis accoustumez apres soupper ; mais se leuer
incontinent de table , & se retirer au plus se-
cret de son cabinet , & en ce lieu communiquer
& deuiser familièrement avec Dieu seul. De-
uant se mettre au liét pour prendre son repos,
il sera fort conuenable , presenter Oraisons
& prieres deuotes à Dieu , à ce que par sa gra-
ce il le garde toute ceste nuict des illusions dia-
boliques , de tout peché , & de tous phantosmes
& imaginations fausses & vaines : car par
ce moyen le somme en sera plus tranquil , net
& gracieux : & y aura plus d'opportunité d'em-
ployer vne partie de ceste nuict és exercices,
avec lesquels l'ame se dispose mieux , & se
preparer à la solemnité du iour suruant. Et au
matin , si tost que nous aurons ouuert les
yeux , qu'il nous souuienne d'embrasser Iesus-

Christ, & celuy crucifié, avec memoire de sa tres-saincte Passion, en laquelle nous deuons en ce iour estre particulièrement occupez, parce que ce Sacrement estant institué en la memoire de la Passion de Iesus-Christ, c'est la principale cogitation & meditation que nous deuons auoir en nostre esprit, afin que faisans ainsi nous accomplissions la volonté du testateur.

Voila les choses requises de la part de l'homme, pour se preparer à la reception & communion de cét ineffable Sacrement, lesquelles neantmoins ne sont totalement suffisantes, si ce n'est que Dieu prepare de son costé le cœur de l'homme; car si personne ne peut sans l'aide & faueur d'iceluy se disposer pour receuoir augmentation & accroissement de graces: encores moins se pourra-il disposer & preparer pour dignement receuoir Dieu sans le secours & grace speciale de Dieu mesme. C'est la raison pourquoy il faut, comme chose tres-necessaire, par humbles & deuotes prieres & oraisons, inuoker l'aide & faueur de ce Seigneur, par l'operation duquel nostre conscience soit purifiée, & la sale, où Iesus-Christ veut celebrer la Pasque avec nous, embellie & bien ornée. Ce qui se pourra facilement obtenir par deuotes Oraisons & Meditations:

car par icelles l'interieur de l'homme est plus pur, plus deuot, & attentif à Dieu au temps de la communion, & en son cœur s'allumera la flamme de ce feu diuin, pour le purifier, enflammer, & transformer en Dieu. A quoy pourront aider les Meditations & Oraisons suivantes, lesquelles sont faites & accommo-
dées à ce propos, relisant, non pas à la haste & en courant, mais avec loisir & attention, avec les pauses & stations que requiert vn si grand & tres-haut mystere.

Meditation auant la sacrée Communion pour exciter en l'ame vne crainte & amour de ce tres-sainct Sacrement.

Q Vi estes vous (ô Seigneur) & qui suis-je, pour prendre la hardiesse de m'approcher de vous ? Quelle chose est l'homme sinon vn vase de corruption, enfant du diable, heritier de l'enfer, ouurier de pechez, mespriseur de Dieu, & creature tres-imbecile & inhabile à tout bien, & tres-disposée & puissante à tout mal ?

Quelle chose est l'homme, sinon animal en toutes choses miserable, aueugle en ses conseils, vain en ses actions, lourd & mal-aduisé en ses appetits, inconstant en ses desirs, & finalement petit en toutes

choses, si ce n'est en la grande estime qu'il fait de foy-mesme? Voila donc, Seigneur, ce que ie suis.

Mais qui estes-vous mon Seigneur: vous estes grand sans quantité, bon sans qualité, sage sans mesure, & eternal sans temps. Vous estes infiny en grandeur, tout-puissant en vertu; démesuré en sapience, en conseils admirable, en iugemens terrible, & en toutes vertus parfait & accompli.

Comment doncques vne si vile & lourde creature osera-elle approcher d'un Dieu d'une si grande Majesté? Les estoilles en vostre presence perdent leur splendeur: les colonnes du Ciel tremblent deuant vous, les plus hauts Seraphins resserrent leurs ailles, & se tiennent pour petits papillons en vostre presence. Comment doncques vne si vile creature prendra-elle la hardiesse de vous receuoir dans foy? Luc 3.

Saint Iean Baptiste sanctifié dans le ventre de sa mere, n'ose pas toucher vostre corps, & ne se sent digne de deslier les courroyes de vos souliers. Ioan. 1

Le Prince des Apostres s'escrie, & dit: *Retirez-vous de moy, Seigneur, car ie suis homme pecheur.* Et moy ainsi chargé des pe-

chez , auray-je la hardiesse de m'approcher de vous ? Si ces pains qui estoient deuant Dieu sur la table du Temple , qui n'estoient seulement que l'ombre de ce mystere , ne deuoient estre mangez , sinon de celuy qui estoit munde & sanctifié : Comme auray-je assez d'assurance pour manger le pain des Anges , estant si esloigné de toute sainteté ?

Dieu commandoit que cét Agneau Paschal (qui estoit figure de ce Sacrement) fust mägé avec pain azymé , & avec laictuës ameres , les souliers en pied , & les reims ceints. Comment donc oseray-je m'approcher du vray Agneau Paschal , sans auoir rien de tous ces appareils ? Qu'est-ce que le pain azymé , sinon la pureté & sincerité sans leuain de malice ? Que signifient les laictuës ameres , sinon la vraye contrition ? Où est la pureté des reims , & la blancheur des pieds , qui sont les saints desirs & affections ? Je crains & doute merueilleusement en quelle maniere ie seray receu à cette table , estant despourueu de cette preparation.

Matt.
12.

De cette table fut dechassé celuy qui ne se trouua vestu de sa robe nuptiale , qui n'est autre chose que la mesme charité : &

pieds & mains liez , luy fut commandé estre ietté és tenebres exterieures. Que dois-je donc attendre estant trouué en tel estat à ce banquet ? O diuins & celestes yeux , ausquels sont entierement descouverts & apparens tous les discours de nos ames : que fera-il de la mienne , si deuant iceux elle est ainsi trouuée deuestuë ?

Toucher l'Arche du Testament (qui 2. Roys n'estoit que figure de ce mystere) fut chose de telle importance , que le Prestre qui la toucha , appelé Osa , en fut incontinent chastié d'une mort soudaine : comment donc ne craindray-je ce mesme chastimēt , receuant indignement le mesme , qui estoit figuré par cette Arche ?

Les Bethsamites ne firent autre chose , 1. Roys que curieusement regarder cette mesme Arche du Testament , lors qu'elle passoit par leur pais : & pour cette seule hardiesse l'Escripture sainte dit , que Dieu pour ce peché fit mourir cinquante mille hommes du peuple. O chose pour faire trembler tous cœurs ! Ceux-là ne mespriserent l'Arche , & ne la recueillirent avec mauvais visage , ains se resiouirent à sa venue , luy firent feste , & luy offrirent sacrifice. Et seulement pour l'auoir voulu regarder avec

280 PARADIS DES PRIÈRES,
curiosité , furent chastiez par le sang de
tant de personnes. Qui attendroit iamais
vn tel chastiment pour tel peché d'vn si
pitoyable ? Mais ô Dieu misericordieux &
terrible: combien plus grande chose est-ce
de vostre Sacrement , que de cette Arche ?
Combien est-ce plus grande chose de vous
recevoir , que de vous regarder ?

Comment doncques ne craindray-je ,
moy venant à recevoir vn Dieu de si haute
Majesté & iustice , mesmement connois-
sant certainement que quand bien par l'es-
pace d'vne infinité d'années , ie me serois
disposé & préparé pour recevoir vne seule
fois ce Sacrement , avec toute la pureté
des Anges : si ne serois-je digne de le rece-
voir : combien donc le suis-je moins estant
ainsi mal disposé ; Et si i'ay si grande occa-
sion de craindre , considérant vostre gran-
deur : combien plus deurois-je craindre ,
considerant mes pechez & ma malice ? Il
me souvient , Seigneur , de plusieurs &
grandes coulpes , que i'ay commises en ce
monde à l'encontre de vous.

Il a esté vn temps (& plaise à vostre mi-
sericorde qu'il ne soit encores aujour-
d'huy) que vostre bonté infinie estoit la
chose la plus esloignée de ma souuenance ,

& la moins aimée : & que la pouldre des creatures estoit plus estimée de moy , que le trhresor de vostre grace , ny l'esperance de vostre gloire. Mes desirs estoient la loy & la reigle de ma vie : i'auois donné toute obeïssance à mes appetits , & ne faisois non plus de compte de vous , que si iamais ie ne vous eusse conneu.

Ie suis cét ignorant qui a dit en son cœur , il n'y a point de Dieu ; car i'ay vescu bien long-temps , tout ainsi comme si i'eusse creu que vous ne fussiez point. Ie n'ay iamais prins aucun trauail pour vostre amour : iamais ie n'ay eu crainte de vostre iustice : iamais pour la reuerence de vos loix ne me suis retenu de mal-faire : iamais ne vous ay rendu graces de vos benefices , ainsi que ie suis tenu : iamais quelque connoissance que i'eusse que vous estes en tout lieu , ne me suis abstenu de pecher en vostre presence. I'ay oütroyé à mes yeux tout ce qu'ils ont désiré , & ne fis iamais la moindre force à mon cœur , pour luy distraire & desnier aucun de ses plaisirs. Quelle sorte de mauuaitié se peut penser , par laquelle ne soit passé ma malice & impieté ?

Quelle autre chose a iamais esté ma vie , sinon vne perpetuelle guerre à l'encontre

282 PARADIS DES PRIERES,
de vous, & vne reiteration de tous les martyres que vous auez endurez pour moy? Combien de fois, à l'appetit de quelques declarations, ou de quelques deniers, vous ay-je vendu comme vn autre Iudas? Que fais-je donc maintenant m'approchant de vous, sinon vous donner des baisers de paix apres vous auoir trahy? Et qu'ay-je fait toutes les autres fois que i'ay communiqué, & incontinent apres auoir communiqué, que ie vous ay offensé, sinon vous iniurier & me mocquer de vous avec les soldats, lesquels d'vn costé s'agenouïllans vous adoroient, & de l'autre vous frapportoient avec des cannes?

Comment doncques, ô mon Sauueur & mon Iuge : prendray-je l'audace de vous receuoir en vn si vilain & mal-plaisant logis? Comment feray-je reposer vostre corps sacré en vn liect de dragons, & en vn repaire de serpens? Quelle chose est l'ame pleine de pechez, sinon vne retraite de diables, vne estable de bestes immondes, vne porcherie & receptacle de toutes ordures & vilainies?

Comment pourrez-vous donc (ô pureté virginale, fontaine de beauté) demeurer en vn lieu si abominable? Qu'a affaire

la lumiere avec les tenebres, & la compagnie de Dieu avec celle de Belial? O fleur des champs, lys des valées, ô pain des Anges, comment voulez-vous maintenant estre la viande des bestes?

Doit-on bailler cette viande diuine aux chiens, & cette si precieuse marguerite aux pourceaux? O amateur des ames pures & mundes, qui vous repaissez entre les lys tant que dure le iour, & que les ombres s'abaissent. Quelle pasture vous pourray-je apprestre en mon cœur, duquel ne naissent ces fleurs, mais seulement chardons & espines? Vostre liect est construit de bois de Liban, ayant les colonnes d'argent, & la couche d'or, & les degrez pour y monter couuerts de pourpre: mais en ceste maison n'y a aucune de ces couleurs. Quel siege doncques vous presenteray-je, quand vous viendrez à arriuer?

Vostre sacré corps fut enueloppé en vn linceul pur & net, & enseuely en vne sepulture neufue, où personne n'auoit encores esté mise: mais quelle place y a-il en mon ame qui soit nette & neufue, où ie vous puisse enseuelir? Qu'à iamais esté ma bouche autre chose qu'un sepulchre ouuert, duquel sortoit la puanteur & corruption

284 PARADIS DES PRIÈRES,
de mes pechez? Qu'a iamais esté mō cœur,
sinon vne source de mauuais desirs? Quel-
le chose a esté ma volonté, sinon vn logis
& vn liēt du diable?

Comment doncques seray-je si hardy
de m'approcher de vous pour vous rece-
voir, & vous baiser avec ses lèvres ordes &
sales? Il n'y a aucune partie en mon ame qui
soit pure & nette, & qui plusieurs fois
n'ayt esté corrompuë par le peché: & par-
tant ie n'ay point de sepulchre neuf &
munde, où ie vous puisse enseuelir. Ah!
mon Redempteur & Sauueur, ie suis con-
fus, me voyant tel. I'ay grande honte de
voir la maniere en laquelle ie m'envais pour
dormir & reposer entre les bras de l'Es-
poux du Ciel, lequel de nouveau me veut
recevoir.

Seconde Meditation.

IE connois, Seigneur, mon indignité, &
connois vostre misericorde, qui est celle
qui me donne la hardiesse de m'approcher
de vous, quel que ie sois: Car tant plus ie
seray indigne, tant plus vous ferez glo-
rifié, ne me dechassant, & ne desdaignant
vne si vile creature. Vous ne dechassez pas
les pecheurs, ô Seigneur, ains les appel-
lez & tirez à vous. Vous estes celuy qui

avez dit : Venez à moy tous qui estes chargez de peine & de trauail , & d'infirmite : & ie vous soulageray. Vous avez dit que les sains n'ont affaire du medecin mais bien les malades : & que vous n'estes venu pour appeller les iustes , mais les pecheurs.

Il a esté dit de vous publiquement que vous receuiez les pecheurs , & que vous mangiez avec eux.

Vous n'avez point , Seigneur , changé de condition depuis ce temps-là : qui me fait croire qu'encores maintenant vous appelez du Ciel ceux que pour lors vous appelliez estant sur terre. Et pour cette condition , esmeu de cette vostre pitoyable inuitation & conuiement ; ie viens à vous chargé de pechez , afin que vous me deschargiez : & trauaillé de mes propres miseres & tentations , afin d'estre de vous soulagé & rafraischy. Ie viens cōme le malade au medecin , afin que vous me guarissiez , & comme pecheur au iuste & à la fontaine Pro. 8. de iustice , afin que vous me iustificiez. Vous dites que vous receuez les pecheurs , & mangez avec eux : mesmes que vos delices & vostre viande est de conuerser avec telle maniere de gens. Si donc vous prenez tant de plaisir en telles compagnies &

banquets : voyez icy vn pecheur , avec lequel vous pourrez faire bonne chere de telles viandes.

Luc. 7. Je ſçay bien , Seigneur, que les larmes de cette publique pechereſſe vous furent plus agreables que le ſuperbe banquet du Pharifien : dautant que vous ne meſpriſaſtes ſes larmes, & ne la dechaſſaſtes comme pechereſſe, mais pluſtoſt la receuſtes , luy pardonnaſtes , & la priſtes en voſtre protection , & pour vn peu de larmes luy pardonnaſtes beaucoup de pechez. Icy vous eſt preſentée , Seigneur, nouuelle occaſion de plus grande gloire , qui eſt vn pecheur accompagné de plus de pechez , & de moins de larmes. Celle-là ne fut ny la premiere , ny la derniere de vos miſericordes : Vous en auez faites pluſieurs ſemblables ; & en auez encores pluſieurs autres à faire : Faites que cette-cy ſoit comptée au nombre d'icelles, & pardonnez à celuy qui vous a plus offenſé , & qui pleure moins pour vous auoir offenſé. Il n'a pas tant de larmes qu'il vous en puiſſe lauer les pieds , mais vous auez bien reſpandu-aſſez de ſang pour lauer les pechez du monde.

N'entrez contre moy en indignation, Seigneur , pource qu'eſtant tel que vous
me

me voyez, ie prends la hardiesse de venir en vostre presence. Et vous souuenez que vous ne pristés en mauuaise part, quand cette pauvre femme, qui estoit malade d'un flux de sang, s'approcha pour receuoir le remede de son infirmité, touchant le bort de vostre robbe, ains là consolastes luy disant : Sois assuree fille que ta foy t'a sauuee. Et maintenant moy tourmenté & affligé d'un autre flux de sang plus dange-reux & plus incurable que cestuy-là : que puis-je faire sinon m'approcher de vous pour receuoir le benefice de mon salut ? Ah ! Seigneur, vous n'avez point changé la condition, ny l'office que vous auiez en terre, encores que vous soyez monté au Ciel ; car s'il estoit ainsi, nous aurions besoin d'une autre Escriture & d'une autre Euangile, qui nous declarast la condition que vous auez là haut, si elle estoit indiffe-rente de celle dont vous souliez vser icy. Matt. 9.

Ie lis en vos Euangiles, que tous les ma-lades & comblez de miseres, s'efforçoient de vous approcher & vous toucher, pour-ce que de vous sortoit vne vertu qui les guarissoit tous. A vous venoient les le-preux : & par l'extension de vostre benoiste main ils estoient guaris. A vous venoient Matt. 10.

288 PARADIS DES PRIERES,
les aueugles, les sourds, les paralytiques,
& les demoniaques, & à vous finalement
arriuoient tous les monstres du monde : &
ne vous estes iamais monsté de difficile
accez à aucun d'eux. En vous seul est le sa-
lut, en vous le remede de tous les maux.
Vous n'estes moins gracieux & pitoyable à
vouloir departir guarison & salut, que puis-
sant pour le faire.

Où irons nous doncques ; nous autres
pauures necessiteux, sinon à vous ? Je con-
nois veritablement, Seigneur, que ce di-
uin Sacrement n'est pas seulement viande
pour les sains ; mais encore medecine pour
les malades : qu'il n'est pas seulement for-
ce des viuans, mais resurrection des morts,
non seulement il delecte & fait enamourer
les iustes, mais encores il guarit & purifie
les pecheurs.

Que chacun doncques s'approche de là
où il est, & que de là prenne la part qui luy
appartient. Que les iustes viennent man-
ger & faire bonne chere à cette table, &
que la voix de leur confession & loüange
ressonne en tout ce calice de mon salut : Je
ne puis passer par aucun endroit sans ce
mystere, & ne me puis en aucune maniere
excuser d'iceluy.

Si ie suis malade, icy on me guarira : si ie suis en santé, icy ie seray conserué & entreteu. Si ie suis viuant, icy ie seray conforté ; & si ie suis mort, icy ie seray ressuscité ; si ie suis ardent en l'amour diuin, icy s'augmentera cét ardeur ; & si ie suis tiede, icy ie seray eschauffé. Je ne perdray point le cœur pour me voir aueugle, car le Sei- ps. 44.
gneur illumine les aueugles ; ny pour me voir tombé, car le Seigneur releue ceux qui le sont. Je ne fuiray de luy comme fit Adam, pour se voir nud ; car il est puissant Gen. 3 :
pour couvrir ma nudité, ny pour me voir pesant & chargé de pechez, car il est fontaine de misericorde, ny pour me voir en si grande pauureté ; car il est Seigneur de toutes les choses créées. Et ne pense point en cela luy faire iniure, ains luy donner occasion, tant plus ie seray miserable, de faire plus reluire en moy la grandeur de sa misericorde, me secourant & remédiant.

Les tenebres & cecité de l'aueugle serui-
rent à illustrer & faire paroistre dauanta-
ge lagloire de Dieu, & l'imbecilité & vti-
lité de ma condition seruira à faire paroi-
stre combien il est bon, quand estant si
haut, il ne desdaignera vne si vile & basse
creature, attendu spécialement qu'en cét

290 PARADIS DES PRIÈRES,
endroit on n'a aucun respect à moy; mais
aux merites de mon Seigneur Iesus Christ,
par lesquels il plaist au Pere eternel me re-
cevoir pour son enfant, & me traicter com-
me tel.

Je vous supplie donc, ô Dieu tres-be-
nin & clement, Pere de nostre Seigneur
Iesus Christ, que comme le saint Roy
David admettoit à sa table vn hōme estro-
pié, pource qu'il estoit fils de son grād amy
Ionathas, voulant bien en cela honorer le
fils, non pour l'amour de luy, mais pour
les merites de son pere, il vous plaise aussi, ô
Pere eternel, recevoir & admettre ce lourd
& pauvre pecheur à vostre table sacrée, non
pour son esgard; mais pour les merites de
vostre si grand amy Iesus Christ, nostre
vray Seigneur & Pere, qui avec tant de
douleurs & travaux, pour vostre gloire &
honneur vous obeït mourant en la Croix;
lequel vit & regne avec vous és siecles des
siecles, Amen.

*Oraison premiere de S. Thomas d'Aquin avant
la sainte Communion.*

O Dieu eternel & Tout-puissant me
voicy venir au Sacrement de vostre
Fils vnique, & mon Seigneur Iesus-Christ,
comme malade au medecin de la vie: com-

me souillé à la fontaine de misericorde :
comme aueugle, à la lumiere de clarté eter-
nelle , comme pauvre au Seigneur des
Cieux & de la terre : & comme nud , au
Roy de la gloire.

Ie supplie donc , ô Seigneur , vostre
bonté & misericorde infinie , qu'il luy plai-
se guarir ma maladie , nettoyer mes souil-
leures , illuminer ma cecité , enrichir ma
pauvreté , & vestir ma nudité , afin que par
ce moyen ie puisse receuoir le pain des An-
ges, le Roy des Roys , le Seigneur des Sei-
gneurs , avec si grande reuerence & crain-
te , avec telle douleur & vray amour, avec
telle foy & pureté , & avec telle intention
& humilité, qu'il est necessaire & conuen-
able pour le salut de mon ame.

Faiçtes-moy la grace, Seigneur , que ie
receiue , non seulement ce Sacrement ;
mais aussi la vertu & grace du Sacrement.
Octroyez-moy (ô tres-pitoyable pere)
que cestuy vostre Fils vnique , lequel ie me
propose maintenant receuoir ainsi voilé &
couuert en cette vie , ie le puisse voir sans
voile, ny couuerture en l'autre , en laquelle
il vit & regne avec vous au siecle des sie-
cles, Amen.

292 PARADIS DES PRIERES,
*Ensuit vne autre deuote Oraison pour dire
auant la sacrée Communion.*

Grena-
de au
mesme
liure.

IE vous louë & remercie (ô doux Sei-
gneur & Sauueur) de tant de biens qu'il
vous a pleu faire à cette si vile & miserable
creature. Je vous remercie, Seigneur, de
toutes les misericordes, dont il vous a pleu
vser enuers le genre humain, au mystere
de vostre sacrée Incarnation: & particulie-
rement pour vostre Natiuité, Circôcision,
Presentation au Temple, pour vostre fuit-
te en Egypte, pour vos ieusnes & tenta-
tions: pour les traualx de vos voyages,
pour les discours de vos predications, pour
les persecutions du monde, pour les tour-
mens & douleurs de vostre tref-saincte
Passion, & pour tout ce que en ce monde
vous avez enduré pour moy, & beaucoup
plus pour l'affection & amour, de laquelle
vous avez enduré, qui a esté sans compa-
raison plus grande. Et par sus tout, ie vous
remercie de ce qu'il vous a pleu me faire
seoir en vostre table, & me faire participât
de vous-mesme, & des inestimables thre-
sors & merites de vostre Passion.

O mon Dieu, & mon Sauueur; avec
quoy pourray-je satisfaire au payement de
cette nouuelle misericorde? Qui estes

vous, & qui sommes-nous, que vous daigniez, Seigneur de toute hauteſſe & Maieſté, venir en nos maiſons de terre & de fange ? A voſtre maiſon, Seigneur, conuient, & eſt deuë toute ſaincteté à tousiours. Comment doncques voulez-vous prendre pour voſtre maiſon, celle qui tousiours eſt remplie de meſchanceté, Le Ciel eſt voſtre habitation & voſtre throſne, la terre eſt l'eſcabeau de vos pieds : d'autant que le tout eſt remply de gloire de voſtre Maieſté. Comment donc daignerez-vous demeurer en vn ſi vil habitacle ? Eſt-il poſſible, dit Salomon, que Dieu habite en terre avec les hommes ? Si le Ciel & les Cieux des Cieux ne vous peuuent contenir ny comprendre, comment le pourra faire cette ſi petite habitation ?

O grande merueille, que celuy qui ſied ſur les Cherubins, & de là regarde les abyſmes, maintenant ſ'abbaiſſes iuſques à cét abyſme, & poſe icy le ſiege de ſa Maieſté. Il a ſemblé peu de choſe à voſtre bonté, d'auoir enuoyé les Anges pour noſtre ſeruiſſe ; mais auez voulu vous-meſmes venir à nous, & entrer en nos ames, pour traicter & manier avec vos mains les affaires de noſtre ſalut: viſitant icy les malades,

releuant les tombez, enseignant les ignorans, redressant les desuoyez : & finalement estant vous-mesme celuy qui nous guarissez de tous nos maux, non par les mains d'autrui : mais avec les vostres, ny par autre medecine, que celle de vostre chair propre & de vostre sang.

O bon Pasteur, comment auez-vous si fidellement eu souuenance de la parole que vous promistes, par le Prophete, disant: *Je feray paistre mes ouailles, & les feray seurement reposer.* Mais qui sera iamais indigne de telles graces ? qui sera digne de ce benefice : ce sera vostre seule misericorde, Seigneur, qui nous fera digne de tant de biens. Et puis que sans icelle nul n'en peut estre digne faites, Seigneur, que ce soit celle qui me fauorise, & qui me face participant de ce mystere, & non ingrat de ce tant inestimable benefice. Que vostre grace doncques, Seigneur, supplée à mes defauts & imbecillitez, que mes pechez me soient pardonnez par vostre misericorde; que vostre esprit prepare mon ame, que vos merites enrichissent ma paureté, & que toutes mes ordures & macules soient laüées & nettoüyées de vostre sãg precieux, afin que dignement ie puisse receuoir

ce venerable Sacrement.

Ie me resiouïs (ô mon Dieu) me souuenant du miracle que fit Elisée quand il ressuscita vn mort, estant son corps aussi mort, mis aupres de l'autre. Si doncques le corps mort d'un Prophete eut tant de puissance, que pourra le corps viuant du Seigneur des Ptophetes? Ie sçay pour certain, Seigneur, que vous n'estes pas moins puissant que vostre Prophete, ny mon ame moins morte que ce corps, ny cét attouchement de moindre efficace, que cestuy-là. Pourquoi doncques n'en espereray-je vn semblable benefice? Pourquoi le corps conceu en peché, fera-il choses plus admirables, que celuy qui est conceu du Sainct Esprit? Pourquoi le corps du seruiteur sera-il plus honoré que celuy du maistre? Pourquoi vostre corps tres-sacré ne ressuscitera-il les ames qui s'approcheront d'iceluy, ayant luy ressuscité le corps qui fut mis aupres du sien? Et specialement, puis que sans chercher ny desirer la vie, il fut ressuscité par la vertu de ce sainct Corps, faites par vostre infinie misericorde, Seigneur, que la demandant, & cherchant par le moyen de ce Sacrement, ie sois par la vertu tellement ressuscité; que plus ie ne

296 PARADIS DES PRIERES,
viue pour moy, mais pour vous.

Ie vous supplie tres-humblement (ô bon Iesus) par cette ineffable charité & amour, qui vous fit prendre chair humaine, & mourir pour moy, qu'il vous plaise me nettoyer de tous mes pechez, & orner & embellir mon ame de toutes vos vertus & merites, & me faire la grace que ie reçoie ce saint Sacrement avec telle humilité & reuerence, avec telle crainte & tremeur, avec telle douleur & repentance de mes pechez, & avec si bon propos & ferme deliberation de m'abstenir d'iceux, & avec tout l'amour & charité qu'il est requis à vn si haut mystere.

Donnez-moy, Seigneur, telle pureté d'intention, que ie reçoie ce mystere à la gloire de vostre saint Nom, & pour le remede de toutes mes infirmitéz & necessitez, à ce qu'avec telle armes, ie me puisse defendre de l'ennemy, & qu'avec cette viande salutaire, ie puisse estre sustenté & entretenu en la vie spirituelle, & estre fait vne mesme chose avec vous, par le moyen de ce Sacrement d'amour. Vous offrant ce sacrifice pour le salut de tous fideles, tant viuans que trespassez, afin que tous soient aidez par la vertu inestimable de ce Sacre-

ment, qui fut institué & consacré pour le salut de tous, par vous qui vivez & regnez és siècles des siècles, Amen.

Troisième Oraison pour dire deuant la sacrée Communion.

SEigneur mon Dieu, quand ie viens à
considerer la grandeur & excellence
de vostre Majesté: & d'autre par ma vilité,
& mon neant: ie frissonne de crainte, ie
suis totalement espouuanté & confus en
moy-mesme: car si grande & abondante
est la multitude de mes iniquitez, que mes-
me ie ne puis de moy-mesme les corriger,
& encores moins satisfaire pour toutes
icelles. Que feray-je donc, mon Dieu,
mon secours, ma force & ma consolation
en toutes mes necessitez? Que feray-je
donc, mon Seigneur? Ie sçay bien ce que
i'ay maintenant volonté de faire: vostre
Fils vnique a offert à vostre Majesté pour
moy vn tres-parfaict sacrifice sur l'Autel
de la Croix. Ie vous presenteray à cette
heure le mesme sacrifice pour toutes mes
fautes & pechez, à ce qu'il face la satisfac-
tion pour moy: Car ie sçay bien à la verité,
& tiens pour tout certain, qu'il n'y a
rien au Ciel, ou en la terre, qui vous soit
plus plaissant & agreable, avec quoy l'hom-

Grena-
deli. 4.
de l'O-
raison
& Me-
ditatiō.

me puisse estre plus facilement reconcilié avec vous. Non seulement ie vous veux maintenant offrir en sacrifice de bon odeur cestuy vostre Fils bien-aimé ; mais aussi ie le prendray de cœur & de bouche , iagoit que pollué & souillée , ie le mangeray , & le retiendray soigneusement dans les entrailles de mon ame : à celle fin que par ce moyen ie vous puisse gratifier d'auantage , & faire chose qui vous soit plus agreable , vous rendant en cette façon cestuy-mesme vostre fils , pour tous les dons , graces & benefices sans nombre , par lesquels vous me tenez lié de telle sorte , que ie ne pourray iamais vous rendre dignes actions de graces , par autre moyen que par cestui-cy.

Ie vous offre donc presentement , ô Pere celeste & Eternel , vostre fils tres-cher & bien-aimé , & aussi ie le receuray à vostre loüange & honneur , afin que par la grace & puissance d'iceluy , ie puisse vaincre & surmonter mes ennemis , qui me sont fascheux & grandement molestes : à sçauoir le diable , le monde , & la chair. Ie receuray vostre fils , à ce que ses thresors & richesses subuiennent à ma pauureté , à ce que sa bonté infinie chasse & bannisse de moy toute sorte de malice , que sa diuine

& incomprehensible restaure , repare & rende parfaite mon humanité , laquelle est infectée , corrompuë & debilitée par le peché. Je prèdray & de bouche & de cœur vostre Fils bien-aimé , ô Pere tres-doux & tres-suaue : ie le receuray , afin que luy estant mon mediateur & aduocat , il me fasse approcher près de vous , & me tienne perseueramment detenu & immobile à vostre costé , ne plus ne moins que iadis cestuy vostre Fils fut detenu attaché à la Croix , pour l'amour de moy : de laquelle il ne voulut iamais descendre , iusques à tant qu'il m'eust du tout racheté , & payé ma rançon , qu'il m'eust parfaictement reconcilié , & à vous & à luy.

Ie vous supplie donc , tres-affectueusement , ô Pere benin , par l'ardante charité & amour de cestuy vostre Fils , qu'il vous plaise me donner aide & secours en cette affaire , & me lier à vous si estroittement & inseparablement , que iamais ie ne vous delaisse ; iaçoit que tout le monde se separast de vous ; encor que ie veisse tout ce qui est contenu en la rondeur de la terre , vous abandonner & delaisser. Laquelle grace & faueur , ie ne demande pas seulement pour moy : mais aussi pour tous ceux , à l'endroit

300 PARADIS DES PRIERES,
desquels ie suis tenu & obligé par quelque
lieu de parenté , fraternité , amitié & be-
nefice , & mesme pour tous les hommes,
tant viuans que trespassez.

Et vous , ô mon tres-doux & pitoyable
Sauueur , qui auez donné & delaislé aux
hommes fideles ; vos seruiteurs & amis,
vostre chair pour viande , & vostre sang
precieux en breuuage , vostre ame pour
nostre redemption , ayez pitié de moy ; &
faictes misericorde à cestuy vostre petit &
indigne seruiteur : donnez vostre grace à
celuy qui a tres-grand besoin , & me faictes
tel , que dignement ie vous reçoie en ce
Sacrement , duquel à present ie desire m'ap-
procher : car si i'y viens & le reçois indi-
gnement , i'encoureray vostre indignation
& iugement : & si de vostre grace vous ne
m'en rendez digne , c'est en vain que ie me
peine & traueille. Estendez donc vers moy
vostre dextre , ô doux Iesus , baillez la
main à vostre seruiteur , qui se deffie de ses
propres forces & vertus : suppleez du vo-
stre , ce qui luy defaut du sien : & faictes en
moy vn cenacle & vne chambre grande &
bien parée , couuerte & bien tappissée de
toutes sortes de graces & vertus , dans la-
quelle vous vous reposiez doucement : où

la souuenance de vos merueilles anciennes, & de vos benefices, & sur tout la memoire de vostre cruelle & tres-amere Passion puissent faire leur demeure sans fin, & que iamais ne se separe de ce lieu, celuy qui est Dieu viuant & regnant par tous les siecles des siecles, Amen.

Admonition pour le temps de la sainte
Communion.

A V temps de la Communion, quand tu voudras te presenter à l'Autel, fais estat, & imagines que tu ouïs retentir à tes oreilles cette voix de l'Euangile, qui dit: Voicy venir l'Espoux, venez au deuant de luy: Parce qu'à la verité, Dieu ne se monstre en nul autre Sacremēt estre espoux de nos ames si apertement, comme en cestui-cy. Car l'effect de ce Sacrement Eucharistique, est de conioindre & unir l'ame avec Dieu, & que de deux soit faicte vne mesme chose: ce qui est proprement vn mariage spirituel.

Pour donc receuoir dignement cēt Espoux, il est necessaire de regarder & considerer attentiuement la façon de laquelle il vient, & quel est celuy qui vient vers toy, afin que tu puisse aller au deuant de luy avec le mesme equipage, &

le recevoir avec les appareils. Il vient à toy plein de charité, de douceur, de miséricorde, de bonté, disant: Qu'avec un tres-grand desir, il a desiré celebrer avec toy cette Pasque, en laquelle se mange l'Agneau Paschal. Tu es aussi de ton costé reciproquement obligé de le recevoir avec toute la deuotion, amour, crainte & allegresse qu'il te sera possible, puis que tu vas pour recevoir & embrasser le vray Espoux de ton ame, ton Dieu, ton Createur, ton Seigneur, & ton souuerain bien. Là où tu dois considerer la grande deuotion & ioye, de laquelle ce saint vieillard Simeon receut l'enfant Iesus entre ses bras, quand la Vierge luy presenta, n'ayant desiré la vie sinon pour le voir. Recconant en ce Sacremēt le mesme Seigneur, tu dois estre pouruen du mesme desir & deuotion, & de la mesme ioye, puis que tu es venu, afin de recevoir en l'Hostie consacrée iceluy mesme, que ce saint vieillard portoit entre ses bras.

Considere aussi la deuotion & la ioye, avec laquelle la mere de saint Iean Baptiste receut en sa maison, la mere de ce mesme Seigneur, quand remplie d'allegresse & deuotion, elle s'escria, disant ces paroles: D'où me procede si grand bien, que la mere de mon Seigneur vienne en ma maison? C'est bien aussi la raison qu'avec le mesme zele & affection, tu recoine ce
mesme

mesme Seigneur, disant avec cette sainte Dame.

*Oraison deuote pour exciter l'ame en la deuotion
& reuerence de Dieu, au temps de la
sainte Communion.*

D'Où me vient telle misericorde, d'où
procède vn si grand bien, que vous,
Seigneur des Anges, & la gloire du Ciel,
vueillez venir à moy? ô Pere, ô Pasteur,
ô Seigneur, ô Dieu de toutes choses, ô
mon vnique & souuerain bien, qui non
content de m'auoir créé à vostre sem-
blâce, & racheté avec vostre precieux sang:
outre tout cela, vous voulez maintenant
& daignez venir à moy, & demeurer en
moy, & me transformer en vous, & me
faire vne chose avec vous. Pourquoi vient
à moy ce Seigneur? est-ce pour mes meri-
tes, ou pour acquerir quelque force, quel-
que bien, ou grace avec moy? est-ce à cau-
se qu'il a besoin de moy, ou de mes biens?
Non certainement, Seigneur; mais pour
vostre seule bonté & misericorde, par la-
quelle vous prenez plus de plaisir d'estre
avec moy, que moy avec vous.

Je vous desire & viens vers vous, afin
d'auoir qui me donne: & vous vous dele-
ctez d'estre avec moy, pour auoir à qui

304 . PARADIS DES PRIERES,
vous vous puissiez donner , à cause que
vous estes bon. Je vous desire , parce que ie
suis pauvre & miserable ; & vous venez à
moy , pource que vous estes misericor-
dieux. Vous venez chez moy , à raison de
vostre tres-grande liberalité & largesse, &
pource que vous auez plus d'affection de
donner., que moy de receuoir ; d'autant
qu'en vous y a plus de bonté, qu'en moy de
besoing & necessité. De là vient , que vous
prenez plus de plaisir venant à moy , que
moy allant vers vous : qui est cause , que
Pro. 8. vous dites : *Vos delices estre de demeurer avec
les enfans des hommes.*

*Receuant le saint Sacrement tu diras au moins
de cœur , si tu ne peux dire de bouche.*

SEigneur , ie ne suis pas digne que vous
S'entriez chez moy , & dans le cabinet de
mon ame : toutesfois , mon Seigneur , c'est
vous qui auez dit de vostre bouche sacrée:
Ioan. 6. *Celuy qui mange ma chair , & boit mon sang,
demeure en moy , & moy en luy.* Soyez donc
propice à moy pecheur , par la reception
de vostre corps & sang precieux : & faictes-
moy la grace, que ie ne le reçoie à mon iu-
gement & damnation ; mais moyennant
vostre misericorde & bonté , à mon salut,

pour la remission & satisfaction de tous mes pechez & offences, Amen.

Admonition de ce qu'il faut faire apres la sacrée Communion.

1 **A** Pres que tu auras receu la sainte & sacrée Hostie, tu la dois retenir quelque peu de temps en ta bouche, iusques à ce qu'estant humectée, elle puisse estre plus facilement conduite dedans le corps: Parce que ne faisant pas ainsi, il aduient souuentesfois qu'elle s'attache au palais, & que par apres on a tant de peine à la separer, qu'on obmet de penser à tout ce qui est requis de considerer & mediter alors.

Grenade li. 3.
du Memorial

2 Donne-toy bien aussi garde de cracher incontinent apres la sainte Communion receüe, s'il n'y a quelque particuliere necessité, laquelle aduenant, on le doit faire en quelque lieu pur & honnestes, & là où les hommes ne puissent marcher dessus.

3 Il ne faut aussi manger si tost apres, car encores que cela ne soit peché, si ne laisse-il d'estre irreuerence: mais il faudra attendre quelque espace de temps, que les especes sacramentalles soient digerées dans l'estomach.

4 Tu ne feras aussi, comme font plusieurs qui incontinent apres qu'ils ont communiqué, s'en vont rire & deuïser avec les autres: mais tout

ce temps, ou toute la iournée, tu éviteras soigneusement toutes deuises humaines, tous propos vains & fabuleux. Car cela est une tres-grande incivilité & audace, qu'incontinent apres auoir receu vn tel hôte, & Seigneur en la maison de ton cœur, luy tourner le dos, & le laisser avec la parole en la bouche, pour aller deuiser avec les autres, ne te point resiouir, & luy congratuler à son arriuée & bien venue, ne vouloir parler & deuiser avec luy, mais le fuyr, & s'addonner à raconter choses mensongeres, vaines & fabuleuses avec les hommes.

5. Il faut donc que tu employes toute cette iournée en prieres & oraisons deuotes, à reciter les loüanges diuines, à mediter les perfections & l'amour de Dieu, penser à la Passion de nostre Seigneur Iesus-Christ, & te ressouuenir des benefices sans nombre que tu as receu de ton Dieu, & pour tous luy rendre graces sans cesse: Car tandis que les especes sacramentales sont & demeurent entieres dans l'estomach (dit le Docteur Cajetan) tout ce temps-là ce diuin & celeste Sacrement cause & opere des effets supernaturels, & du tout admirables dans nos ames: de sorte que l'on peut dire à bon droit, ce que iadis disoit de luy-mesme nostre Sauueur: Pendant que ie suis au monde, ie suis la lumiere du monde: Nous voyons iournelle-

ment à veüe d'œil , que le Soleil esclaire , & cause le iour au monde , non seulement quand il se monstre visiblement , & est haut monté sur nostre horizon : mais aussi il nous enuoye sa lumiere deuant qu'il soit leué , & nous delaisse encores quelque espace de temps , apres qu'il s'est couché , pour le moins vne bonne heure : ainsi est-il du vray Soleil de Iustice , caché & couuert en ce Sacrement : Car il estend sur nous les rayons de ses graces & faueurs , non seulement à l'instant de la Communion ; mais aussi deuant & apres : Deuant la Communion par vn feruent desir & esperance assurée de pardon : apres icelle par la memoire & souuenance d'un si grand & incomprehensible benefice.

Premiere Meditation pour s'occuper apres la Communion.

O Mon Dieu , ma misericorde, comme pourray-je vous rendre dignes graces , de ce que vous Roy des Roys , & Seigneur des Seigneurs , auez bien voulu visiter mon ame, & entrer en ma pauvre habitation, & vous faire vne mesme chose avec moy, par le moyen de l'ineestimable vertu

Grenadeli. 3.
du Memorial.

308 PARADIS DES PRIERES,
de ce Sacrement ? Auec quoy vous rendray-je vn si grand hōneur ? Quels presens pourray-je vous faire en satisfaction & remuneration de ce si grand benefice ? Quels remerciemens vous pourra faire vne creature si pauure pour chose si riche ? Puis vous ne vous estes cōtenté de nous faire icy participans de vostre suprême deité ; mais aussi nous faictes participans de vostre sainte humanité , & de tous les merites qu'auec icelle vous auez gaignez pour nous , nous donnant icy vostre chair & vostre sang , & par icelle nous faictes participans de tous les thresors & merites que par la mesme chair & sang vous nous auez gaignez.

O admirable cōmunication ! ô precieux thresor mal reconneu & attendu des hommes , digne d'estre exalté auec loüanges perpetuelles ! O tres-clement reparateur & restaurateur de nos ames ! de quelles plus grandes richesses les pouuiez-vous douer & enrichir , que de cette-cy ? Vous dites fort bien , Parlant au Pere en vostre oraison : *Pere, pour eux ie m'ay sanctifié, à ce qu'ils soient vraiment saints*, O nouuelle maniere de sanctifier , tant penible & difficile au Sanctificateur , tres-douce & facile au sanctifié ? Vostre est la sainteté , &

mien en est le fruit : vostre en est la peine, & mienne l'vtilité ; vostre est la despenſe, & le gain en est le mien ; vostre la discipline & le chastiment, & mien le pardon ; vostre est la bouë & le venin ; & mienne est la ſanté & la vie qui s'aquier par icelle. Pour moy on ſatisfait les douleurs, les cloux, les ſoufflets, les eſpines, & ce precieus ſang, que pour moy vous auez eſpandu. Ces larmes m'ont lauë, ces playes m'ont guarý, & ces battures ont pour moy ſatisfait.

O tres-riche communication, ſedule & papier de confraternité ! ô compagnie des threſors ineffables ! Quel ſort principal vous a eſté donné de noſtre part ? Quelle choſe vous auons-nous donnée pour nous faire vne telle donation ? Il n'y a certes aucune cauſe, ſi ce n'eſt ſeulement de voſtre bonté. Pourquoi eſt-ce que le Soleil eſclaire ? Pourquoi eſt-ce que le feu eſchauffe ? Pourquoi eſt-ce que l'eau rafraichit ? c'eſt manifeſtement pour autant que les proprietez naturelles de ces choſes ſont telles, qu'elles produiſent tels effets.

A vous donc mon Dieu, eſt choſe propre & naturelle de pardonner & auoir miſericorde : & qui plus eſt pardonner aux autres, & ne pardonner à vous-mesmes.

La mesme bonté vostre, est nostre bonté, nō telle quelle; mais bōté souueraine. Tout ainsi doncques qu'il appartient & est chose propre à la bonté de se communiquer, aussi appartient-il à la souueraine bonté, de se souuerainement cōmuniquer : ce que vous auez fait enuers nous, puis que vous vous estes donné du tout à nous. Naissant, vous vous donnastes à nous pour frere, mangeant, pour nourriture : mourant, pour prix, & regnans, pour loyer. Finalement (ô mon ame) si tu t'efforce de comprendre en vne parole totis les biens que t'apporte avec soy ce diuin Sacrement, considere ce qu'apporta ce Seigneur au monde, quand il y vint; puis apres que tout ainsi que venant au monde, il luy donna vie de grace, avec tout ce qui s'en ensuit: aussi quand par le moyen de ce Sacrement il vient à nostre ame, il luy donne la mesme vie.

O viande diuine, par laquelle les enfans des hommes sont faits enfans de Dieu, & par laquelle nostre humanité se mortifie, afin que Dieu viue en icelle! O pain tres-doux, digne d'estre adoré: qui nourris l'ame non pas le ventre, qui confirme & fortifie le cœur, sans aggrauer ny appesantir

le corps, qui resiouïs l'esprit, & n'enfle l'entendement, par la vertu duquel est chassée nostre sensualité, & brisée la teste à nostre propre volonté, afin qu'en nous soit exécutée celle de Dieu!

Quelles graces doncques, quelles loüanges vous donneray-je Seigneur, à raison de ce benefice? Si la grace & reconnoissance doit estre correspondante au bien-fait, quelle maniere de reconnoissance sera suffisante pour vn tel present? Il se lit en Exode, que vous dites à Moyse: *Prends vn vase d'or, & l'emplis de manne, & le mets en l'arche du Testament, & qu'il soit là conserué & gardé à tousiours, afin que tous ceux qui viendront cy apres sçachent, avec quelle maniere de viande i'ay par l'espace de quarante ans substanté leurs peres au desert.* Or si tel fut vostre plaisir que cette viande corruptible fust tant estimée, que vous commandastes qu'elle fust gardée pour memoire en lieu de si grande veneration, en quelle estime & veneration doit-on tenir cette viande incorruptible, qui donne vie eternelle à qui en mange.

Je vois clairement que la mesme difference qui est de l'vne de ces viandes à l'autre, est aussi entre l'vn des benefices, & l'autre: & que semblable difference doit

estre entre les graces & reconnoissances de l'un & de l'autre. Cette viande estoit de la terre, cette-cy est du Ciel : cette estoit viande du corps : cette-cy de l'ame : cette-là ne donnoit vraye vie à qui la mangeoit : cette-cy est vie eternelle à celuy qui la reçoit dignement.

Mais quel besoin est-il faire comparaison de l'un à l'autre, puis que la mesme difference qui est du Createur à la creature, est celle de l'une de ces viandes à l'autre ?

Si doncques telle memoire & gratitude fut requise par vous, pour auoir substanté ce peuple de viande corporelle & corruptible, quelle doit estre celle que vous recherchez pour nous auoir nourris de viande d'autant plus excellente, que le Createur est meilleur que la creature ? Il ne se pourroit trouuer grace ny louange suffisante à cet effect. Qui est cause que me desfiant de pouuoir iamais m'acquitter de cette obligation, il ne me reste autre remede, que de receuoir avec le Prophete le calice de mon salut, & inuoker le nom de mon Seigneur : ce qui n'est pas s'acquitter des benefices receus : mais en requerir d'autres, & accumuler obligations sus obligations.

Ie vous requiers donc, Seigneur, que vous receuiez ce venerable Sacremēt pour satisfaction de toutes mes fautes & pechez, & parfaict chastiment & amendement de ma vie. Par iceluy releuez-moy de toutes mes cheutes, & suppleez à tous les defauts de ma pauvreté. Par iceluy mortifiez en moy tout ce qui desplaist à vos yeux diuins: & faites que ie sois homme, qui me conforme du tout à vostre volonté. Octroyez-moy, Seigneur, par le moyen d'iceluy que tousiours ie perseuere en vous, & que ie vous aime parfaictement en toute perseuerance; & que ie demeure tousiours vny & incorporé avec vous, pour la gloire & honneur de vostre saint Nom.

Ayez aussi, Seigneur, pitié & misericorde de tous les pecheurs: faictes que les heretiques & schismatiques retournent à vostre sainte Eglise. Illuminez tous les infideles, afin qu'ils vous connoissent: Secourez tous les oppressez & affigez. Aidez tous ceux pour lesquels ie suis tenu de faire prieres & oraisons. Consolez mes peres, parens, amis, ennemis & bien-faicteurs. Ayez misericorde de tous ceux pour lesquels vous avez espandu vostre sang precieux. Octroyez grace & pardon aux vi-

314 PARADIS DES PRIERES,
uans, & aux trespassez repos, tranquillité &
gloire eternelle, vous qui vivez & regnez
es siecles des siecles, Amen.

*S'ensuit vne autre fort deuote Meditation pour
s'exercer en icelle le iour de la tres-saincte
Communion, pensant à la grandeur du bene-
ficereceu, & en rendant graces à nostre Sei-
gneur.*

ENcores que toutes les creatures qui
sont au Ciel & en la terre, fussent con-
uerties en langues, & que toutes ensemble
m'aidassent à vous louer & remercier, Sei-
gneur, pour le moindre de leurs benefices:
si est-il bien certain que ie ne m'en pourrois
dignement acquitter. Celuy donc qui auec
si grande compaignie ne vous pourroit re-
mercier pour le moindre des benefices,
pourra-il faire tout seul, & pour le plus
grand?

O mon Dieu, mon Sauueur, quelles gra-
ces & quelles loüanges vous rendray-je,
pour m'auoir ce iourd'huy voulu visiter &
consoler, maintenir & honorer de vostre
presence? Cette sainte mere de vostre
Precurseur pleine du saint Esprit, voyant
entrer en sa maison la Vierge qui vous por-
toit en son ventre, espouuantée de chose si

merueilleuse s'escria, disant: *Et d'où me vient* Lucr.
ce grand heur, que la mere de mon Seigneur
viennne pour me visiter ? Que feray-je donc
moy tres-vil & petit ver; mais le plus grand
de tous les pecheurs, voyant qu'en ma mai-
son est entrée ce iourd'huy vne Hostie con-
sacrée, en laquelle est contenu le mesme
Dieu, qui venoit à cette heure-là ? Avec
quelle plus haute voix pourray-ie m'es-
crier, d'où me vient ce grand bien, que non
la mere de Dieu, mais le mesme Dieu &
Seigneur de toutes les choses créées, ayt
voulu venir chez moy, chez moy, qui si
long-temps ayt esté la retraicte & demeure
de Satan; chez moy, qui tant de fois l'ay
offensé; chez moy, qui tousiours l'ay mes-
prisé, deshonoré, crucifié, & qui luy ay au- Isa. 66.
tant de fois donné à boire du fiel, que i'ay
commis de pechez: & auquel finalement
i'ay fermé la porte, & lequel i'ay chassé de
moy ? Dont i'auois bien merité de n'estre
iamais tant honoré, que de receuoir celuy
que i'auois en cette maniere dechassé, & de
n'estre iamais admis à sa Cene sacrée, puis
que quand il luy a pleu m'y appeller, ie m'y
suis voulu trouuer.

Mais comment chez moy, ô Seigneur,
vous qui estes Roy des Roys, & Seigneur

316 PARADIS DES PRIERES,
des Seigneurs: vous qui n'avez besoin d'aucune chose créée, qui avez pour vostre siege le Ciel, & pour marche-pied royal toute la terre, qui avez pour ministres tous les exercites des Anges, qui estes loué des estoilles matutinales, & contenez sous vostre main toutes les bornes de la terre: Vous qui assis sur les Cherubins, voyez iusques aux abysses; c'est à dire, les choses les plus secretes & cachées du monde, penetrant avec vostre sapience du plus haut iusques au plus bas: Vous, Seigneur, de si incomprehensible Majesté & grandeur, aués-vous bien voulu venir en lieu de si estrange petitesse & indignité? Voudriez-vous bien, Seigneur, descendre vne autre fois en enfer? Voudriez-vous bien estre mis vne autrefois entre les mains des pecheurs? Voudriez-vous bien vne autrefois naistre en vne estable des bestes, & estre couché en vne creiche entre la paille & le foin? Il appert bien, ô mon Dieu, que vous avez encores maintenant le mesme cœur que vous auiez alors, puis que ce que vous avez fait vne fois pour les pecheurs, vous continuez à faire encores le mesme pour eux chacun iour.

Et quand par quelque autre maniere il

vous plaira me visiter , si me fera-ce vne grande misericorde, non seulement, Seigneur, pour m'auoir voulu visiter ; mais entrer en moy , & demeurer en moy , & me transformer en vous , & me faire vne mesme chose avec vous par vnion , si merueilleuse , qu'elle merite d'estre parangonnée, comme vous la parāgonnastes à cette tres-haute & tres-diuline vnion , que vous auez avec vostre Pere. Car comme vostre Pere est en vous , & vous en luy : ainsi celuy qui vous mange demeure en vous , & vous en luy. Et quelle chose pourroit estre plus merueilleuse ?

Le Roy Dauid s'esmerueilloit de la grande estime que vous faisiez de l'homme , & disoit : *Seigneur, qu'est-ce que l'homme , que vous voulez bien auoir souuenance de luy, & le mettre en vostre cœur ?* Mais combien est-ce plus grande merueille , que Dieu vueille non seulement se souuenir de l'homme, mais se faire homme soy-mesme pour l'amour de l'homme , & demeurer avec l'homme , & mourir pour l'homme , & se donner pour viande à l'homme, & se faire vne mesme chose avec l'homme ?

Le Roy Salomon s'esmerueilloit aussi, que Dieu voulut habiter en ce Temple , en

318 PARADIS DES PRIERES,
l'edification duquel il auoit consommé tant
d'années, & si grande despenſe, diſant : *Eſt-
il poſſible de croire que Dieu vueille icy verita-
blement habiter avec les hommes ? Si le Ciel, ny
les Cieux des Cieux ne te peuuent comprendre,
ny contenir en ſoy ; combien moins le pourra fai-
re cette maiſon que ie r'ay edifiée ?* Mais com-
bien eſt-ce plus grande merueille , que le
meſme Seigneur des Cieux par vne autre
beaucoup plus excellente maniere , vueille
habiter en vne ſi pauvre ame , qui à peine a
iamais trauaillé vn ſeul iour , pour luy pre-
parer le logis :

Toute la nature crée s'eſmerueille de
voir Dieu faiſt homme , de le voir deſcen-
dre du Ciel en terre , demeurer neuf mois
enfermé dans le ventre d'une Vierge. Et y
a bien grande raiſon de s'en eſmerueillir ;
puis que cette-là fut la plus grande des mer-
ueilles de Dieu, & la meilleure œuvre, & le
plus grand de ſes benefices : Mais ce ventre
virginal eſtoit plein du S. Eſprit : il eſtoit
plus reluiſant que les eſtoilles du Ciel , plus
pur que les Anges de Paradis, plus orné de
vertu & de grace , que le Ciel & la terre
avec tout leur ornement , & ainſi eſtoit le
logis dignement préparé pour Dieu.

Mais que ce meſme Seigneur vueille ha-
biter

biter au mien, qui est plus impur que n'est la fange, plus obscur que la nuit, plus infect que toutes les cloaques du monde, comment ne sera-ce grande merueille? Et posé le cas que par sa bonté infinie ie fusse desia laué & nettoyé avec l'eau de sa grace & de ses Sacremens, comment ne sera-ce neantmoins vne grande misericorde, qu'un Seigneur de si grande pureté & netteté n'ayt à contre-cœur vne chose qui a esté autresfois si vilaine & infecte?

Vn grand Seigneur se sentiroit offensé, si on le seruoit à table de quelque vaisselle qui eust autresfois seruy à receuoir le vomissement des malades, & autres choses semblables: encores que depuis il eust esté bien laué, & fait plus blanc que neige, parce que la memoire des ordures passées seroit assez pour le faire estre à contre-cœur à celuy qui le verroit. Par ainsi, ô mō Dieu, mon Sauueur: y a-il plus grande misericorde, que de n'auoir à ennuy voyant presenter à vostre table, entre les vaisseaux esleuz, vn vaisseau de corruption, & de toutes ordures, à ce que vous mangiez en iceluy? car bien qu'il fust desia nettoyé de vostre grace: si est-ce que la memoire du peché y est encor toute fraiche, & la mauuai-

320 PARADIS DES PRIERES,
se odeur, & les reliques d'iceluy qui restent
toufiours en l'ame. Comment donc per-
mettez-vous qu'un tel vaisseau comme est
cettuy-cy ; vous soit mis sur vostre table,
& qu'il soit comme un reliquaire , auquel
soit enchassée cette Hostie consacrée ?

O beny foyez-vous des Anges , ô Sei-
gneur, pour vne si grande grace , & pour
vne si profonde misericorde, & pour vne si
excellente œuvre & demonstration de vo-
stre bonté. Il est bien apparent que vous
estes extrêmement communicatif de vous-
mesmes, puis que tant vous vous estes vou-
lu humilier & abandonner vostre droit,
seulement pour nous faire bons. Il paroist
bien quelle est la grandeur de vostre amour
enuers les hommes, & que la charité (com-
me dit vostre Apostre) n'est point ambi-
tieuse , & ne cherche les choses siennes,
puis que vous n'aués à desdain chose si gros-
siere & lourde comme est le cœur du pe-
cheur. Mais que sera-ce si avec tout cecy
vous adioustez ce qu'opere & signifie ce
merueilleux Sacrement.

O quelles ioyeuses nouuelles de vous,
Seigneur , m'apporte ce mystere ! ô com-
bien il me donne d'occasion de grand con-
tentement ! Il me confirme en vostre nom,

qui estes mon Pere, & non seulement Pere, mais encores tres-doux espoux de mon ame: car i'ay oüy dire que le propre effect de ce Sacrement, pour lequel vous l'auez institué, est maintenir & recréer les ames de spirituelles delices, & les faire vne mesme chose avec vous. Si doncques il est ainsi, & que par les œuvres on puisse iuger du cœur: de quel cœur est iamais sortie telle œuvre que cette-cy? car l'union appartient proprement aux mariez, & les carresses ne sont accoustumées du maistre au seruiteur; mais bien de l'espoux à son espouse; ny mesme du pere au fils, si ce n'est qu'il soit encores petit enfant, & tendrement aimé de son pere: car il appartient à vn tel pere de pouruoir à son enfant, non seulement de ce qui luy est nécessaire pour la vie, mais encores d'entretienement & choses qui le puissent resiouir & recréer.

Et par ce que telle demonstration d'amour comme est cette-cy, restoit encores à descouurir au monde, elle a esté reseruée pour le temps de vostre venue, & pour la bonne nouuelle de vostre Euangile. De façon, qu'és autres especes de vos Sacremens & benefices; vous me donnez à connoistre comme vous estes mon Roy & mon Sau-

322 PARADIS DES PRIERES,
ueur, mon Pasteur & Aduocat, mon Me-
decin, mon maistre, mon tuteur, mon Re-
dempteur & defendeur; & finalement mon
Seigneur & mon Dieu.

Mais en cettuy (auquel par vne si estran-
ge maniere que vous vous estes voulu vnir
auec mon ame, & la consoler de si merueil-
leuses recreations) vous me faiçtes claire-
ment connoistre que vous estes m^{on} espoux
& mon pere : & pere qui tendrement aime
son fils, comme Iacob aimoit Benjamin en-
tre tous ses freres. Cela m'est donné à con-
noistre par l'effect de vostre Sacrement, le-
quel m'apporte ces bonnes nouuelles.

Vous n'estes point double, Seigneur, en
aucune de vos œuures : ce qu'elles mon-
strent par le dehors, c'est ce qu'elles ont au
dedans. Et pour cette raison, par cét effect
ie connois la cause, par cette œuvre ie iuge
de vostre cœur : par ce traictement & con-
solation que vous me faiçtes, ie prens argu-
mens de la bonne volonté que vous me
portez.

Mais quel plus grand benefice, quelle
plus grande grace, quel plus grand amour
se pourroit demonstrier que cettuy-cy ? O
matiere de grande resiouissance, fontaine
de plaisirs, veine de vertu, mort de vices,

pain de vie, medecine de salut, feu d'amour, refection des esprits, salut des ames, banquet Royal, & goust de toute la felicité & satieté celeste. Las! que feray-ie, ô mon Dieu? quelles graces vous rendray-ie? de quel amour vous aimeray-ie? si ie veux respondre au mesme ton, & au mesme amour qu'icy me demonstrez? Si vous estant celuy que vous estes, m'aimez ainsi, qui ne suis que vn ord & miserable ver de terre: comment ne vous aimeray-ie, ô l'Espoux tres-haut, tres-riche, & tres-noble de mon ame? Je vous aimeray doncques, Seigneur, ie vous desireray, ie vous mangeray & beurray.

O grande douceur d'amour, ô amour d'ineestimable douceur, que mon ame vous mangé, & que mes entrailles soient remplies de la tres-suaue liqueur de vostre douceur. O charité, ô mon Dieu, ô mon doux miel, lait fort suaue, viande delectable, & viande des grands; faites-moy croistre en vous, afin que dignement ie puisse iouir de vous: ô douce satieté & rassasiemēt de ma volonté, ô l'amour & desir de mon cœur; pourquoy ne suis-ie entierement enflammé & ardēt au feu de vostre amour? Comment ne suis-ie du tout comme le fer en la

324 PARADIS DES PRIERES,
fournaise, transformé en amour de telle
maniere, qu'en moy ne soit autre chose
qu'amour? O feu diuin, ô douce flamme, ô
blessure agreable, ô prison amoureuse,
pourquoy ne suis-ie pris & lié de cette
chaisne, & blessé de cette sagette, brulé de
ce feu; de façon que mes entrailles ardent
& se consomment toutes en amour?

Enfans d'Adam, lignage d'hommes
aueugles & trompez, que faictes-vous? où
allez-vous? que cherchez-vous? Si vous
cherchez des amours, ceux-cy sont les
plus doux, les plus nobles, & les plus hono-
rables qui soient au monde: si vous cher-
chez des plaisirs & delices, ceux-cy sont
les plus agreables, les plus grands & les
plus chastes qui puissent estre. Si vous
cherchez des richesses, icy est le thresor du
Ciel, le prix du monde, & la grande mer
de tous les biens; si vous cherchez hon-
neur, icy est Dieu, & avec luy toute la Cour
du Ciel qui vient vous honorer.

Troiesieme Meditation apres la Communion.

ASsis à cette table, receu entre tels
bras, consolé de telles delices, obligé
de tant de benefices, & sur tous, pris & lié
de si forts liens d'amour: d'oresnauant, Sei-
gneur, ie renonce à tous autres plaisirs &

delices pour cét amour. Que plus il n'y ait de monde pour moy, plus de plaisirs charnels pour moy, plus de pompe du siecle, ny de vanité pour moy : soient de moy, chassez bien loing tous ces biens pleins de fausseté & tromperie, puis que cettuy-cy seul est le vray & souuerain bien. Celuy qui a à manger le pain des Anges, ne doit point manger la viande des bestes. Il n'est pas honneste que celuy qui a receu Dieu en sa maison, recoiue en icelle autre creature.

Si vne païsante de bas estat se marioit avec vn Roy, incontinent elle mettroit bas, & mespriseroit ses pauvres habits, & autres petitesse qui conuenoient mieux à sa condition passée, & en toutes choses se montreroit femme de celuy à qui elle seroit. Et ainsi estant mon ame ioincte à cette dignité par le moyen de ce Sacrement, comment s'abaissera-elle à la vilité & fange de son sentier ancien, & de ses coustumes passées? Comment ouurira-elle la porte de son cœur à aucun penser du monde? Celuy qui dedans soy a receu le Seigneur du monde, comment donnera-il lieu à aucune chose prophane en son ame estant ja consacrée & sanctifiée par la presence diuine?

Salomon ne voulut permettre que la fille de Pharaon qui estoit sa femme, demeurast en sa maison, pour ce qu'en icelle l'arche du Testament auoit seiourné quelque peu de temps, encores qu'elle n'y fust plus. Si donc ce tant sage Roy ne permist que sa propre femme, mesme estant de si grand lieu, mist le pied où auoit esté l'arche de Dieu, pour ce qu'elle estoit de races des Gentils : comment consentiray-je que chose gentile & prophane entre au cœur où Dieu mesme a esté ? Comment le lieu où Dieu a couché, admettra-il des pensées & desirs prophanes ? Comment paroles deshonestes & vaines seront-elles professées de la langue, par laquelle Dieu est passé ? Si ce mesme Roy Salomon, pour auoir seulement offert sacrifice au porticque du Temple, laissa le porticque tellement sanctifié, qu'il ne deuoit plus iamais seruir à chose prophane : combien est plus raisonnable que moname le soit de mesme, puis que dans icelle a esté receu celuy qui estoit la sanctification de tous les sacrifices & Sacremens de la Loy ?

Puis donc Seigneur, que vous me laissez tant honoré par cette vostre uisitation ; donnez-moy la grace que ie puisse estre di-

gne de cét honneur que vous me faictes. Vous ne fistes iamais honneur à aucun, sans l'accompagner d'appuy, & oreiller de grace pour le soustenir & maintenir : & puis que vous m'avez honoré de vostre presence, sanctifiez-moy de vostre vertu, afin que par le moyen d'icelle ie puisse répondre & satisfaire à cette charge. Vous avez tousiours fait ainsi en tous les lieux où vous estes entré. Vous entraastes au ventre virginal de vostre tres-saincte mere, & comme vous l'esleuastes en gloire inestimable, aussi la doüiastes de vous de grace inestimable pour la maintenir. Vous entraastes en ce monde pour conuerser avec les hommes : & comme vous l'honorastes & annoblistes de vostre venuë : aussi les restablistes-vous, & illuminastes de vostre grace. Vous entraastes puis apres en enfer, & du mesme enfer vous fistes le Paradis, beatifiant avec vostre gloire ceux que vous auiez honoré de vostre uisitation.

Finalemēt, quand la figure de ce Sacrement (qui estoit l'Arche du Testamēt) entra en la maison d'Obededon, vous enuoyastes incontinent vostre benediction sur icelle, & sur toutes les autres maisons,

328 PARADIS DES PRIERES,
remunerant d'une si riche & liberale main
la reception & hospitalité qui vous y estoit
faicte. Et puis doncques Seigneur, que vous
auez encores voulu entrer en cette pauvre
demeure, & loger en icelle; commencez à
benir la maison de vostre seruiteur, & à
me donner le moyen de pouuoir corres-
pondre à cét honneur, me faisant habita-
tion digne de vous.

Vous auez voulu que ie fusse comme ce
sainct Sepulchre, auquel fut depose vostre
precieux corps: donnez-moy doncques
toutes les qualitez & conditions qu'auoit
ce sepulchre, afin que ie puisse estre ce à
quoy vous m'auiez esleu. Donnez-moy
cette fermeté & constance de pierre, & ce
suair d'humilité, & cette myrrhe de mor-
tification, avec laquelle ie meure à tous
mes appetits & volontez, & ne viue qu'à
vous. Il vous a pleu que ie fusse comme vne
Arche du Testament, en laquelle vous fis-
siez vostre residence: faictes-moy la gra-
ce, que comme en cette Arche il n'y auoit
rien de plus digne & precieux que les Ta-
bles de la Loy, qu'aussi dedans mon cœur
n'y ait autre pensée, ny autre desir que de
vostre sainte Loy.

Vous auez voulu me faire connoistre en ce Sacrement, que vous estes mon Pere, me traittant tout ainsi comme vostre enfant chereiment aimé: faites-moy la grace que ie me puisse rendre digne de ce benefice, vous aimant seul d'un amour si tendre, que tout ce qui est dedans moy se consume en vostre amour: & que la memoire seule de vostre doux nom soit suffisante pour attendrir & faire fondre mon cœur. Donnez-moy encores vn esprit & cœur d'enfant enuers vous, qui est l'esprit d'obeïssance, de reuerence, d'amour & de confiance, afin qu'en tous mes traux & aduersitez ie me retire incontinent à vous avec telle assurance & confiance, que l'enfant fidele se retire à son pere, duquel il est grandement aimé.

Outre tout cecy, vous auez voulu decouurir & demonstrier à mon ame en ce Sacrement vn amour d'espoux à son espouse, & me traitter en cette qualité. Donnez-moy donc, Seigneur, ce mesme cœur enuers vous, à ce que ie vous aime aussi d'un amour fidele, d'un amour loyal, d'un amour chaste, d'un amour profond, & d'un amour si fort, que iamais aucune chose ne

330 PARADIS DES PRIERES,
me puisse aucunement separer de vous.

O tres-plaisant Espoux de mon ante,
ouurez ces bras doux & amoureux, & l'em-
brassez & conjoignez de telle maniere
auec vous, que ny à la vie, ny à la mort, elle
n'en puisse iamais estre diuisée. Vous auez
ordonné & institué ce Sacrement pour
cette vnion, scachant assez combien la
creature pouuoit mieux demeurer en vous
qu'en elle-mesme, puis qu'elle demeure en
vous, comme en Dieu: & en elle, comme
en vne foible & debile creature.

La goutte d'eau qui est seule, & à part
soy, se seche au premier vent, ou cha-
leur de l'air: mais iettée en la mer, & vnüe
auec son principe, est permanente à tou-
siours. Pour cette occasion, Seigneur, ti-
rez-moy hors de moy-mesme, & rece-
uez-moy en vous, afin qu'en vous ie viue,
qu'en vous ie meure, & qu'en vous ie de-
meure, puis que sans vous ie diminuë &
defaux, & qu'en vous ie suis stable, & en
moy ie passe, comme fait la vanité. Ne
vous partez point donc (mon Sauueur &
Redempteur Iesus) demeurez, Seigneur,
auec moy; car voicy le soir qui approche,
& ja le iour prend fin: la nuit se haste à

grands pas , & non pas vne nuit seule, mais plusieurs : c'est à sçauoir, la nuit de la mort, & du monde, & du peché, & de la tribulation, & de la tentation, & de la solitude, & absence de la grace. Toutes ces nuits viennent à tomber dessus nous, & à nous couvrir & enuveloper. Ne nous abandonnez, Seigneur, de toutes parts la lumière va defaillante, & la charité refroidissante, & la malice croissant : que fera-ce donc de nous si vous nous délaissez ? *Malheur sur nous (dit le Prophete) que le iour est ja fort diminué, & les ombres se sont faictes plus grandes au soir.*

Car d'autant que la vraye lumière qui est la connoissance de Dieu, & des vrais biens, va diminuant ; les ombres des faux & transitoires semblent plus grandes, & de plus grande dignité : Partant, Seigneur demeurez avec nous, qui estes la lumière du monde, afin que toute chose semble & paroisse ce qu'elle est, & que nous ne soyons de ceux qui appellent le mal bien, & le bien mal : & font le doux amer, & l'amer doux. Et puis qu'une si bonne aduventure m'est arriuée, que de vous auoir aujourd'huy en ma maison, avec si grande commodité

332 PARADIS DES PRIERES,
de negocier avec vous seul de mes affaires : il n'est raisonnable de perdre vne si bonne occasion.

Ie ne vous laisseray, Seigneur, ie luit-
teray avec vous toute la nuit, & ne vous
lascheray, iusqu'à ce que vous me donniez
vostre benediction. Changez, Seigneur,
mon nom ancien, & m'en donnez vn nou-
veau, qui est vn autre nouuel estre, & vn
autre maniere de viure. Faites-moy boi-
teux d'un pied, & me laissez l'autre sain &
entier, afin que l'amour du monde defaille
en moy, & que le vostre seul y demeure
sain & entier, à ce qu'estans desia bannis &
tuez tous les autres amours & desirs ; ie
n'aime que vous seul, ie ne desire que vous,
à vous seul ie pense, ie demeure avec vous
seul, en vous seul soit mon habitation, à
vous seul ie viue, & en vous soyent fon-
dées toutes mes volonte, affections &
pensées : à vous seul i'aye mon recours en
toutes mes tribulations, & que de vous
seul ie reçoie entier secours, & que fina-
lement, Seigneur, vous soyiez tout mien,
& que ie sois tout vostre, qui viuez & re-
gnez és siecles des siecles, Amen.

Enfuyent les Oraisons, & actions de
graces, pour dire apres la sainte
Communion.

Premiere Oraison.

IE vous rends graces (ô mon Dieu & Seigneur, Pere tout-puissant) pour infinis benefices que i'ay receus de vous : & particulierement de ce que m'avez admis à la Communion & participation du corps de vostre Fils vnique. Je vous supplie (Pere tres-clement) que cette sacrée Communion ne me soit occasion de chastiment & punition ; mais vne salutaire & profitable intercession de pardon : qu'elle me soit armure de foy, escu & bouclier de bonne volonté, mort & ruine de tous mes vices, exil de tous desirs charnels, & accroissement de charité, patience, vraye humilité, obeïssance, & de toute vertu. Qu'elle soit ioye parfaite à mon esprit, ferme defense & protection contre tous mes ennemis visibles & inuisibles, & perpetuelle vnion avec vous seul, mon vray Dieu &

Seigneur. Et vous plaife me conduire à ce banquet incomparable & deliceux, où vous estes vraye lumiere, satieté parfaicte, ioye perdurable, par tous les siècles des siècles, Amen.

Seconde Oraison pour la Communion.

Seigneur Iesus-Christ, Roy des Roys, & Seigneur des Seigneurs, ie rends grace à vostre diuine Majesté, de ce que vous auez bien voulu refectionner mō ame, par trop seche & aride, de vostre corps tres-precieux, avec vne douceur & delectation que ie ne pourrois exprimer de paroles. Je vous supplie tres-affectueusement que ce qui est en moy de vicieux, & contraire à vostre tres-saincte volonté, soit dissipé, & entierement chassé hors de mon ame par la Communion de ce Sacrement : à cette fin que mon cœur soit comme vne maison & habitation bien preparée & ornée pour le S. Esprit.

Faites, ô mon tres-doux Seigneur, que la reception de ce tres-sainct & sacré Sacrement me soit impetration & pardon de mes pechez, medecine de vie, accroissement & assurance de grace, souuenance de vostre sacrée & douloureuse Passion, le
viatique

viatique de cette mienne peregrination, la douceur, consolation & suauité de mon ame, salut & sainteté au temps de la tentation, paix & ioye en toute angoisse & tribulation, lumiere & vertu en toutes mes paroles & actions, soulas & derniere assurance à la mort.

Que ce Sacrement change de telle sorte, le palais & goust de mon ame que par-dessus vous il ne sente aucune douceur, qu'il n'ayme aucune beauté, qu'il ne cherche autre amour, qu'il ne desire aucune consolation, qu'il n'admette iamais autre delectation, qu'il ne se soucie d'autre gloire & honneur, & que finalement il ne craigne & redoute aucune cruauté, sinon à cause de vous, & pour l'amour de vous, mon Seigneur, qui avec le Pere, & le saint Esprit, viuez & regnez par tous les siecles des siecles, Amen.

Troisiesme Oraison apres la Communion.

O Mon Seigneur Iesus-Christ, vray Dieu & vray homme, qui m'avez départy ce iourd'huy des benefices si grands, & en si grand nombre, m'ayant pardonné mes pechez & offenses, par les merites de vostre Passion, & par la vertu du S. Sacrement de Penitence, comme

336 PARADIS DES PRIERES,
i'estime & croy fermemēt : & m'auēz semblablement fait participant de vostre corps & sang precieux en l'Hostie consacrée que i'ay receuē, bien que ce soit indignement & sans aucun merite suffisant. Je vous supplie, Seigneur, par celuy que vous estes, & par vostre infinie bonté & misericorde, que n'ayant point esgard à mes pechés & offenses passées, vous me vueillez conseruer en vostre grace & seruice.

Faites, Seigneur, que le saint Sacrement que i'ay receu, soit, non pas ma peine & condamnation, ains mon salut & mon merite. Faiētes qu'il soit la remission de mes pechez, & la purification de mon ame, & qu'il me renforce en toute bonté & vertu. Qu'il soit mon remede & ma forteresse cōtre tous les périls de cette vie, la defense de ma foiblesse, & mon secours contre toutes les tentations, par lesquelles ie puis estre tenté du monde, de la chair, & du diable, afin que moyennant vostre grace, ie les puisse surmonter. O mon Dieu, ma misericorde, & tout mon bien : ô ma vie & le souhait de mon ame. Je me veux mettre sous l'ombre de vos aisles, non pas seulement à cette heure; mais pour tout le temps de ma vie iusques à l'article de ma mort,

croyant fermement ce que croit & tient
nostre sainte mere l'Eglise, & tousiours ie
demande pardon de mes pechez.

Ie prie & demande outre cela, de grace à
là tres sacrée Vierge Marie vostre mere, à
tous les Anges bien-heureux, & à tous les
saincts & saintes de vostre Cour celeste,
qu'ils soient mes Aduocats : par l'interces-
sion desquels, en vertu de ce benefice ines-
table, que vous m'avez fait ce iourd'huy,
m'ayant inuité & admis à vostre table pour
manger vne si diuine & inestimable vian-
de, ie suis fortifié en ce monde remply de
miseres, soulagé en cette peregrination, &
voyage qu'il me faut faire tant que i'arriue
au port tât désiré du Ciel, ne plus ne moins
que le Prophete Elie fut iadis fortifié, apres
auoir mangé vn peu de pain cuit sous les
cendres, afin que comme luy, ie puisse che-
miner & arriuer sans aucun danger à la
montagne de vostre gloire, & iouir de ce
banquet celeste que vous faictes tousiours
aux bien-heureux, avec vne abondance de
douceur, & de toute delectation, & avec
des mets tant exquis & glorieux qu'on ne
peut pas les raconter.

Là où, mon Seigneur, vous estes la fon-
taine & le fleuve de cette grace qui les en-


338 PARADIS DES PRIERES,
yvre tous, la saincteté tres-pure qui les san-
ctifie tous, la pleine lumiere qui les illumine
tous, & où vous estes la ioye parfaite, la
vraye felicité, & la gloire perdurable, vi-
uant & regnant à iamais.

201 2 *Quatriesme Oraison apres la saincte
Communion.*

TRanspercez les mouëlles & entrailles
de mon ame, ô mon tres-doux Sei-
gneur Iesus-Christ, d'une tres-douce &
salutaire playe de vostre amour, & d'une
vraye, entiere, parfaite & tres-saincte cha-
rité, afin qu'elle languisse & s'escoule rota-
lement en vn desir d'estre conioincte avec
vous. Donnez-luy vne faim extrême de
gouster ce delicieux pain des Anges, qui est
vostre sacré corps, la nourriture des ames
deuotes, en nostre pain quotidien, conte-
nant en soy toute douceur & faueur, toutes
delices & tout contentement.

Que les entrailles de mô ame, Seigneur,
soient remplies de la douceur de ce miel
celeste; c'est à dire, de vous, vers qui les
Anges ne souhaitent autre chose que de
dresser les yeux, & contempler la face.
Qu'elle soit incessamment alterée de vous,
qui estes la fontaine de vie, la fontaine de
sapience, & science, fontaine de la lumiere

eternelle, le torrent de volupté, l'abondance de la maison de Dieu; qu'elle ne soit conuoiteuse d'autre chose que de vous, qu'elle ne cherche, qu'elle ne parle, qu'elle ne medite autre chose que vous, & que toutes ses actions soient à la loüange de vostre Nom tres-sainct, accompagnées d'une humilité & dilection, avec plaisir & discretion, & avec vne perseuerance iusques à la fin: & que vous seul soyez tousiours mon esperance, mes richesses, mes delices, ma confiance, ma ioye, mon soulas, mon repos & tranquillité, ma paix, ma douceur, ma viande, ma refection, mon refuge, mon ayde, ma portion, mon thresor, où soit profondement enraciné mon cœur & ma pensée, dès maintenant & à tousiours, Amen.



ORAISONS
A LA SAINCTE
TRINITE.





CHAPITRE VII.

Contenant quelques Oraisons deuotes à la sainte Trinite.

Oraison à la sainte Trinité.



Eigneur Dieu qui estes sans commencement & principe, immortel, incomprehensible, incirconscrit, infiny, inuisible, immuable, present en tous lieux; mais caché, totalement en tout lieu, mais immense & sans lieu prefix, inenarrable, indicible, inestimable, inscrutable: qui n'estes sujet à aucun mouuement, encores que fassiez mouuoir toutes choses, qui portez toutes choses sans estre chargé, qui estes tousiours en action sans vous mouuoir, qui n'estes iamais nouveau, iamais viel; mais enuieillissant les orgueilleux, sans qu'il le sçachent. Vous estes grand sans quantité, & partant infiny: bon sans qualité, & par cela vrayement & sou-

uerainement bon, & nul ne peut estre bon fors que vous: de qui la volonté est œuvre parfaicte & le vouloir, puissance, Qui de rien auez créé toutes choses, & les auez faictes de vostre simple & propre mouuement. Qui par vostre diuine sapience: laquelle ne peut iamais estre assez louée, auez créé tout ce monde vniuersel. Dans lequel vous auez constitué l'homme comme gardien & Seigneur. Je vous louë, ie vous adore, & vous porte la plus grande crainte & reuerence qu'il m'est possible, ô sainte & bien-heureuse Trinité, vn seul Dieu. Mon Seigneur, ayez pitié de moy, & me faictes misericorde, me pardonnant mes pechez.

Il seroit besoin, Seigneur, que i'employasse tout le temps de ma vie és exercices de crainte, puis que i'ay tant d'occasion & cause de craindre & de plorer. Mais avec tout cela comme la grandeur de vostre gloire nous oblige à vous adorer & reuerer: aussi pareillement elle nous contraint de vous louer & glorifier, par ce qu'à vous seul est deu l'Hymne & la louange de Sion, qui estes vn abyssme de toutes perfections, vne mer de sapience, de toute-puissance, de beauté, de richesse, de grandeur, de suavité, de Majesté, auquel consistent toutes

les perfections & beautez de toutes les creatures, tant celestes que terrestres, & toutes en suprême degré des perfections : en comparaison duquel toute autre beauté est laideur, toute autre richesse est pauvreté, toute autre puissance est foiblesse, toute autre science est ignorance, toute autre douceur est amertume. Et finalement tout ce qui reluit au Ciel & en la terre, est beaucoup moins aupres de vous, que la moindre chandelle au regard du Soleil.

Vous estes parfait, sans aucune imperfection ny defect; vous estes grand sans quantité, bon sans qualité, fort sans infirmité, veritable sans aucun mensonge, sans lieu, present en tout lieu, sans place, tout entier, en tout endroit, infiny en grandeur, Tout-puissant en vertu, souverain en bonté, en sapience inestimable, terrible en conseil, iuste en iugement, tres-secret en pensées, tres-abondant en misericorde, tres-patient envers les pecheurs, & tres-pitoyable envers les penitens.

Que diray-je donc, Seigneur, de la grandeur de vostre sapience ? Vous Seigneur, avez conneu mes pensées beaucoup avant qu'elles fussent : & avez trouué le fil & sentier de ma vie. Vous avez veu de toute

Psal. 8.

344 PARADIS DES PRIERES,
eternité toutes mes œuvres, & n'ay iamais
proferé vne seule parole, qui ne vous soit
conneuë. Vous, Seigneur, sçauéz toutes
choses passées, & toutes les futures : vous
m'avez créé, & avez mis dessus vostre
main, vostre science, & la connoissance
que vous avez de moy, est merueilleuse-
ment admirable; elle est si haute & si ex-
trême, que ma comprehension ne la peut
atteindre.

Où pourray-ie fuyr vostre esprit, & où
me pourray-ie cacher, pour esuiter vostre
presence? Si ie monte iusques au Ciel, vous
y estes: si ie descends iusques en enfer, là
encores ie vous trouueray present. Et si ie
prens des ailles, que ie m'en aille habiter les
dernieres & plus loingtaines parties de la
mer, encores faudroit-il que i'y fusse con-
duit par vostre main, & que là ie fusse sou-
stenu de vostre dextre. Et quand i'ay dit
en moy-mesme, possible que les tenebres
me cacheront; i'ay aussi-tost conneu que
ce sont celles qui vous descouuriront mes
pechez. Car les tenebres ne sont tenebres
en vostre presence, & la nuit deuiet com-
me le iour, claire: là où vous estes. Vos
yeux, dit vn Sage, voyent toutes les voyes
des hommes, & avez tous leurs pas en vo-

stre connoissance. Il n'y a tenebres ny ombre de mort, où se puissent cacher ceux qui font mal.

Mais que diray-je de la grandeur de vostre Toute-puissance ? Dieu nostre Roy (dit le Prophete) a effectué le salut au milieu de la terre. Et suit peu apres, disant : Vous avez avec vostre vertu estably & confirmé la mer. Et avez rompu & fracassé les testes des dragons dans les eauës, & les avez baillé pour viande aux peuples Ethiopiens.

Vous avez ouuert & fait sortir les fontaines & torrens, & desséché les fleuves d'Ethan : & le iour & la nuit sont mesme-ment vostres ; car vous avez basti & fabriqué le Soleil & l'aurore : vous avez fait & constitué les fins & termes de la terre : & tant l'Esté comme le Printemps, sont œuvre de vos mains. Et dit en vn autre lieu le mesme Prophete, Seigneur Dieu des vertus, qui est celuy qui soit semblable à vous ? Vous estes puissant, Seigneur, & vostre verité vous environne de tous costez. Vous commandez à la puissance de la mer, & apaisez l'esmeute de ses flots & tourmentes. Et non content de ce, il adioust encore au mesme Psalme, disant : Vous avez humilié,

346 PARADIS DES PRIERES,
& fait abbaïſſer le ſuperbe, & avec la vertu
de voſtre bras avez diſſipé vos ennemis.
Les Cieux ſont voſtres, & voſtre encores
eſt toute la terre, & tout ce qu'elle con-
tient; puis que vous-meſmes l'avez fon-
dée, & avez créé la mer & le vent d'Aqui-
lon, qui la fait troubler & eſmouvoir. Les
montagnes de Thabor & d'Ermon tref-
ſauteront de ioye, au ſeul nommer de vo-
ſtre nom; par ce que voſtre bras ſeul eſt
tres-puiſſant.

Le ſainct homme Iob monſtroit bien
n'auoir pas moindre connoiſſance de vo-
ſtre Toute-puiſſance, diſant de vous: Chez
luy eſt la ſapience & la force, & eſt poſſeſ-
ſeur de conſeil & intelligence. S'il deſtruit
& ruine, il n'y a aucun qui puiſſe reedifier:
ſ'il enferme l'homme, il n'y a aucun qui luy
puiſſe ouurir. S'il retenoit les eäuës, toutes
choſes ſe ſecheroient: & ſi les laiſſoit cou-
rir, toutes choſes ſeroient noyées. Et luy
eſt la force & la ſapience, & connoiſt le
trompeur & le trompe. Il conduit les con-
ſeillers à ſotte fin, & fait eſtonner les Ju-
ges. Il oſte la ceinture militaire aux grands
Roys & glorieux, & fait ceindre leurs
reins d'une corde. Il deſcouure & manife-
ſte le profond des tenebres, & rend claire

& nuisante l'ombre de la mort. Il multiplie les peuples, & les destruit: & apres qu'ils sont destruits, il les restaure. S'il nous donne la paix, qui la nous pourra iamais oster? Et s'il se cache de nous, qui le pourra retrouver?

Mais que diray-je, Seigneur, des richesses de vostre gloire, & de l'abondante veine de vostre felicité? Si tu peche (dict l'Ecriture) quel dommage luy feras-tu? Et quand bien tu multiplirois toutes tes iniquitez, que ferois-tu à l'encontre de luy? Et si tu es iuste, quel profit luy apporteras-tu, ou quelle vtilité scauroit-il recevoir de tes mains? A l'homme tel que tu es seront dommageables & nuisantes les mauuaisez & malices, & ta iustice profitera aux hommes: Mais vous, Seigneur, estes tant accompli d'heur & de felicité, & est si profonde la veine de vostre gloire, que vous n'avez affaire d'aucun.

Pour tel, Seigneur, ie vous confesse, pour tel ie vous louë, & glorifie vostre saint Nom. Illuminez mon cœur Seigneur, & donnez des paroles à ma langue, afin que le cœur pense en vos grandeurs, & ma bouche soit pleine de vos loüanges: Mais pour ce que la loüange n'est belle ny

348 PARADIS DES PRIERES,
agreable en la bouche du pecheur, i'inuo-
que tous les Anges du Ciel, & toutes les
creatures du monde: à ce que toutes en-
semble vous loüent avec moy, & suppléent
en cét endroit à mon defaut, les inuitant
à ce faire par ce glorieux Cantique, que ces
trois ieunes enfans vous chanterent au mi-
lieu des flammes de la fournaise de Baby-
lone: disans:

O Seigneur Dieu de nos Peres, vous
estes beny, & estes digne d'estre loüé &
exalté à tousiours, & par dessus toutes
choses. Et si le sainct Nom de vostre gloire
soit beny, loüé & exalté par dessus tous, &
en tous les siecles. Beny soyez-vous au
sainct Temple de vostre gloire, loüé &
exalté par dessus tous, & glorieux en tous
les siecles. Vous estes beny au throsne &
siege de vostre Royaume, loüable & plus
que glorieux par dessus tous, en tous les
siecles. Vous estes remply de benediction
vous qui regardez les abysses, & estes assis
sur les Cherubins, vous estes loüable & es-
leué par dessus tous, en tous les siecles.
Vous estes benist au firmament du Ciel;
vous estes loüable & glorieux à iamais, es-
leué & exalté par dessus tous, & en tous les
siecles des siecles, Amen.

Oraison au Pere celeste.

O Seigneur nostre Dieu , Dieu bon, Dieu tout-puissant, Dieu d'ineffable & d'incomprehensible nature , Dieu qui donnez la connoissance de toutes choses, & Pere de nostre Seigneur & Sauueur Iesus-Christ , lequel pour nostre profit public, vous auez enuoyé de vostre sein paternel , prendre nostre nature , afin qu'il nous donnast la sienne. Comment , mon Seigneur, considerant la grandeur de vostre incomprehensible Majesté , la rigueur de vos tres-iustes & equitables iugemens, & voyant quelle haine vous portez aux pechez, suis si temeraire & effronté de comparoir en vostre paternelle presence ?

Si ce Publicain de l'Euangile n'auoit la hardiesse de hausser ses yeux au Ciel ; mais demeurant derriere les autres se fraploit la poitrine, disant de loing : *Seigneur, soyez propice à moy pauvre pecheur* : Et si cette sainte pecheresse n'eut la hardiesse de comparoir deuant les yeux du Seigneur vostre fils ; mais tournoyant par derriere , se ietta à ses pieds, & avec ses larmes impetra la remission de ses pechez. Et si ce saint Patriarche Abraham voulant parler avec vous (Seigneur) disoit : *Parleray-ie au Sei-*

gneur, moy qui ne suis que pouldre & cendre?
 Si ceux-là se prosternoient & humilioient
 ainsi, quand ils se presentoient en la presen-
 ce de vostre Majesté, estât ce qu'ils estoiet,
 que fera vn si pauvre & miserable pecheur
 comme ie suis? Que fera la putrefaction &
 la cendre? Que fera l'abyssme de tous pe-
 chez & miseres?

Toutesfois, d'autant que ie ne puis Sei-
 gneur, auoir la crainte & la reuerence telle
 que vostre grande Majesté le requiert, si ce
 n'est mettant mes yeux en icelle: permet-
 tez-moy, mon Dieu, que ie puisse hausser
 mes yeux tristes & pesâns vers vous, sans
 que la debilité de ma veüe soit reprimée &
 esbloüie par la reuerberation de la splen-
 deur & clarté de vostre gloire. Ie connois
 & voy bien que vous estes ce grand Dieu,
 qui surmontez tout nostre sçauoir. Ie sçay
 bien qu'il n'y a aucun entendement ny in-
 telligence créé qui vous puisse compren-
 dre. Toutesfois avec tout cela, encores
 qu'il n'y ayt aucun qui vous comprenne; si
 est-ce que nul ne sçauroit faire chose meil-
 leure, que de ficher & colloquer ses yeux
 en vous.

Ordonc, tres-souuerain, tres-puissant,
 tres-misericordieux, tres-iuste, tres-secret,

tres-

tres-present, tres-beau, stable, incompre-
hensible, tres-sainct, tres-parfait, inuinci-
ble, qui voyez toutes choses, immuable,
qui mouuez: la largeur ne vous amplifie: &
si n'estes restreint par aucune petitesse, la
varieté ne vous change, & n'estes corrom-
pu par la necessité, vous n'estes troublé des
choses tristes; ny resioüy des ioyeuses; au-
quel ny l'oubly, ny la memoire ne peuuent
rien oster ny donner; deuant lequel ny les
choses passées ne passent, ny les futures ne
succedent; auquel aucune chose n'a iamais
donné commencement, ny les temps aug-
mentation, ny aucun accident ne donnera
iamais aucune fin, par ce que vous vivez
au siecle des siecles.

Vous estes celuy qui possédez tout, d'un
bout iusques à l'autre, & qui suauement
disposez & ordonnez toutes choses. Vous
estes celuy qui auez toutes choses sans ne-
cessité, qui les soustenez & sustentez sans
lassitude, qui les gouvernez sans peine, &
les mouuez sans vous mouuoir. Vous estes
tout ioyeux, tout pieds, tout mains: Tout
yeux, par ce que vous voyez tout; tout
pieds, par ce que vous soustenez l'Vniuers;
tout mains, par ce que vous faictes routes
choses: Vous estes dedans toutes choses;

352 PARADIS DES PRIERES,
mais non enfermé, hors de toutes; mais
non exclus dessus toutes; mais non assujet-
ty ny oppressé: au dessus de toutes; mais
non esleué.

O vray & souuerain Dieu, & vraye &
souueraine vie, de laquelle & par laquelle
toutes choses viuent qui bien & heureuse-
ment viuent. Vous estes, Seigneur, la mes-
me bonté & beauté, duquel & par lequel
est bon & beau, tout ce qui est bon & beau.
Vous estes celuy qui commandez que
nous vous cherchions, & qui faictes que
nous vous trouuions, & qui nous ouurez
quand nous vous appellons. Vous estes ce-
luy duquel se separer est cheoir, duquel
s'approcher est se releuer, auquel demeu-
rer est demeurer & durer eternellement.
Vous estes celuy duquel iamais aucun ne se
separe sans estre abusé, duquel aucun ne
s'approche vous cherchant sans estre bien
instruit, & lequel personne ne retrouve
sans estre purgé. Vous estes celuy la con-
noissance duquel est viure, auquel seruir
& regner, lequel saluër & louër, est le plai-
sir & salut de ceulx qui vous louë.

Que pourray-je dire donc, ô mon Sci-
gneur & mon Roy, de la grandeur de vos
loüanges? Je diray ce que vos Prophetes

remplis de vostre esprit, ont dit : Qui est celuy (dit Isaye) qui mesura iamais les eaux & les Cieux , avec la paulme de la main ? Qui est-ce qui tient avec trois doigts de la main suspendue toute cette machine terrestre, & qui a esgalé les montagnes & collines avec le poids en la balance ? Qui est celuy qui iamais aida l'esprit du Seigneur, ou qui iamais fut son conseiller, ou qui luy enseigna iamais aucune chose ? Tous les peuples sont comme vne gouttelle d'eau en sa comparaison. Toutes les aires sont comme vn peu de poudre en sa presence, & tous les bois du mont du Liban, avec tous les troupeaux qui sont en iceluy, ne sçauroient suffire à luy offrir vn digne sacrifice. Tous les peuples sont en comparaison de luy, comme s'ils n'estoient point, & seront reputez comme rien, estans parangonnez à luy. Car si en presence du Soleil les estoilles du Ciel ne donnent aucune clarté, ains demeurent en sa presence, comme si elles n'estoient point (estans toutesfois & luy les autres creatures :) cõment paroistront toutes choses en vostre presence, vous estant le Createur de toutes icelles ?

Partant Seigneur, premierement, ie vous adore avec la plus profonde humilité & reuerence que ie puis, & avec cette adoration de Latrie, qui est deuë à vous seul, & non à aucune creature, en la maniere que vous adorent les dominatiōs du Ciel, & toutes les creatures du monde : desquelles encores que la pluspart ne vous connoissent, si ne peuuent-elles cesser d'adorer le Sceptre de vostre diuinité, & reconnoistre vostre grandeur : Par ce que vous seul estes Dieu des Dieux, Roy des Roys, Seigneur des Seigneurs, & cause des causes. Vous estes Alpha & Omega : c'est à dire, le commencement & la fin en toutes choses, & commencement sans commencement, & fin sans fin : Vous seul estes celuy qui estes veritablement : car toutes les autres choses, quelques hautes & dignes qu'elles soient, ont leur estre emprunté & pendant d'ailleurs : mais vostre estre est souuerain, parfait, vniuersel, & qui ne dépend de chose aucune. Au moyen dequoy avec grande raison se dit, que vous estes celuy qui estes ; car toutes les autres creatures n'ont point d'estre en comparaison de vous.

Or confessant toutes ces merueilles &

admirables grandeurs , prosterné deuant vostre diuine face, ie vous adore avec toute l'humilité qu'il m'est possible , comme vous adorent tous ces bien-heureux esprits : qui prosternez deuant le throsne de vostre Majesté, & mettans leurs couronnes à vos pieds, vous adorent & font reuerence, confessans receuoir de vous tout ce qu'ils ont. Ainsi pareillement moy qui suis la vile creature du monde , mille fois ie vous fais reuerence, & vous adore : confessant que vous estes mon vray Dieu & Seigneur : & tout ce que ie suis, **que** ie vis, que i'ay, que i'espere, est tout vostre. De façon que ie conuoque & inuite toutes les creatures à semblablement vous louer & adorer, & les appelle & conuie à ce faire, avec le Cantique de nostre Prophete, qui dit :

Or sus venez , & nous esiouïssons en la veüe du Seigneur, & menons ioye avec iubilation en la presence de nostre Seigneur, presentons-nous deuant sa face, confessans & loüans sa gloire avec Psalmes : Car nostre Dieu est grand Seigneur, & est grand Roy sur tous les Dieux : toute la terre est en ses mains, & la hauteur des montagnes est toute soubs sa puissance. La mer est lien-

356 PARADIS DES PRIERES,
ne, parce que luy-mesme l'a fondée, & ses
mains ont fondé cette grande terre & ma-
chine de l'Vniuers. Venez donc, & ado-
rons le Seigneur, & prosternez deuant luy,
pleurons en la preséce de nostre Crea-
teur. Car il est nostre Seigneur & nostre
Dieu, nous sommes son peuple, & les
ouïailles de son troupeau. Et puis que vous
estes (mon Dieu & mon Seigneur) si di-
gné d'estre adoré, & reueré: faites moy la
grace que ie vous adore & reuere perpe-
tuellement, comme vous méritez, non
seulement de paroles & de bouche, mais
de cœur & d'effect, & avec ma vie, vous
qui vivez pour tousiours és siecles des sie-
cles, Amen.

Oraison au Fils.

O Verbe eternal, ô vray Orient, ô lu-
miere & clarté ineffable, ô splen-
deur de la lumiere eternelle, ô miroir de
la diuine Majesté, qui lors que vous estiez
en la forme de Dieu n'avez estimé rapine
d'estre esgal à Dieu vostre Pere: ie vous
adore, ie vous louë & donne benediction
à iamais. Par vostre trop grande & tres-ar-
dente charité que vous avez eu enuers
nous de toute eternité; vous estes descen-
du du sein paternel, pour prendre nostre

nature, & vous reuestir de la forme de ser-
uiteur, de sorte que vous auez esté trouué
en habit comme homme : non pour autre
occasion qu'à celle fin de nous deliurer,
nous hommes miserables, qui estions obli-
gez à la mort & damnation eternelle, &
nous oster de la puissance tyrannique du
diable & nous faire heritiers & participans
de l'heritage celeste & eternel, laquelle ex-
cellence de vostre humilité & grandeur,
de vostre diuine charité, toutes les fois que
ie viens à considerer en moy-mesme, tout
estonné & presque hors de moy, ie suis
contraint de m'escrier : O mon Seigneur,
qu'est-ce que l'homme, attendu que vous
vous ressouuenez d'iceluy ? & quelle cho-
se est le Fils de l'homme, veu que vous
daignez bien le visiter ? Vous le visitez,
dis-je, avec les entrailles de vos misericor-
des ; car vous ne nous auez pas seulement
exhibé quelque apparence de vostre mise-
ricorde : mais vous nous auez manifesté
& départy entierement la plenitude d'i-
celle : espandant cette vostre misericorde
sur nous en toute abondance & affluence,
ne nous reseruant rien que vous ne nous
ayez donné, estant fait en nous toutes
choses.

Si ie desire guarir & medeciner mes playes, vous estes le vray & tres-expert medecin: si ie suis brulé d'une par trop ardente fièvre, vous estes vraye fontaine: si ie suis oppressé & accablé de mes iniquitez, vous estes la iustice: si i'ay besoin de secours & de force, vous estes la vertu: si ie crains & redoute la mort vous estes la vie: si ie desire le Ciel, vous estes la voye pour y paruenir: si ie veux fuir les tenebres, vous estes la vraye lumiere: si ie cherche quelque nourriture, vous estes la viande tres-delectable & solide.

Que diray-ie d'auantage? Tout ainsi que par le peché d'Adam nostre premier parent, tout malheur & iniquité est descēdue sur nous, ainsi par vostre iustice tout bien, grace & vertu a esté espandue, & est decoulée sur nous. Car Adam ne pouuoit pas d'auantage au mal, que vous auez de pouuoir au bien. Celle-cy est ma foy; ie croy cecy tres-assurement. Car quelle iustice y auroit-il que la generation humaine & terrestre eust plus de puissance pour nuire & porter dommage, que la generation celeste pour donner secours & parfaite deliurance.

Que vous rendray-je, mon Seigneur,

pour tant & de si grands benefices? Encores que tous les iours de ma vie i'endurasse la mort pour vous, qui m'avez tant & si tendrement aimé, ie ne pourrois en cecy dignement satisfaire & selon le merite: que mesme ie ne payerois la moindre partie de cette debte & obligation. Ie sçay bien, mon Seigneur, ie sçay ce que vous cherchez & demandez de moy. Vous voulez qu'il y ait quelque conformité entre l'excellence du prix, & la dignité de ce qui est racheté: vous attendez de nous vn tel & si grand merite de vie & conuersation, qu'il puisse auoir quelque affinité avec le commerce de nostre redemption, faict par le gage de vostre precieux sang. Ce que ne pouuant payer sans vostre grace & faueur; ie vous supplie tres-humblement, mon doux & debonnaire Seigneur, me vouloir donner secours & aide, à ce que ie garde & conserue ce que vous avez payé avec tât de sueurs & trauaux. Faites-moy la grace de ne point souïller derechef ce que vous avez nettoyé, ne point faire nouvelle ouuerture aux playes que vous avez fermées & guaries: & qu'il ne soit besoin cy-apres que le feu infernal brusle & consōme ce qui a esté yne fois purgé & destrempé par vostre sãg.

Destruisez en moy le Royaume de péché, chassez & bannissez hors de moy, non seulement les œuvres & paroles mauuaises : mais aussi les cogitations peruerfes, les conseils deprauez, les affections damna-
bles, & sur tout faites sortir de mon pauvre cœur les ardeurs & esmotiōs de cette chair corruptible. Accordez de grace, que tous mes membres soient disposez pour vous seruir en toute iustice & sanctification, que ie croisse & augmente de plus en plus en toute vertu, & fasse abondamment les œuvres qui vous sont plaisantes & acceptables, afin que par cy apres ie ne viue plus en la chair, & selon la chair; mais que ie sois entierement purgé de toute cogitation, macule & pollution d'icelle, & que de iour à autre ie puisse obtenir de vous vne parfaicte & entiere remission de mes pechez.

Renforcez-moy, Seigneur, & me fortifiez, d'autant que ie suis fort debile : & estant perdu, remettez-moy en mon sentier. Ressuscitez-moy, car ie suis mort: guidez & gouuernez sous vostre bon plaisir toutes mes actions, toutes mes paroles & pensées, à celle fin que d'oresnauant ie vous serue tousiours, ie viue pour vous, &

en vous, & me donne du tout à vous. Je sçay fort bien, ô bonté infinie, mon Seigneur, que pour autant que vous m'avez fait, ie vous appartiens & suis à vous seul, & non à autre: Et parce aussi que vous m'avez racheté, & avez esté fait homme pour moy; ie vous serois redeuable de beaucoup plus que ie ne vault, si ie l'auois au moyen que vous estes plus grand & plus precieux que celuy pour lequel vous vous estes liuré vous-mesme. Mais voila tout mon pouuoir, & autre chose n'ay que ie vous puisse offrir; & encores ie le tiens de vous, & par vostre seul moyen: & partant ne le puis donner sans vous, & sans vne speciale permission & congé de vostre Majesté: Acceptez-moy donc, & me tirez à vous, à ce que par imitation & dilection ie sois fait vostre, comme de condition & creation ie suis à vous. A vous, dis-je qui viuez & regnez eternellement par tous les siècles des siècles, Amen.

Oraison au saint Esprit.

O Saint Esprit consolateur, qui le iour de la Pentecoste descendistes sur les Apostres, & remplistes leurs poitrines sacrées de charité, de grace & de sapien-

Grena-
de trai-
té 5.
du Me-
morial.
Act. 2.

ce: ie vous supplie , Seigneur, par cette ineffable misericorde & liberalité , qu'il vous plaise remplir mon ame de vostre grace, & toutes mes entrailles de l'ineffable douceur de vostre amour.

Venez, ô saint Esprit, & enuoyez-nous du Ciel vn rayon de vostre lumiere. Venez, ô Pere des pauures , venez , ô donneur de la lumiere interieure , & de la lumiere des cœurs. Venez , tres-bon consolateur, doux espoux des ames , & le pacifique repos d'icelles. Venez à moy nettoyeur des pechez , & la medecine de nos maladies: Venez force des foibles, & remede de ceux qui sont cheuz & blesez : Venez maistre des humbles , & destructeur des orgueilleux : Venez gloire singuliere des viuans , & l'vnique salut de ceux qui meurent: Venez mon Dieu, & preparez-moy à vous receuoir avec toute la richesse de vos dons & misericordes.


Enyvrez-moy avec le don de sapience, illuminez-moy avec le don d'entendement, gouvernez-moy avec le don de conseil: confirmez-moy avec le don de force: enseignez-moy avec le don de science, blesez-moy avec le don de pieté, & outre-percez mon cœur avec le don de vostre crainte.


O tres-doux amateur de ceux qui ont le cœur monde, enflammez & bruslez toutes mes entrailles avec le feu tres-suaue de vostre amour, afin qu'estans embrazées, elles soient rauies & conduites à vous, qui estes ma dernière fin, & vn abysme de tout bien. O tres-doux amateur des âmes pures, puis que vous sçauiez, Seigneur, que ie ne puis rien de moy-mesme: estendez vostre pitoyable main sur moy, & faites-moy sortir de moy-mesme, afin que ie puisse aller à vous par ce moyen: & à cette occasion Seigneur, renuersez par terre, mortifiez, cassez, & defaites en moy tout ce qu'il vous plaira, afin qu'en toutes choses ie sois fait conforme à vostre volonté tres-sainte: de maniere que toute ma vie soit vn parfait sacrifice, qui soit entierement brulé au feu de vostre saint amour.

O qui me concedera que ie sois admis en vn si grand bien? Regardez, mon Seigneur, regardez comme souspire iour & nuict apres vous cette pauvre & miserable creature vostre, mon âme, laquelle a eu soif de vous, Dieu viuant. Quand iray-je comparoistre deuant la face de toutes les graces? Quand est-ce que i'entreray au lieu de cét admirable tabernacle: de sorte, que

i'arriue à la maison de mon Dieu? Quand est-ce que vostre diuine face, Seigneur me remplira de resiouissance? Quand me verray-je saoulé de vostre presence glorieuse? quand seray-je enyvré du torrent de vos delices & voluptez celestes? Quand fera-ce que par vous ie seray deliuré de la tentation, & que i'outrepasleray le mur de cette mortalité?

O fontaine de splendeur eternelle? Re-conduisez-moy, Seigneur, à cét abyssme du bien eternel, duquel i'ay esté produit: & faictes que ie vous puisse là connoistre, tout ainsi que vous m'avez conneu, & que ie vous puisse aimer comme vous m'avez aimé, & que ie vous voye à iamais à la compagnie de tous les esleuz du Ciel, comme vous m'avez veu de toute eternité, Amen.





CHAPITRE VIII.

Contenant sept belles & deuotes
Oraisons , pour demander
& impetrer l'amour
de Dieu.

P R E F A C E.

DOVTE les deuotes personnes, & tous les saincts Docteurs , tant Scolastiques , que contemplatifs sont d'un mesme accord , que la perfection de la vie Chrestienne (à laquelle tous doiuent aspirer) iacoit que tous ne puissent cheminer en icelle d'un mesme pas , consiste en la parfaite charité & amour de Dieu. Et pour cette occasion l'Apostre en vne sienne Epistre la nomme Lien de perfection: & en vn autre, La fin de toute la Loy: Car la chose est, & se trouue en sa perfection, quaud elle a atteint la fin & le terme pour laquelle elle a esté créé: parce qu'elle ne peut monter plus haut qu'au lieu où sa puissance la peut conduire.

Grenade ch. 1.
du 7.
traicté
du Memorial.

Coloss.
3.
1. Tim.
1.

Or comme ainsi soit, que Dieu seul est la dernière fin, & comme le centre de la creature raisonnable, dans lequel se retrouve tout ce que l'entendement humain peut comprendre, ou que la volonté peut desirer & aimer, il s'ensuit de là que la perfection de l'homme consiste en l'amour & parfaite charité de Dieu : le propre office duquel amour, est d'unir l'homme avec Dieu, (qui est le souverain bien) par dilection & amour, & le faire une mesme chose avec luy, comme tesmoigne l'Evangéliste, quand il dit : Dieu est charité; & qui demeure en charité demeure en Dieu, & Dieu avec luy : Nous voyons donc qu'en charité consiste la perfection de la vie Chrestienne : de sorte que d'autant qu'elle sera plus ou moins parfaite, telle sera la vie du Chrestien. Et de tant plus que l'ame devote s'approchera de Dieu, & s'advancera en l'amour de son Seigneur, tant plus sera-elle sainte & bien-aimée de son Createur.

Quelle est la nature de l'amour, quels sont les moyens de l'acquérir, & quelles choses le peuvent empescher, sont assez doctement & amplement descrites par R. P. L. de Grenade, au septiesme traicté du Memorial, & en la premiere partie des Additions, où nous renvoyons le Lecteur.

Quant est des voyes pour arriver à l'amour,
il

il y en a deux : la premiere desquelle se nomme Scholastique, & l'autre est appellée Mystique. La premiere, est quand nous considerons toutes les choses qui nous peuuent inciter & esmouuoir nostre cœur à cét amour diuin : comme sont les benefices de Dieu, & les perfections d'iceluy. La derniere est, lors que d'un desir embrasé & d'une affection totalement brulante, nous ne demandons à Dieu ce don celeste, avec Oraisons tres-ardentes & deuotes.

A la premiere voye appartiennent plusieurs Meditations de benefices, & de perfections diuines : & telles considerations se trouuent amplement au premier liure de l'Oraison du R. P. L. de Grenade au sixiesme traicte du Memorial, & en la seconde partie des Additions, ou supplément.

A quoy pourront aussi seruir les deux premieres Oraisons du Chapitre precedant, & toutes les actions de graces du Chapitre suuant apres ce present.

A la derniere voye, appellée mystique appartiennent les Oraisons suiuanes, prinsees & colligées du mesme Autheur : & plusieurs autres de ce mesme suiet, comme est le premier Chapitre de ce liure, contenant vne deuote exposition de l'Oraison Dominicale.

P R E M I E R E O R A I S O N
pour demander l'amour de nostre
Seigneur.

Grena-
de en
la par-
tie pre-
miere
des Ad-
ditions
au sup-
plémēt.

L Es genoux de mon ame estans cour-
bez, abbatus & engloutis dans l'abyf-
me de ma vilité, avecques toutes la reue-
rence & humilité possible à ce ver con-
temptible; ie me presente deuant vous,
mon Dieu, comme vne des plus pauvres
& viles creatures du monde.

Là ie me tiens deuant le torrent de vo-
stre miséricorde, deuant les influences de
vostre grace, deuant la splendeur du vray
Soleil de Iustice, qui darde çà & là ses ra-
yons par toute la terre, & les communi-
que liberalement à tous ceux qui ne leur
ferment pas les portes. Là se met entre les
mains du tres-sçauant Maistre vne masse
d'argile, & vn tronc nouëux coupé recen-
tement de l'arbre avec son escorce: faites
de luy Pere tres-clement, ce pourquoy
vous l'avez créé.

C'est vne grande hardiesse à vne crea-
ture si basse de demãder vn amour si haut:
& veu la grandeur de ma bassesse; ie vou-
droy bien demander quelque autre cho-
se plus basse: mais que ferois-je, puis que

vous me commandez de vous aimer?

Vous m'avez créé, afin que ie vous aimasse, & me menassiez si ie ne vous aime: vous estes mort, afin que ie vous aimasse, & me commandez que ie ne vous demande rien plus instamment que l'amour: & desirez tât que ie vous aime, que me voyât sans amour, vous avez ordonné vn Sacrement de merueilleuse vertu pour transformer les cœurs en vostre amour.

O mon Sauueur, que vous suis-je, que vous me condamnez que ie vous aime, & qu'à ces fins vous ayez cherché des inuentions telles & si admirables? Que vous suis-je, & dequoy vous fers-je sinon de trauail, de tourment, & de croix? & que m'estes-vous sinon salut, repos & tout bien? Si donc vous m'aimez, estant tel que ie suis en vostre endroit: pourquoy ne vous aimeray-je pas, estant tel que vous estes en mon endroit?

Me confiant donc Seigneur, en toutes ces arres d'amour, & en ce commandement si gracieux, par lequel il vous a plu si cherement me commander que ie vous aimasse tout le temps de ma vie: ie vous demande par cette grace, encor vne autre grace, c'est qu'il vous plaise me

370 PARADIS DES PRIERES,
donner ce que vous commandez que ie
vous donne, puis que ie ne le puis pas don-
ner sans vous.

Je ne merite pas de vous aimer , mais
vous meritez bien d'estre aimé : à raison
dequoy ie n'ose pas vous supplier que vous
m'aimiez , ains seulement que vous per-
mettiez que i'aye la hardiesse de vous ai-
mer. Ne fuyez pas , Seigneur , ne fuyez
pas , laissez vous aimer de vos creatures,
d'amour infiny.

O Dieu , qui estes essentiellement
amour , amour increé , amour infiny,
amour sans mesure : non seulement ama-
teur : mais tout amour, duquel procedel'a-
mour de tous Seraphins , & de toutes les
creatures (tout ainsi comme de la lumiere
du Solcil celle de toutes les estoilles) pour-
quoy ne vous aimeray-je point? pourquoy
ne me brusleray-je en ce feu d'amour , qui
brusle tout l'Vniuers?

O Dieu , qui estes essentiellement la
mesme bonté , par qui est bon tout ce qui
est bon : de qui deriue la bonté de toutes les
creatures , comme de la mer toutes les
eaux , & au respect de laquelle bonté plus
qu'excellente, il n'y a chose au Ciel , ny en
la terre , qui puisse estre appellée bonne:

pourquoy ne vous aimeray-je point, veu que l'object de l'amour est la bonté?

O dieu, qui estes essentiellemēt la mesme beauté : de qui procede toute la beauté des chāps, & en qui sōt encloses les plus excellentes beautez de toutes les creatures: pourquoy ne vous aimeray-je point, puis que la beauté est si puisāte pour auuiuer les cœurs?

Et si ie ne vous aime à raison de ce que vous estes en vous, pourquoy ne vous aimeray-je, à raison de ce que vous estes enuers moy? L'enfant aime son Pere, pource qu'il a receu de luy l'estre qu'il a. Les membres aiment leur chef, & s'exposent à la mort pour luy, pource qu'ils sont conseruez par luy en leur estre. Tous les effects aiment leurs causes, pource qu'ils en ont receu l'estre qu'ils ont, & esperent receuoir ce qui leur defect. Quel tiltre donc de ceux-cy vous manque, ô mon Dieu, pourquoy ie ne vous doiue point payer toutes ces debtes & tributs d'amour?

Vous m'avez donné l'estre que i'ay, beaucoup plus parfaictement que mes parens: vous me conseruez en cēt estre que vous m'avez donné beaucoup mieux que le chef ne fait pas les membres. Vous deuez parfaire ce qui defect à cēt ouurage

372 PARADIS DES PRIERES,
commencé, pour le conduire au dernier
point de sa perfection. Vous estes le Pe-
re qui m'avez fait, le chef qui me gouver-
nez, & l'espoux qui donnez à mon ame vn
parfaict contentement.

Vous estes l'ouurier de cette maison, &
le peintre de cette figure, faicte à vostre
image & semblance, qui restē encor à par-
faire. Tout ce qu'elle a, elle l'a receu de
vous, & ce qui luy defaut, elle espere le re-
cevoir de vous. Car comme personne n'a
peu luy donner ce qu'elle a, sinon vous:
personne aussi ne peut parfaire ce qui luy
defaut sinon vous: de maniere que tout ce
qu'elle a, tout ce que elle est, & tout ce
qu'elle espere est vostre.

Surquoy donc doit-elle ietter son re-
gard si ce n'est sur vous? avec qui doit-elle
compter, si ce n'est avec vous? de quels
yeux doit-elle dependre, si ce n'est des vo-
stres? en qui doit-elle mettre tout son
amour sinon en icelui qui est tout son bien?

Hier. 2. *La fille (dit Hieremie) pourroit-elle oublier le
plus beau de ses ornemens, & le lien dont elle
ceint la poitrine? Si vous donc, mon Dieu,
estes tout l'ornement, & toute la beauté de
mon ame: comment sera-il possible que ie
vous oublie? Qu'ay-je donc à voir dans le*

Ciel, & qu'ay-je à desirer sur la terre? Ma chair doit defaillir, & mon cœur aussi, Dieu de mon cœur, & mon seul heritage, Dieu pour tousiours. Fuyez, fuyez de ma maison, creatures larronneſſes & adultères de mon Dieu: esloignez-vous donc, & retirez-vous de moy; car vous n'estes pas pour moy, ny moy pour vous.

O amour increé, qui tousiours bruslez, & à iamais n'estes esteint: ô amour tousiours vif, & bouillant en la poitrine de Dieu: O eternal dard du cœur du Pere, qui ne cessez iamais de frapper en la face du Fils, avec vn amour infiny: que ie sois frappé de ce dard, que ie sois enflammé de ce feu, que ie vous suiue mon bien-aimé, que ie vous chante hautement des chansons d'amour, & que mon ame vienne à defaillir en vos loüanges, avecques vne resiouissance d'amour ineffable.

O Pere tres-sainct, ô Fils tres-clement, ô S. Esprit tres-amoureux, quand sera-ce, Pere plein d'amour, que vous entrerez au plus profond de mon ame, & au plus secret d'icelle, & me possederez du tout? Quand seray-je tout vostre, & vous tout mien? Quand sera-ce, ô mon Roy? Quand viendra cette iournée? O quand: où sera-

374 PARADIS DES PRIERES,
ce poinct? Penſez-vous à l'aduenture que
ie la verray? O quelle grande tardiueté! ô
quel penible retardement! faiâtes prom-
ptement, bon Ieſus, faiâtes promptement:
ne ſoyez pas tardif, accourez, mon bien-
aimé, avec la legereté du dain, & de la che-
vre montaniere qui court ſur les monta-
gnes de Bethel.

O mon Dieu, repos de ma vie, lumiere
de mes yeux, conſolation de mes trauaux,
arre de mes deſirs, Paradis de mon cœur,
centre de mon ame, aſſurance de ma
gloire, compagnie de ma peregrination,
allegreſſe de mon banniſſement, mede-
cine de mes playes, pitoyable fleau de mes
coulpes, maître de mes ignorances, guide
de mon chemin, nid où ſe repoſe mon
ame, port où elle ſe ſauue, miroir où elle ſe
garde, baſton où elle ſ'appuye, pierre ſur
qui elle ſe fonde, & tres-precieux threſor
en qui elle ſe glorifie.

Si donc, Seigneur, vous m'eſtes toutes
ces choſes: Comment ſeroit-il poſſible
que ie vous oubliâſſe? Si ie viens à vous ou-
blier, que ma dextre ſoit miſe en oubly:
que ma langue ſoit ſuspenduë au palais de
ma bouche, ſi ie ne me ſouuiens de vous:
Pl. 36. Ie ne repoſeray point, ô bien-heureuſe

Trinité, ie ne donneray sommeil quelconque à mes yeux, ny repos aux iours de ma vie: tant que i'aye trouué cét amour, tant que i'aye trouué lieu en mon cœur pour le Seigneur, & habitation pour le Dieu de Iacob, qui vit & regne és siècles des siècles, Amen.

Seconde Oraison pour demander l'Amour de N. Seigneur, tirée en partie de quelques paroles deuotes de saint Augustin.

PVis-ie vous aimer, Seigneur, qui estes ma forteresse? faictes que ie vous aime, vertu de mon ame: que ie vous aime tousiours, allegresse ineffable de mō cœur. Que ie viue, non pas pour moy; mais pour vous tout le temps de ma vie: laquelle apres auoir esté perduë par ma grande misere, fut ressuscitée par vostre grande misericorde.

I'ay eu bien tard crainte de vous Majesté infinie: ie vous ay tard conneuë beauté tres-ancienne, ie vous ay tard aimée, bonté sempiternelle. Ie vous cherchois, mon repos, & ne vous trouuois point; par ce que ie ne sçauois pas vous chercher. Ie vous cherchois, mon repos, & ne vous trouuois point; par ce que ie ne sçauois pas vous rêcontrer. Ie vous cherchois parmy ces choses exterieures, & vous demeuriez aux

376 PARADIS DES PRIERES,
interieures : Je tournoyais tous les lieux
& places du monde, & ne trouuois point
en chose quelconque le repos que ie cher-
chois, pour ce que ie cherchois hors de
moy, ce qui estoit dedans moy.

Vous m'avez aimé, mon Seigneur, &
amour vnique, vous m'avez aimé auant
que ie vous aimasse. Vous m'avez créé à
vostre image & semblance, & m'avez don-
né puissance & seigneurie sur toutes vos
creatures. Vous avez deuté les Anges du
Ciel à ma garde, & leur avez commandé
de me porter en la palme de leurs mains:
Vous n'avez pas permis que ie nasquisse en
la terre des infideles; mais en celle des fi-
deles, où ie fusse laué & sanctifié avec l'es-
prit & l'eau. Vous ne m'avez pas donné ny
richesse ny pauvreté, qui me fist enorgueil-
lir, ou vous blasphemer : mais vous m'avez
donné entendement & sapience, afin que
ie vous conneusse, & vous aimasse.

Vous m'avez appelé, lors que i'estois
plus perdu, & avez heurté à ma porte, bien
que ie ne vous respondisse pas. Je viuois,
me confiant en moy-mesme, & en mes
propres forces, lesquelles n'estoient pas
forces, ains foiblesse & debilité. Je voulois
courir, & deuenois las, de maniere que là

où ie me pensois plus asseuré, ie me trouuois plus décheu. Ie m'esloignay de vous, tout ainsi que l'Enfant Prodigue, & m'en allay en vn païs bien desert, où aimant la vanité ie m'y feis vain. I'estois aueugle, & aimois l'aueuglement; i'estois serf, & aimois la seruitude; i'estois prisonnier, & ne tenois conte de ma prison: l'amer me sembloit doux, & le doux amer: & finalement estant miserable entre tous, ie ne connoissois pas ma misere.

Estant perdu en cette maniere, vous abaissastes vos yeux pitoyables sur moy: & tandis que ie pechois contre vous, vous me visitastes: estant cheu, vous me releuastes: estant plein de toute ignorance, vous m'enseignastes: estant vendu & deliuré à mes ennemis, vous inclinastes les Cieux, & descendistes pour me racheter: & fustes si desfireux de mō rachat, que pour iceluy vous donnastes vostre sang propre. Vous m'avez aimé, Seigneur, plus que vostre vie, puis que vous aués voulu mourir pour mon ame. En cette maniere, & avec vn prix si cher, vous m'avez deliuré de l'exil, & m'avez racheté du tourment, vous m'avez appelé par mon nom, m'avez marqué de vostre sang, afin que vostre memoire demeure

378 PARADIS DES PRIERES,
rast tousiours en moy, & que celuy ne s'es-
loignast iamais de mon cœur, qui pour l'a-
mour de moy ne s'est pas esloigné de la
Croix.

Que ie vous connoisse donc, Seigneur,
qui me connoissez : que ie vous connoisse
vertu de mon ame, que ie chemine tous-
jours en vostre presence, Soleil de Iustice.
Il est bon pour moy que ie m'accoste de
Dieu avec le Prophete, & que ie mette en
luy mon espoir. Car quand ie ne m'accoste
point de vous, ie m'applique soudainement
aux choses transitoires, & suis distrait par
des vaines pensées & paroles. O pauvre
miserable moy : quand sera-ce donc que ie
m'accosteray tellement de vous, que ie
m'en esloigne iamais ? Quand est-ce que
mes pensées depraüées se conformeront à
la reigle de vostre esgalité ? Vous aimez,
Seigneur, la solitude, & moy la cōpagnie :
vous aimez le silence, & moy le deuis : vous
aimez la verité, & moy la vanité : vous ai-
mez la pureté, & moy l'immondice.

Je vous supplie donc, Seigneur, par vous-
mesme, qu'il vous plaise illuminer mes
yeux de vostre lumiere, & frapper mon
cœur de vostre amour, dressant mes pas
en vos voyes, de maniere que ie ne m'en

esloigne iamais. Deliurez, Seigneur, le prisonnier, recueillez le vagabond en vos playes; leuez de terre celuy qui est cheu, tournez refaire celuy qui par tant de costez est imparfait. Donnez-moy, Seigneur, vn cœur qui pense tousiours à vous, vne memoire qui ne vous oublie iamais, vn entendement qui vous contemple tousiours, & vne volonté qui tousiours vous aime. Ne vous esloignez pas de mon cœur, ny de ma bouche, ny de mes œuures, afin que vous me soyiez tousiours en aide. Approchez-vous de moy, car ie meurs sans vous; approchez-vous de moy, afin que me ressouenant de vous ie ressuscite. Vostre odeur tres-suaue me recrée: vostre memoire me rend sain, vostre lumiere me donne vie, & Psal. 16. vostre voix me delecte: mais mon ame se faoullera, lors que vostre gloire apparoi-stra, Amen.

*Troisiesme Oraison pour demander l'Amour
de Dieu.*

SI nous sommes tant obligez à nos bien-faïcteurs pour les choses que nous en auons receus, ô Seigneur: & si tout bien-faïct est comme vne amorce & allechemēt d'amour, & si selon la quantité du bois, tel est le feu qui se met en iceluy: combien de-

uroit estre grand le feu d'amour qui doit ardre en mon cœur, puis que le bois & la matiere de vos benefices est de si grande quantité? Si tout ce monde visible & invisible est à moy de vostre grace & de vostre bien-fait : combien doit estre grande la flamme & le brasier d'amour qui s'embrase par toutes ces choses?

D'autant plus mesmement que ie ne suis pas seulement obligé à vous aimer pour ce regard; mais aussi par ce qu'en vous seul se trouuent accumulées toutes les causes d'amour qui sont esparfes par toutes les creatures, & icelles encore en vn souverain degre de perfection; car si nous parlons de bonté, qui est-ce qui se trouuera meilleur que vous? quant à la beauté, qui est plus beau que vous? quant à la douceur & suavité, qui est plus benin & gracieux que vous? quant aux richesses & sapience; y a-il aucun plus riche, ou plus sage que vous? quant à l'amour, qui est-ce qui nous en a iamais plus porté, que celuy qui nous en a fait tant de demonstrations, par ce qu'il a enduré pour nous? quant aux bien-faits, d'où vient ce que nous auons sinon de vous? quant à l'esperance, de qui esperons-nous recouurer tout ce dont nous auons besoin,

sinon de vostre tres-grande misericorde ?

S'il est deu si grande amour à nos peres naturels, qui est plus nostre pere que celuy qui dit : *N'appellez aucun vostre pere sur la terre : car vous n'avez qu'un seul pere, qui est és Cieux ?* Si les espoux sont chers avec si grand amour, qui est l'espoux de mon ame, sinon vous ? Et qui est-ce qui remplit le sein de mon cœur & de mon desir, sinon vous ? Si la derniere fin (comme disent les Philosophes) est aimée d'un amour infiny, qui est le principe & derniere fin, duquel j'ay pris commencement, & auquel ie m'en retourne, sinon vous ? & d'où vient tout ce que ie possède ? De qui ay-je esperance de recevoir tout ce qui me defaut, sinon de vous ?

Finalemēt, si la similitude est cause d'amour, à quelle image & semblance a esté créé mon ame, sinon à la vostre ? Or si cette seule cause & chacune des precedentes, seule & à part soy, est si puissant allement & aiguillon d'amour : quel deura estre l'amour procedant de toutes icelles vnies ensemble ? Veritablement autant que la mer surmonte tous les fleuves, qui entrēt en elle, autant deuroit cēt amour surmonter tout autre amour.

Or donc (ô mon Dieu, ô mon Seigneur) ayant tant de causes & occasions de vous aimer : pourquoy ne vous aimeray-je de tout mon cœur, de toutes mes forces, & de tout ce qui est en moy ? En vous est toute mon esperance, toute ma gloire, toute ma ioye & consolation. O mon principe, suffisance vnique & aimable : quand vous aimeray-je de toutes mes forces & de toute mon ame ? Quand vous pourray-je complaire en toutes choses ? Quand est-ce que tout ce qui vous est contraire fera en moy mortifié ? Quand feray-je du tout vostre ? Quand delaisseray-je d'estre mien ? Quand fera-ce , qu'autre chose ne viura en moy que vous seul ? Quand feray-je entieremēt embrasé en la flamme de vostre amour ? Quand feray-je de vous esbranlé & transporté en vous ? Quand fera-ce , qu'après auoir osté tous empeschemens & destourbiers , vous me ferez vn mesme esprit avec vous , afin que iamais ie ne me separe de vous ? Ah ! Seigneur , que vous couste de me faire vn si grand bien ? que vous ostez-vous ? que perdez-vous du vostre ?

Seigneur , puis que vous estes vne mer d'infinie liberalité & clemence , pourquoy retardez-vous par ire & desdain vostre misericorde

sericorde enuers moy ? Pourquoy aurons plus de puissance & de force mes iniquitez, que vostre bonté ? Pourquoy mes fautes auront-elles plus de credit & autorité à me condamner, que vostre bonté à me sauuer ? Si vous cherchez contrition & penitence, ie me repens tellement de vous auoir offensé, que ie desirerois plustost mille fois estre mort, que de commettre vne seule offense à l'encontre de vous. Si vous demandez satisfaction ; voyez icy ce mien corps miserable, executez dessus luy toute la fureur de vostre ire, moyennant que vous ne me deniez vostre amour.

Ie ne vous demande, Seigneur, or ny argent, ny aucune chose créée, car toutes ensemble ne me sçauroient contenter sans vous, & tout m'est pauureté, hors vostre amour ie veux amour, ie cherche amour, ie vous demande amour, ie souspire pour vostre amour : donnez-moy vostre amour, & ie seray satisfait. Pour quelle occasion, Seigneur, me differez-vous tant cette grace ? Pourquoy prenez-vous plaisir à me voir affliger & tourmenter nuit & iour, sans me vouloir secourir ? Iusqu'à quand, Seigneur, me voulez-vous ainsi mettre en oubly ? est-ce pour tousiours ? Iusques à quād destour-

384 PARADIS DES PRIERES,
nez-vous vostre face de moy ? Iusques à
quand destournez-vous vostre face de
moy ? Iusques à quand mon ame ira-elle
flottant en la mer de si angoisseux desirs ?

Regardez-moy , Seigneur , en pitié &
misericorde. Ie ne vous demande cette ample
& abondante part & portion qui se dō-
ne aux enfans : mais ie me contenteray d'v-
ne seule petite miette tombante de vostre
table. Voyez-moy icy donc, Seigneur, me
presentant à vostre riche table, comme vn
pauvre chien affamé , où ie demeure de-
bout & fiché , vous regardant au visage, &
voyant comme vous mangez , & donnez à
manger à vos enfans de la viande de vo-
stre gloire. Voyez-moy icy changeant de
mille contenance & figures en mō cœur,
pour incliner le vostre, à ce qu'il ait de moy
misericorde.

Ie ne suis aucunement rassasié, Seigneur,
des choses de cette vie : ie n'aime que vous
seul, ie ne cherche que vous seul, & ne desi-
re que vostre regard , & vous requerray
toufiours vostre amour, chantant avec vo-
stre Prophete: Ie vous aimeray à toufiours,
ô Seigneur, ô ma force. Seigneur, mon fort
rampart , mon refuge , ma liberté. Vous
estes mon Dieu, ma defense, mon esperan-

ce: Le Seigneur est mon protecteur, & la tuition de mon salut: c'est celuy qui me recura. Loüant le Seigneur, ie l'inuoqueray, & il me sauuera de mes ennemis, luy qui vit & regne és siecles des siecles, Amen.

Quatriesme Oraison pour demander à Dieu son Amour.

SI entre toutes les choses qui nous attirent à l'amour, l'une des principales est la beauté: pourquoy ne vous dois-je point aimer, mon Seigneur, puis que vous estes la fontaine de toute beauté? Vous estes la beauté de l'Vniuers, puis que vous avez créé toutes les choses belles en leur estre: le Soleil & la Lune s'esmerueillent de vostre beauté, les Anges desirent de regarder vostre face: & en cela consiste toute la gloire & derniere felicité des esprits celestes.

Je vous dois pareillement aimer mō Seigneur, pour ce que vous estes la perfection de toutes les choses. Vous estes la loüange des Anges, le loyer des Saints, l'esperance des Patriarches, la lumiere des Prophetes, la resiouissance des Apostres, la coronne des Martyrs, la gloire des Confesseurs, la pureté des Vierges, & le salut de tous les

386 PARADIS DES PRIERES,
esleuz. Tous les esprits bien-heureux vous
loüent, les colonnes du Ciel vous redou-
tent, & toutes les creatures du monde vous
portent reuerence & honneur.

Vous remplissez toutes les choses, sans
vous estendre, & passez par chacune d'icel-
les sans vous mouuoir, & vous tenez au de-
dans de toutes, sans vous restreindre. Vous
les auez creées sans necessité, & les gou-
vernez sans trauail, & les chāgez sans vous
changer. Vous seul iugez sans erreur, &
chastiez sans passion: & faiçtes vne infinité
de graces sans amoindrir en façon quelcō-
que vostre thresor: car si la mer espanchant
tant d'eaux emmy la terre ne s'amoindrit
point, bien qu'elle ne soit pas infinie: com-
ment s'amoindriront vos thresors qui sont
infinis? Vous seul estes tres-suffisant & à
vous & à toutes les choses. Et partant ce-
luy qui ne possède que vous seulement, a
tout, & celuy qui ne vous possède point, ja-
çoit qu'il ait tout le reste, ne possède tou-
tesfois rien, ains est pauvre, miserable &
mandiant.

Toutes ces perfectiones & loüanges,
mon Dieu, avec vne infinité d'autres se
trouuent en vous, lesquelles nostre enten-
dement ne peut comprendre, ny langue

mortelle expliquer ; car la plus grande loüange que nostre bassesse puisse annoncer de vous , est de dire que vous estes du tout incomprehensible , & que vous deuez estre reueré avec licence (comme dict vn Philosophe) donnant cette souueraine gloire à vostre substance, disant qu'elle seule est infinie en essence, en toute-puissance, en sapience & bonté, en beauté, & en tout le reste : & comme elle est infinie en toutes choses, aussi ne peut-elle pas estre comprise par nostre entendement , & beaucoup moins expliquée par nostre langue mortelle.

Vous estes plus haut que tout ce qu'on se peut imaginer & figurer, & estes plus haut que tout ce qu'il est possible d'entendre & contempler : & encor estes plus haut & digne que tout ce qu'il est possible d'aimer, posseder, & desirer : Car l'immensité de vostre grandeur surpasse toutes choses : de maniere que vous estes incomprehensible à toutes les creatures, pour autant que ny le sens humain, ny l'imagination, ny l'opinion, ny la raison, ny aucune vertu créée, ne vous peut comprendre. Et puis que vostre immensité surpasse tout nostre sens & entendement : celle-cy, Seigneur, sera la

388 PARADIS DES PRIERES,
meilleure de nos confessions, & la plus
grande de vos louanges: à sçauoir que vous
estes incomprehensible.

Si vous estes le desir de toutes les choses:
en quelle maniere refteray-ie seul parmy
elles, sans vous desirer: ô bien vniuersel du
monde, ô derniere fin, pour laquelle mon
ame a esté créée: permettez-vous vne tel-
le monstruosité au monde, que ie sois seul
celuy qui ne vous aimera, & ne vous desi-
rera point? ô mon Dieu Createur de tou-
tes choses, pourquoy ne vous aimeray-ie
pas de toutes les sortes d'amour?

Vous estes mon vray Dieu, mon Pere
sainct, mon Seigneur pitoyable, mon
grand Roy, mon bel amy, mon pain vif,
mon Prestre eternal, mon pur sacrifice, ma
vraye lumiere, ma sainte douceur, ma cer-
taine sapience, ma pure simplicité, mon ri-
che heritage, ma grande misericorde, ma
redemption entiere, mon esperance ferme,
ma parfaite charité, ma vie eternelle, ma
ioye & beatitude infinie. Si donc mō Dieu,
vous estes toutes ces choses: pourquoy ne
vous aimeray-ie pas du profond de mes en-
trailles, & de tout mon cœur?

O mon allegresse & repos, ô ma ioye &
delectation; ie vous supplie, mō Createur,

qu'il vous plaise eslargir mon cœur en vostre amour, afin que toutes mes forces & sens espreuent & connoissent cōbien c'est vne douce chose de se fondre entierement, nager & se submerger sous les ondes de vostre amour: Le Prophete dit qu'il a veu vn fleuve de feu allumé & furieux, qui sortoit de la face de Dieu: ô mon Seigneur, faites-moy nager en ce fleuve; mettez-moy au milieu de son cours, afin qu'il m'emporte avec soy, si que ie n'apparoisse plus au monde, ains reste du tout consommé & transformé en ce feu d'amour. Que celle-cy soit ma demande, cettuy-cy soit mon estude continuel, que i'employe les iours à cecy, que ie pense la nuit à cecy; & que ie ne voye point de mesyeux chose quelconque, qui ne me ferue de semonneur & d'aiguillon à vostre amour. Faites que ie viue en cette pensée, que celle-cy soit la derniere parole avec laquelle ie puisse finir ma vie, puis que ceux qui meurent en vous sont bien-heureux, & celuy meurt en vous qui vous aime durant sa vie, Amen.

*Cinquiesme Oraison pour demander l'Amour
de Dieu.*

FAictes que ie vous aime, mon Seigneur & mon Createur, à raison de vostre tres-noble & tres-parfait estre, lequel est si propre & essentiel en vous, qu'il n'est pas possible que cela puisse entrer en l'entendement de celuy qui scait quelle chose est Dieu, que vous ne soyez. Car si vous n'estiez, chose quelconque ne seroit, attendu que toutes les choses qui ont estre, dependent de vous. Mais vostre estre ne dépend point d'aucun, sinon de vous-mesme; pour ce que ce n'est pas vn estre participé, ains propre: de maniere qu'il n'est pas limité, ny mesuré, ains vniuersel & infiny, puis que seul il comprend tout estre.

Le vous dois encor aimer, mon Seigneur, puis que seul vous estes l'ordre & la reigle de toutes choses (comme dit vn Philosophe) & estes la mesure de toutes les substances: pour ce que chacune, quand plus elle s'approche de vous, tant plus aussi elle participe de vous, & tant plus elle est noble & plus parfaite en son estre. Parmy lesquelles choses qui n'ont sinon l'estre, se tiennent au plus bas lieu, comme sont les

Elemens : & vn peu plus auant celles qui ont vie, comme sont les plantes : & plus auant celles qui ont sentiment, comme les animaux : & plus auant encor celles qui ont entendement & sapience, comme sont les hommes : & par dessus tous ceux-cy, ceux-là qui sont en grace & en charité ; car ils sont plus proches de vous, & participent plus de vostre bonté, puis que comme dit vostre Euangeliste : Dieu est charité, & qui demeure en charité, demeure en Dieu, & Dieu en luy.

Je vous dois encor aimer, puis que seul vous estes la cause tres-vniuerselle de toutes choses : ce que mesme les Philosophes ont conneu par raison naturelle, voyant qu'il estoit impossible de proceder sans fin és causes ordonnées essentiellement : mais qu'il falloit que toutes eussent finalement vn seul but, & vinssent à finir en vne premiere cause, d'où elles fussent procedées, & de laquelle elles fussent meues : & c'est comme la premiere rouë d'vn horloge qui meut toutes les autres, ou comme le chef principal d'vne Republique, duquel toutes choses dépendent : car vous estes tel en cette grande Republique du Monde.

Je vous dois encor aimer, mō Seigneur,

392 PARADIS DES PRIERES,
puis que vous estes la vie bien-heureuse, &
l'autheur de toute chose qui a vie. Car si
c'est vne chose meilleure d'auoir la vie,
qu'estre sans icelle, & vous estes le meilleur
de toutes les choses, il s'ensuit necessaire-
ment que vous auez vie: & si la vie raison-
nable est meilleure que l'irraisonnable: il
s'ensuit que vostre vie est raisonnable & in-
tellectuelle par dessus tout intellect. Et si
la vie bien-heureuse est meilleure que la
malheureuse: il s'ensuit que vostre vie est
bien heureuse: & pour autant que vous
estes le plus grand de toutes les choses, il
s'ensuit que vostre vie est tres-heureuse par
dessus toutes les autres vies.

Faites donc, mon Seigneur, que ie vous
aime, puis que vous estes la fontaine de la
felicité, & de la vie: de qui toutes les choses
qui viuent ont receu la vie, en qui nous vi-
uons, nous mouuons & sommes: & par qui
toutes les choses viuent heureusement: Je
vous dois encor aimer, mon Seigneur, puis
que vous estes le tres-puissant mainteneur,
conseruateur, & nourricier de toutes les
creatures, lesquelles n'ayans pas peu venir
du non estre à l'estre sans vous; aussi ne
pourroient-elles pas se conseruer en cét
estre-là sans vous. Vous estes celuy qui de-

meurez assis par dessus tous les throsnes des Cieux : & de là vostre veüe penetrer iusques aux abysses.

Je suis encore obligé de vous aimer, mon Seigneur, pour ce que vous estes la fontaine de sapience, de laquelle procedent tous les thresors de sapience & science. Car tout ainsi comme ce Soleil vniuersel est le Dan. 5. principe & cause de toute la lumiere du monde, & par le moyen d'iceluy nous voyons tout ce qu'il est impossible de voir : ainsi vous estes vne lumiere inuisible, & estes le Soleil de nostre entendement, duquel la lumiere d'iceluy deriue par le benefice & clarté de laquelle il entend tout ce qu'il entend.

Je vous dois donc aimer encor, pour ce que vous estes la bonté essentielle & infinie : car vous n'estes pas bon par qualité, mais par essence : de maniere que vostre mesme nature, est la bonté mesme, laquelle on connoist tres-bien en vos oeures, pour ce qu'une chose est d'autant meilleure, qu'elle est plus communicatiue de soy-mesme, comme est le Soleil entre les creatures corporelles, lequel communique sa lumiere si liberalement, & espend sa chaleur par tout le monde.

Mais qui pourroit-on trouuer, soit au Ciel, soit en la terre, qui soit si communicatif, & si liberal, comme vous estes, mon Seigneur? Quelle creature se trouuera, pour petite qu'elle soit, qui ne participe quelque chose de vous, ains qui ne soit pleine de vos richesses, puis qu'aucunes d'icelles n'a autre patrimoine, ny autre estre, que celuy que vous luy auez donné?

Faiçtes doncques mon Seigneur, que ie vous aime, pour cette infinie bonté qui se trouue en vous, qui est la plus forte cause & occasion d'amour, de laquelle vient & procede tout nostre bien. Car tout ainsi comme c'est vne condition propre au Soleil d'illuminer, & au feu d'eschauffer, & à la neige de refroidir: tout de mesme, & beaucoup plus, c'est vne propriété de vostre bonté souueraine de faire tout bien, & de se communiquer. Or qui sera si fort ennemy de foy-mesme, que de n'aimer point cette bonté, de laquelle nous receuons tant de biens?

Certainement, Seigneur, nous accourons tous à vous, à raison de la tres-grande clemence & douceur qu'on raconte de vous; car vous ne mesprisez pas le pauvre, vous ne fuyez pas le pecheur, vous n'auçez

point dechassé le larron qui vous confessoit, ny la pechereffe qui se lamentoit, ny la Chananée qui vous appelloit, ny la femme adultere, ny l'Euangeliste, qui demeueroit au contoir, ny le Publicain qui prioit, ny le Disciple qui vous nia, ny le persecuteur de vostre Eglise, ny ceux qui vous crucifierent.

C'est pourquoy, Seigneur, nous courons apres vous à l'odeur de ces precieux vnguens; car il n'y a chose au monde plus suave: ny plus amiable, ny plus douce à appaiser que vous. Vous doncques estant non vne mer si grande, ains vn monde de tant de perfections & vertus: comment ne vous aimeray-ie point de tout mon cœur, & de toutes mes forces? Et si chacune de vos perfections pour estre infiny, ie merite d'estre aimée d'un amour infiny; de quel amour pourray-ie aimer celuy qui a vne infinité de perfection en soy?

Avec quelle langue vous louërây-je? avec quelles paroles annoncerây-je vostre grandeur? avec quelles entrailles aimerây-ie vostre bonté? On void la debte toute claire, & voit-on encore la pauureté du debteur: Je vous prie, mon Seigneur, qu'il vous plaise suppléer à mon défaut, & puis

396 PARADIS DES PRIERES,
que vous meritez d'estre tant aimé, & me
commandez si estroittement, que ie vous
aime : donnez-moy vn cœur neuf, avec le-
quel ie vous aime comme vous commādés;
puis qu'à vous seul est deu amour infiny,
perpetuelle loüange, eternelle gloire, sou-
ueraine puissance, regne perpetuel, & em-
pire sans fin, és siecles des siecles, Amen.

*Sixiesme Oraison pour demander l'Amour
de Nostre Seigneur.*

O Mon Dieu, ô ma misericorde, si tou-
tes les raisons & causes d'amour se
rencontrent en vous, & toutes en vn sou-
uerain degré de perfection : pourquoy ne
vous aimeray-je d'un parfait & souuerain
amour ? Vne seule deses occasions nous
fait bien souuent aimer precipiteusement
quelque creature, & desirer de mourir pour
elle. Si doncques toutes les occasions d'a-
mour sont coniointes en vous, Seigneur, &
toutes en vne perfection si grande, qui ne
s'embrasera, qui ne se precipitera, qui ne
desirera de souffrir mille morts pour vostre
amour?

Si l'on considere les benefices, nous ne
sommes redeuables à personne plus qu'à

vous, si l'amour, personne ne nous porte plus d'affection que vous : si le parentage, nostre ame n'a point de parentage avec quelque autre, plus grand qu'avecques vous ; si par apres l'on considere les perfections, qui est plus parfait que vous ? qui est meilleur, qui est plus beau, qui est plus benin, qui est plus noble, qui est plus sçauant, qui est plus puissant, qui est plus riche, & plus communicatif de soy-mesme, & de tous ses biens, que vous ?

Qu'est-ce donc qui empesche, Seigneur, que nostre cœur ne coure vers vous ? Quelle chaisne peut estre si forte, qu'elle nous tienne prins, afin que nous ne puissions pas nous approcher de vous ? Si c'est l'amour des choses de ce monde, veu que tout ce qui est en iceluy est comme la fleur du champ : comment est-il possible qu'une si fragile matiere retienne l'impetuosité de cette course vers vous ? Quoy, vne petite paille seroit-elle à l'adventure suffisante pour retenir en l'air vne pierre, quand elle descend & court vers son centre ? Comment donc permettez-vous, mon Dieu, qu'une paille si legere, comme sont toutes les choses de ce monde, soit suffisante pour retenir l'impetuosité de nostre course vers

398 PARADIS DES PRIERES,
vous, qui estes nostre derniere fin, & le centre de nos ames ?

Auec qui peut auoir mon ame vne plus grande ressemblance, qu'auec vous, puis qu'elle a esté faicte à vostre image & semblance ? A qui auray-je mon cœur mieux proportionné qu'à vous ? Entre quelles choses y a-il plus grande proportion & ressemblance qu'entre le vase & l'estuy qui fut fait pour luy ? Et puis que mon ame fut créée pour estre vn vase d'élection auquel vous habitassiez, Seigneur, d'où vient qu'il n'y a chose quelconque qui soit suffisante pour emplir ce vase, si ce n'est vous, auec qui est-ce qu'elle aura plus grande proportion & ressemblance qu'auec vous ?

Vostre nom, mon Seigneur, soit mille fois beny pour tousiours, puis que vous nous auez faits semblables à vous. Puissions-nous estre veritablement deux choses en vne, puissions-nous dire veritablement, auec l'Espouse sainte au Cantique : *Celuy que i'aime est en moy, & moy en luy* : Et bien que vous soyiez si haut, & nous si bas, cecy n'empesche point, ains augmente la cause de nostre amour. Car la ressemblance auec vne inegalité proportionnée est beaucoup plus aimable que celle qui est de toutes parts

parts egale. L'amour du pere enuers l'enfant, & de la femme enuers le mary, est plus grand que l'amour des freres, qui sont en toutes choses esgaux. Deux voix differentes, quand elles sont proportionnées, font vne plus douce harmonie, que quand elles sont vniformes, & d'un mesme son. Et par ainsi la proportion & ressemblance qui est entre vous & nos ames, estant si grande, cette inegalité proportionnée est cause de plus grand amour: car tant plus vne chose est imparfaicte, tant plus elle aime la parfaicte, pour receuoir d'elle sa perfection.

Au moyen dequoy, mon Seigneur, iagoit que vous soyez haut & environné de gloire, nostre bassesse pourtant ne vous perdra point de veü: car avec vostre lumiere nous vous verrons, vous qui estes la vraye lumiere, & bien que vous soyez tres-grand, vous n'estes pas moins bon que grand, & comme vostre grandeur vous rend tres-haut; ainsi vostre bonté vous redres-tres-humain, pour ne despriser pas les hommes.

Cecy donc estant vray, si toutes les causes & raisons que l'entendement humain peut comprendre, se rencontrent en vous,

400 PARADIS DES PRIERES,
mon Seigneur, & toutes en vn souuerain
degré de perfection: qu'est-ce à dire que
nostre volonté ne nous aime, tout autant
comme la raison luy dicte & luy fait enten-
dre que vous deuez estre aimé? Cette do-
leance & complainte prouient de ce com-
mun peché, pour lequel la nature humaine
reste si fort inclinée à soy-mesme, qu'elle
s'aime plus que toutes les autres choses, &
les ordonne & dispose toutes à soy. Par-
quoy; Seigneur, si vous ne guarissez la na-
ture avec la grace: & si vous ne faites escou-
ler en nos ames la vertu de charité, avec
l'assistance du saint Esprit, où elle se tient:
nous ne vous pourrons pas aimer avec cét
amour gratuit & supernaturel, avec lequel
vous meritez d'estre aimé.

Et puis que vous me commandez, Sei-
gneur, que ie vous aime avec vn tel amour,
(ce que ie ne puis pas faire sans vous) don-
nez-moy la grace de pouuoir accomplir
cette obligation. Accordez-moy que ie
vous aime, & si ce n'est tout autant que
vous meritez, (car personne ne peut faire
cecy que vous seul) que ce soit au moins
tout autant qu'il me sera possible; c'est à di-
re de toutes mes forces, & de tout mon
cœur: de sorte que toutes mes entrailles

bruslent, & s'addonnent à vostre amour.

Accordez-moy que ie vous aime d'un amour simple, qui esloigné de tout interest & profit particulier, ne desire rien plus que vous, d'un amour fort, qui ne refuse travail ny peine quelconque pour vous : d'un amour actif & diligent, qui s'occupe tousjours és choses de vostre seruice : d'un amour vnitif, qui ne cesse iamais de vous aimer, & qui iamais ne s'esloigne de vous : d'un amour incomparable, qui mesprise toutes les choses pour vous : d'un amour discret, qui n'excede pas vos loix par un zele & ferueur desmesurée : d'un amour bien ordonné, qui aime toutes les choses avec un amour proportionné, & vous sur tout : d'un amour pur & chaste, qui ne vous desire point sinon pour l'amour de vous-mesme : d'un amour doux & suau, qui ne trouue point faueur & goust en chose quelconque, sinon en vous : d'un amour plein de zele, qui ne desire rien plus que vostre gloire, & qui ne sente rien d'auantage que les deshonneurs faits à vostre saint Nom : & finalement d'un amour si violent, qu'il vienne à separer mon cœur de toutes les choses temporelles & terrestres, & le tiennent tousiours esleué à vous, iusques à ce que

402 PARADIS DES PRIERES,
ie passe de ce lieu d'exil en vostre gloire, où
par apres, voyant clairement la grandeur
de vostre beauté : ie puisse vous aimer eter-
nellement avec ces parfaits amateurs, qui
ne cessent iamais de vous aimer & louer :
Vous (dis-je) qui estes le Roy des Roys, le
Seigneur des Seigneurs, & le Dieu des
Dieux en Sion.

*Septiesme Oraison pour demander à nostre
Seigneur son Amour.*

Grena-
deen la
1. par-
tie des
Addi-
tions.

O Dieu souverain, tres-bon, tout-puif-
sant, tres-benin & misericordieux, &
neantmoins tres-iuste, tres-fort & incom-
prehensible, mon Seigneur ! Vous estes
celuy mon Dieu, qui surpassez en douceur
le miel, & le lait en blancheur : vous estes
plus clair & luisant que la lumiere, de plus
grand prix & excellence que les precieuses
marguerites, & que toute autre espec^e de
pierreries. O mon Dieu, les causes & tiltres
qui me peuvent attirer à vostre amour, &
me ravir totalement en vostre charité, sont
infinis & sans nombre: Car vous estes plus
Iob. 11. haut que le Ciel, plus profond que l'enfer,
de plus grande longueur que la terre, &
plus large que la mer, comme dit vostre

sainct Prophete. Qui est plus parfait que vous? qui est meilleur que vous? qui est plus beau, plus doux & benin, plus noble, plus puissant, plus sage, & plus riche que vous? Toutes ces choses sont en vous, mon Seigneur, pour toutes lesquelles vous devez à bon droit estre aimé; veu mesme que vous estes le souverain bien.

D'avantage, attendu que tout bien est aimable de soy-mesme, vn chacun aime toutesfois de plus grande affection son bien propre. Je vous aimeray donc, mon Seigneur, non seulement à raison que vous estes le souverain bien : mais aussi à cause que vous estes mon bien propre. Car lors que ie viens à considerer & calculer en moy-mesme, avec combien de tiltres, & par combien de manieres vous vous estes rendu mien, toutes mes entrailles se liquéfient, & suis contraint de m'escrier avec l'Espouse, & dire: *Mon bien-aymé est à moy,* Cant. 2
& moy à luy. Je voy donc bien maintenant, ô mon Dieu, que vous estes mon Createur, mon sanctificateur, & mon glorificateur; car vous estes l'estre de nature, l'estre de grace, & l'estre de gloire, qui est le plus haut estre de tous, pour lequel mon ame a esté créée par vostre infinie bonté. Et pour

ce que beaucoup d'autres choses estoient requises pour arriuer à vne fin si haute: vous les auez toutes apportées de chez vous, mon Seigneur, me secourant tous-jours en cette iournée. Car vous estes mon aide, mon gouuerneur, mon defenseur, mon tuteur, ma garde, mon support, mon excitateur, mon conseruateur, mon preseruateur: & finalement vous estes mon Dieu, mon Seigneur, mon salut, mon esperance, ma gloire, & mon tout.

Vous m'estes tout cecy, Seigneur, comme Dieu; mais comme homme vous auez encor beaucoup d'autres tiltres & offices, pour lesquels ie vous ay d'autres obligations: car la cheute de l'homme aduenue par le peché, ayant esté si grande, les blessures & les dommages qu'il a receus, & les biens qu'il a perdus estans en si grand nombre (ce qui a esté tout entierement réparé par vostre misericorde:) de là vient qu'il y a tant de noms qui vous appartiennent, à raison de tant d'offices & benefices que vous m'avez faits en cecy.

Car vous estes premierement mon reparateur; puis que vous auez restitué la nature humaine, qui estoit cheute par le peché. Vous estes mon deliureur, puis que par vo-

stre prison vous m'avez deliuré de la tyrannie du peché, de la mort, de l'enfer, & du diable mon ennemy capital. Vous estes encor mon Redempteur, pour ce que par le moyen du prix & rachat que vous avez payé pour moy : vous m'avez deliuré de la seruitude en laquelle mes pechez m'auoient mis.

Vous estes aussi mon Roy, pour ce que vous m'avez regy & gouverné avec vostre esprit, & avez combattu pour moy, & m'avez defendu de mes ennemis. Vous estes mon Prestre, pour ce que vous avez prié, & priez tousiours comme eternal Prestre, pour moy deuant la face de vostre Pere : Vous estes pareillement mon sacrifice ; puis que vous vous estes offert vous-mesme sur l'Autel de la Croix, afin de satisfaire pour mes pechez. Vous estes mon Aduocat, pour ce que le diable m'accusant & produisant vn roolle de mes fautes deuant vostre Pere, contre moy, vous aduocassates & plaidastes ma cause, y apportant du vostre, ce qui defailloit à ma iustice.

D'auantage, vous estes mon mediateur ; car vous estes tout ensemble Dieu & homme, amy des hommes, comme vray homme, & amy tres-fauorisé de Dieu comme

406 PARADIS DES PRIERES,
vray fils de Dieu : de sorte que par ce moyē
vous vous entremettez parfaictement , &
sans estre suspect , entre Dieu & les hom-
mes. Vous estes mon Pasteur , pour ce que
vous païssez & guidez mon ame , comme
vne brebis de vostre troupeau. Vous estes
aussi ma viande; puis que vous-mesme estes
celuy qui vous donnez à moy pour ma
nourriture, en ce tres-diuin Sacrement de
l'Autel.

Vous estes mon Pere , & pere du siecle
aduenir ; puis que vous m'avez regeneré
avec tant de griefues douleurs en l'arbre de
la Croix , & m'avez donné vn estre tout
nouueau avec vostre esprit. Vous estes mon
chef , & chef commun de toute l'Eglise ;
puis que comme vray Chef vous influez
en icelle , & en tous ces membres la vertu,
la vie & le sentiment spirituel. Vous estes
encor mon vray Medecin , puis que vous
auez guarý les playes de mon ame , avec le
sang des vostres.

Vous estes mon Maistre , puis que vous
m'avez enseigné si parfaictement le che-
min du Ciel par la lumiere de vostre do-
ctrine. Vous estes mon exemple ; puis que
non seulement avec les paroles , mais beau-
coup plus avec les œuures , & avec les exem-

ples de vostre tres-saincte vie, vous me guidez en cette iournée. Vous estes mon effort & mon soulas; puis qu'il n'y a trauail, ny douleur si grande, que la consideration & memoire des vostres, ne fasse passer ioyeusement. Vous estes mon honneur & ma gloire; puis que vous faisant homme pour l'amour de moy: vous m'avez fait vostre frere, & compagnon de vostre mesme nature.


Vous estes finalement mon Sauueur, & tres-suffisant Sauueur; puis que vous avez operé tres-parfaitement au milieu de la terre, tout ce qui estoit requis pour mon salut: Car vous avez illuminé mon ignorance par vostre doctrine; avez renforcé ma foiblesse par vos exemples; avez enflâmé ma tepidité par vos benefices; avez informé mon ame par vos mysteres; avez enrichy ma pauureté par vos merites; avez guaray mes playes par vos Sacremens: avez payé mes coulpes par vos douleurs, & maintenant vous m'aidez au Ciel par vostre intercession. Et pour conclure ce propos, vous estes (comme dit l'Apostre) ma sapience, ma iustice, ma sanctification, ma redemption, & tout mon bien.


Comment sera-il possible, que ie n'aime

408 PARADIS DES PRIERES,
point vn Seigneur auquel ie suis obligé par
tant de tiltres & benefices? Si les hommes
à raison de l'amour qu'ils portent à eux-
mesmes, aiment toutes les choses qui sont
à eux: comment ne vous aimeray-je point
Seigneur: si ie veux que vous soyez mien,
& que ce soit par tant de tiltres, & occasiōs
si grandes? Et si pour chacun de ces tiltres,
ie vous dois tout ce cœur que i'ay, & beau-
coup d'avantage si ie les auois: qu'est-ce
que ie vous deuray pour tous ces tiltres
conioincts ensemble?

Quelle iniquité seroit-ce donc, de refu-
ser vn seul cœur que i'ay, estant redeuable
de tant de cœurs? Et si chacun de ses bene-
fices est vn aiguillon qui nous pousse à l'a-
mour, & vne sagette qui outreperce le
cœur: comment seray-je si froid parmy
tant d'attraiçts, & si fort insensible parmy
tant d'aiguillons & sagettes de cét amour?
C'est à vous, Seigneur, que ie me plains de
mon cœur, & presente cette requeste de-
uant vostre iugement contre luy: puis que
tant de tiltres & occasions de vous aimer
pleuuent sur luy, il respond si mal à ces
obligations. O cœur plus farouche que les
fers, plus inuincible que les pierres, plus
dur que le diamant, si par tels coups tu ne

te-brises: Puis-je donc vous aimer, Seigneur, avec tout mon cœur, avec toute mon ame, avec toutes mes forces, avec tout mon esprit, & avec tout ce qui est en moy: car si tout est vostre, & mesme par tant de tiltres, à quel autre amour faut-il qu'il soit employé, sinon au vostre? Et pour ce qu'aimer est vouloir bien à celuy qu'on aime, & vous Seigneur, vous estes si plein de biens, que ie ne puis pas vous desirer plus de bien que celuy que vous avez: ie veux mon Seigneur, que vous l'ayez: & par ainsi, ie vous rends graces pour vostre grande gloire: & avec cecy ie desire que toutes les creatures vous seruent, vous honorent, vous loient, & vous glorifient: & que le Ciel & la terre s'occupent en vos loüanges. Que ce soit tousiours mon desir, que ce soit ma viande, que ce soient mes delectations, que ie vous benisse en tout temps, & que vos loüanges soiēt tousiours en ma bouche, Amen.





CHAPITRE IX.

Auquel sont contenuës diuerſes
actions de graces des benefices
receus de Dieu.

PROLOGVE.

SI en l'ancienne Loy il eſt com-
mandé aux Iuiſ de rendre
ſoigneuſement graces, & re-
connoiſtre Dieu pour les bene-
fices communs, qu'ils auoient
receu de la main liberale & magnifique de no-
ſtre commun Createur: il eſt tres-juſte & plus
que raiſonnable, que nous ne demeurions in-
grats, pour des benefices plus rares & excellens
comme ſont ceux de la Creation, Conſernation,
Redemption, Vocation, & Preſernation du
mal, des Inſpirations diuines, des Sacremens,
de la Beatitude promiſe, & ainſi de toutes les
autres graces & bien-faits de noſtre Dieu: mais
nous deuons luy rendre toutes les humbles &

deuotes actions de graces qu'il nous sera possible, non seulement de bouche, comme faisoit le superbe Pharisien, mais aussi de cœur & d'esprit.

Reconnoissons par tout la magnificence, grandeur & liberalité de nostre bien-faïcteur, & la vilité de celuy qui reçoit le benefice : confessons tousiours le prix & la dignité du present, & pour iceluy presentons à Dieu vne affection ardente par foy, & vn desir d'annoncer par tout l'excellence de la diuine bonté. Toutes lesquelles choses pour pouuoir plus parfaictement estre obseruées par les ames deuotes : nous auons amassé de diuers opuscules spirituels du R. P. Grenade, ses actions de graces qui suyuent, desquelles on se pourra heureusement seruir.

PREMIERE ACTION DE GRACE,
pour le benefice de Creation.

IE vous rends graces, Seigneur Dieu Tout-puissant & tres-sage, & tres-magnifique Createur de toutes choses, de ce que vous m'avez créé, lors que ie n'estois rien, afin que ie fusse en estre: vous m'avez créé, non vne pierre, non vn serpent, non vn oyseau, non vne beste irraisonnable; mais vn homme faict à vostre image &

Prinse
de Gre-
nade au
1. sup-
plémēt
du Me-
morial.
Guide
des pe-
cheurs,
liure 1.

similitude: à sçauoir vne substance dotée d'intelligence, & de volonté arbitraire: à celle fin qu'ayant avec vous vne certaine similitude d'essence, de viure & d'operer; ie fusse vne image & modelle de vostre beauté & excellence infinie.

Or de peur qu'une tant noble & excellente creature ne retournast incontinent au neant, dont elle auoit esté prise, & par ainsi vint dès aussi-tost à perir: vous m'avez créé immortelle, & afin que cette gloire ne fust point transitoire, vous m'avez donné perpetuité en l'estre, à ce que par ce moyen ie fusse perpetuellement bien-heureux & capable de vostre immense eternité. De maniere que toutes les autres creatures ne font que donner vne vie au monde, quand elles naissent & commencent dès lors à disparoistre petit à petit; mais de vostre grace: ie suis venu de non estre à l'estre pour ne retourner iamais à non estre, ains tousiours posséder vne vie perdurable.

Mais tout cela vous a semblé peu de chose, Seigneur, si vous ne me donniez vne ame si precieuse & si noble, qu'à grand peine peut-elle ceder en excellence & dignité à la noblesse des Anges. Car comme ils

n'ont autre viande & nourriture que vous : ainsi mon ame ne peut estre contente, sinon de vostre immense Majesté ; car vous l'avez créée d'une telle nature & capacité, que les Cieux, la terre, & tout ce qui est contenu en iceux, ne la peuvent saouler.

Considere donc, ô mon ame, & connois quelle tu es, & pour quel usage tu as esté créée : regarde quelles choses tu dois chercher, & quelles sont les viandes dont tu te dois nourrir & rassasier. Dieu seul te peut contenter, ô mon ame, Dieu seul te peut rassasier ; toutes les autres choses te peuvent bien occuper & emplir ; mais elles ne te peuvent donner contentement & satieté parfaite. Cherche donc ce Seigneur, & t'efforce de le trouver : c'est luy qui est ton espoux, qui est le repos & accomplissement de tes desirs : comme aussi semblablement il est ton seul but & ta dernière fin.

Reconnois maintenant, ô mon ame, reconnois ta dignité, voy quelle tu as esté créée. Le Roy de la beauté duquel le Soleil & la Lune s'esmerueillent, la Majesté duquel les Cieux & la terre reuerent, de la Sapience duquel les cœurs des Anges

414 PARADIS DES PRIERES,
font illuminez, par la bonté duquel l'assemblée de tous les bien-heureux est maintenue & rassasiée: Ce Roy, ô ame qui t'a créé, veut demeurer avec toy, comme en son siege, & comme en son saint Temple: il veut loger dans ton sein, & dans le cabinet de ton cœur, il desire visiter & remplir tous les coings de la capacité & grandeur de ton ame; puis que luy seul le peut entierement contenter & remplir. Appreste toy donc, & orne toy, leue toy mon ame, leue toy, & va au deuant d'un tel hôte, qui se vient loger chez toy; fais-le entrer, & avec toute allegresse l'introduis en ta maison, & d'une extreme amour & deuotion, dis: Celuy qui m'a créé, s'est reposé dans mon tabernacle.

Seigneur mon Dieu, quand ie viens à regarder cette dignité de mon ame: ie cesse d'admirer & de m'esmerveiller de ce que vostre fils tout enyvré de l'amour d'icelle, delaisant le Ciel, & descendant de vostre sein paternel, n'a point eu à contre-cœur le ventre virginal de la bien-heureuse Vierge Marie, de ce que par l'espace de trente trois ans, il l'a cherché avec tant de peines & traux, de ce qu'il a donné son ame pour icelle, & avec la rançon de son sang tres-precieux

precieux l'a deliurée & rachetée de la servitude & captiuité, en laquelle elle estoit tyranniquement detenuë. Mais ie m'esmerueille bien plustost de mon ingratitude, de mon insensibilité & bestise, qui aime mieux de rechef liurer cette mienne ame rachetée avec vn si grand & incomprehensible thresor, & la prostituer pour choses si viles aux diables, & aime mieux commettre fornication avec ses bestes & monstres horribles, que de la faire reposer doucement entre les bras de mon Redempteur & espoux, qui est le plus beau, & le plus gracieux de tous les enfans des hommes, les douces mammelles duquel surpassent en douceur le miel, le vin en suauité, & en bonne odeur les plus doux flairans parfums, le nom duquel est comme vne huile aromatique espanduë, qui rend vne senteur & fragrance admirable.

D'autre costé, quand ie viens à tourner mes yeux, & à considerer toute la fabrique & edifice sumptueux de ce mien corps que vous m'avez donné, ie reconnois en iceluy autant de benefices comme il y a de membres & parties, autant de graces & bienfaits, comme il y a de sens, de veines, de nerfs & arteres, & autant d'os, muscles &

416 PARADIS DES PRIERES,
iointures qui se trouuent en iceluy. Toutes lesquelles choses hautement preschent & annoncent vostre admirable sapience & bonté. En laquelle douce harmonie & accord si ie voulois employer ma consideration, & philosopher continuellement, ie n'aurois iamais faute de sujet & de matiere tres-ample pour vous louer & remercier; ie ne vous pourrois iamais rendre les actions de graces dignes pour tant de beneficés, iamais ne seroit en ma puissance de satisfaire à tant d'obligations: lesquelles sont assez conuës & entenduës de ceux qui par quelque fortune ou meschef sont priuez de telle grace, destituez de la fureur & de l'usage de leurs membres, ou qui endurent quelque dure affection en leurs corps vitiez & offencez.

Accomplissez en moy, Seigneur, ce que vous y auez commencé: ne mesprisez pas l'œuvre de vos mains. Baillez-moy ce qui me defaut, parce que vous estes mon Createur & mon Dieu: vous estes ma vie, mon salut, ma viande & nourriture mes richesses, ma gloire, mon honneur, ma paix, & generalement vous estes tout mon bien. Sans vous toute abondance m'est pauvrete & indigence: sans vous ie meurs, & re-

tourne à mon neant, si vous ne me donnez la vraye & bien-heureuse vie, qui n'est autre que vous-mesmes, qui vivez & regnez Dieu eternal à iamais, en tous les siecles des siecles, Amen.

Dixiesme action de grace, pour le benefice de la conseruation corporelle.

IE vous rends graces, ô mon Dieu & Seigneur souuerain tout-puissant, tres-iuste & tres-misericordieux, non seulement à cause que vous m'avez créé & produit en estre, lors que ie n'estois pas; mais aussi à raison que vous m'avez conserué, depuis que i'ay esté créé de rien, de peur que ie ne retournasse au mesme neant: pour cela donc vous m'avez conserué, & me conseruez encores tous les iours. Je confesse & croy indubitablement que l'un & l'autre est œuvre de vos mains: car si vos mains se fermoient tant soit peu, & si vos yeux se destournoiēt de dessus moy vn seul moment de temps, & vn seul clein d'œil, faudroit necessairement que ie retournasse au mesme lieu, d'où vous m'avez créé. Tout autant donc que ma vie a eu, a encores maintenant, & aura par cy apres de momens & instans, ce sont autant de benefices & singulieres parties de ce grand & incomprehensible benefice.

Je vous rends graces, ô Pere pitoyable, de ce que vous m'avez conserué par vne maniere du tout admirable, dans l'estroite prison du ventre de ma mere, depuis le iour de ma conception, iusques au iour de ma naissance: de peur que ie ne fusse suffoqué és entrailles maternelles, ou que ie ne vinssé naistre deuant le temps, comme vn auorton & fruiët non encore meur, ou estranglé à la sortie de cette maison tant estroite, ou que par quelque autre moyen ie fusse interessé & produit en ce monde priué de la vie, & sans pouuoir receuoir la grace du saint Sacrement de Baptême.

Je vous remercie, de ce que ie n'ay prins ma naissance entre les Barbares & Idolatres, qui adorent le bois & les pierres, non entre les heretiques qui blasphemement vostre Nom tres-sainct, & les Sacremens par vous instituez en vostre Eglise: mais entre les Catholiques, qui vous reuerent d'une vraye & sincere foy, qui vous prient & inuoquent deuotement en toutes leurs necessitez.

Je vous rends graces, ô mon Seigneur, de ce que vous m'avez conserué, viuant en ce monde remply de lacs & dangers, de toute infortune & mort subite: Cependant

que ie vis, & conuerse en ce monde, tant de milliers d'hommes ont esté submergez en la mer, bruslez du feu, tuez en guerre, esgorgez des brigands, deschirez par les bestes cruelles, engloutis de la terre, peris de faim, estoufez de soif, gelez de froid, rostis de trop grande chaleur, empoisonnez de venim, estranglez & mis à mort par quelque façon estrange & soudaine. Durant ce temps mesme, plusieurs sont deuenus aueugles, boiteux, enragez, furibonds, demoniacles, lunatiques, ou affligez du mal caduc, la vie desquels est beaucoup plus cruelle & miserable que la mort: & cependant Seigneur, vostre prouidence paternelle m'a preserué de tous ces maux & dangers: i'aoit que rien ne leur est arriué, qui ne peust tomber pareillement sur moy, fils premier d'Adam, créé de la mesme masse de corruption, conceu & engendré au mesme peché originel, si n'eust esté que de vostre grace me conseruez.

De tout cecy donc ie suis grandement obligé enuers vous, & confesse que i'ay receu tout cela de vostre liberalité: Si mon Roy temporel ayant dix prisonniers coupables d'un mesme crime & forfait, en faisoit pendre & mourir neuf, & que de sa

pure gracieuseté il me laissast aller libre & sans punition, moy qui estois fujet selon les Loix, aux mesmes tourmens & supplices: quelles actions de graces luy rendrois-je pour vn tel & si grand benefice? Or vous auez vsé de cette mesme faueur en mon endroit, non vne seule fois, mais vous recommencez tous les iours, & à toutes heures & momens. Que vous rendray-je donc mō Seigneur, pour toutes ces choses? Quelles loüanges vous chanteray-je? Quelles actions de graces vous pourray-je donner? Je diray avec le Prophete: *Cela vient de la grace du Seigneur, de sa pure bonté & misericorde, que nous n'auons pas esté consummez, pour autant que ses misérations ne nous ont encores manqué & defailli.*

Outre ce, vous nous auez baillé vn corps necessiteux, & qui a besoin de plusieurs choses, desquelles s'il est priué, il se corrompt facilement & perit: mais vous auez bien pourueu à tout cela par vostre singuliere prouidence, à ce que tout nous fust departy en nostre necessité. Car tout ainsi que vous nous auez créé pour vous-mesmes, ainsi auez-vous créé toutes choses pour l'amour de nous, & pour nostre vtilité; vous auez créé pour nostre seruice, tout

ce qui est en la terre, és eaux, en l'air, au feu aux spheres celestes, & mesmes tout ce qui est de créé és Cieux: de sorte que toutes les creatures sont nos ministres & vassaux. Car vous avez constitué l'homme sur toutes les œuures de vos mains, ô Seigneur, vous avez assubiecty toutes ces choses dessous ses pieds. Il n'y a rien en toute la terre, en la mer, & parmy l'air: rien ne vit, ne se peut mouuoir, qui ne soit pour ma nourriture, ou pour me recréer, ou pour me medeciner: de sorte que tout ce monde inferieur n'est autre chose qu'un beau & plaisant verger, & qu'une boutique bien garnie de toutes sortes de drogues & medicaments, pour mon vtilité & particulier seruice.

Si ie veux esleuer mes yeux plus haut par dessus ce monde elementaire, combien y a-il de choses grandes & admirables, que vous avez faites pour moy, mon tres-liberal Seigneur? La lune pour qui est-ce qu'elle esclaire de nuict; pour qui est-ce que le Soleil eschauffe; pour qui est-ce que les estoilles luisent, sinon pour moy? Pour quelle vtilité est-ce que tous les astres enuoyent leurs influences sur les choses basses, sinon pour la mienne? Que si ie

monte encores ie pourray voir , comme vous auez creé les esprits Angeliques , lesquels vous auez deputé pour nostre seruice, afin que par leur aide & secours, ie fusse defendu contre tous mes ennemis visibles & inuisibles, afin qu'ils vous presentēt mes oraisons , & que finalement ils reçoient mon ame sortant de ce corps mortel , pour la porter en vostre diuine presence.

Leue-toy maintenant , ô mon ame , & fais vn denombrement , si faire tu le peux, de tous ces benefices particuliers , par lesquels Dieu ne cesse d'aller apres toy , iacoit que tu peches contre luy par tes continuelles offenses : par tant de moyens il s'efforce de t'attirer à soy. Toutes & chacune de ces choses sont autant de voix pour magnifier & loüer ce tres-liberal bien-faicteur : & mesme elles t'inuitent à ce faire. Pourquoi n'aimeras-tu pas ce Seigneur ? Pourquoi ne luy feras-tu humble seruice ? pour quelle occasion ne luy rendras-tu actions de graces ? pourquoi est-ce que tu n'emploieras & le temps & les forces qu'il te donne pour le loüer , veu mesme qu'il est tousiours aimé, seruy, loüé, & remercié par toutes ses creatures ?

O Seigneur, mon Dieu, ie desire de tout

mon cœur vous rendre graces : toutes les entrailles de mon ame souhaitent tres-affectueusement vous louer , & s'occuper en vos diuines loüanges : mais vne chose me retarde & donne empeschement ; c'est que ie ne puis rien trouuer en moy pour ce faire : & aussi pour raison que la loüange n'est point belle & bien-seante , & moins encores agreable à vostre tres-pure Majesté , en la bouche sale & polluë du pauvre pecheur. Mais que vous auez créé toutes choses pour mon vſage & pour mon seruice. J'appelleray toutes les creatures , à celle fin qu'avec moy elles vous louënt nostre commun Createur & Seigneur, ie les inuiteray donc en cette sorte.

Vous toutes les creatures , du Seigneur, benissez le Seigneur , louëz-le , & le surhauffez en tous les ſiecles. Anges & Archangès, vertus, dominations, principautez, puissances & throsnes bien-heureux : Cherubins & Seraphins qui bruslez dans les viues flammes de l'amour de vostre Createur, benissez le Seigneur : louëz-le, & l'exaltez en tous les ſiecles : Apostres & Euangelistes fondateurs de l'Eglise, & toute l'armée victorieuse & inuincible des Martyrs, benissez le Seigneur : louëz-le &

424 PARADIS DES PRIERES,
l'exaltez en tous les siecles. Bien-heureux
Confesseurs & Docteurs de l'Eglise, Vier-
ges glorieuses & continentes, & vous tous
les Saints & Esleuz de Dieu benissez le
Seigneur: loüez-le & l'exaltez en tous les
siecles. Cieux, Soleil, Lune, estoilles, eaux
qui estes par dessus les Cieux, donnez be-
nediction au Seigneur. Que la terre, que
les montagnes & vallons donnent loüan-
ge au Seigneur: & toutes sortes de se-
mences qui germez dans la terre, be-
nissez le Seigneur. Sources & fontaines,
fleuves & mers, & tout ce qui est viuant
dans les eaux, donnez benediction au Sei-
gneur. Oyseaux de l'air, bestes & reptiles
de la terre, benissez le Seigneur: & vous
enfans des hommes, Prestres & Ministres
de Dieu viuant, esprits & ames des iustes,
pf. 102. donnez loüange au Seigneur. Vous tous
humbles de cœur, Religieux & ames de-
uotes, benissez le Seigneur. Et toy, ô mon
ame, loüe, benis & donne gloire eternelle-
ment au Seigneur, que iamais sa loüange
ne prenne fin dans ta bouche: que tous mes
membres benissent le Seigneur mainte-
nant, & à tousiours és siecles des siecles,
Amen.

*Troisiesme action de grace pour le benefice
ineffable de nostre Redemption.*

IE rends graces de bouche & de cœur, & Grena-
de en la
1. partie
des ad-
ditions
du Me-
morial.
de toutes les forces & puissances qui
sont en moy, à vostre infinie & incompre-
hensible misericorde, ô mon Seigneur &
mon Dieu, de ce que vous n'avez permis
& voulu que ie fusse à iamais & eternelle-
ment separé de vous comme l'Ange su-
perbe & orgueilleux, moy qui auois esté
créé à vostre image & semblance, qui estois
tombé & perdu en la cheute & peché de
nos prremiers parens : mais par vostre in-
comprehensible & ineffable bonté m'a-
uez absous & racheté. Seigneur, à raison
que vous m'avez fait & créé, ie vous suis
redevable de moy-mesme : mais entant
que vous m'avez racheté & payé ma ran-
çon ; ie vous deuerois beaucoup plus que
moy-mesme, si i'auois quelque chose plus
que moy : car il ne m'eust de rien seruy nai-
stre au monde, si ce n'eust esté qu'il m'estoit
beaucoup vtile & profitable d'estre ra-
cheté.

Or encores que vous eussiez bien d'au-
tres moyens de nous racheter sans mourir,
vous avez toutesfois voulu faire cette re-

426 PARADIS DES PRIERES,
demption, & nous donner ce secours en
mourant : à celle fin de nous manifester &
faire voir la grandeur de vostre amour, & la
force de vostre dilection ; car vous nous
eussiez moins aimé, si vous n'eussiez pour
vn temps supporté ce que vous vouliez
oster & desraciner de nous. Et d'autant
plus deuez vous estre dignement loué &
honoré de nous, de tant plus que les choses
que vous avez endurées pour nous, estoient
indignes de vous : Car qui estes-vous qui
endurez ? quelles & combien grandes les
peines que vous souffrez ? & pourquoy est-
ce que vous les endurez ? Dictes-le moy,
mon Seigneur, pour & à celle fin que ie
puisse priser & balancer ce benefice incom-
parable, & cét oeuvre admirable selon son
prix & sa iuste valeur.

Que diray-je donc qui vous estes, ô mon
Dieu ? ie diray ce que vous dittes vous-mes-
mes à vn Prophete : *Ie suis celuy qui suis.*
Vous estes vn estre infiny, qui ne procedez
d'aucun, sinon de vous-mesme, & hors de
vous, n'y a chose qui aye l'estre de foy ; mais
bien de vous qui estes ce principe & fon-
taine de l'estre. Toute chose qui est, dépend
comme d'un filet de vostre seule volonté.
Vous avez fait tout de rien avec vostre

Toute-puissance, & sans aucune aide conferuez le tout par vostre bonté: & reduiriez tout en rien s'il vous plaisoit avec vostre simple vouloir. Vous seul estes celuy qui estes, & tout ce qui est comparé avec vostre estre n'a point d'estre.

Vous estes seul bon sans defectuosité, sage sans erreur, puissant sans cōtradiction, liberal sans acception de personnes, iuste sans estre esmeu de passions, magnifique sans detrimēt ou dommage, & grand sans comparaison. Vostre beauté certes est si grande, que celuy qui vous pense loier suffisamment, obscurcit vostre gloire, & celuy qui se parangonne à vous perd la sienne.

Que diray-je de la grandeur de vostre Majesté? vous regardez la terre, & la faites trembler: vous touchez les montagnes, & les faites brusler; vous commandez à la mer, & faites esleuer ses ondes: vous appelez les estoilles, & elles obeïssent à vostre voix: les dominations & puissances angeliques vous adorent: les plus hauts Seraphins baissent deuant vous leurs aïlles, & se tiennent pour vermine contemptible. Que diray-je donc mon Dieu? Comment pourray-je dire qui vous estes? Vos

428 PARADIS DES PRIERES,
œuvres vous confessent, Seigneur, & vos
Saints vous obeïssent pour tousiours : les
Cieux annoncent vostre grandeur, & les
estailles vostre puissance : les fleurs des
champs vostre beauté, la terre vostre
prouidence : la mer & ses ondes vostre ma-
jesté. Vous auez créé toutes choses sans
aucune peine, gouvernez tout sans vous
ennuyer, le soustenez sans vous lasser, & le
possédez sans nécessité.

Or donc mon Roy, que vostre majesté
me donne licence maintenant d'oser ra-
conter, ou pour mieux dire, de pouuoir
sentir ce que vous auez enduré pour moy
estant tel que vous estes. Et cependant
que ie le raconteray, que tous les chœurs
des Anges se tiennent agenouillez deuant
vous, vous remerciant de tout ce que vous
auez fait pour nous : vous qui estes si grand
& si admirable : vous vous estes abbaissé
de cette souveraine hauteur de vostre gloi-
re, pour venir en cette vallée de larmes
en forme d'homme pecheur, où vous
auez enduré faim, soif, froid, lassitude,
persecution, douleur, & vne pauvreté si
grande, que les renards ayans leurs ta-
nieres, & les oiseaux de l'air leurs nids,
vous ô richesse du Ciel, n'avez pas eu

sur quoy pancher vostre teste. Vous naquistes en vne estable, à la compagnie des bestes : on vous mist dedans vne creche à faute de berceau : on vous marca le huitiesme iour de la marque des pecheurs : le monde commença soudain à vous persecuter : vous vous mistes en fuite vers les nations estrangeres, & cherchastes le silence de la nuit obscure. Pour cette fuite, l'innocence de l'aage ne vous excusa point des trauaux : le repos ne fut point donné à vn corps si delicat que le vostre : & en vn aage si tendre vostre enfance ne demeura point oisue.

Qui pourra, bon Iesus, expliquer les lassitudes & trauaux de vos voyages, vos veilles, vos oraisons, vos pitoyables larmes, vos ieusnes, vostre paureté, vostre faim, vos persecutions, & les iniures de tous vos aduersaires ? Ceux qui comme iuges se tenoient assis à la porte, parloient mal de vous, & vous trahissoient. Et ceux qui beuuoient le vin faisoient des bals & chansons sur vous. Finalement vostre vie fut telle, & tant aiguillonnée, que vous pouuez dire à iuste raison avec le Prophete : *Je suis pauvre & exercé en beaucoup de trauaux dès le commencement de ma creation.* Que sera-ce donc,

si nous conioignons les trauaux de la vie avec ceux de la mort & de la croix ? C'est là où la liberté fut prise, la liberté accusée, l'innocence battüe, la beauté souillée de crachats, la iustice condamnée, la gloire mocquée, & la vie morte & crucifiée.

Maintenant ie vous supplie, mon Roy, ma misericorde, qu'il vous plaise declarer & manifester l'occasion qui a esmeu vostre pitoyable cœur, & l'a vaincu, à souffrir des choses telles, pour des creatures si abiectes & si viles. Auiez-vous à l'auenture quelque interest à cecy, ou en attendiez-vous quelque plus grande gloire & beatitude que vous n'eussiez point ? Quel fruit pensiez vous receuoir d'une si chere semence ? O vraye grace, ô amour sans profit, ô pure & sincere bonté !

Quel besoin auez-vous, Seigneur tres-grand, du seruice des fourmis ? Quel fruit vous pouuoit apporter le salut des hōmes ? Vous ne seriez pas vray Dieu si vous pouuiez receuoir quelque augmentation. Vous auez dit ainsi à vn vostre amy : qui ne peut donner chose quelconque auant que ie luy aye rien donné ? Toutes les choses qui sont soubs le Ciel sont miennes. Auant (dit le Prophete) que les montagnes fussent , & que

que la terre fust fondée en sa rondeur, vous estiez Dieu. Qu'est-ce à dire, vous estiez Dieu? vous estiez vn estre infiny, vne beatitude accomplie, vn abyfme de tous biens, qui ne vous venoient pas des montagnes, ny de la terre, ny d'ailleurs que de vous-mesmes.

O mer Oceane de toutes les perfectiōs, ô abyfme d'infinie gloire. Que vous importoient nos miseres & nos douleurs? Qu'auiez-vous affaire de la colomne, des coups de foïet, & de soufflets, & de la Croix? A quel propos tāt d'iniures? à quel propos tant de douleurs par les entrailles, dit le Prophete, de la misericorde de nostre Dieu, par lesquelles vous vinstes à nous visiter, descendant d'en haut, ô entrailles amoureuses, ô entrailles qui estes vne mer de misericorde & amour? C'est donc par ces entrailles, & non point par necessité, ny pour quelque vtilité, que vous auez esté marry de nos erreurs, auez eu pitié de nostre seruitude, auez veu l'affliction de vostre peuple, & estes descendu, iusques à vous mettre parmy les buissons, les rosiers & les espines pour le deliurer. Non pas que nous le meritaissions, ou que nous fussions vos amis; mais seulement par les entrailles

de vostre compassion & pieté, il ne vous ennuye point de vous reuestir d'une chair qui descendoit de telle chair : le destroit de nostre petit corps ne vous fut point facheux, ny la bassesse de nostre nature, ny les miseres de nostre mortalité, aussi ne fut pas la duresse de la creche, ny la puantise de l'estable, ny les incommoditez du monde, ny mesme la mort de la Croix.

Or quelles graces vous rendrons-nous, Seigneur, pour ce benefice si grand? Avec quel amour aimerons-nous celuy qui nous a mis au deuant vn monstre de bonté si incomprehensible? Car comme est-il possible qu'on trouue au monde quelqu'un qui ne vous aime, & qui vienne à mettre en oubly tel benefice? Que plustost Seigneur, ie vienne à m'oublier moy-mesme qu'un benefice si grand. Que ces cloux avec lesquels vos innocentes mains furent percées, transpercent tousiours mon cœur. Ce change plein de pieté que vous avez faict, prenant dessus vous mes maux, & me donnant si liberalement de vos biens, ne sortira iamais hors de mon entendement. Et puis que durant tout le temps de vostre vie, vous avez desiré la croix en laquelle vous deuiez mourir pour moy, tout le temps

que ie viuray ie la tiendray deuant moy pour vous complaire ; iusques à tant que vous me transferiez en lieu de paix & d'assurance, où la mort n'a plus aucun pouuoir & dominatiō, où il n'y a plus de pleurs & gemissemens , ny aucune douleur. Où nous regnerons avec vous és siecles des siecles, Amen.

Quatriesme action de grace pour le benefice de vocation & iustification.

IE vous rends graces immortelles, mon Seigneur, & mon Dieu, mon secours, mon refuge, & mon Redempteur, qui m'avez appelé des tenebres en vostre lumiere admirable, afin que moy qui n'auois encores obtenu misericorde, ie fusse maintenant possesseur de cette vostre misericorde. Car tout le temps que ie demeurois en la terre d'oubliance, & comme citoyen habitois en la region de l'ombre de mort, quand mes voyes estoient du tout meschantes & déprauées : & que ie faisois tout au contraire de vostre volonté, comme estant vostre ennemy: alors vostre pitié m'a appelé, non seulement quand ie fuyois de vous ; mais aussi cette mesme pieté vostre a retenu & contraint celuy qui faisoit resistance. Alors

Grena-
de pre-
miere
partie
du sup-
plémēt.
1. Per. 1.
Osée 1.

434 PARADIS DES PRIERES,
vous m'avez donné vostre saint Esprit : &
m'avez adopté pour vostre enfant.

I'ay meschamment delaisié & mesprisé
la grace que vous m'auiez fait au Baptême,
i'ay rompu & deschiré la premiere robe
que vous m'auiez baillée, & à la façon de
l'enfant prodigue, i'ay perdu & dissipé tou-
te la substâce que de vostre grace vous m'a-
uiez donnée. I'ay pollué & profané le Tem-
ple saint que vous auiez edifié & sanctifié
en moy, y mettant les idoles de mes sales
plaisirs, & le souillant avec toute sorte de
peché & malice.

Vn temps fut, mon Sauueur, que i'estois
aussi aueugle & perdu comme si ie n'eusse
point eu de lóy, & comme si i'eusse creu
qu'il n'y auoit point de Dieu : de sorte que
ie ne me ressouuenois point de la mort, ny
du iugement, ny de l'autre vie : & pour ce
la lóy qui me gouernoit estoient mes ap-
petits & desirs, faisant tout ce que ie desi-
rois, & desirant tout ce que ie ne pouuois
pas acquerir.

Voila comme i'ay passé les ans de ma
vie, viuant en des tenebres si espaisées, que
(comme celles d'Egypte) on les pouuoit
toucher avec les mains. O combien tard ie
vous ay conneuë eternelle lumiere! ô com-

bien tard ay-je ouuert les yeux pour contempler vostre ancienne beauté ! Durant tout ce temps-là vous m'avez gardé , m'avez supporté, & m'avez attendu , ne voulant pas que la mort m'affaillist à l'impourueu. O hauteſſe de vos iugemens , & grandeur de vostre misericorde.

Combien d'autres ont esté surpris de la mort en ferueur de leurs pechez , lesquels dès cette heure - là seront tourmentez eternellement, & moy qui estois de ce nombre ay esté gardé par vostre misericorde, & reſerué iuſques à preſent. Que ſeroit-ce maintenant de moy, ſi en ce temps-là vous m'euffiez appellé à vostre iugement ? Quel conte euſſe-je peu rendre en tel eſtat ? O ma misericorde & ma redemption ; ie reconnois que ie vous ſuis tant obligé, à raiſon de cette traite ſi longue , (puis que par ce moyen ie ne ſuis pas du nombre des damnez) comme ſi i'euffe esté deſia parmy eux, & que vous m'en euſſiez retiré. Soit beniſte vostre patience, par laquelle ie vis, & beniſte ſoit vostre misericorde , qui m'a ſi long-temps gardé.

Vous ne me gardiez pas ſeulement quãd ie pechois, mais bien ſouuent (comme ſi i'euffe esté fait vostre amy) vous me viſi-

436 PARADIS DES PRIERES,
tiez, & m'appelliez à vous par des amiables
& secrettes inspirations, me remettant au
deuant des yeux la grandeur de mes fautes,
la briefueté de cette vie, l'éternité de l'autre,
la rigueur de vostre iustice, & la benignité
de vostre misericorde. Au milieu de mes
iniquitez vostre presence me venoit
assaillir: de maniere que quand ie faussois
encore ma foy, cherchant les delectations
mondaines, & desirois manger des oignons
d'Egypte, vous me faisiez sortir les larmes
des yeux avec ces morceaux. Mon office
estoit de vous offenser, & le vostre de m'ex-
citer: le chemin que ie tenois estoit pour
vous fuir, comme si ce ne m'eust esté rien
de vous perdre, & le vostre estoit de me
chercher, comme si c'eust esté beaucoup
pour vous de me trouuer.

Nous auons perseueré plusieurs iours en
cette sorte, vous en vos benefices, & moy
en mes malefices, vous vous montrant par
vos faits tel que vous estiez, & moy par les
miens aussi tel comme i'estois. C'estoient
tout autant de voix par lesquelles vous
m'appelliez doucement, & me vouliez at-
tirer vers vous: mais quand celles-cy ne
suffirent pas, vous fistes sonner vne grande
voix aux oreilles de mon ame, par laquelle

comme avec le rugissement du Lion , il vous pleut me ressusciter & mettre de mort à vie : c'est ceste voix pleine de pouuoir & magnificence que Dauid annonçoit en son Psalme ; car la puissance dont vous vſez pour faire cette œuvre , n'est pas moindre que la misericorde. Pour autant que comme c'est vne chose de tres-grande misericorde que pardonner les pechez , c'est vne chose aussi de tres-grand pouuoir que faire iustes les pecheurs.

Combien y a-il de benefices qui se font en ce benefice ? Icy se pardonnent les pechez , icy se donne la grace & la charité, avec toutes les vertus & dons du S. Esprit : Icy le pecheur se reconcilie avec Dieu , & d'ennemy est fait amy , & d'esclau du diable enfant de Dieu, & heritier de son Royaume : Icy l'enfant prodigue est receu en la maison du pere : Icy est donnée la meilleure robe , & l'anneau , & les chausses avec tous les autres ornemens de fils.

Et iacoit, ô mon Dieu , que ie ne puisse sçauoir pour le vray, si ie suis digne de haine ou d'amour , i'espere neantmoins en vous , & mets toute confiance en vostre bonté & misericorde : Pareillement ma conscience me donne bon tesmoignage,

438 PARADIS DES PRIERES,
que ie suis participant de cette grace de iustification : c'est pourquoy ie me reconnois grandement vostre debteur & obligé.

Et afin que ie ne sois trouué ingrat pour vn si grand bien ; ie vous en remercie infiniment, disant de cœur & de bouche : Vous soyez pour tousiours beny, Seigneur, donateur tres-liberal de tous biens, & encores de vous-mesmes, pour ce qu'estant tel que ie suis, & viuant comme on me voit viure, vous m'avez donné par vostre misericorde, l'esprit de vostre grace, & en iceluy vous m'avez donné vn maistre, vn nourricier, vn tuteur, gouuerneur, defenseur, consolateur, & tout bien : C'est vn signe d'adoption, ce sont les arres de mariage & de la vie eternelle : c'est l'auteur de la grace, par laquelle l'ame que vous receuez vostre espouse, est reuestuë de force & beauté, afin que par cette-cy elle plaise à vos yeux, & que par celle-là elle se rende terrible aux demons.

Auquel de vos benefices pourra donc estre parangonné cettuy-cy ? Le benefice de la creation fut grand, pour autant que par son moyen ie fus conduit du non estre à l'estre.

Mais celuy de la iustification est beaucoup plus grand, pour autant que par ce

moyen l'homme est retiré de l'estre de la coulpe à l'estre de la grace. En l'un, vous le faites estre homme; en l'autre, vous le faites estre diuin: car en l'un vous le faites fils de l'homme, & en l'autre fils de Dieu. Ce n'est pas seulement plus grande chose de iustifier l'homme, que de le créer; mais c'est encores plus que de créer les cieux & la terre de nouueau, pour ce que tout cecy est vn bien limité & finy; mais la grace de la iustification est infinie, entant qu'elle est ordonnée pour vn bien infiny.

Grand est le benefice que nous attendons de la glorification, par lequel l'homme est fait bien-heureux: mais celuy de la iustification n'est pas moins en son genre, puis que ce n'est pas moins de faire l'homme de pecheur iuste, que de iuste bien-heureux: veu qu'il y a plus grande distance du peché à la grace, que de la grace à la gloire.

Tres-grand est encores le benefice de nostre redemption. Mais que seruiroit à l'homme d'auoir esté racheté, s'il n'estoit iustifié? Ce benefice est la clef de tous les benefices, sans lequel tous les autres, non seulement ne nous aideroient en rien, mais encore viendroient à estre matiere de plus grande damnation.

Puis donc que ce benefice de la vocation est si grand : ie vous supplie, Seigneur, que vous me disiez quelle fut l'occasion pour laquelle vous fustes esmeu à me faire tant de bien ? Qu'avez-vous veu en moy qu'il vous plaise de me regarder ainsi d'un tel œil ? Il n'y auoit en moy chose quelconque qui fust sans peché. Ie ne vous connoissois point, ie ne vous aimois point, ie ne vous seruois point, & ne me ressouuenois point de vous : i'estois deuenu vn enfer de tenebres d'iniquité : En quoy donc avez-vous peu ficher ces yeux amateurs de la pureté pour me faire tant de bien ?

Ie ne puis faire, Seigneur, que ie ne demeure tout estonné & confus en moy-mesme, quand ie pense à cecy, pour ce que ie ne trouue point d'autre occasion que vostre seule bonté : mais quand avec cecy ie me ressouuiens de plusieurs autres compagnons que i'ay eu en mes vices, & comme nous tous estans meschans ; mais moy plus que tous les autres, vous avez laissé quelques-uns d'entr'eux, & m'avez prins, m'avez fait asseoir à vostre table, & m'avez donné à manger de cette manne cachée, que personne ne connoist, sinon ceux qui l'ont esprouuée : quand ie voy que tous ensemble,

eux & moy estans detenus en la prison d'Egypte; vous m'avez peut-estre tiré de là, afin que ie seruisse à vostre table royale avec le calice de la compunctiō , & auez condamné les autres à se tenir-là, pour repaistre de leur chair les Vautours infernaux.

Quand ie pense à cecy, ie reste si confus & hors de moy-mesme, que ie ne sçay comme vous louer, & ne sçay comme ie dois mettre fin à vous remercier de ce bien. Je ne voudrois faire autre chose tout le temps de ma vie, que vous demander: Seigneur, qu'avez-vous veu en moy, plus qu'en quelque autre? Pourquoi m'avez-vous ainsi appelé? pourquoi m'avez-vous ainsi deliuré, ainsi receu, ainsi regardé? laissant en leur peché tant d'autres, lesquels n'estoient pas si meschans que moy? Je ne sçay que faire, sinon vous rendre graces immortelles pour ce benefice, & vous supplier que ie puisse veritablement chanter avec le Prophete, disant: *Vous avez rompu, Seigneur, mes liens: ie vous sacrifieray vn sacrifice de loüange, & inuoqueray vostre saint Nom.* A celuy qui est assis sur le throsne, & à l'Agneau, soit gloire & honneur & puissance es siecles des siecles, Amen.

*Cinquieme action de grace pour le benefice
des Sacremens.*

Dieu eternal, Pere de Iesus-Christ vostre fils bien - aymé, nostre Redempteur & Sauueur, qui estes Createur de toutes choses, & Seigneur yniuersel de toutes creatures; ie vous rends graces de tout mon cœur, de toutes mes forces & puissances, de ce que sans aucun merite precedent, prouenant de ma part, mais par vostre seule clemence & misericordieuse bonté, auez daigné me lauer en cette eau qui sortit du precieux costé de vostre Fils, ostant par icelle toute la laideur & deformité de mon ame au Sacrement de Baptesine, & me deliurant entierement de la tyrannie de mes mortels ennemis (qui sont le peché, l'enfer, le diable, & la mort,) & me faisant vn temple vif, & habitation de toute la sainte Trinité, me donnant l'esprit d'adoption, par lequel i'ay esté fait & enroolé au nombre des enfans de Dieu: & outre-plus, me fournissant de tout ce qui est requis à cette dignité si excellente, comme sont les graces, les vertus infuses, & les dons du saint Esprit, afin que mon ame ornée & embellie d'iceux, ne plus

ne moins qu'une Espouse, peust apparoir en la presence de vostre diuine Majesté belle & gracieuse : & qu'elle print nouuelles forces pour surmonter & emporter une glorieuse victoire & triomphe du diable, vieil & mortel ennemy de tout le genre humain, & afin que par ce moyen elle peust acquerir la fin, pour laquelle elle a esté créée, qui est le Royaume des Cieux & la beatitude eternelle.

Auec quoy payeray-je ce benefice, mon Dieu? quelle chose vous donneray-je, Seigneur, en reconnoissance de ce que parmy une si grande multitude de nations barbares & infideles, de Turcs, Mores & Gentils, qui adorent les pierres, le bois, & les serpens ; vous auez voulu que ie fusse Chrestien, & que le fort me conduit au giron de l'Eglise, que ie fusse receu en vostre heritage, en vostre maison, & dans l'Arche du vray Noé, afin que ie n'allasse point en perdition avec le reste du monde, surpris par le deluge de l'infidelité, dans lequel tant de milliers d'ames perissent tous les iours?

O Seigneur mon Dieu, combien grand nombre d'ames creastes vous le mesme iour au mesme instant & moment que la mienne fut créée, desquelles les vnes furent en-

uoyees en Turquie; les autres aux Indes, les autres en Barbarie, & en autres lieux semblables remplis d'infidelité & idolatrie: le mesme sort, sans doute, pouuoit eschoir à la mienne: mais par vostre grace, Seigneur tres-benin & misericordieux: vous n'avez pas voulu qu'elle tombast sinon au Paradis & giron de vostre Eglise, laquelle est la maison de vos enfans: Faiçtes moy ceste faueur, ô mon Dieu, que ie puisse dignement conuerſer & viure en cette vostre maison & famille, de crainte qu'un tel & si grand benefice ne se trouue mal employé en mon endroit, & de peur qu'au ſiecle aduenir mon sort ne ſoit pire que ceux des infideles.

Pere tres-sainct, ie louë & benis à iamais vostre nom tres-doux & ineffable, & vous glorifie de cœur & de bouche, tant qu'il m'est poſſible, de ce que non vne ſeule fois, vous m'avez lauë & nettoyé au ſang precieux de vostre Fils bien-aimé; mais avez laiſſé vne fontaine ouuerte en ſon coſté ſainct & ſacré, qui decoule ſans ceſſe, afin que ie me baignaſſe en icelle, & me lauaſſe, toutes les fois que mon ame ſeroit entachée & ſouillée de quelque peché: Car quelle choſe eſt le Sacrement de Confefſion, ſinon vne fontaine tres-claire pour la-

uer nos macules, & vne medecine tres-salutaire pour guarir nos maladies, & vn moyen tres-efficace pour nous reconcilier à vous au prix du sang de vostre Fils Iesus-Christ nostre Sauueur ?

C'est moy qui auois peché, & à cause de mon offence i'estois condamné à la mort perpetuelle; mais vostre Fils esmeu d'une pure compassion, à prins sur soy mes pechez, & a receu en son corps les coups de fouet, & la sentence que ie meritois: & en vertu de cette satisfaction, il a commandé au Prestre qu'il me deliure de la mort eternelle, pour autant qu'il a prins la debte sur soy-mesme.

Auec quel cœur donc, avec quel amour, & avec quels yeux est-il raisonnable que ie regarde vostre Fils vnique, qui a fait & enduré telles choses pour moy ? Et quelle chose dois-je faire pour luy, selon que le droict de la raison requiert le reciproque ?

S'il me falloit tous les iours endurer des tourmens, si mesme il estoit besoin que ie suportasse la gehenne & peine eternelle; ie ne pourrois rien faire & rendre de condigne à ce benefice si grand & excellent.

Ie ne vous rends moindres actions de graces, ô mon tres-doux Sauueur Iesus-

446 PARADIS DES PRIERES,
Christ, vray amateur des hommes, pour
l'institution du Sacrement de la sainte
Communion.

Or ce Sacrement est le Sacrement des
Sacremens, le mystere des mysteres, le
benefice des benefices & le Memorial de
toutes les merueilles de Dieu: C'est le Sa-
crement de grace, de charité, d'amour,
d'vñion, de deuotion, de remission, & de
toutes les autres sortes de biens. Icy l'hóme
est visité de Dieu, il est icy honoré de la di-
uine presence; il est icy fait vn tēple vif du
corps precieux de Iesus-Christ: Icy la gra-
ce est donnée en tres-grande abondance:
icy se gouste la douceur & suauité diuine en
sa propre source & fontaine: Icy le feu de
l'amour diuin est allumé: icy l'ame embras-
se son vray & legitime espoux, duquel el-
le reçoit de merueilleux plaisirs & dele-
stations.

O quelle ioye & ließe, quelle volupté,
quelle douceur, quelle soüefueté se trouue
en l'ame deuote, & au cœur de l'homme
iuste, à l'heure qu'il reçoit ce terrible &
venerable Sacrement de vostre corps pre-
cieux, mon tres-doux & bien-aimé Iesus?
On n'entend rien autre chose dans vne tel-
le ame pour lors, qu'une douce & plaisante
melodie

melodie de l'homme interieur , que des
suspirs pleins de toutes bonnes affections
& saints desirs , qu'une continuelle action
de grace , qu'un tres-doux & harmonieux
Cantique de loüanges de l'Espoux tant ai-
mable , que des chansons spirituelles de
charité & d'amour.

Vous nous avez delaisfé, ô Seigneur, ce
tres-sainct & tres-auguste Sacrement, à cel-
le fin qu'il soit nostre viatique , & prouision
auec laquelle nous deuons faire le voyage
du Ciel: C'est le pain des Laboureurs , auec
lequel sont renforcez ceux qui trauaillent
en la vigne du Seigneur. Vous nous l'a-
uez donné , à ce qu'il soit tres-fidele & as-
seuré tesmoignage de l'amour & charité
que vous nous portez , qu'il soit un repos
de nos miseres , un canal par lequel vous
voulez esandre & faire decouler vostre
grace dessus nous , des arres du salut eter-
nel , & le thresor incomparable de toutes
les ames Chrestiennes & deuotes. Icy sont
renouellez les bons propos ; icy reuer-
dissent les bons desirs ; icy la deuotion ac-
croist & s'augmente ; icy s'ouurent les rui-
sseaux & fontaines de larmes ; icy mon ame
vous mange , ô doux Sauueur Iesus , & se

448 PARADIS DES PRIERES,
nourrit de vous qui estes mon vray pain, &
ma propre nourriture, ma viande tres-de-
lectable, mon souuerain bien, & la plus
grande felicité que ie puisse receuoir en
cette vie, tandis que ie suis encore viateur
en ce monde.

Tels sont vos dons & presens, Seigneur,
tels sont vos benefices & les graces que
vous nous auez conferees en ces trois Sa-
cremens: & selon que vous auez bien ac-
coustumé de les departir à ceux qui les re-
çoient: Pour lesquels, comme aussi pour
les quatre autres Sacrements; si ie voulois
vous rendre graces condignes, il seroit be-
soin consommer & employer toute ma vie
en ce seul exercice: de sorte & maniere,
qu'il ne me faudroit penser à autre chose
qu'à cela tant seulement.

Donnez-moy donc la grace, Seigneur,
non seulement de vous faire action de gra-
ce, mais aussi auoir en vostre endroit vne
continuelle action de grace: c'est à dire,
que continuellement & sans cesse ie puisse
me ressouuenir de vostre benignité & mu-
nificence tres-grande en mon endroit à
celle fin que vous experimentiez, comme
ie ne suis point ingrat & mesconnoissant:

& pour cette raison, que vous augmentiez
& fassiez croistre vos graces & vos dons en
moy, iusques à tant que ie paruiendray par
l'aide & secours d'iceux, à vous qui estes la
fontaine eternelle de tous biens, vn Ocean
de toutes graces & perfectiones, & l'origi-
ne de toute beatitude & felicité diuine,
Amen.

*Sixiesme action de grace, pour le benefice
de conseruation spirituelle, en la
vie de grace.*

IE vous adore, ie vous louë, ie vous
glorifie, vous rends toutes les humbles
actions de graces qu'il m'est possible, ô Pe-
re tres-benin. Je vous remercie de tout
mon cœur; ô Dieu souuerain & eternel,
pour tous & vn chacun de vos benefices:
Et en premier lieu, i'ay à vous reconnoi-
stre & remercier, de ce que sans aucuns
niens merites precedens, vous m'avez
guary, lors que i'estois blessé & navré à
mort, & de ce que m'avez reconcilié à
vous, lors que i'estois vostre grand enne-
my. Je vous rends graces, de ce que vous
m'avez racheté de prison & captiuité, &

rappelé de la mort à la vie : de ce que par vostre grace , clemence & pitié plus que paternelle, m'avez gardé & soigneusement conserué en cét estat heureux iusques à present , & par vostre mesme grace me conseruez de iour à autre, & encores maintenant à cette heure.

Seigneur , vous estes celuy qui seul nous avez créés & faits de rien , & qui seul nous conseruez en l'estre de la nature que vous nous avez donné : aussi estes-vous celuy qui par vostre saint Esprit nous regenererez derechef en l'estre de la grace , & qui seul nous conseruez la grace que vous nous donnez ; Car comme dit le Prophete : *Si le Seigneur n'edifie la maison , ceux qui l'edifient se trauaillent en vain , & s'il ne la garde apres l'auoir edifiée , pour neant veille celuy qui la garde.* Par vous nous sommes releuez du peché , & par vous nous n'y retombons point apres. Si ie me suis releué , vous m'avez donné la main : & si maintenant ie suis debout , vous estes celuy qui me tenez , afin que ie ne chée point.

Combien de benefices donc , contient en foy ce bien-fait ? Tant de bons pro-

pos & inspirations que i'ay euës , c'a esté par vostre benefice. Tout autant de fois que i'ay vaincu l'ennemy , & mes mauuaises inclinations & appetits , c'a esté par vostre benefice , puis qu'il est vray que personne ne peut pas dire purement Iesus , sans vne speciale faueur du sainct Esprit , & que personne ne peut faire vn œuure meritoire sans vous , non plus que le serment apporte du fruit estant coup-pé de la vigne ; c'est vne chose manifeste, que si quelque fruit de bonnes œuures est sorti de ce serment , c'a esté par la vertu de la vigne à laquelle il estoit conjoinct.

Si quelquesfois ie ieusne , cela vient de vous ; si ie supporte quelque chose, vous me la faictes supporter : & si quelquesfois ie denie & refuse ma propre volonté , vous me la faictes denier. Si iamais i'ay versé des larmes , ou fait quelque oraison qui vous pleust , ie confesse , mon Seigneur, l'auoir fait par vostre aide, & que vous auez operé en moy toutes mes œuures : & par ainsi ie vous remercie de toutes , & me reconnois debiteur d'autant de benefices , comme ie vous ay faict de

452 PARADIS DES PRIERES,
seruices en cette vie ; si ie vous en ay
fait aucun.

Que diray-je donc des appareils &
preparatifs , que vous m'avez donné pour
bien viure ? combien de prescheurs m'avez
vous enuoyé pour m'instruire ? combien de
bons Confesseurs ? combien de bons amis
& compagnons ? combien de bons exem-
ples ? combien de bons liures , & de beaux
escrits , pour m'exciter & m'attirer à bien
faire ? Car vostre prudence est telle & si
merueilleuse , que le monde estant si cor-
rompu , beaucoup de ces moyens & secours
ne defaillent point en aucune partie d'ice-
luy , si deserte qu'elle soit , pour ceux qui
s'en veulent seruir : Et si celuy qui en a iouy ,
& qui s'en est seruy vous est beaucoup re-
deuable , beaucoup plus vous est obligé ce-
luy qui a profité sans eux ; car cela prouient
de ce que vous avez suppléé à ce defaut ,
prenant sur vous toutes ces offres icy , afin
que toutes ces choses se trouuassent en
vous d'autant emmeilleurées , que vous
estes meilleure aide & meilleur maistre que
tous les autres.

En outre , qui pourra expliquer les pe-
rils & maux dont vous m'avez deliuré , es-

quels ie pouuois estre cheu? Il n'y a peché qu'un homme commette, qu'un autre homme ne puisse commettre aussi, à raison dequoy ie puis dire en verité, que les pechez de tous les hommes sont autant de benefices que i'ay receus: car ie pourrois estre desia tombé en tous, si vous Seigneur, ne m'en eussiez guaranty par vostre misericorde infinie: Et partant, combien d'occasions de pecher m'avez-vous osté, qui seroient suffisantes pour me perdre & precipiter, puis qu'elles precipiterent Dauid, si vous ne les eussiez coupées, connoissant bien ma foiblesse.

Ces benefices, mon Seigneur, estans priuatifs, ou preseruatifs, ne peuuent pas estre connus si clairement; iacoit qu'on ne les doie pas moins estimer: veu que ce n'est pas un moindre bien-fait de preseruer l'homme du mal, que de luy faire du bien. Combien de fois donc, ô bon Iesus, auez-vous usé de cette misericorde enuers moy? Combien de fois auez-vous lié les mains à mon ennemy, afin qu'il ne me tentast point selon son pouuoir, & si finalement il me tentoit, afin qu'il ne me vainquist point? Combien de fois l'avez-vous espou-

454 PARADIS DES PRIERES,
uanté & chassé bien loing de moy, afin que
du tout il ne me tentast point ? Combien
de fois auez-vous enchanté cét antique
serpent, afin qu'encores bien que i'allasse
parmy les viperes & basilics, il n'eust pas
la puissance de me nuire ? Combien de
fois m'aez - vous accompagné au mi-
lieu des eaux & du feu, afin que ny les
flammes ne me brussassent point, ny les
eaux ne me noyassent point ? Combien
de fois au milieu des bouillons du monde
aez-vous changé les flammes de Babylo-
ne en vne rosée d'air temperé, afin qu'el-
les ne me brussassent point : Combien
de fois pourrois-je dire avec verité ces pa-
roles du Prophete : I'ay esté combatu
plusieurs fois, & inuesty pour estre ren-
uersé, & vous m'aez tenu mon Seigneur:
& si pour cause de ma foiblesse ie com-
mençois à choir ; vous mettiez au dessous
vostre agreable & puissante main, afin que
ie ne fisse point mal. Si ie vous disois que
mes pieds estoient glissans, vostre mise-
ricorde, Seigneur, m'aidoit, & selon la
multitude des douleurs de mon cœur ; vos
consolations recreoient & resiouissoient
mon ame.

Outre toutes ces choses , Seigneur, ie reçois vne grande ioye & admiration de vostre bonté , quand ie me mets à considerer combien de fois pour la grauité de mes fautes , i'aurois merité que vous esloignassiez vostre main de moy (comme peut-estre vous l'avez esloignée des autres) & vous ne l'avez pas fait : Car c'est chose toute certaine que les hommes pour beaucoup d'occasions meritent d'estre abandonnez de vous.

Comment donc pourray-je croire de moy-mesme, que ie sois libre de coulpes? Ie me suis par plusieurs fois glorifié vainement de vos dons : i'ay vsurpé la gloire qui estoit deuë à vous seul : i'ay esté ingrat de vos benefices, & tres-negligent & lasche pour en vser à mon profit : i'ay esté arrogant & temeraire à m'exposer aux dangers. Et pour ces occasions i'ay merité plusieurs fois d'estre abandonné, à celle fin que ma cheute me chastiaist de ma folie; mais vostre patience a esté si grande & si admirable, que vous avez dissimulé mes negligences, & avez fermé les yeux à mes foibleesses & laschetes. Vous m'avez supporté iusqu'à cette heure avec

vne pieté bien grande , & n'avez pas voulu que vos secours manquassent de vostre costé , iacoit que du mien vous fussiez beaucoup greué.

Le conuerty donc maintenant & change en actions de graces , & en voix de loüange , les douleurs & remords de conscience que j'auray , si vous m'eussiez abandonné du tout , disant avec le Prophete : *Retourne mon ame à ton repos , puis que le Seigneur a usé de la misericorde enuers toy , car il a deliuré mon ame de la mort , mes yeux de larmes , & mes pieds de la cheute.* Pour tous ces benefices , ie vous rends graces mon Seigneur, Dieu tout-puissant , qui estes , qui estiez , & qui serez à iamais : pour autant que vos ceuures sont grandes & admirables , & vos voyes iustes & veritables , ô Roy de tous les siecles, Amen.

Septiesme action de graces de tous les benefices.

Grena-
de liu.
5. du
Memo-
rial.

IE vous rends graces & loüanges infinies , Seigneur , de tous les biens & graces que vous m'avez faiçts depuis le iour de ma conception iusqu'au iour present : &

pour l'amour que vous m'avez porté de toute eternité, quand vous determinastes de me créer, de me racheter, de me faire vostre, & me donner tout ce que iusques à cette heure vous m'avez donné, puis que tout ce que i'ay, & tout ce que ie fais, est tout vostre.

Vostre est ce mien corps, & tous ses membres & sentimens : vostre est mon ame, & toutes ses habitudes & puissances : vostres sont toutes les heures & momens que i'ay vescu iusqu'à present : vostres sont les forces & la santé que vous m'avez donnée : vostre est le Ciel & la terre, qui me nourrit & soustient ; vostre est le Soleil & la Lune, les estoilles, les champs, les oyseaux, les poissons, les animaux, & toutes les autres creatures, qui par vostre commandement me seruent. Tout cela, Seigneur est vostre, & vous en rends graces telles qu'il m'est possible.

Mais encor ay-je à vous remercier beaucoup d'avantage, de ce que vous-mesmes avez voulu estre mien quand vous vous estes tout donné & offert en ma redemption. Pour moy vous vous vestites de chair, pour moy vous nasquistes en vne

458 PARADIS DES PRIÈRES,
estable; pour moy vous fustes couché en
vne creiche; pour moy fustes enueloppé en
drappeaux vils & pauvres; pour moy fustes
circoncis le huitiesme iour; pour moy fu-
stes fugitif en Egypte; pour moy, vous fu-
stes en tant de manieres tenté, persecuté,
mal traicté, flagellé, couronné d'espines,
deshonoré, condamné à mort, & cloüé
en vne croix: Pour moy vous auez ieusné,
prié, pleuré; pour moy vous auez veillé,
cheminé, supporté les plus grands tour-
mens, qui iamais se peurent endurer; pour
moy, vous auez ordonné & consacré les
medecines de vos Sacremens, avec la pre-
cieuse liqueur de vostre sang: & particu-
lierement le plus grand de tous; à sçauoir,
celuy de vostre tres-sainct corps, auquel
vous estes vous-mesme, mon Dieu, pour
ma restauration, pour ma nourriture, pour
ma force, pour ma delectation, & pour ga-
ges & arres de mon esperance, & pour signe
& tesmoignage de vostre amour,

Pour toutes les choses susdites ie vous
rends toutes les dignes graces, qui sont en
ma puissance, disant de tout mon cœur avec
le saint Roy Dauid: ô mon ame, louë &
benis perpetuellement le Seigneur, &

tout ce qui est en moy , soit employé & dedié à la gloire de son saint Nom. Donne ô mon ame , benediction , au Seigneur , & garde toy bien de mettre en oubly ses graces & tribulations : car c'est celuy qui te pardonne tous tes pechez , & qui guarit toutes tes infirmités , qui delivre ta vie de la mort , & qui par sa misericorde & grande affection te couronne. C'est luy qui accomplit tous tes bons desirs , & qui fait que ta ieunesse se renouvelle , comme l'Aigle qui laisse son bec crochu de vieillesse , & en reprend vn nouveau , & se rajeunit.

Le Seigneur vse de misericorde , & fait iustice à tous ceux qui sont oppressez. Notre Seigneur est plein de misericorde & de benignité , il est magnanime , pitoyable , & liberal. Il ne sera pas tousiours courroucé contre nous , & ne nous menacera pas tousiours. Le Seigneur ne nous a pas encores traictez ainsi , que nos pechez & nos iniquitez le meritoient ; car autant que le Ciel est hault par dessus la terre , autant a-il estably & confirmé sa misericorde sur ceux qui le craignent & reuerent , & autant que l'Orient est esloigné de

l'Occident, autant a-il mis loing de nous toutes nos iniquitez.

Tout ainsi que le pitoyable pere a pitié & misericordé de ses enfans, ainsi le Seigneur a pitié & misericorde de ceux qui le craignent : Car il sçait bien de quelle matiere nous sommes creéz : & se souuient assez que nous ne sommes que pouldre : & que l'aage de l'homme est semblable au foin & fleurs des champs qui se passent avec la saison. Elles se seichent : & au premier vent qui les souffle, ne peuvent subsister, & sont emportées, sans que plus on reconnoisse qu'elles ont fleuri en ce lieu : Mais la misericorde du Seigneur durera perpetuellement, & demeurera à tousiours sur ceux qui le craignent : Et sera tousiours sa iustice propice & secourable aux enfans des enfans qui accomplissent & gardent son Testament, & mettent en leur memoire ses commandemens pour les executer. Le Seigneur a préparé son throsne au Ciel, & son regne s'estendant sur tous les peuples.

Donnez benediction au Seigneur, ô tous ses Anges puissans en vertu, qui fai-

CHAPITRE IX. 461

tes ses commandemens , oyans la voix
de ses paroles. Que le Seigneur soit be-
ny pour toutes ses vertus , par ses mini-
stres , qui font sa volonté ; & qu'il soit
beny de toutes ses œuvres. Et toy (ô
mon ame) donne tousiours loüange &
benediction au Seigneur en tout lieu , où
s'estend sa puissance & domination,
Amen.



ORAISSONS
SVR LA PASSION
DE IESVS-CHRIST.





CHAPITRE X.

Le Chapitre dixième contient sept
Oraisons de la vie & Passion
de nostre Sauueur
IESVS-CHRIST.

PROLOGVE.

Notre tous les exercices de la vie spirituelle ; si nous croyons au dire saint Bonauenture , il n'y en a point de plus utile que la meditation de la vie , mort & Passion de nostre Redempteur : Car cette meditation , outre ce qu'elle engendre vn mespris de toutes choses visibles en nostre cœur , nous arme & fortifie pareillement contre toutes les forces & puissances du monde , de la chair , & du diable : nous fait auoir vne accointance & familiarité avec Dieu , nous attire à son amour , nous fait concennoir vne bonne confiance & assurance en sa bonté , & conduit finalement l'ame au sommet de toute vertu , & iusques au souuerain degré de

Au
Prolo-
gue des
Medi-
tations
de la
vie de
Iesus-
Christ.

464 PARADIS DES PRIERES,
la perfection: Car où pourrois-tu trouuer plus
parfaictement la vertu tres-excellente d'une
pauvreté tres-entiere, d'une tres-profonde hu-
milité, d'une tres-parfaicte charité, obéissan-
ce, patience, mansuetude: & generalement de
toutes les autres vertus, qu'en la vie du Sau-
ueur? Parquoy fort à propos dit sainct Ber-
nard: L'homme qui desire amasser & acquerir
les vertus, travaille en vain s'il les cherche au-
tre part, ou les demande d'ailleurs, que du Sei-
gneur des vertus: la doctrine duquel est une
reigle de prudence, la misericorde duquel est un
œuvre de iustice, la vie duquel est un exemple
de temperance, la mort duquel est l'estendart &
banniere de patience. En cet exercice le susdit
Docteur tres-deuot & contemplatif a employé
& consoimé toute sa vie, faisant un faisceau
& leuquet de toutes les anxietez, amaritudes
& tribulations de Iesus-Christ, lequel il gar-
doit tousiours avec grand soing & deuotion en
son sein, & entre les mammelles de son ame,
comme il le tesmoigne luy-mesme.

L'homme deuot fera donc tres-bien, si pour
le moins en une sepmaine il fait tout le discours
de la vie & passion de Iesus-Christ, en priant
ou en meditant en icelle: attendu mesme qu'il
n'accepte & reçoit aucune Oraison plus agreable
que celle en laquelle se fait mention & memoir-

re de sa vie. Or à celle fin que cecy se fist plus commodément, le R. P. Grenade auoit compris en sept Oraisons, la vie, mort, Passion & Resurrection de Iesus-Christ, à celle fin qu'elles peussent seruir pour tous les iours de la sepmaine, & ce en forme d'action de grace: veu qu'il n'y a aucun benefice, pour lequel nous soyons obligez de rendre telles & si continuelles actions de graces, que pour celuy de nostre redemption.

Ces sept Oraisons contenoient cinquante & trois articles desquels nous en auons retranché trois, & des sept Oraisons n'en auons fait que cinq, à celle fin de les reduire en forme de Rosaire pour aider à la deuotion de ceux qui s'en voudront seruir; mais à celle fin que l'intention de l'Authheur ne semblast manquer, nous auons adiousté deux Oraisons du mesme suiet, prinſes du mesme Authheur: & par ainsi le deuot Orateur aura vn Rosaire parfait és cinq premieres, & sept Oraisons pour tous les iours de la sepmaine. Ceux qui ne se voudront seruir de Rosaire, n'auront que faire de reciter les Oraisons Dominicales & salutations Angeliques mises apres vn chacun article,

PREMIERE ORAISON DE
la vie de Iesus-Christ, & le premier
Dizain du Rosaire.

IE vous rends graces, doux Iesus, de ce
que pour l'amour de moy vous avez
voulu descendre de vostre Palais Royal,
& du sein tres-haut du Pere, à cette va-
lée de miseres, pour prendre chair hu-
maine au tres-chaste corps de la tres-sa-
crée Vierge vostre mere. Je vous supplie
donc, Seigneur, que vous vueillez prepa-
rer mon cœur pour vostre logis : & à cette
fin l'orner de vertus, afin que vous seul le
possediez perpetuellement: ô si i'estois tel,
que ie meritasse de vous conuier humble-
ment en iceluy, vous y recevoir amiable-
ment, & vous y retenir perpetuellement!
ô que ne puis-ie si ardemment & affectueu-
sement vous embrasser des bras d'amour,
que iamais ny de pensée, ny d'affection,
ie ne me separe de vous, *Pater noster, Ave
Maria.*

2 Je vous rends graces, doux Iesus, qui
voulustes que vous ayant la tres-sacrée
Vierge conceu, elle s'en alla visiter sa pa-
rente Elizabeth, pour la saluer, & la servir

Grena-
de li. 5.
du Me-
morial.
Iesus
descéd
du Ciel.

La vi-
sitiō.
Luci.

en ses affaires : ne desdaignastes demeurer
neuf mois caché en son ventre tres-pur.
Donnez-moy (ie vous supplie) la grace
de vraye humilité , l'imprimant au pro-
fond de mon cœur , afin qu'accompagné
d'icelle , ie ne me trouue tousiours préparé
à toutes choses pour vostre seruice : Faites,
Seigneur , que mon cœur ayt tousiours en
haine les choses mondaines , & qu'il soit
tousiours affamé , soucieux & desireux de
vous retenir dedans soy pour mon hoste &
possesseur. *Aue Maria.*

3 Je vous rends graces doux Iesus , qui ^{La Na-}
nasquistes de la Vierge tres-heureuse , sans ^{tiuité.}
douleur , & sans macule de pureté virgina- ^{Luc 1.}
le, qui vous met tant comme pauvre & pas-
sible en vne creiche , humblement & avec
grande reuerence vous adora. Je vous
supplie donc par vostre grande misericor-
de, que continuellement vous vueillez
naistre dedans moy par nouuelles ferueurs
de charité , & estre le seul & vnique desir
de mon cœur , mon seul plaisir & mon vni-
que esperance. Ah ! que mon cœur n'est-il
tel qu'il ne cherche autre que vous seul,
qu'il ne pense qu'à vous seul , & qu'il n'ai-
me que vous seul avec tres-ardent amour.

Aue Maria.

La pau-
ureté.
Luc 2.

4 Je vous rends graces, doux Iesus, qui naissant en la rigueur du froid, vous vouldistes estre enuveloppé en pauvres linges, & boire du laiët comme petit enfançon, des tres-pures mammelles de vostre mere. Oötroyez-moy, ie vous prie Seigneur, que ie sois tousiours en vostre presence, humble & vrayemēt pauvre d'esprit. Oötroyez moy, Seigneur, que i'endure & supporte tousiours bien volontiers toute chose aspre & laborieuse pour vostre saint Nom, & que ie n'aime autre chose de ce monde, sinon vous, & que ie ne cherche de posseder aucune chose sans vous. *Aue Maria.*

Les An-
ges.
Luc. 2.

5 Je vous rends graces doux Iesus, qui estant nay fustes avec doux Cantiques louié des Anges, cherché des Pasteurs, d'iceux adoré avec grande ioye & admiration. Faictes moy la grace, Seigneur, que ie perseuere ioyeusement en vos loüanges, & que vous cherchant diligemment avec les Pasteurs, ie vous trouue & vous possede eternellement. *Aue Maria.*

Circō-
cision.

Luc 2.

6 Je vous rends graces, doux Iesus, que vous vouldistes le huiëtiesme iour (suyuant la coustume generale des autres enfans) estre circoncis, & estant encores si ieune & tendre, esprendre vostre sang, & vouldistes

pour nostre plus grande consolation estre appellé IESVS: Je vous prie donc, Seigneur, que me vueillez marquer & reünir du nombre des vostres: & circoncir tous les excez & superfluitez de mon ame: à sçauoir, toutes les mauuaises paroles, œuures & penſees. Vous estes, ô Seigneur, appellé IESVS, qui signifie Sauueur: parce qu'à vous seul appartient la puissance de donner le salut. Je vous requiers donc, Seigneur, que la memoire de ce tres-doux & tant desiré Nom chasse de moy toute foiblesse & pusillanimité desordonnée, & me donne ferme esperance de vostre misericorde, & me defende de toutes les persecutions, fallaces & tromperies de l'ennemy, *Aue Maria.*

7 Je vous rends graces doux IESVS, qui fustes par viue foy & profonde deuotion cherché des Mages, & trouué par la conduite de l'Estaille, fustes d'eux adoré, prosternez en vostre preséce, vous offrans Or, Myrrhe & Encens. Octroyez moi qu'avec ces affectionnez & desireux Cheualiers ie vous cherche tousiours en la creiche de mon cœur, & que dedans iceluy ie vous adore en esprit & verité: qu'avec eux ie vous presente l'Or de reluisante charité, l'En-

Les
Mages.
Matt. 2.

470 - PARADIS DES PRIERES,
cens de deuotion, & la Myrrhe odorife-
rante de parfaicte penitence ; & finale-
ment que i'occupe & employe toutes les
forces de mon ame, à faire & accomplir
vostre sainte volonté, *Aue Maria.*

Purifi-
cation.
Luc. 2.

8 Je vous rends graces doux Iesus, qui
pour nous monstrier exemple d'humilité
& obeïssance, voulustes pour l'amour de
nous, vous faire sujet à la Loy, & estre
porté au Temple sur les bras de vostre tres-
sainte mere, & qu'on offrist pour vous au
Temple vne offrande des pauures. A l'oc-
casion dequoy le iuste Simeon, & Anne le
Prophete, par la grande ioye qu'ils receu-
rent de vostre presence, dōnerent vn mer-
ueilleux tesmoignage de vostre personne.
O si ie pouuois tant faire; que iamais vn seul
poinct de vaine gloire n'entraist dedans
mon cœur ! ô si tant de milliers, de sortes
de presomptions pouuoient estre bannies
de moy, & qu'en moy fussent morts tous
appetits de faueurs, & toutes autres ma-
nieres d'amour de moy-mesme ! O âroyez
moy, ie vous supplie, Seigneur, que ie
fuye tous les honneurs & loüanges huma-
nes, & que ie me submette à tous les hom-
mes pour l'amour de vous, & qu'à tous ie
preste volontiers obeïssance. *Aue Maria.*

7 Je vous rends grace, ô doux Iesus, qui estant encor tout petit enfant, fustes bien-tost persecuté avec vostre mere, & ne desdaignastes point vous enfuyr, & aller en exil en Egypte. Octroyez-moy, Seigneur, qu'en tous les ennuy & molesties de mes persecutions, & en toutes mes tribulations & tentations, ie n'aye recours qu'à vous seul, ie ne cherche autre que vous, & qu'autre que vous ie n'inuoque: que ie reçoie ioyeusement, & supporte d'un cœur doux & gracieux tout ce qui me viendra de vostre sainte main, vous rendant tous-jours graces de toutes les choses qui me pourront aduenir. *Aue Maria.*

10 Je vous rends graces, ô doux Iesus, qui fustes cherché trois iours avec grands ennuy & tristesse de vostre pitoyable mere, lors que vous demeurastes dans le Temple: & apres ce temps fustes retrouvé avec sa grand' ioye dans iceluy, & entre les Docteurs, les escoutant, & les interrogeant avec grande sapience. O si i'estois si heureux, que vous vous donnassiez & communicassiez à moy de telle sorte, que iamais ie ne me peusse destourner de vous? Chassez, chassez Seigneur (ie vous supplie) toute paresse de mon cœur, bannissez d'i-

472 PARADIS DES PRIERES,
celuy toute la tepidité qui vous desplaist, &
donnez-moy parfaicte deuotion, & foy
ardente de vostre iustice: & faictes qu'elle
prenne telle possession de mon cœur, &
de toutes mes entrailles, que iamais ie ne
me faoule ny ennuye de vous seruir.

Aue Maria.

*Seconde Oraison à Iesus, & second
Dizain du Rosaire.*

Baptel-
me.

Matt. 3.

II E vous rends graces, ô doux Iesus, qui
Entrant au fleuve de Iourdain, voulus-
tes estre baptizé de vostre seruiteur & pre-
curseur. Plaise vous, Seigneur, me purifier
par vos merites en cette vie, me nettoyer
de mes vices, & m'enyurer de vostre
amour, & du desir de la celeste patrie. Plai-
se vous, Seigneur, auant que mon ame sor-
te de cette ptison, me faire tel que vous de-
sirez que ie sois, à ce que partant de cette
peregrination & exil, ie sois incōtinent vny
avec vous, & que ie puisse iouyr de vostre
veuë en cette felicité & gloire qui n'a point
de fin. *Pater noster, Aue Maria.*

Le
ieufne
& Ten-
tation.
Marc. 1.

12. Ie vous rends graces, ô doux Iesus, qui
estant au desert entre les animaux sauuages
deuant la predication de l'Euangile, & per-
seuerant quarante iours & quarante nuits
à ieun, & veillant continuellement en

pleurs & oraisons, permistes à l'ennemy ne vous tenter: & apres la victoire que vous eustes de luy, vous fustes seruy des Anges. Octroyez-moy, ie vous supplie, Seigneur, par vostre sainte grace, que ie me submette & chastie toutes mes vicieuses affections, & que ie perseuere tousiours, m'occupant en ieusnes, veilles, oraisons, & toutes autres loüables exercices. Octroyez moy particulierement que par l'aide & secours de vostre grace, ie sois libre du vice de gloutonnie, & de tous les autres lacs & embusches de l'ennemy: que nulle tentation m'affaille, que nulle me separe de vous: mais que plustost elles me soient occasion de plus me retirer à vous, & de m'y venir & conioindre tousiours avec vous.

Aue Maria.

13. Je vous rends graces, ô doux Iesus, qui pour moy fustes affligé en ce monde avec grandes peines & necessitez, de froid, de chaud, de faim & soif, de lassitude & de sueurs. Octroyez-moy, Seigneur, & me faites la grace que ie reçoieue allaigremēt toutes aduersitez quelconques, comme venantes de vostre main tres-sainte: & que ie les supporte d'un cœur patient pour l'honneur de vous, & en quelque plai-

Affli-
ctions.
Iean. 4.

474 PARADIS DES PRIERES,
fir ou trauail, & en quelque mauuais acci-
dent que ce soit ie perseuere en vous sans
me mouuoir, desirant & procurant que
toufiours vostre volonté soit faite, & non
pas la mienne. *Aue Maria.*

Tra-
uaux.

Marc. 9

14 Je vous rends graces, ô doux Iesus,
qui auez supporté plusieurs trauaux, cher-
chant (comme vray Pasteur & Sauueur du
monde) la conuersion des ames, veillant
en oraisons, vous lassant & trauaillant
en voyages, pour manifester & publier la
doctrine celeste, courant de pays en pays,
de cité en cité, de ville en ville, de chasteau
en chasteau. Faites-moy la grace, Sei-
gneur, que ie ne trouue iamais aucun em-
peschement és choses de vostre seruice;
que plustost ie sois toufiours tres-prompt
& leger à tout bien. Oütroyez-moy, que
d'une foy tres-ardente ie sois desireux du
salut de tous, & que tant que ie pourray
toufiours & en tous lieux ie le procure, &
que ie m'y employe de toute ma puissance,
à vostre honneur & gloire. *Aue Maria.*

Les mi-
racles.

15 Je vous rends graces, ô doux Iesus, qui
conuersant entre les hommes, auez beni-
gnement voulu les consoler, & avec plu-
sieurs miracles par vostre misericorde gua-
rir leurs infirmités. Donnez-moy ie vous

supplie, Seigneur, vn cœur plein de charitable affection, pieté & compassion enuers tous, afin que ie compatisse aux afflictions de tous, & que ie sente les miseres d'autrui, comme les miennes propres, & qu'avec vn cœur tres-benin ie supporte les imperfections de tous, & que gayement ie les secoure en leurs necessitez autant qu'il me sera possible. Guarissez par vostre grace, Seigneur, & nettoyez mon ame de toutes mauuaises passions & vains desirs, dont elle est toute playée, afin que saine & deliurée de tous ses maux & empeschemens, elle se hausse librement en haut, & que iamaïs elle ne se lasse, iusques à ce que par amour tres-pur, elle merite d'arriuer & d'estre receu entre vos bras. *Aue Maria.*

16 Je vous rends graces, ô doux Iesus, ^{Iniures.} qui pour moy auez supporté beaucoup d'iniures, blasphemes, persecutions & calomnies de ceux mesmes ausquels vous faifiez tant de biens. Dōnez-moy ie vous supplie, vn cœur vraiment simple & innocent, à ce que purement i'aime mes ennemis, & que ie sente dedans moy vne douleur de leurs maux, & qu'en mon cœur ie les excuse, afin que leur rendant le bien pour le mal, ie me face imitateur de vostre

476 PARADIS DES PRIERES,
charité & patience. *Aue Maria.*

Entree 17 Je vous rends graces, ô doux Iesus,
en Ie- que venanten Ierusalem en grande humi-
rusalẽ. lité & douceur dessus vn asne, pendant que
Luc. 19. ceux qui vous receuoient vous chantoient
solemnellement glorieuses & belles loüan-
ges ; vous respendistes douloureuses lar-
mes, preuoyant la destruction de cette ci-
té, & la perte de tant d'ames. Octroyez
moy, ie vous supplie, Seigneur, vne in-
terieure connoissance de moy-mesme, afin
que ie voye clairement ma pauureté & im-
becilité, & que profondément ie me des-
prise & humilie. O si iamais ie ne me dele-
ctoïs des loüanges & faueurs des hommes ;
mais que ie m'applicasse & entendisse touf-
iours à pleurer mes propres miseres & pe-
chez ! O si ie tenois & estimois pour mien-
nes les pertes & dommages d'autrui, & si
ie les pleurois comme les miennes.

Aue Maria.

Cene. 18 Je vous rends graces, ô doux Iesus, qui
Luc. 30. pour mettre fin à la Loy mangeastes l'A-
gneau Paschal en Ierusalem avec vos disci-
ples, leur donnant exemple d'humilité &
amour ineffable, vous agenouillant leur
lauastes les pieds, les essuyant avec le lin-
ge que vous auiez mis à l'entour de vous.

Je vous supplie, Seigneur, que cét exemple penetre mon cœur, qu'il iette par terre toute presumption & orgueil quelconque qu'il trouuera en iceluy. Donnez-moy, Seigneur, vne tres-profonde humilité, avec laquelle i'obserue vos commandemens, & de ceux qui me commanderont quelque chose en vostre nom. Donnez moy charité tres-feruente, par laquelle ie vous puisse purement & entierement aimer, & tous les hommes pour l'amour de vous. *Aue Maria.*

19 Je vous rends graces, ô doux Iesus, qui par vne tres-haute charité instituastes le tres-sainct Sacrement de vostre corps & sang, & par plus admirable charité vous estes donné pour nostre viande, étant par ce moyen corporellement demeuré avec nous iusques à la fin du monde, Enflammez & excitez, ie vous supplie, en moy des desirs tres-ardens, & vne faim embrasée de ce venerable Sacrement. Faiâtes qu'avec vn chaste amour, avec vne profonde humilité, avec vne pureté de cœur, ie me presète pour vous receuoir en cette table de vie, & faiâtes que mon ame ait si grand soif de vous, & soit tellement navrée de vostre amour, que ie merite cy-

Institution
du Sacrement.
Matt.
16.

478 PARADIS DES PRIERES,
apres iouyr des eternelles delices en vo-
stre Royaume , pour l'honneur & gloire
de vostre saint nom.

Conso-
lations
des Dis-
ciples.
Jean
13. 14.
15. 16.
17.

20 Je vous rends graces, ô doux Iesus, qui
voulant partir de ce monde admonestastes
& consolastes vos Disciples avec paroles
d'amour ineffable, & d'une affectueuse &
ardante priere, les recommandastes à vo-
stre Pere, declarant manifestement, com-
bien cherement vous aymiez, non seule-
ment eux, mais tous ceux qui deuoient
croire en vous par leur doctrine: faites que
mon cœur prenne goust en vos paroles, &
que tousiours il les trouue plus douces que
miel. Faictes descendre en ma poitrine
(Seigneur) l'esprit de cette vostre brus-
lante & enflammée admonition, afin que
par le moyen d'icelle ie me transforme
tout en vostre amour. Soyez mon adresse
& conducteur en toutes choses, Seigneur,
afin qu'en moy soit tousiours vostre vo-
lonte accomplie. *Aue Maria.*

*Troisiesme Oraison à Iesus, & troisiesme
Dizain du Rosaire.*

Oraison
Marc.
41.

21 **I**E vous rends graces, ô doux Iesus,
qui prosterné en terre fistes Orai-
son & Priere à vostre Pere, vous offrant
tout à sa disposition, & disant que toute sa
volonté,

volonté, & non la vostre, fust entierement accomplie. Octroyez-moy, Seigneur, qu'en toutes mes necessitez & affaires i'aye recours à vous par oraison, & que ie m'offre tout à vostre prouidence: sans election de ma propre volonté ny d'aucun autre mien interest particulier que ie ne fuye iamais les aduersitez, & que ie ne delaisse iamais (à raison d'icelles) de poursuiure le bien encommencé: mais que ie reçoie toutes choses avec vne tranquillité d'esprit & equanimité, comme venantes de vostre main pitoyable, & que ie les supporte toutes, pour l'amour de vous d'un cœur humble & gracieux. *Pater noster. Aue Maria.*

22 Je vous rends graces, ô doux Iesus, Roy du Ciel & de la terre, qui estant en presence du superbe Pontife, comme personne abiecte & mesprisée, endurastes avec tres-grande patience & douceur, le cruel soufflet qui vous fut donné par l'un de ses ministres. Refrenez en moy, Seigneur, toutes impetuosités & tempestes d'ire & courroux, tuez en moy toute indignation & rancune, & amortissez toute estincelle de concupiscence & vengeance, afin qu'estant iniurié ou offensé, ie ne me trouble, ie ne me lamente, ie ne m'altere, mais que

Le soufflet deuant le grand Prestre, Caiphe. Ican. 18

480 PARADIS DES PRIÈRES,

supportant toute chose gracieusement, ie
faisse bien à tous ceux qui m'auront fait
mal. *Aue Maria.*

23 Ie vous rends graces, ô doux Iesus, qui
fustes toute cette nuit mal traicté & accu-
sé de vos ennemis, & frappé de soufflets
& coups de poing, & mocqué avec plu-
sieurs sortes d'iniures & ignominies. Vous
sçavez bien, Seigneur, cōbien il m'est en-
nuyeux & difficile de supporter mesmes
les moindres choses: vous sçavez bien que
ie n'ay aucune vertu, & que ma volonté est
pareilleuse, & mon desir froid. Secourez
& aydez par vostre misericorde, Seigneur,
à mon infirmité, & me faites la grace que
nulle impetuosité d'infortune ou aduersi-
té me puisse atterrer ou espouuanter.
Ostroyez-moy que ie resiste aux maux
qui me suruiennēt, que ie ne m'altere pour
iniure quelconque à moy faite: mais que
vous rendant grace de toutes, ie refere
toutes choses à l'honneur & à la gloire de
vostre saint Nom. *Aue Maria.*

Accu-
sations
& filé-
ce.

24 Ie vous rends graces, ô doux Iesus, qui
estant en presence de Pilate, vous taisiez
sans respondre à toutes les fausses accu-
sations & des-honneurs qui vous estoient
mis en auant, comme le doux Agneau,

qui n'ouure la bouche & ne refiste à ceux qui l'espargnent. Oûtroyez-moy, Seigneur, que toutes murmurations & infamies qui pourront estre dictes de moy, ne m'apportent aucune perturbation : mais que par me taire ie surmonte tous ceux qui me font iniure. Donnez-moy la grace de parfaicte humilité, par laquelle ie ne desire estre loüé, ny refuse estre diffamé pour l'amour de vous. *Aue Maria.*

25 Je vous rends graces, ô doux Iesus, qui avec grand bruit & rumeur du peuple fustes conduit par le milieu de la Cité, du tribunal de Pilate à Herodes. Oûtroyez-moy, ie vous supplie, tant de force, que ie ne m'espouuante ou me trouble des persecutions de mes ennemis, & que leurs iniures ne me facent alterer, que leurs mespris ne me confondent : mais que ie supporte toutes choses avec humilité, & que me taisant, i'endure le tout, afin que suivant la loy de vos saints cōmandemens, ie possede mon ame en patience. *Aue Maria.*

26 Je vous rends graces, ô doux Iesus, qui interrogé & examiné par Herode avec plusieurs paroles, & accusé en plusieurs sortes par les Prestres & Pontifes, ne respondistes aucune chose, mais surmontastes

Accusations
& interrogatoire
Luc 13

tout en vous taisant. Faites-moy la grace, Seigneur, que ie refrene ma langue, de sorte que ie ne profere aucunes paroles vicieuses, & que ie ne perde le temps en fables oyseuses. Faites-moy la grace, que tousiours ie die choses iustes, honnestes, vtils, & conformes à vostre volonté. Octroyez-moy, que i'abhorre le vice de la murmuration: & que ie me plaise à bien dire, & à bien penser de tous. *Aue Maria.*

Barrabas.

Marc.

25.

Ps. 117.

1. Pet.

12.

27 Le vous rends graces, ô doux Iesus, qui estant parangonné avec le larron Barrabas, fustes iugé par les Iuifs pire & moins digne de vie, & ainsi pardonnans à l'homicide, condamnerent à mort l'auteur de la vie.

Il appert bien clairement (Seigneur) que vous estiez cette pierre viue, reprouuée des hommes, & esleuë de Dieu. O si ie vous aymois par dessus toutes choses, & que pour aucune chose, iamais ie ne vous changeasse: mais que ie reputasse toutes choses fumier vil, en comparaison de vous! Octroyez-moy, Seigneur, que iamais le venin d'enuie n'infecte mon ame: mais qu'en vous seul ie repose, & qu'en vous seul ie retrouve toute ma consolation. *Pater noster. Aue Maria.*

28 Le vous rends graces, ô doux Iesus, qui

consentistes estre despoüillé nud, & lié à la
colonne, & là estre battu de battures enor-
mes : pour guarir & excuser les nostres par
les vostres. Despoüillez, ie vous supplie,
mon cœur de toutes mauuaises pensées:
despoüillez-moy del'homme vieil, & de
toutes ses œuures : & reuestez-moy du
nouuel homme créé à vostre semblance, en
iustice, verité, & sainteté, & me donnez
force de supporter avec humilité les battu-
res de vostre paternelle correction. *Aue*
Maria.

29 Ie vous rends graces, ô doux Iesus, qui
apres tant de coups, & apres tant de sang
espandu, fustes grandement iniurié avec
diuerfes sortes de vilenies & vituperes : par
ce que pour vous faire plus grand deshon-
neur, ils vous vestirent d'une robe rouge, 15.
vous mettant sur vostre diuin chef par
grande cruauté avec vne corōne d'espines,
vn roseau en main en lieu d'un sceptre, &
s'agenouïllans par mocquerie en vostre
presence, vous salüoient disans, Dieu te
garde, Roy des Iuifs. Fichez, Seigneur, &
cloüez en mon cœur la cōtinuelle memo-
re de ce douloureux estat, & le navrez avec
les sagettes tres-poignantes & aiguës de
vostre tres-ardēte charité. Oūtroyez-moy,

Coron-
né d'es-
pines &
robe
de pour
pre.
Marc.

Seigneur, que ie n'ayme que vous seul, que ie ne pense qu'à vous seul, que seuremēt en vous seul ie repose, & que nulle tribulation, nulle angoisse, nulle persecution, nul tourment ne me puisse separer de vous: & que ie ne tienne à des-honneur d'estre vilipēdé & mesprisé avec vous. *Aue Maria.*

30 Je vous rends graces, ô doux Iesus, qui entre les autres mocqueries & iniures que vous avez supportées pour moy, vouldes encores porter vostre Croix iusques au mont de Caluaire, avec grande peine & trauail de vostre corps & de vos espaules tant fracassées. Oūtroyez-moy, Seigneur, que d'un cœur fort & deuot, i'embrasse vostre Croix me niant moy-mesme, afin qu'imitant avec vne ardente charité les exemples de vos vertus, ie mérite de vous suiure humblement iusques à la mort. *Aue Maria.*

Quatrième Oraison à Iesus : & quatrième dixain du Rosaire.

13 **I**E vous rends graces, ô doux Iesus, qui estant arriué las & trauaillé au lieu des tourmens, les espaules desrompuës du poids de la Croix, ainsi affligé & plein de soif, ne peustes auoir pour vous rafraischir, autre chose que du vinaigre, qu'il vous

Vinai-
gre &
fiel.
Matth.
22.

donnerent, mellé avec du fiel.

O si par la recordation de ce breuuage, ie pouuois amortir en moy toutes mes gloutonnies, les sensualitez & delices de la chair, & que ie ne consentisse plus iamais à aucune volupté: Donnez-moy donc, Seigneur, cette très-honorable & très-necesfaire vertu de la temperâce au boire & māger: à ce qu'estant refrenez tous les appetits donnez de ma gorge, ie n'aye faim ny soif, que de vous seul, & en vous seul soient toutes mes delices, *Pater noster. Aue Maria.*

32. Je vous rends graces, ô doux Iesus, qui en presence de tout le peuple consentistes d'estre despoüillé, de forte qu'à l'arracher de vos robbes, & pour l'aigreur du froid, la douleur de vos playes se renouuella, & commença le sang à couler d'icelles, & le mal à se r'engreger. Ôtroyez-moy, Seigneur, vray amour de pauureté; & faictes-moy la grace, que ie ne me contriste de chose aucune qui me defaille. Ôtroyez-moy que patiemment ie supporte les necesfitez & defauts de cette vie. Despoüillez mon cœur de toutes imaginations & affections terrestres, & renouuellez en moy de iour en iour, les saints propos & desirs de vostre sainct Amour. *Aue Maria.*

H h iij

Crucifiemét.

33 Je vous rends graces, ô doux Iesus, qui refusastes d'estre cruellement estendu sur le bois de la Croix, & souffristes que toutes les ligatures de vos membres tres-sacrez fussent disjointes, & qu'ils fussent cloüez & percez de cloux tres-aigus en la mesme Croix. Ôtroyez-moy, Seigneur, que d'une ame fidele & reconnoissant, j'aye tousiours memoire de cette executiue charité, avec laquelle vous avez si benigne-ment estendu vos bras, & ouuert vos mains pour estre cloüées, offrant vos pieds aussi pour estre transpercez, Dilatez donc Seigneur, & eslargissez mon cœur avec vne parfaicte charité: transpercez avec le mesme clou de vostre amour, tous sentimens, & resserrez dedans vous seulement toutes mes pensées & affections. *Aue Maria.*

34 Je vous rends graces, ô doux Iesus, qui demeurastes trois heures entieres attaché au bois ignominieux de la Croix: & respendant vostre sang en grande abondance, sentistes tres-grande douleur en tous vos membres. Releuez, Seigneur, avec le mesme bois cette miserable, qui est tombée en terre, & lauez-là des ordures de ses pechez par vostre sang espendu. O sang qui donnés vie & salut. Plaist vous, mon Dieu, mon

Seigneur, plaise vous me lauer, me purifier, me sanctifier avec ce precieux sang. Plaise vous l'offrir à vostre Pere, pour la parfaite satisfaction & remede de tous mes maux. Je vous supplie, qu'avec tres-ardent amour, ie merite de succer avec mō cœur, & leicher avec la lāgue de mon ame, les tres-precieuses gouttes de ce sang diuin: & qu'en cet endroit ie gousté combien est doux & suaue vostre esprit, & combien est plaissant cette precieuse liqueur. *Aue Maria.*

35 Je vous rends graces, ô doux Iesus, qui ^{Entre} pour moy voulustes bien estre entre deux ^{deux} larrons, & estre reputé pour larron, afin ^{larrōs.} que par vostre incroyable humilité & ^{Marc.} patience vous guarissiez nostre impatience & orgueil, les ruinant & destruisant du tout. Releuez, Seigneur, mon esprit en haut, afin que de là ie desprise toutes les choses qui se voyent en ce monde, & qu'en vous seul ie fiche mes yeux: que ie n'aime que vous seul, que ie ne pense qu'à vous seul, pour vous seul ie souspire, de vous seul ie parle, de vous seul ie songe; que ie ne sçache que vous seul, qu'en vous seul ie me delecte, & que ie ne cherche contentement en autre qu'en vous seul.

39 Je vous rends graces, ô doux Iesus, qui

488 PARADIS DES PRIERES,

Prie
pour
ceux
qui le
cruci-
fient.
Luc. 25.

fustes si benin enuers les meschans , que vous fistes oraison mesmes pour ceux qui vous crucifierent, disant : Pere, pardonnés leur , car ils ne sçauent ce qu'ils font : Donnez-moy la grace , Seigneur , de vraye patience & douceur , avec laquelle suiuant vostre exemple & commandement , i'ayme mes ennemis, & que ie fasse bien à ceux qui me fõt mal, & qu'humblemēt & de tout mon cœur ie vous supplie pour eux , qu'il vous plaise me pardonner. *Aue Maria.*

Moc-
qué en
la

Croix.
Matt. 17

37 Ie vous rends graces , ô doux Iesus, qui fustes mocqué de vos peruers ennemis, avec grands blasphemes, pendant que vous souffriez des tourmens intollerables & aigres angouisses en la Croix. Oütroyez-moy, Seigneur, que me souuenāt de cette ineffable humilité & patience, avec laquelle vous supportastes tant de douleur & vituperes, ie supporte patiemment choses semblables, & qu'avec vous ie perseuere en la Croix de patience iusqu'à la mort. Que nulle impetuosité ou force de tentation, nulle tēpeste de tribulation ou iniures , ne me destournent du bon propos & deliberatiō encōmencée: ny la mort, ny la vie, ny le present, ny le futur, ny chose aucune créée, ne me puisse separer de vous. *Aue Maria.*

38 Je vous rends graces, ô doux Iesus, qui ^{Promes} endurastes, que l'un des deux larrons se ^{se du} mocquaist de vous, & octroyastes benigne- ^{para-} ment le Paradis à l'autre, qui conneut sa ^{dis au} faute, & d'une foy pleine de pieté vous ^{larron.} confessa. O si i'estois si heureux, que ie me- ^{Luc 23.} ritasse ainsi estre regardé de ces yeux de mi-
sericorde, avec lesquels vous regardastes
cet heureux larron, afin qu'estant aymé de
vostre grace, ie vescuissse tout le temps de
ma vie en telle innocence, que ie méritasse
en la fin ouyr de vous cette douce parole.
Ce iourd'huy tu seras en Paradis avec moy.

Aue Maria.

39 Je vous rends graces, ô doux Iesus, qui ^{Recō-} voyant de vostre Croix, vostre tres-dou- ^{manda-} ce mere, pleine de douleurs & de larmes, ^{tion de} ayant compassion en vostre cœur de ses ^{sa mere} angoisses, la recommandastes à vostre ^{à saint} bien-aymé disciple saint Iean, lequel in- ^{Iean.} continent aussi vous recommandastes à el-
le mesme, & ensemble tous nous autres
avec luy. Octroyez-moy, Seigneur, que
i'honore, & que i'ayme cette Vierge glo-
rieuse, d'un tres-ardent & tres-chaste
amour; afin que la tenant pour mere, ie
merite qu'elle me tienne & traicte pour son
enfât. Faites, Seigneur, qu'elle me soit pro;

490 PARADIS DES PRIÈRES,
rectrice en toutes mes necessitez, & singu-
lierement à l'heure de la mort. *Aue Maria.*

L'imé-
tation
à son
pere
Marc.
15.

40 Je vous rends graces, ô doux Iesus, qui
ayant encor vos playes ouuertes, & la te-
ste environnée d'espines, & pendant mise-
rablement les bras de la Croix, vous la-
mentastes, protestant d'estre abandonné
de vostre Pere. Faites-moy la grace, Sei-
gneur, qu'en toutes mes aduersitez & ten-
tations i'aye mon recours à vous, Pere pi-
toyable: & que me deffiant de moy-mes-
me, de vous seul ie me fie, me commettant
tout entre vos mains. Navrez interieu-
rement mon ame avec la memoire de vos
playes: faites qu'elles soient imprimées au
plus profond de mon cœur: & enyurés-
moy de vostre sang en telle sorte, que ie ne
pense ny cherche autre chose que vous seu-
lement, que mon ame ne trouue, ne posse-
de, & ne retienne que vous seulement. *Aue
Maria.*

*Cinquième Oraison à Iesus, & dernier dixain
du Rosaire.*

L'espō-
ge.
Mat.
17.

24 **I**E vous rends graces, ô doux Iesus,
qu'à l'heure de vostre mort voulustes
que pour estancher vostre soif, on vous
presenta à la bouche vne esponge pleine
de vinaigre, à ce que goustant en cet estat

si douloureux vne si amere refrigeration, vous satisfissiez à vôtre Pere pour tous nos pechez de gloutonnie, pour nous laisser vn merueilleux exemple d'aspreté & pauvreté. Faites-moy la grace, Seigneur, que pour vostre amour ie mesprise toutes precieuses & delicates viandes : & que i'vse temperamment de celles que vous m'offroyez pour sustenter ce miserable corps, & que ie vous en rende graces infinies. Seigneur, rendez sain & purifié le goust de mon ame : à ce que tout ce qui vous plaist, me soit sauoureux, & que tout ce qui vous desplaist, me soit insipide & ennuyeux. *Aue Maria.*

42. Je vous rends graces, ô doux Iesus, *Consummatus* ardent amateur de l'humain lignage : qui si ^{matum} parfaitement conduistes à fin l'œuvre de ^{est.} Ioã. i. 9. nostre Redemption, vous offrant vous-mesmes pour vif sacrifice en l'autel de la Croix, pour les pechez du monde. Faites-moy la grace, que vous seul soyez le but & signe, auquel tendent toutes mes pensées, œuvres, & paroles : à ce qu'en toutes choses ie cherche avec vne droicte & chaste intention, tant seulement vostre honneur, & que ie ne cherche ny desire chose aucune fors que vous. Faites-moy la grace, Sei-

492 PARADIS DES PRIERES,

gneur, que iamais ie ne cesse, & iamais ie ne me lasse de vous seruir : mais que se renouellant en moy de iour en iour la ferueur de l'esprit, chacun iour ie me face plus prompt & diligent à vous seruir & louer. *Aue Maria.*

La
mort.
Luc 23.

43 Je vous rends graces, ô doux Iesus, puis que volontairement pour nous vous auez appelé la mort, abbaisant vostre chef venerable, & recommandant vostre esprit au Pere, le separastes de vostre chair : & nous demonstastes clairement que vous estiez ce bõ Pasteur, qui met sa vie pour ses ouailles. Faites-moy la grace, Seigneur, que ie sois mort à tous vices, & mauuais desirs : & qu'en vous seul ie viue, que vous seul ie sente : à ce qu'acheuât le cours de cette vie fragile en vraye charité, i'entre incontinent en vous, qui estes le vray Paradis de nostre ame. *Aue Maria.*

44 Je vous rends graces, ô doux Iesus, qui voulustes qu'avec le fer de la lance, le costé vous fut ouuert, & le cœur manifesté, & que de là coulât sang & eau, pour lauer & donner vie à nos ames. O si mon cœur estoit navré avec la lance de vostre amour, de telle façon que ie ne cherchasse iamais autre chose, que ce que vous cherchez.

Faites, Seigneur, que le secret de vostre charité, & le thresor de vostre diuinité, entre en mon ame par la playe de vostre costé: afin que là ie vous adore, mon seul vray Dieu, pour moy crucifié & mort: & ostez de ma memoire toutes les choses visibles: à ce qu'à vous seul i'aye mon regard, & mō intētion en toutes choses. *Aue Maria.*

45 Ie vous rends graces, ô doux Iesus, qui avec grandes plaintes & lamentations de vos amis fustes osté de la Croix, & oingt d'onguens precieux & odoriferans, enuëloppé en vn linge: & non seulement enseuely, mais enseuely en sepulture d'autrui! Atterrez, atterrez tous mes sentimens, toutes mes forces, toutes mes affections; à ce qu'vny avec vous seul, qui estes vray lien d'amour ie demeure cōme hors de moy en toutes choses, qui ne sont conformes à vostre bon plaisir, & que ie ne sente que vous mon seul & vnique bien, mon vnique thresor, mon vnique Redempteur. *Aue Maria.*

La se-
pulture
Luc 23.

46 Ie vous rends graces, ô doux Iesus, qui avec grande puissance descendistes aux enfers, où ayant rompu & fracassé le pouuoir de l'ennemy, resiouïstes de vostre presence ces anciens Peres qui là estoient captifs, & les tirant des tenebres de prison,

494 PARADIS DES PRIÈRES,

les conduistes aux ioyes de Paradis. Faites donc, ie vous supplie, maintenant, que la vertu de vostre sacré sang & Passion descende sur les ames de mes parens, amis, bien-faïcteurs, & de tous les fideles trepassez à ce que deliurées des peines de Purgatoire, elles soient receües en la felicité eternelle. *Aue Maria.*

47 Je vous rends graces, ô doux Iesus, qui sortant victorieux du Sepulchre clos & fermé, resuscitastes, ayant surmonté la mort, tres-noble & excellent triomphe: & ayant rendu la clarté à vostre precieux corps, rendistes vne ioye inestimable à vos amis par vostre uisitation: Oütroyez-moy ie vous supplie, Seigneur, que ressuscitant de la mort de mes pechez, & de leur vieille & ancienne conuersation, d'icy en auant ie viue vne vie nouuelle, cherchant les choses hautes, & non les basses, afin que quād vous, qui estes ma vie, apparoißrez de nouveau en cette terre, ie sois pareillement representé en gloire avec vous. *Aue Maria.*

48 Je vous rends graces, ô doux Iesus, qui quarante iours apres vostre Resurrection, en presence de vos Disciples, montastes glorieux & triomphant au Ciel: où seant à la dextre de vostre Pere eternel, vous viuez

&

& regnez eternellement. O si mon ame estoit tellement enamourée de vous, que toutes les choses terrestres luy fussent ennuyeuses, & soupirant tousiours par les Celestes, elle eust vn continuel & enflammé desir d'icelles ! O si ie n'auois affection à aucune chose, & que ie ne prinsse plaisir qu'à vous seul, mon Seigneur, & mon Dieu. *Aue Maria.*

49 Le vous rends graces, ô doux Iesus, qui Le 8.
enuoyastes le S. Esprit à tous vos esleus, Esprit.
lesquels perseueroient en Oraison, & les Aët. 2.
enuoyastes prescher à toutes gens, par tout le monde vniuersel. Purgez, Seigneur, l'interieur & le profond de mon cœur, donnez-moy vraye pureté & netteté de conscience, à ce que ce mesme esprit consolateur y trouuant logis agreable, l'illumine & embellisse enabondance des dons de ses graces, & que luy seul me console, me confirme, m'occupe, me gouuerne, & me possede entierement. *Aue Maria.*

50 Le vous rends graces, ô doux Iesus, qui Le iu-
venant à iuger le monde au iour du iuge- gemēt.
ment, donnerez à chacun, ou loyer, ou Matt.
chastiment selon ses œuvres. Helas ! mon 25.
Dieu, & Seigneur tres-pitoyable, faites-moy la grace que passant innocemment le

496 PARADIS DES PRIÈRES,
cours de cette miserable vie, selon vostre
saincte volonté, mon ame parte de la pri-
son de ce corps si ornée de merites, & de
vertus, qu'elle soit par vostre grande mise-
ricorde receuë en vostre gloire! où ensem-
ble avec tous les Saints, ie vous puisse
louier & benir en tous les siecles des siecles.
Pater noster. Aue Maria.

Sixième Oraison à Iesus.

Grena-
de en la
1. par-
tie des
addi-
tions
du Me-
morial. **I**E vous adore, mon Seigneur Iesus-
Christ, Roy des Cieux, lumiere du
monde, Seigneur des Seigneurs, Prince
de paix, vertu de Dieu, & sapience du Pe-
re eternal. Je vous adore Reconciliateur
des hommes, Aduocat des pecheurs, sou-
las des trauaillez, consolation des affligez,
& guerdon des iustes. Je vous adore, pain
de vie, medecine de l'ame, Redempteur
du monde, allegresse du Ciel, sacrifice
agreable, hostie pacifique, qui par l'odeur
& soüefueté de vos vertus, auez incliné les
yeux du Pere eternal à regarder nos mise-
res, ouyr nos gemissemens & nous re-
ceuoir en sa grace.

O tres-pitoyable Iesus, ie viens icy con-
fesser cette inestimable pieté, de laquelle
vous auez vsé enuers nous, sans que nous
l'eussions merité: & vous viens offrir vn sa-

crifice de loüanges, pour tous les benefices, par lesquels vous auez fait du bien à cette mauuaife semence, vaisseaux d'ire, enfans reprouuez, seruiteurs inutiles, & dignes de mort. Car estant tels que nous estions, vous brilastes vos yeux d'enhaut pour regarder nos miseres, & vistes l'affliction de vostre peuple, & descendistes pour le deliurer. Et iacoit que vous soyez vray Fils de Dieu, qui soustenez routes choses par vostre vertu, & les gouvernez par vostre Sapiëce, au nom de qui toute la nature créée flechist les genoux: ce neantmoins vous n'auiez pas desdaigné d'abbaisser la hauteur de vostre pouuoir, iusques au cachot tenebreux de ce siecle: & vous faire compaignon de nos miseres, vous reuestant du sac de nostre mortalité, afin de consommer par vostre pouuoir nostre foiblesse, & changer nostre mortalité en eternité: laver nos pechez avec vostre sang, & remettre nostre nature en l'innocence perduë.

Vous ne voulustes pas enuoyer pout cét effect aucun des Anges, ou des Cherubins, ou Seraphins: mais vous mesme voulustes venir pour la volonté du Pere, (duquel la bonté infinie nous est descouuerte en vous, qui estes son image, & son Verbe) sans tou-

498 PARADIS DES PRIERES,
tesfois changer, ny quitter le lieu que vous
tenez, mais offrant à nos yeux vostre pre-
sence par le moyen de vostre sainte huma-
nité: C'est pourquoy vous estes descendu
du sein du Pere és entrailles de la mere: dās
lesquelles vous fustes conceu par la seule
vertu du saint Esprit, avec vne si grande
merueille, que vous ne perdistes point
l'humanité la gloire du Pere, ny ne dimi-
nuastes point en naissant la virginité de la
mere.

O merueilleuse & incomprehensible al-
liance! Le Seigneur de la gloire conioinct
sa tres-haute diuinité avec la bassesse de no-
stre humanité: le facteur des creatures ne
se desdaigne point de prendre la forme
d'un serf, & non pas seulement d'un serf,
mais encores d'un pecheur. O tres-ayma-
ble Iesus, quelle grande charité fut celle
que vous nous auez monstrée en cette œu-
re! Vous ne vous estes pas contenté d'es-
tre nostre Seigneur, Createur & prote-
cteur: mais encores vous vous estes fait
nostre compagnon, nostre frere, nostre
chair & nostre sang.

O ineffable humilité, ô pauvreté inesti-
mable, ô amour incomprehensible! Re-
garde, ô mon ame, comme ce Dieu si

grand, qui remplit le Ciel & la terre, demeure en vne petite creiche : regarde comme celuy pour qui la largeur des Cieux est estroite, demeure enuelpé en des pauvres drappeaux : regarde comme celuy de qui despend toute la nature créée, demeure couché sur la poitrine d'une fille, regarde comme celuy qui donne à manger à toutes les creatures, s'entretient d'un peu de lait : & comme celuy qui tonne là haut és Cieux, à la voix duquel toutes les puissances Angeliques s'humilient, & abaissent leurs ailles, se plaint au berceau.

Pourquoy mon Dieu, auez-vous voulu naistre si humble, & si pauvre, si ce n'est pour commencer la premiere leçon de vostre doctrine, laquelle consiste en l'humilité, principe & fondement de toutes les vertus ? Que diray-ie donc de cette pauvreté ? vous vous estes fait tellement pauvre, que mesme n'avez pas eu en cette natiuité vn petit coin de propre pour vous retirer : mais vous naquistes en vne estable, qui fut encor prestée à vostre tres-saincte mere, entre deux animaux. Quelle creature fut iamais au monde si pauvre, qu'à son enfantement elle vint à mettre son fils en vne creiche, parmy la paille & le foin, &

500 PARADIS DES PRIERES,
parmy l'haleine des bestes, à faute de meilleur confort & soulas?

Outre ce, quel cœur y aura-il Seigneur qui ne s'esmeue à l'amour & deuotion, considerant non pas seulement cette extrême pauureté: mais encor l'amour inestimable que vous nous auez icy demonstree, vous faisant si pauvre pour vous, & si riche pour nous? C'est le propre des hommes riches d'enrichir les autres par leur pauureté: car il faut qu'ils retranchent de leurs biens ce qu'ils ont à donner aux autres. Mais vous, Seigneur, quelle necessité auez-vous de vous appauvrir pour nous enrichir? vous auez pris mon humanité, pour me donner vostre diuinité: vous auez voulu estre fils de l'homme, pour me faire enfant de Dieu, afin que ie fusse par grace ce que vous estiez par nature: & outre ce, vous qui estes le pain des Anges, vous vous estes mis dedans vne creiche pour vous faire la viande des bestes. Car que sont autre chose les hommes, sinon ces bestes, desquelles le Prophete parle, quand il dit: *Les bestes se corrompront en leur fient*: c'est à dire en la puantise & corruption de leurs pechez. Vous vous estes dōc mis dedās vne creiche pour les hommes deuenus

bestes: & auez voulu vous faire foin (puis que toute chair est foin,) afin que les bestes vous trouuassent-là en son propre lieu. Vous auez veu les hommes faits chair, qui ne sçauoient aymer que la chair: à raison dequoy vous vous estes fait chair vous mesme: en laquelle vous auez mis tant de douceur & souëfueté, que le cœur de celuy sera bien endurcy, qui ne vous aymera de tout son pouuoir.

Qui pourra, Seigneur, expliquer les traualx que vous auez endurez en cette chair tres-saincte, les voyages que vous auez faits, & les exemples de vertu que vous nous auez donnez durât tout le cours de vostre saincte vie? Car que fut autre chose vostre vie, sinon vne lumiere, & vn exemple tres-parfait de toute vertu? C'est pourquoy quand ie me veux connoistre, ie iette les yeux sur vostre tres-saincte vie, comme sur quelque miroir resplandissant, & là ie voy clairement ce qui me defaut. Là ie trouue vne vraye obeïssance, profonde humilité, volontaire pauureté, ineffable pureté, merueilleuse patience, constante perseuerance, longanimité grande, mais sur tout vne incomprehensible charité, & celle vertu dont nostre misere a plus

302 PARADIS DES PRIERES,
grand besoin, à sçauoir vostre tres-grande
misericorde: & finalement toutes les ver-
tus que ie peux desirer, ie les trouue icy
comme escrites & depeintes en vn tableau
bien poly.

Car vous estes veritablement ce liure
que le Prophete vid escrit dedās & dehors,
puis que toute vostre sainte vie, en ce
qu'elle descouuroit dehors, & receloit au
dedans, est d'une merueilleuse doctrine &
vertu: & sans doute quiconque estudiera
dans ce liure, & le mangera comme fit le
Prophete, il trouuera là dedans des mor-
ceaux d'or.

O tres-clement & tres-doux Seigneur,
que vous puis-ie donc donner pour tant de
benefices? Veritablement quand i'aurois
toutes les vies des enfans d'Adam, tous les
iours & toutes les années du siecle, & tous
les traux des hommes qui sont, furent,
& seront iamais, tout cecy ne seroit rien
pour payer le moindre de ces benefices. Et
puis que rien de tout cela n'est en ma puis-
sance, & vous, Seigneur, vous auez fait
toutes ces choses, afin que ie m'en seruisse,
ie vous supplie qu'il vous plaise adiouster
vne autre grace à toutes ces graces: c'est
que ie reconnoisse, & ne sois iamais ingrat

de tels benefices, & que i'aye le soin & la diligence requise pour me sçauoir seruir d'iceux, avec vn tres-ardent amour de celuy qui m'a fait tant de bien, Amen.

Septiesme Oraison à Iesus, en laquelle on luy rend grace de tous les benefices receus d'iceluy.

IE vous rends graces, ô doux Iesus, qui m'avez fait & créé à vostre image & semblance, & m'avez donné ce corps avec tous les sentimens, & cette ame avec toutes les puissances, afin que de toutes icelles ie vous peusse connoistre & aimer. Faites-moy la grace, Seigneur, que ie vous puisse seruir de telle sorte, que mortifiant en moy toutes passions & inclinations vicieuses, ie vienne à reformer en moy l'image que vous, Pere celeste, avez créée: & que ie commence à reformer en moy la diuine similitude par l'innocence de ma vie.

Je vous rends graces, ô doux Iesus, pour le bien-fait de ma conseruation, puis que vous-mesme qui m'avez créé, me conseruez continuellement en l'estre que vous m'avez donné; mesmement que pour cette mienne conseruation vous avez créé toutes choses en ce monde, le Ciel, la ter-

Grena-
de li 5.
du Me-
morial.

504 PARADIS DES PRIERES,
re, la mer, le Soleil, la Lune, les estoilles,
les animaux, les poissons, les oyseaux, les
arbres, & finalement toutes les autres
creatures. Desquelles vous avez créé les
vnes pour nous conseruer, les autres pour
nous guerir: les vnes pour nous instruire,
& les autres pour nous chastier. Je vous
supplie donc, Seigneur, me faire la grace
que ie sçache bien vser de toutes ces creatu-
res vostres, & à telle fin qu'elles sont créés:
c'est à dire, que par le moyē d'icelles ie par-
uienne à la vraye connoissance de vous qui
estes mon vray Dieu & Seigneur: & que
par le moyen d'icelles mon cœur soit exci-
té & enflammé à la contemplation &
amour de vostre saint nom.

Je vous rends graces, ô doux Iesus, pour
le bien-fait de ma redemption, c'est à di-
re pour l'incomprehensible benignité &
misericorde, de laquelle vous avez vſé en-
uers moy, & pour cette profonde humi-
lité & tres-ardente charité, de laquelle
vous m'avez aymé, supportant pour moy,
tant & de si grands trauals. Je vous rends
graces pour toutes les peines & fatigues de
vostre tres-sainte vie, & de vostre hon-
teuse mort. Je vous rends graces pour l'hu-
milité de vostre incarnation, pour la pau-

ureté de vostre Natiuité , pour le sang de vostre Circoncision , pour vostre exil en Egypte , pour les ieusnes que vous fistes au desert , pour les veilles en Oraison , pour les lassitudes de vos peregrinations , pour les discours de vos Predications , pour le trauail de vos persecutions , pour les calomnies de vos ennemis , & pour la pauureté & humilité de vostre vie tres-saincte.

Je vous rends graces , ô doux Iesus , pour l'Oraison que vous fistes au iardin , pour le sang que vous suastes , pour vostre prison , pour les soufflets , pour les blasphemes , pour les battures , pour la couronne d'espines , pour la robbe de pourpre : pour les mocqueries , pour les vituperes , pour la sentence de l'inique iuge , pour le fiel & vinaigre , pour les cloux & la mort , pour la sepulture , pour la Croix , & finalement pour vostre glorieuse resurrection , Ascension , venue du saint Esprit , parce que vous auez ordonné & institué tous ces mysteres pour mon salut.

Je vous rends graces , ô doux Iesus , qui dès ma Natiuité & au commencement de ma vie , me receustes au sein de vostre sainte Eglise , & m'auiez nourry en la foy Catholique , me faisant Chrestien , sustentat &

506 PARADIS DES PRIERES,
conseruant mon corps & mon ame iusqu'à
present. Plaise à vostre Majesté que vous
seul soyez la viande sauoureuse de mon
cœur; & que mon ame ait perpetuelle soif;
mais seulement de vous, fontaine de vie,
iusqu'à ce que le cours de cette peregrina-
tion soit acheué, & que puis apres ie iouysse
en vostre beatitude de ces tres-abondantes
flammes, qui sortent de vous, ô fontaine
de vie & felicité.

Je vous rends graces, ô doux Iesus, qui
iusques à maintenant m'avez diuerty & de-
liuré de plusieurs grands dangers, tant du
corps que de l'ame, qui meritois bien pour
mes tres-grandes iniquitez estre le plus
souuent abandonné de vous. Illuminez, ie
vous supplie (Seigneur) mon cœur avec la
lumiere de vostre grace, afin que connois-
sant clairement la grandeur de vostre pieté
& de mon ingratitude, ie pleure incessam-
ment mes pechez, & que ie mette peine à
l'aduenir seulement de plaire à vous, mon
Seigneur & mon Sauueur.

Je vous rends graces, ô doux Iesus,
pource qu'estant endormy & enseuely en
la fange & ordure de mes pechez, viuant
meschamment, vous m'avez si long-temps
supporté, m'attendant avec si longue pa-

tience à penitence. Oûtroyez-moy , Seigneur , par vostre grace , qu'avec vne viue contrition , & avec bonnes œuures ie puisse rompre les esquadrons & troupes de mes pechez commis , & que pour l'aduenir ie vous ayme de tres-ardent amour avec toute pureté de cœur.

Ie vous rends graces , ô doux Iesus , de ce que cheminant en la voye de perdition , & estant desia proche de la bouche de l'enfer , vous n'avez pas voulu que ie perisse : ains derechef m'avez cõduit au chemin de la vie , lors que ie ne pensois à vous , & lors que ie fuyois de vous , resistant à vos saintes inspirations. Oûtroyez-moy que d'icy en auant , ie vous suiue d'humble & d'entiere affection , & qu'avec toute diligence & obeissance , i'embrasse vos saintes inspirations , & que ie chasse de mon cœur toute amour de choses visibles : afin que du tout il se conuertisse à vous , sans plus iamais s'en destourner.

Ie vous rends graces , ô doux Iesus , de m'auoir conserué & deffendu , n'estant que tres-vil pecheur : m'ayant regardé des yeux de vostre misericorde de telle façon que mesme lors que ie peche , vous me sustenez , & me visitez , deffendez & recreez

508 PARADIS DES PRIERES,
aussi continuellemēt, comme si vous auiez
mis tous les autres hommes en oubly, &
n'eussiez soin que de moy seul. Faites, Sei-
gneur, que ie vous ayme tres-ardemment,
& que i'abandonne toutes choses transi-
toires pour l'amour de vous, que ie ne pen-
se qu'à vous seul, que ie vous suiue tousiours
avec toute promptitude, mettant en exe-
cution vostre sainte volonté.

Ie vous rends graces, ô doux Iesus, sur
tous les benefices, d'auoir ordonné & in-
stitué pour mon remede, tant & de si beaux
Sacremens, & de m'auoir visité avec tant
d'inspirations, & préservé de tant de maux;
& autres particuliers & secrets benefices
que vous m'avez faits, me promettant en-
cores la beatitude de la gloire, si cen'est
que par ma grande faute ie me rende indi-
gne d'icelle. Oütroyez moy (Seigneur) que
tels & si grands benefices ne me soient oc-
casion d'orgueil & negligence: ains de plus
grande humilité, actions de graces & desirs
de vostre seruice, Amen.

Oraison deuote du S. nom de Iesus.

O Bon Iesus, ô doux Iesus, ô Iesus fils
de la glorieuse Vierge Marie, plein
de misericorde & pieté: ô doux Iesus, fai-
tes-moy misericorde, selon vostre bonté
infinie, ô tres-benin Iesus, ie vous prie in-

digne pecheur que ie suis, par ce sang precieux que vous auez voulu verser & respandre en Croix pour les iniques pecheurs, qu'il vous plaise oster de moy tous mes pechez, & ne vueillez pas mespriser ce seruiteur vostre, qui vous prie humblement, & qui inuoque vostre tres-sainct nom de Iesus.

O que cestuy vostre nom Iesus est vn nom tres-doux! ô que ce nom de Iesus est vn nom salutaire! car que signifie Iesus, sinon Sauueur? Et partant, ô bon Iesus, qui par vostre bonté m'avez créé, & m'avez racheté avec vostre sang precieux, ne permettez pas que mon ame s'en aille en enfer, à raison de mes iniquitez. Que mon iniquité, bon Iesus, ne damne point mon ame créée par vostre infinie bonté.


Reconnoissez en moy, ô bon Iesus, ce qui est vostre, à sçauoir mon ame, & chassez de moy les choses qui ne sont pas à vous, à sçauoir mes pechez. O bñ Iesus, faites-moy misericorde tandis que ie seray en ce mode, afin que ie ne sois point damné au iour de vostre iugement effroyable. O bon Iesus, si cōme pecheur peruers & meschāt, ie merite par vne vraye iustice d'estre damné pour mes griefs & enormes pechez, j'appelle humblement de vostre equitable

110 PARADIS DES PRIÈRES,

Justice, à vostre pitoyable misericorde, m'assurant que vous, mon Seigneur Iesus, aurez pitié & misericorde de mon ame, comme pere pitoyable, & Dieu misericordieux. Quelle utilité, ô bon Iesus, retireriez vous de ma chair, si mon ame descendoit en enfer? C'est vne chose certaine Seigneur, que pas vn de ceux qui descendent aux enfers, ne louera iamais vostre saint nom Iesus.

O Iesus tres-misericordieux, ayez pitié de nous: ô tres-doux Iesus, deliurez-nous de tous nos travaux & tribulations. O pitoyable Iesus, soyez debonnaire envers nous pecheurs miserables. O tres-sacré Iesus, faites que nos ames soient au ciel, compagnes de vos esleus, ô Iesus, salut de tous ceux qui esperent en vous, confortez-les & leur donnez consolation.

O Iesus, salut de tous ceux qui croient en vous, ayez misericorde & pitié d'iceux. O Iesus fils de la tres-sainte & immaculée Vierge Marie, concédez-nous vostre misericorde, grace, sapience, charité, chasteté & patience en toutes nos aduersitez, afin que nous puissions tousiours & sans fin louer, benir, honorer, & glorifier vostre tres-saint nom de Iesus.



CHAPITRE XI.

Contenant sept Oraisons deuotes,
& vn Rosaire à la glorieuse
Vierge Marie.

PREFACE.

IL n'y a point de doute, que tout ce qui se dit à la loüange de la mere, est dit à la l'honneur & loüange du fils, & toutesfois & quantes que nous recitons le los & les vertus du fils, nous ne nous esloignons en rien des loüanges de la mere. Car si selon le dire du Sage Salomon, le fils sage est la gloire du Pere, combien sera-ce chose plus loüable & pleine de gloire, d'estre la mere de la mesme sagesse & sapience? C'est pourquoy apres auoir dicté quelques Oraisons à la loüange du fils, il nous a semblé utile & raisonnable adiouster quelques semblables oraisons des loüanges & glorieuses vertus de sa benoïste & tres-Chaste mere.

S. Bernard.
Homil.
4. sur
l'Euan-
gile
Missus
est.
Pro. 10.

Tu dois donc estre aduertty, Lecteur benueo-

le, que le R. P. Grenade, apres auoir donné la methode de prier vocalement aux plus simples & deuots, au cinquième traicté de son Memorial, par plusieurs oraisons de diuerses matieres & argumens: entre les autres auoit mis sept Oraisons à la glorieuse Vierge Marie, remplies de ses louāges & d'une deuotion singuliere. Et pour autant qu'elles contenoient à peu près un Rosaire, avec lequel les plus deuots ont accoustumé saluër cette glorieuse Dame, nous les auons reduits en un Rosaire parfait, contenus és cinq premieres oraisons. Mais afin que l'intention de l'auteur ne fust frustrée, & aussi pour, & à celle fin de condescendre à la deuotion des autres qui desirent tous les iours avec nouvelle oraison saluër cette Vierge immaculée, nous auons obserué le nombre de sept en ces oraisons, comme en plusieurs autres Chapitres precedens, afin que par nouvelle oraison la deuotion se puisse pareillement augmenter & renoueller en tous les iours de la semaine.

Ceux qui vseront des sept oraisons n'auront besoin de dire les Oraisons Dominicales & salutations Angeliques, mises apres un chacun article des cinq premieres: car elles sont nottées seulement pour ceux qui se veulent seruir du Rosaire.

PREMIERE ORAISON DE LA
vie de nostre Dame.

IE vous saluë , tres-douce & gracieuse Grenade liu. 5. du Memorial. Electio de Maria.
Vierge Marie , esleuë de Dieu eternal,
pour mere de son fils vnique, auant tous les
fideles. Vous estes cette heureuse Dame,
au ventre virginal de laquelle le Roy du
Ciel & de la terre a voulu prendre nostre
chair , pour rachepter le genre humain.
Vous estes cette pitoyable mere entre
Dieu & les hommes, par le moyen de la-
quelle le Ciel s'est conioinct avec la terre:
& les choses hautes & superieures avec les
basses & inferieures. Vous estes la guide de
nostre vie, porte de la diuine grace, & port
de la mer impetueuse de ce siecle. Impe-
trez-moy (Dame) pardon de mes pechez:
& tant de grace, que de tout mon cœur ie
puisse honorer & aymer vostre cher Fils,
mon Sauueur, & vous Royne de miseri-
corde. *Aue Maria.*

2 Ie vous salüe , douce Vierge desirée Figures & Prophetes.
d'un profond desir, representée avec figu-
res, & promise par diuerses Propheties &
reuelatiōs des Peres anciē. Receuez-moy

324 PARADIS DES PRIERES,

Dame, pour vostre seruant, adoptez-moy, ô mere de grace, & octroyez-moy que ie sois du nombre de vos amis, & de ceux que vous gardez escrits & engrauez en vostre poitrine virginale, lesquels vous conseruez, adressez, & defendez en toutes choses. *Aue Maria.*

Conce- 3. Je vous saluë douce Vierge, merueille-
ptio de sement embellie & ornée de toute perfe-
la Vier- ction, de la grace de Dieu au ventre de vo-
ge. stre mere. O Vierge tres-claire, tres-pure,
& esleuë entre mille. Ne me dechassez,
Dame, encor que ie sois tel que vous sca-
uez: mais prestez l'aureille au pauvre mise-
rable qui vous inuoque: consolez le pau-
vre qui vous cherche, & secourez celuy
qui a mis en vous toute son esperance. *Aue
Maria.*

Natiui-
té de
Marie.

4. Je vous saluë, douce & gracieuse Vierge,
de laquelle la Natiuité desirée de si long-
temps, attenduë de tant de gens, a apporté
au monde nouuelle lumiere, & nouuelle
resiouïssance. O Vierge tres-innocente,
faites que ie sois innocent: & effacez en
moy ce qui desplaist à vos yeux tres-purs
& tres-chastes. Ayez misericorde de moy,
puis que dès vostre tendre ieunesse, vo-
stre aage croissant, tousiours est creuë avec

vous la miséricorde. *Aue Maria.*

5 Je vous saluë, douce & gracieuse Vierge, en laquelle Dieu a mis toute beauté naturelle, & toute grace spirituelle, avec laquelle il vous a renduë aimable à toute gēt. Beauté de la glorieuse Vierge.

O tres-belle & excellente Vierge ornée (ie vous supplie) cette mienne ame d'ornemens spirituels: plantez en mon cœur des vifs & ardens desirs de pureté, & chasteté, afin que par ce moyen ie vous plaise en toutes choses, & que ie sois vostre vray seruant & imitateur. *Aue Maria.*

6 Je vous saluë, douce & benigne Vierge Marie, qui fustes conduite par vos parens au Temple: & là présentée au Seigneur, & offerte à son seruice, auez tousiours vescu Presentatiō de Marie au Temple.

d'une vie Angelique, humble, vertueuse, & en tout agreable au Seigneur. Faites que ie ressentie en moy l'odeur de vostre tres-saincte cōuersation, afin que tant qu'il me sera possible ie ne sois iamais moleste ny enuieux à personne, que ie n'offence & ne scandalise iamais aucun: mais que ie serue de consolation à tous, & que ie prouoque chacun à l'amour de Dieu & au mespris du monde. *Aue Maria.*

7 Je vous saluë, douce Vierge Marie, vray exemple, & Vierge des Vierges, qui

vous consacrant entierement à Dieu, fistes vœu de Virginité d'une gaye, libre, & deliberée volonté. Vous estes parfait exemple de parfaite chasteté & pureté, la tres-sainte & tres-chaste conuersation de laquelle penetroit les cœurs de ceux qui vous regardoiēt, creant en eux avec une lumiere celeste, vray amour de pureté & de chasteté : Impetrez-moy (ô belle Dame) une telle pureté d'esprit & de corps, que nulle ordure ne me souille, que nul vice ne me possède, que ie ne consente à aucune delectation : mais que desprisant toutes les delices & concupiscences charnelles, tout mon plaisir & repos soit tant seulement en vostre benoist Fils. *Aue Maria.*

8 Je vous salue, douce Vierge Marie, qui en vos sacrées occupations & exercices de contemplation, estiez consolée de Dieu par une particuliere visitation & familier office des Anges, non sans merueilleux plaisir de la pureté de vostre conscience. Impetrez-moy (ô glorieuse Dame) en faueur de vos merites, amour de silence, de repos & d'occupation en saintes prieres & oraisons, & en lecture des choses diuines, & en autres exercices spirituels, avec sincerité & repos de mon

ame, & qu'en tout cela soit son plaisir & delectation, tant qu'elle demeurera enfermée en la miserable prison de ce corps.

Aue Maria.

9 Le vous saluë, douce Vierge Marie, qui par diuine disposition & conseil fustes mariée avec le saint personnage Ioseph. Faites en sorte ie vous supplie (ô glorieuse Dame) que ie ne me separe iamais de vous; mais regardez-moy tousiours de vos yeux gracieux: Car tout ainsi que celuy qui est regardé de vos yeux irritez & courroucez, ne peut viure: aussi ne peut perir celuy qui est regardé de vous avec vn doux & gracieux regard. Receuez donc, ô Dame, l'esprit de celuy qui vous aime, & conseruez celuy qui se confie du tout en vous, soiez tousiours enuers moy gracieuse & pitoyable, à ce que par vostre moyë ie trouue grace aupres de celuy qui vous a esleü. *Aue M.*

10 Le vous salüe, douce Vierge Marie, qui estant en tres-haute contemplation en vostre Oratoire fustes salüée de l'Ange Gabriel, avec grande humilité, vous faisant participante des mysteres du grand Conseil diuin. O pleüst à Dieu que tout mon plus grand plaisir, fut de vous salüer souuent, vous offrant les fideles & deuotieux

Esposée à Ioseph,

Annonciation
Luc. 1.

518 PARADIS DES PRIERES,
seruices qui vous sont deuz , & qu'il ne se
trouuaft en moy aucune chose qui peust of-
fenser vos yeux si purs , qu'ils surpassent les
Anges en pureté. *Aue Maria.*

*Deuxiesme Oraison , & second dizain
du Rosaire.*

Conce-
ptio du
Fils de
Dieu.

II **I**E vous saluë , douce Vierge Marie,
qui en vos tres-chastes entrailles con-
ceustes le Fils de Dieu. O bien-heuse en-
tre toutes les femmes : dictes - moy , ie
vous prie , quelle ioye sentistes vous lors
au secret de vostre ame , quand cette veine
d'eaux viues , cette cause de toute douceur
entra en vostre tres-saincte habitation , se
vestant de vostre tres-pure chair. Ie louë
& glorifie , ô Vierge glorieuse , & reuer
humblement vos tres-sacrées entrailles
Virginales:plaise vous conseruer & accroi-
stre tousiours en mon ame le don de pureté
& chasteté. *Pater noster. Aue Maria.*

Visita-
tion.
Luc. 1.

12 Ie vous saluë , douce Vierge , qui alla-
stes aux montagnes de Iudée , portant avec
vous le Roy de gloire enfermé dans vôt
chaste ventre , visitastes & seruistes vostre
parente sainte Elizabeth. Visitez ie vous
supplie , ô Dame glorieuse , cette mienne
ame , & faites que fidelement ie vous
serue , & que ie vous aime de tout mon

cœur tout le temps de ma vie. *Aue Maria.*

13 Le vous saluë, douce Vierge Marie, Voyage de Bethleem. Luc. 2.
 qui avec vostre saint espoux Ioseph, estât
 fille si delicate, portant en vostre tres-cha-
 ste ventrel'vnique Fils de Dieu, partistes
 de Nazareth, & allastes en Bethleem pour
 payer le tribut que chacun deuoit payer.
 Faiâtes moy la grace, ô glorieuse Dame,
 que ie supporte ainsi patiemment les misê-
 res de cét exil, & que tousiours ie desire &
 aspire à cette Bethleem celeste, où le pain
 de vie, I. Christ nostre salut. *Aue Maria.*

14 Le vous saluë,, douce Vierge Marie, L'esta- ble pour logis.
 qui toute lassé & trauaillée, quand vous fu-
 stes arriuée à cette cité ne trouuâstes aucun
 logis, & fustes contrainte choisir vne esta-
 ble pour vous reposer, & pour enfanter le
 Roy de gloire. Dirigez ie vous supplie, ô
 glorieuse Dame, & gouuernez toutes les
 affections de mon ame, afin que ie n'aime
 aucunes choses desordonnément, & que ie
 ne m'attache à icelles; mais que seulement
 comme pelerin & estranger en ce monde,
 i'aspire de tout mon desir aux eternelles
 habitations, constituant en Dieu seule-
 ment tout mon repos. *Aue Maria.*

15 Le vous saluë douce Vierge Marie, qui Enfan- tement virgi- gal.
 sans douleur & sans detrimement aucun de

520 PARADIS DES PRIERES,
vostre tres-pure virginité , enfantastes le
Sauueur du monde & la ioye du Ciel: Vous
estes cette heureuse ensemble & Vierge &
mere: vous estes le temple du vray Salo-
mon; vous estes l'Arche & sanctuaire de
Dieu; vous estes la porte fermée que vid
Ezechiel; vous estes le iardin clos , & la
fontaine cachetée de l'espoux celeste.
Remplissez ô Dame, mon cœur , & tous
mes sens de vostre grace , afin que rafraî-
chy d'un tel secours, ie viue de telle façon,
que ie vous puisse estre agreable & à vostre
Fils ynique. *Aue Maria.*

La crei-
che.

16 Je vous saluë, douce Vierge Marie, qui
enuelopastes ce doux enfant Iesus, fruit
de vostre tres-chaste ventre , en pauures
drappeaux, & le couchastes en la creiche. O
si mon esprit estoit tant occupé en vostre
amour, & mon ame tant embellie de la
pureté de vostre vie, que ie deuinsse com-
me vn petit enfant , afin que ie meritasse
d'estre aidé de vous & recreé de vos bien-
faits en toutes mes tribulations. *Aue Maria.*

Marie
alaitte
Iesus de
son
laiet.

17. Je vous saluë, douce Vierge Marie, qui
avec le laiët de vostre poitrine virginale
nourristes ce doux enfant Iesus, & le tenât
doucelement entre vos bras le baistastes &
adorastes. Faites moy la grace , que quand

ie viendray à estre las & ennuyé des tra-
uauz & miseres de cette vie, ie sois secou-
ru de vostre paternelle pieté, afin que re-
créé du lait de la consolation spirituelle,
ie desprise toute autre consolation de cette
transitoire & miserable vie. *Aue Maria.*

18 Ie vous saluë, douce Vierge Marie, qui <sup>Purifi-
cation.
Luc. 2,</sup>
quarante iours apres presentastes vostre
cher enfant Iesus au Temple, où il fut re-
ceu entre les bras de saint Simeon, chan-
tant ce doux Cantique. Maintenant
vous laissez, ô Seigneur, vostre serui-
teur en paix, suiuant vostre parole. En-
cores que puis apres il adioutast larmes
avec son chant, vous declarant les traualz
& persecutions que deuoit endurer ce tres-
saint enfant, & le cousteau de douleur,
qui vous deuoit percer le cœur. Faiâtes
moy la grace (ô glorieuse Dame) que ie
sois imitateur d'une si longue Croix &
patience, receuant avec icelle tous les
traualz que le Seigneur m'enuoyera, &
connoissant par cet exemple la grande
grace qu'il me fait avec iceux.

Aue Maria.

19 Ie vous saluë, douce Vierge Marie, qui <sup>Fuite en
Egypte.
Matt. 1.</sup>
estant aduertie par l'Ange de fuir en Egy-
pte, parce qu'Herode comme furieux

522 PARADIS DES PRIERES,
Lyon, alloit cherchant vostre petit enfant
pour le tuer, partistes de nuict pour euit
sa fureur, & abandonnant vostre ville, vo-
stre maison, & ce peu de pauureté que vous
auiez, vous retirastes en Egypte, cù vous
fustes sept ans en la terre des Barbares &
infideles, pauvre & estrangere. Faiçtes
moy la grace, Dame, que ie vous accom-
pagne tousiours en si piteux voyage imi-
tant vostre patience, vostre humilité &
pauureté, & viuant en ce monde comme
banny & estrangier. *Aue Maria.*

Perte de 20 Ie vous saluë douce Vierge Marie, qui
Iesus allant au Temple avec vostre enfant ja
aagé de 12. ans. grand de douze ans, le perdistes sans vo-
Luc 2. stre faute: & le cherchant puis apres avec
tres-grand regret & douleur, le trouuaſtes
avec tres-grande joye, disputant au Tem-
ple avec les Docteurs. Oſtroyez-moy
Dame, que quand quelquesfois ie perdray
la grace de la deuotion par ma faute; ie la
cherche avec la mesme diligence, & que
ie la retrouue & conserue avec plus de soin
pour estre tousiours plus préparé &
prompt au seruice de mon Createur.
Aue Maria.

*Troisiesme Oraison de la vie de nostre Dame,
troisiesme dizain du Rosaire.*

21 **I**E vous saluë, douce Vierge Marie, Marie
nourrie
soigneu
sement
son Fils.
qui si diligemment seruistes & nour-
ristes le Sauueur du monde en son enfance
& ieune aage, & en son adolescence &
aage viril; lors qu'il preschoit le suiuiestes.
Faites-moy la grace, que desprisant toutes
choses transitoires, ie vous aime, ie vous
suiue, & que tousiours ie sospire apres vo-
stre presence. *Pater noster. Aue Maria.*

22 **I**e vous saluë, douce Vierge Marie, qui Les
dou-
leurs
& per-
secu-
tions.
sentistes avec si grande douleur les cruelles
persecutions de vostre cher Fils, iusques
au plus profond de vostre cœur en eustes
compassion, endurant ensemble avec luy
la peine de sa terrible & ignominieuse
mort. Faites-moy la grace (ô glorieuse
Dame) que ie louë & remercie à iamais ce
Seigneur, pour toutes les choses qu'il a fai-
tes & endurées pour moy: & que pour l'a-
mour & souuenance de luy, i'aye tous-
jours compassion des affligez trauallez.
Aue Maria.

23 **I**e vous saluë, douce Vierge Marie, de Le
glaiue
de dou-
leur au
pied
de la
Croix.
laquelle la bien-heureuse ame fut transper-
cée du glaiue de douleur; lors que toute
fonduë en larmes vous estiez au pied de la

524 PARADIS DES PRIERES,

Croix, regardant de vos yeux douloureux, les playes & le sang de vostre Fils vnique qui enduroit. Faites-moy la grace que ie perseuere fidelement avec vous au pied de cette Croix, & qu'avec vn cœur deuot, ie celebre & solemnise la Passion de vostre Fils, mon Redempteur. *Aue Maria.*

Recô-
māda-
tiō à S.
Iean.
Iean. 16

24 Le vous salue, douce Vierge Marie, qui estant encore en ce mesme lieu, ouïstes cette douloureuse parole de la bouche de vostre Fils tres-sainct, qui disoit: Femme, voilà vostre Fils: avec laquelle il vous recom- mandoit son bien-aimé Disciple: luy pour- uoyant de mere, & à vous d'un fils en son lieu. Et en ce mesme lieu semblable ment luy ouïstes dire, *I'ay soif*, & ne vous fut permis donner au moins vn peu d'eau à vostre Fils qui en demandoit en mourant; mais veistes comme en lieu d'eau ils l'a- breuerent de fiel & de vinaigre. Et le veistes pareillement expirer & mourir avec grande & inestimable douleur. Et veistes apres son tres-sacré costé ouuert avec vne lance, lequel coup ne fut senty de luy estant desia mort; mais bien de vostre cœur maternel: qui encores qu'il fust comme mort, pour le regard des choses du monde, si estoit-il toutesfois

plus que vif, pour sentir les douleurs de vofre tres-cher enfant. Je vous requiers, Vierge tres-sacrée, qu'en faueur & recordation de toutes ses douleurs si eſtranges, que vous avez ſouffertes, qu'il vous plaife toucher mon cœur d'une compaſſion & memoire de toutes les douleurs, que mon Redempteur a ſupportées pour moy, & me faire participant du fruit d'icelles ! à ce que par ma faute ie ne perde le remede, que par ſa grace il m'a acquis. *Aue Maria.*

25 Je vous ſalue, douce Vierge Marie, qui toute eſplorée, & avec tres-grande douleur, receuſtes en vofre giron le corps de vofre Fils bien-aimé, apres qu'il fut deſcendu de la Croix, & d'un regard triſte & lamentable, conſiderez toutes & chacune de ſes playes, les coups & marques qu'il auoit receus en ſon corps, & nombriez l'une apres l'autre toutes les meurtriſſeures de coups de baſtons & foüets, & toutes les picqueures des poignantes eſpines, & ſur tout vous contempriez d'un œil larmoyant la playe de ſon ſacré coſté, par laquelle l'on pouoit facilement voir l'interieur de ſes entrailles, & ſon cœur diuin tout à deſcouuert : & pour tout cela vous iettiez

Deſcēte
du
corps
de Jeſus
mis au
giron
de ſa
Mere.

526 PARADIS DES PRIÈRES,

vn ruisseau de larmes , déplorant la mort tant ignominieuse de vostre Fils , & aussi pour la perte que vous faisiez d'un enfant si cherement aimé. Je vous prie , ô ma singulière & pitoyable Dame, que la playe du costé de vostre Fils me soit tousiours ouuerte , afin que par ce pertuis il me soit licite d'entrer en l'Arche , & me reposer doucement dans le cœur de mon Espoux & Seigneur. Oâroyez-moy que ie ne vueille, pense, sçache & desire autre chose , sinon Iesus , & iceluy crucifié. *Aue Maria.*

Le 16.
beau &
tristes
funerailles.

26 Je vous saluë , douce Vierge Marie, qui avec vne infinité de larmes & souspirs auez accompagné iusques au tombeau le corps de vostre Fils enueloppé en vn linceul trespur & embausmé de toutes sortes d'onguës aromatiques. En ce lieu vous auez enfermé vostre thresor , & comme en depost l'auiez couuert d'une grande pierre: là vostre tresbelle face a esté obscurcie d'un nuage de tristesse & de pleurs : là vous auez donné plusieurs baisers à Dieu & à vostre Fils , & le Soleil estant desia couché , retournaistes triste & explorée en vostre maison , iacoit que vous eussiez bien souhaitté passer les nuicts & les iours sans dormir aupres du Sepulchre , si ce n'eust esté que la religion,

&c

& la loy ne le vous permettoit ; alors vous estiez priuée de vostre Fils , alors vous experimentiez la solitude & l'absence de celuy que si tendrement vous aimiez. Je vous supplie , Dame tres-gracieuse , qu'il vous plaise me fauoriser & m'accorder que ie sois enseuely avec vostre Fils , que me separant du monde , & mourant à iceluy , ie viue seulement en Iesus-Christ ; que ie deplore sans cesse mes pechez , par lesquels i'ay causé la mort au Fils , & tant de larmes à la dolente mere. *Aue Maria.*

27 Je vous salue , douce Vierge Marie, ^{Resurre-}
qui fustes extremement resiouie , remplit ^{ction.}
de toute consolation & nouuelle douceur
d'esprit , par la glorieuse & triomphante
Resurrection de Iesus vostre Fils , lors que
de bon matin vne tres-claire lumiere s'apparut
au plus secret de vostre cabinet , lors
que vostre Fils se presenta à vous avec vne
gloire & Majesté incredible , & vous honora
de sa diuine presence , & vous consola
avec paroles pleines de toute consolation
& douceur. Faites donc par vos saintes
prieres , ô Vierge pitoyable , que le Seigneur
tout-puissant me concède , que tout
ainsi que Iesus Christ est ressuscité de mort
par la gloire de son Pere , ainsi que ie puisse

328 PARADIS DES PRIERES,

Apoc.2. ressusciter par nouveauté & sainteté de
vie: que ie puisse trouuer part en la Resurre-
ction premiere, de peur que la mort secon-
de aye aucun pouuoir & domination sur
moy. *Aue Maria.*

Ascen-
sion.

28 Je vous saluë, douce Vierge Marie, qui
le quarantiesme iour apres la Resurre-
ction allastes avec tous les autres fideles
& disciples de Iesus en la montagne des
Oliues, là où vous veistes monter vostre
Fils au Ciel, apres qu'il eut estendu les bras,
esleué les mains, & vous eut donné sa bene-
diction : & lors qu'il se fut separé de vous
montant au Ciel, vous le suiuiiez deuote-
ment avec plusieurs larmes & souspirs, &
mesme comme il est bien raisonnable de
croire, vous regardiez les troupes des saints
Peres, qui mōtoient en triomphe avec luy,
& les armées celestes & Angeliques, qui
luy venoient au deuant avec toutes sortes
d'Hymnes & Cantiques de loüanges. O
mere de grace, ie vous prie par cette ioye
ineffable & immense, que vous receustes
alors, qu'il vous plaise m'octroyer par vos
sainctes prieres, & que mon esprit puisse
suiure vōtre Fils, & mōter avec luy au Ciel:
de sorte que par cy-apres ie cherche seule-
ment les choses qui sont au Ciel & enhaut,

où est Iesus-Christ à la dextre du Pere, & non pas les choses qui sont sur la terre: & faites en sorte que là où est mon thresor, là soit pareillement & se repose mon cœur. *Aue Maria.*

19 Je vous saluë douce Vierge Marie, qui receustes visiblement le saint Esprit le iour de la Pentecoste, lequel espendit en Matt. 6 toutes les puissances de vostre ame ses Descēte du S. Esprit. dons & graces avec telles affluence: de sorte que d'esprit & de pensée vous ne compreniez que ce saint & diuin esprit: car vous seule auez autant receu de ses graces, comme ont receu tous les autres ensemble. O Vierge glorieuse, ô Marie mere de misericorde, ie vous supplie par cette ioye & ließe que sentit alors vostre cœur, quand vous veistes que les Apostres & les autres fideles estoient participans de la mesme grace, & auoient receu le benoist saint Esprit, qu'il vous vienne à plaisir de m'otroyer & obtenir par vos saintes prieres, que remply des dons & graces du S. Esprit; ie sois embrazé en l'amour de Dieu, & de mon prochain, & que ie puisse iouïr de la paix & ließe interieure. *Aue Maria.*

30 Je vous saluë, douce Vierge Marie, qui demeurastes encores viuante en ce monde

l'espace de quinze ans apres l'Ascension de vostre Fils, seruant de secours, de faueur & d'exemple à tous les Chrestiens, & mesmes veistes deuant que mourir quelque progres de la foy, & augmentation de l'Eglise: & finalement aagée de soixante & trois ans goutastes la mort: & fustes esleuée au Ciel sur toutes les compagnies des Anges, & mise en vn throsne Royal, comme Royne & Dame de toutes choses créées. Nous vous supplions donc tres-humblement (ô nostre Dame & mere) que vous soyez nostre protectrice & fidele aduocate, deuant le tribunal de vostre trescher Fils, afin que quand il viendra à iuger les viuans & les morts; nous soyons par vostre intercession deliurez de la mort eternelle, & mis à sa dextre, en la compagnie de ceux qui regneront és siecles des siecles. *Aue Maria.*

Assump-
tion.

Quatriesme Oraison, & quatriesme dizain du Rosaire.

31 **I**E vous salüe, Dame tres-excellente, & apres Dieu tres-saincte entre les Saincts: Marie, qui avec virginité de mere, & avec maternité de Vierge, auez amiablement engendré Iesus-Christ Sauueur du monde: Vous estes le tres-gra-

cieux Temple de Dieu ; Vous estes le sacré
 reposoir du saint Esprit, la chambre glo-
 rieuse de la sainte Trinité. Par vous, ô Da-
 me, tout le monde vniuersel reçoit la vie;
 par vostre moyen les viuans sont recréez,
 & les ames des trespassez sont resiouies &
 consolées par la memoire de vostre doux
 Nom. Tournez (ô tres-douce Dame) l'o-
 reille de vostre pieté à l'oraison de cestuy
 vostre pauvre & vil seruiteur : & par les
 rayons de vostre sainteté, bannissez les re-
 nebres de mes vices: afin que ie puisse estre
 agreable à vos yeux purs & bien-heureux.

Aue Maria.

32 Ie vous salüe (tres-douce mere de mi-
 sericorde) ie vous salüe reparatrice de la
 grace & du pardon. Qui ne vous aimera?
 qui ne vous honorera? & qui ne se recom-
 mandera à vous? Vous estes nostre lumie-
 re és choses dangereuses, nostre consola-
 tion en nos angoisses & necessitez, nostre
 repos en nos lassitudes & ennuis, nostre fi-
 dele secours és perils & tentations. Vous
 estes nostre certain salut & esperance au-
 pres de vostre Fils vnique. Vous estes la
 plus excellente de toutes les femmes, la
 plus gracieuse & la plus belle. Bien-heu-
 reux sont ceux qui vous aiment, & qui par

532 PARADIS DES PRIÈRES,

saincteté de vie se rendent vos familiers. Je recommande mon ame & mon corps à vostre pieté & misericorde. Gouvernez-moy, enseignez-moy, & me defendez à toutes heures & moment, ô mon doux refuge & ma vie. *Aue Maria.*

33 Je vous saluë, salle magnifique, & resplendissant Palais de l'Empereur eternal. Vous estes cette femme tant aimable, pitoyable, prudente, genereuse, elegante & digne d'estre honorée sur toutes les creatures. Vous estes cette Royne du Ciel, qui reluit comme l'aube du iour, qui se leue belle comme la Lune, esleuë comme le Soleil: terrible & espouuantable aux malins esprits, comme vne armée en bataille bien ordonnée. Octroyez-moy, que durant la tempeste de cette vie i'aye tousiours les yeux dresséz vers vous, à ce que mettant à mespris toutes les choses visibles, ie puisse contempler ces belles delices, & delicieuses beautez, qui sont en l'habitation de la gloire. *Aue Maria.*

34 Je vous saluë, estoille tres-claire de laquelle est sorty le Soleil de Iustice, Iesus-Christ nostre Seigneur & Sauueur. Vous estes Vierge, belle par dessus toute beauté: vous estes mere par dessus toute honnesté.

té, & gracieuse qui de vos doux yeux & benins regardez les fideles en tous lieux où ils se trouuent par le monde. La douceur de vostre nom recrée ceux qui sont las & trauaillez : la serenité de vostre splendeur illumine les yeux : la plaisante odeur de vos vertus resiouit les iustes : le benoist fruiet de vostre ventre virginal rassasie les bien-heureux. Vous estes la premiere, qui apres le Seigneur meritez toute loüange des Anges & des hommes. Priez pour moy tres-douce Dame : à ce qu'aydé de vos prieres, ie merite de voir celuy qui est Dieu des Dieux, & vous Dame des Dames en Sion, qui est la gloire eternelle. *Aue Maria.*

35 Ie vous saluë, benoiste mere de singuliere clemence & consolation, par laquelle la benediction celeste est descenduë au monde, avec la grace de la felicité eternelle. De vous print chair, & sortit de vostre ventre virginal cét enfant Iesus, seul autheur de nostre salut, le plus gracieux, le plus beau, le plus noble de tous les enfans des hommes. La religieuse memoire de vous console les affligez : la chaste cōtemplation en vous resiouit les Saincts, vostre parfaicte innocence nettoye & purifie les pecheurs. Tous les enfans de

Dieu trouuent en vous plain & entier repos. Impetrez-moy, Dame, parfaicte purté de cœur, afin que ie me puisse dire du nombre de ceux qui meritent estre aimez de vous, & de vostre fils vnique.

Aue Maria.

36 Je vous salüe Marie, Viergetres-belle, plus claire que le Soleil, plus luisante que toutes les estoilles, plus douce que le miel, plus suauë que le baulme, plus belle que les roses, & plus blanche que les lys. Vous estes fontaine du Paradis, puy d'eau viue, throsne du vray Salomon, vaisseau tres-pur, vuide de toute amertume, & plein de toute consolation. Le Seigneur vous a créeë sans macule: le Seigneur vous a esleuë pour son humble seruante: le Seigneur vous a aimée comme sa tres-digne espouse. Vous estes la gloire du genre humain, beauté & ornement singulier de tout l'Vniuers. Ne retirez, ie vous supplie, glorieuse Vierge, vos yeux de moy pauvre & miserable pecheur: ains d'immonde & souillé que ie suis, faites-moy net: de pecheur, iuste: de paresseux, diligent: de tiede, sec, feruent & deuot. *Aue Maria.*

37 Je vous salüe, ô esperance asseurée de ceux qui se desfient d'eux-mesmes, & se-

cours tres-efficace de tous les abandonnez, tant honorée de vostre Fils, qu'il ne vous refuse aucune chose; mais execute tout ce que vous luy demandez. Vous auez la clef du thresor celeste; vous estes plus honorée que tous les Cherubins, plus haute que tous les Seraphins: Vous estes la gloire & honneur du genre humain; tous les aages & generations vous benissent; toutes les creatures louient la gloire de vostre saint Nom; vous estes exaltée sur toutes les troupes des Anges: & comme la prime-vere, estes accompagnée de fleurs, de roses, & des verdures des vallées. Guarissez-moy, ô bienheureuse Dame, & ie seray guarý: sauuez-moy, & ie seray sauué, & vous beniray tousiours, és siecles des siecles. *Aue Maria.*

38 Je vous salüe, resiouissance du Ciel & consolation de la terre, Marie: vous estes cette tres-sereine mere de lumiere, qui illumine amiablement les ames de ceux qui l'aiment. Vous estes cette tres-douce mere de pitié, qui heureusement conduisez vos fideles seruiteurs aux plaisantes habitations du Ciel: vous vrayement belle comme vne belle colombe, cheminez sur les rües des eaux, les robbes & vestemens de laquelle sentent vne odeur inestimable. A

536 PARADIS DES PRIÈRES,
vous, Dame, de tout mon cœur ie hausse les yeux, en vous seule mon ame se confie : ayez ie vous supplie, misericorde de moy, puis qu'aupres de vostre Fils en vous consiste tout mon salut.

Aue Maria.

39 Ie vous saluë Vierge, exempte de tout peché, Marie mere de Dieu. Ie vous saluë refuge tres-certain & assuré de tous ceux qui fidelement vous inuoquent. Vous estes la forteresse, dans les murs de laquelle sont assurez ceux qui recourent à vous. Vous estes tres-fidele protectrice de tous ceux qui vous louent. Vous estes la luisante nuée qui mitigez l'ardeur de nos appetits : Vous estes la rosée delectable, qui appeaisez & esteignez le feu de nos concupiscences : Vous estes la clef esmaillée & enrichie de perles precieuses, qui ouurez les portes du Paradis : Vous estes la fleur entre les espines, & la rose des valées, recreant les yeux de ceux qui vous regardent : vous estes toute agreable, toute delectable, toute resplendissante, toute gracieuse : Secourez-moy, ô mon aduocate : & apres les ondes tempestueuses de ce siecle, guidez-moy au

port de la felicité eternelle.

Aue Maria.

40 Je vous saluë , loüange des Prophe-
tes , honneur des Apostres , forces des
Martyrs , Confesseurs & Vierges. Vous
estes palme tres-belle de iustice, tres-pur
lys de chasteré, iardin fleury de celeste de-
lectation : Vous estes l'arche du Testa-
ment, où la manne est gardée : vous estes
la terre beniste , qui auez produit le
fruiçt de l'arbre de vie : vous estes le
roc duquel prennent leur source les ruiſ-
seaux des eaux viues. Purifiez, ô Dame,
ie vous supplie , mon cœur de toutes or-
dures de peché : ostez de moy tout ce
qui est desplaisant à vos chastes yeux.
Deliurez mon ame de tous desirs terre-
stres , & tirez-la à l'amour des biens
celestes , pour la gloire & honneur de
vous & de vostre vnique enfant.

Aue Maria.



538 PARADIS DES PRIERES,
*Cinquiesme Oraison à la glorieuse Vierge Ma-
rie : & cinquiesme dizain du Rosaire.*

41 **I**E vous salüe, tres-precieuse Margue-
rite, & perle rare & singuliere du
genre humain. Vous estes toute belle, ô
tres-sacrée Vierge, & en vous ne se trou-
ue aucune tache. Vous estes vaisseau d'ele-
ction, & tres-riche cabinet de toutes les
graces. Vous passez & surmontez les Pa-
triarches en foy, les Prophetes en science,
les Apostres en zele, les Martyrs en pa-
tience, les Confesseurs en temperance, les
simples Vierges en humilité & innocence:
& ornée de si precieux ioyaux, tenez tous
les courtisans du Ciel en profonde admira-
tion de vous. Vous estes le Soleil tres-
clair, qui n'endure l'eclypse : qui autres-
fois de çà bas avez illustré le Ciel, & main-
tenant du Ciel illuminez la terre, & chas-
sez les tenebres du monde. Ne me dechas-
sez, ô Dame, puis que ie mets en vous
mon esperance : mais aydez-moy de vo-
stre secours en toutes mes necessitez.

Aue Maria,

42 **I**e vous salüe, Vierge tres-sacrée, &
douée de singuliere benediction entre tou-
tes les femmes benistes. Vous estes le val
delectable, orné & embelly de fleurs eter-

nelles. Vous estes la belle fleur qui faites sortir de vous vne odeur d'ineestimable suavité. Vous estes la reluisante estoille de Iacob, qui donnez la lumiere & splendeur au Ciel, & à la terre : Vous estes cette verge fleurie de Iessé, qui consolez & resiouissez le monde. Tous les Anges s'esmerueillent de vostre beauté, & se resiouissent tous de vostre presence. Ah ! regardez, ô Dame, & soyez ententive à mes larmes, à mes souspirs & gemissemens : visitez & consolez ce pauvre seruiteur inutile, & luy impetrez le pardon de ses pechez.

Aue Maria.

43 Je vous salüe, singulier ornement du Ciel, & protection de la terre : ie vous salüe, mere mille fois heureuse du Roy eternal. Vous, ô Dame, tenez aupres de vostre vnique enfant l'empire de toutes choses : deuant vous s'enclinent tous les Anges, & toutes les generations : à vos pieds se prosterne tout l'vniuers, parce qu'après l'ineffable Trinité, la Cour du Ciel n'a rien de plus beau que vous ; les diables tremblent à l'ouïr de vostre Nom, se descourant vostre splendeur, les tenebres s'esuanouissent : & à vostre bon plaisir s'ouurent incontinent les portes du Ciel : O es-

perance des Chrestiens aupres de Iesus-Christ vostre Fils ! ô Royne de misericorde , nostre douceur & nostre vie , ie qui suis enfant d'Eue , banny & exilé en ce val de miseres , souspire à vous. Secourez-moy donc , Dame en mes trauaux , & defendez moy en mes dangers , fortifiez moy en ma pusillanimité , & apres cet exil : faictes moy voir ce benoist fruit de vostre ventre Iesus Christ , lequel vit & regne és siecles des siecles. *Aue Maria.*

44 Ie vous saluë , tres-pur Temple du S. Esprit , & sacré reliquaire du Verbe diuin. Ie vous saluë tres-saincte mere , qui enfantastes la ioye des Anges , & le salut des hommes , Iesus-Christ , & en son enfance l'enuelopastes en pauvres drappeaux , le teintes entre vos bras , le reschaufastes sur vostre giron , le nourristes de vos mamelles , & le careffastes de vos baisers & embrassemens. Ie vous supplie , Dame , par cestuy vostre cœur virginal & misericordieux , & par la diligence & sollicitude de laquelle vous voulustes seruir & pouruoir à vostre Fils vnique durant son enfance , que vous vueillez estre la protection & defence de ma cause en sa presence , & effacer tous mes pechez , m'impetrant

pardon & remission d'iceux. Favorisez moy, ô ma douce & pitoyable gouvernante, pendant que ie vogue en cette mer si perilleuse, & principalement sur la fin de ma nauigation & de ma vie : à ce que moyennant vostre conduite & lumiere ie puisse heureusement arriuer au port de la celeste Ierusalem, & que ie vous en louë à tousiours és siecles des siecles.

Aue Maria.

45 Ie vous saluë, tres-feraine & tres-douce mere du Sauueur du monde, ô Marie. Vous estes cette très-chaste tourterelle, dont la voix a tres-doucement touché les oreilles du Tout-puissant. Vous estes cette tres-honneste Colombe, de laquelle le murmure & gemissement a sur tout agréé & pleu au saint Esprit, O Vierge gracieuse, Vierge de merueilleuse beauté, illuminez les tenebres interieures de mon ame avec les rayons de vostre grandeur, afin qu'ostée l'obscurité de mes vices, ie puisse contempler la grandeur de vostre beauté. *Aue Maria.*

46 Ie vous saluë, Marie Vierge pitoyable: ie vous salüe, porte de l'Oriët tousiours fermée, par laquelle est passé & descendu le plus beau & plus excellent entre tous les

542 PARADIS DES PRIÈRES,
enfants des hommes, pour venir habiter
parmy nous; tournez, ô Dame, tournez
vers moy ces tres-serains & plaisans re-
gards de vos tres-chastes yeux: & dechaf-
tiez les tenebres de ma cecité, avec la clar-
té & splendeur de vostre venuë. Separez,
ô Dame, mon esprit & mon ame de tou-
tes les choses qui sont soubs le Ciel, & ren-
dez-là suspenduë & ententiuë à la tres-pure
contemplation de vostre grandeur, luy fai-
sant gouster les tres-douces liqueurs de la
beatitude eternelle. *Aue Maria.*

47 Je vous salüe, ô desireuse & amatrice
de la solitude, & tres-diligente obseruatrice
du repos interieur. Je vous saluë, ô Vier-
ge douce de merueilleuse honnesteté, &
d'ineffable sapience. O Vierge esleuë, Vier-
ge tres-bellë entre toutes les filles de Ieru-
salë, retirez les distraites pensées de vostre
seruiteur: & faites que mes esprits esgarez
& espars se ralsëblent & reposent en vous.
Vous estes le tres-sacré tabernacle de la di-
uinité; vous estes le iardin fermé à l'entour,
où est née cette tres-belle & vnique fleur
Iesus-Christ, Sauueur de nos ames. *Aue
Maria.*

48 Je vous saluë, fleur de tres-profonde
humilité, rose de charité, & lys tres-pur
de

de chasteté: ie vous saluë, mere tres-gener-
 reuse du souverain Createur. O Vierge
 suave, faites que iusques à moy puisse arri-
 uer l'odeur de vos parfums aromatiques, &
 qu'en vous seule se refueille mon esprit, &
 qu'il vous sente de nuict & de iour: qu'en
 vous mes entrailles s'esjouissent, & que
 mon cœur soit saisi d'une tres-douce affe-
 ction enuers vous: de façon que mon ame
 vous aime interieurement, s'occupant
 tousiours gaillardement en vos loüanges.
 Vous estes la fleurie demeure de l'Espoux
 celeste: vous estes le delectable Paradis des
 Anges: vous estes le tres-sacré sacraire des
 Sacremens diuins: vous estes la mere, la
 fille, l'espouse du tres-haut & tout-puissant
 Dieu; faiçtes qu'en vous soit tousiours tou-
 te mon esperance & doux refuge de ma
 vie. *Aue Maria.*

49 Ie vous saluë, espouse tres-chaste du
 saint Esprit, vray consolateur de nos
 ames: ie vous saluë, rose tres-fraiche sans
 aucunes espines, de laquelle le Roy des
 Cieux a voulu naistre, estre nourry & allai-
 cté de son lait. Ie vous saluë, tres-excel-
 lente mere de Dieu, qui surpassez en dou-
 ceur le miel & le lys en blancheur. Vous
 estes par compassion vraiment martyr;

vous estes la loüange des Confesseurs, la lumiere des iustes: la gloire des Vierges, l'honneur, la beauté & l'ornement de tous les Saincts: car vous surpassez tous les autres en pureté de vie; vous les deuancez en degré d'excellence & dignité; vous estes d'un regard & visage bien plus beau & gracieux; vous estes la plus proche de Dieu. O Vierge tres-saincte, ie vous supplie tres-affectueusement impetrer pour moy la grace, que par dessus tous les autres, ie vous puisse loüer & celebrer vostre Nom, que ie puisse vous voir & contempler en la gloire du Ciel; vous qui estes la plus honorable de tous les Saincts, la beauté & l'ornement du Ciel, & la plus proche de la tres-saincte & glorieuse Trinité, & que sans fin ie puisse iouir de vostre bien-heureuse presence. *Aue Maria.*

50 Ie vous salüe, tres-noble & magnifique palais de la sainte Trinité: ie vous salüe fille de Dieu le Pere, mere du Fils, & l'espouse tres-chaste du saint Esprit. O Royne du Ciel, porte du Paradis, Dame & Maistresse de tout le monde! ô refuge tres-assuré des pauvres pecheurs, aduocate des indigens, & la loüange des iustes! Vous estes faite toute chose à tous, aux sages &

imprudens, vous ouurez à tous vostre sein
 remply de misericorde, afin que de vostre
 plenitude tous les autres puissent prendre
 & puiser abondamment : de cette vostre
 abondance, le captif prend sa redemption,
 le malade santé & guarison, le triste sa
 ioye & consolation; le pecheur son pardon;
 le iuste sa grace; l'Ange sa lieffe & exulta-
 tion : & finalement toute la glorieuse Tri-
 nité sa gloire, la personne du Fils sa chair,
 & n'y a personne qui se puisse cacher & ab-
 senter de la chaleur de vostre charité. Re-
 ceuez donc ie vous prie, ô benigne & pi-
 toyable Dame, ces loüanges & salutations
 que ie vous presente, iaçoit que ie les aye
 recité de mes lévres sales & polluës. Que
 ma voix sonne doucement à vos oreilles,
 afin que vous me monstriez vostre face
 bien-heureuse. Priez pour nous vostre Fils
 vnique Iesus-Christ, à ce qu'il nous fasse la
 grace de vous voir apres cette vie, reue-
 stüë de la robbe d'immortalité & de gloi-
 re, regnant eternellement avec le Pere,
 le Fils, & le saint Esprit, és siecles des
 siecles, Amen.

Pater noster. Aue Maria.

Grena-
de li. 5
du Me-
morial.

Sixième Oraison à la glorieuse Vierge Marie.

O Bien-heureuse & glorieuse Vierge, comme pourra mon oraison comparoir deuant vous ; puis que par la malice de ma coulpe i'ay perdu la grace que i'auois meritée par la passion de mon Redempteur. Neantmoins quelque grand pecheur que ie sois, si prendray-je la hardiesse, connoissant ma petition estre iuste, de vous supplier que vous entendiez mon oraison.

O Dame & Roynemienne, ie vous supplie de prier vostre sacré fils, à ce que par sa bonté & misericorde infinie il luy plaise me pardonner. Et si ie ne le merite par mon indignité, qu'il me l'octroye au moins, afin que par ma coulpe ne soit veu perir celui qu'il a créé à son image & semblance. Vous estes lumiere des tenebres, miroir des Saints, & esperance des pecheurs. Toutes les generations vous donnent benediction, tous les desolez vous inuoquent, tous les bons vous contemplent : & en vous se recréent toutes les creatures ; les Anges au Ciel, de vostre presence ; les ames en purgatoire, de vostre consolation ; les hommes en terre de vostre presence.

Tous vous inuoquent, à tous vous respondent, & pour tous vous priez. Que fe-

ray-je donc moy tres-indigne pecheur, pour impetrer vostre grace & estant trouble de mon peché; affligé de mes demerites, & me faisant ma meschanceté deuenir muet? Le vous supplie, tres-precieuse Vierge, par cette si griesue & mortelle douleur que vous sentistes, voyant cheminer vostre cher Fils avec la Croix sur ses espaules, droit au lieu de la mort, que vous vueillez mortifier toutes mes passions & tentatiōs, à ce que par ma malice ne soit perdu celuy qu'il a racheté avec son propre sang.

Faites que ces pitoyables larmes que vous espendistes le suiuant iusques à la Croix, soient perpetuellement en ma pensée, afin que par la contemplation d'icelles il en sorte si grande abondance de mes yeux, qu'elles puissent suffire à lauer & nettoyer les macules de mes pechez. Car qui sera le pecheur qui s'osera iamais presenter sans vous, deuant la face de ce iuge eternal; qui encores qu'il soit doux & patient à supporter, est toutesfois iuste en ses chastimens? Qui se pourra donc dire si iuste qu'il n'ait besoin de vostre secours en tel iugement?

O Vierge bien-heureuse, que sera-ce de moy, si par vostre intercession ie ne re-

couure ce que i'ay perdu par mes pechez? Le vous requiers grande chose, eu esgard à mes fautes: mais bien fort petite, eu esgard à vostre vertu, & n'est rien du tout ce que ie vous pourrois demander, en comparaison de ce que vous pouuez dōner. O Royne des Anges, corrigez & amendez ma vie, disposant toutes mes œuures & actions de telle maniere, que ie merite (encores que ie n'en sois digne) d'estre pitoyablement exaucé de vous.

Faites, ô Dame, demonstration de vostre misericorde pour mon remede, afin qu'à cette occasion vous soyez louée des iustes, & que les pecheurs esperent en vous. Que les grâdes douleurs que vous endurestes en la Passion de vostre tres-cher Fils soient tousiours deuant mes yeux, & que vos peines soient la viande de mon cœur. Que iamais vostre secours ne m'abandonne, que vostre misericorde ne me manque iamais, & que iamais ie ne sois effacé de vostre memoire. Qui me defendra, ô Dame, si ie suis de vous abandonné? Qui se souuiendra de moy, si vous me mettez en oubly? Que fera-ce de moy, si vous (qui estes l'estoille de la mer, & l'adresse des deuoyez) ne me monstrez vostre lumiere?

Ne permettez que ie sois tenté de l'ennemy : & si ie le suis, faites que ie ne tombe; & si ie tombe, secourez-moy : de sorte, qu'incōtinent ie me releue. Qui est celuy, ô Dame, qui iamais vous a inuouqué, qui n'ait esté exaucé? Qui est celuy qui iamais vous a requis de quelque chose, qui ne l'ait obtenüe? Qui est celuy qui iamais vous a fait seruiue, qui n'ë ait esté magnifiquemēt salarié?

O Vierge tres glorieuse, faites que mon cœur sente l'angoisse que vous endurastes, lors qu'estant vostre tres-precieux enfant descendu de la Croix vous le receustes entre vos bras, regardant cette image tres-precieuse adorée des Anges, & lors encrachée par les meschans; & voyant l'estrange cruauté avec laquelle l'innocence du iuste auoit satisfait à la desobeïssance du pecheur, il me semble que ie voy, ô Royne du Ciel, l'estat auquel vous estiez lors, les bras ouuerts & estendus, les yeux cōme morts, la teste baissée, le visage palle & decoulouré, sentant beaucoup plus de tourmens en vostre cœur, que iamais hōme ne pourroit endurer en son corps. Ah! Dame, faites que tousiours resonnēt à mes oreilles ces paroles, qu'alors vous pouuiez à bon droit dire à ceux qui vous regardoient:

O vous tous qui passez par le chemin, regardez & considerez s'il y a douleur semblable à la mienne presente, afin que par icelle ie merite estre exaucé de vous.

III. Transpercez & penetrez mon ame avec ce cousteau de douleur, qui transperça la vostre, quand vous mistes au sepulchre ce corps ainsi flagellé & deschiré de vostre tres-precieux Fils, à ce qu'il me souuienne que ie suis terre, & qu'en fin il est necessaire que ie luy rende ce que d'elle i'ay receu, afin que ie ne me trompe & m'abuse en la gloire transitoire de ce siecle. Faites ô Dame, que i'aye tousiours en memoire; combien de fois vous retournaistes voir le monument où vous auiez laissé enfermé vn si grād thresor, afin que de vous ie puisse impetrer tant de grace, qu'il vous plaise retourner à voir ma petition, que ie sois tousiours accompagné de la contemplation de la solitude, en laquelle vous fustes reduite celle douloureuse nuit, en laquelle rien ne viuoit plus en vous, sinon vos douleurs; beuuant les eaux de vos pitoyables larmes, & mangeant le pain de vos angoisseez contemplations, afin que contemplant les angoisseez que vous avez souffertes en ce bas mōde, ie merite de voir

la gloire que vous avez acquise au Ciel
par tous les siècles des siècles, Ainsi soit-il.

*Septiesme Oraison à la glorieuse Vier-
ge Marie.*

O Serenissime Rôyne du Ciel, mere
de l'vnique Fils du Pere eternal, sa-
craire du saint Esprit, Marie Vierge tres-
pure, pleine de grace, & beniste sur tou-
tes les femmes. Je saluë, louë & reuere vos
bien-heureuses entrailles qui porterent le
fruct de vie, par lequel est venu le salut au
monde, combien que veritablement ie
connoisse que ie ne suis pas digne de vous
loiangier, ny de comparoistre deuant
vous, pour auoir esté conceu & esleué en
peché; ie connois aussi que c'est vne chose
digne de vous, de ne mespriser point les pe-
cheurs pour le remede desquels vous fu-
stes esleuë mere d'vn tel fils, & connois
encore que quelque grande dignité que
vous ayez receuë, vous n'avez rien perdu
pour cela de vostre ancienne humilité &
benignité, au moyen de laquelle vous estes
propice & amiable à tous.

Et pour cette cause, ne plus ne moins
que les pecheurs ont recours à vous com-
me à leur mediatrice, & les miserables vous
cherchent comme mere de misericorde,

552 PARADIS DES PRIERES,
ainsi moy qui suis le plus miserable & le
plus grand pecheur du monde; ie vous de-
fire, & viens maintenant à vous. Car à qui
puis-je mieux recourir qu'à vous, qui estes
exaltée par dessus tous les chœurs & sain-
ctes troupes des Anges, & qui apres vo-
stre Fils nostre Seigneur, possédez le plus
haut throsne en la Cour celeste? En qui
puis-je mieux esperer qu'en vous, qui estes
l'aduocate des pecheurs, & la lumiere res-
plendissante qui illuminez les tenebres de
nostre nuit tant obscure? qui me peut
mieux fauoriser que vous qui estes la porte
du Ciel, les Oraisons de laquelle sont de
telle sorte agreables & acceptables à la Ma-
jesté diuine, que quelque chose que vous
demandiez, elle vous est incontinent
oütoyée?

Voicy donc, ô mere pitoyable & vraye
consolatrice, que ie me recommande à
vous, & me iette à vos pieds tres-saincts,
implorant vostre clemence: ne m'aban-
donnez point, Vierge tres-sacrée, quoy
que ie sois pecheur tres-indigne, puis que
personne ne vous inuoca iamais, qui fut
repoussé de vous, ny personne espera en
vous, qui demeurast confus. Tournez
vers moy ces yeux de misericorde, lesquels

à bon droict sont comparez aux Piscines
 d'Esebon ; car comme l'eau ne defailloit Cant. 7.
 iamais en icelles, ainsi en vos pitoyables
 yeux ne défaut iamais la misericorde &
 compassion de nos miseres : de sorte qu'on
 peut dire beaucoup mieux de vous , ce
 que Iob disoit , que dès vostre enfance Iob 31.
 la misericorde a creu quant & vous , &
 qu'elle est née du ventre de vostre mere
 avec vous.

Inclinez par apres , ô mere benigne,
 les oreilles de vostre pieté à l'oraison de
 ce vostre seruiteur affligé : & regardez les
 peines & tribulations que i'endure , aus-
 quelles ie sçay pour tout certain que vous
 pouuez facilement remedier , s'il vous
 plaist. Je reconnois bien mon indigni-
 té, & combien ie suis dissemblable à vous,
 parce que vous estes toute sainte , toute
 gracieuse, toute belle, & n'y a tache quel-
 conque en vous : & ie suis grand pe-
 cheur , plein de toute misere, nay du tout
 en peché , & tout couuert de taches abo-
 minables. Mais toutesfois , tant plus que
 ma vilité est grande, tant plus se manifeste
 vostre humilité: & tant plus que mes plaies
 sont grandes & mortelles , tant plus ap-
 paroist en moy vostre puissance & mise-

554 PARADIS DES PRIERES,
ricorde me voulant guarir. Parquoy, Vierge tres-douce , monstrez que vous estes mere, & soyez ententive à mon secours, & ne me refusez point ce que vous auez accoustumé d'accorder à tous ceux qui se recommandent affectueusement à vous.

Souvenez-vous , ô tres-glorieuse Dame, de tant de choses excellentes qui sont dites de vous , & qui ont esté faites par vous : car vous auez correspondu par les œuures ce qui a esté predict & figuré de vous. Vous estes cette belle & pitoyable Vierge figurée par Rebecca, laquelle donna de l'eau , non seulement au seruiteur d'Abraham qui la luy demanda ; mais aussi à tous ses chameaux : ce que vous faites beaucoup mieux, n'estant pas contente de fauoriser seulement les iustes , qui sont ceux qui viuent selon la raison ; mais encore vous estes fauorable aux chameaux, c'est à dire aux pecheurs , qui à la façon des chameaux engourdis, se laissent vaincre par leur propre concupiscence, ausquels par vostre moyen est communiquée l'eau de grace, laquelle ie vous supplie aussi m'estre communiquée par vous, combien que i'en sois tres-indigne.

Vous estes cette Royne aimée, figurée

par la belle Ester, à la requeste & intercession de laquelle le grand Roy Assuere donna la vie à ceux qu'il auoit condamnez à la mort; car vous estant ainsi plus belle & plus agreable aux yeux du tres-haut Roy des Roys; vous obtenez par vos prieres la vie eternelle à plusieurs qui meritoient par leurs pechez d'estre condamnez entre lesquels, ie vous supplie, que ie sois admis & receu, puis que ie me reconnois digne de la mort eternelle.


Vous estes encore figurée par cette prudente Abigail, qui empescha la vengeance ^{1. Reg.} que Dauid vouloit prendre sur tous ceux de sa maison, ce que vous faites souuent par vostre prudence & grace singuliere, obtenant que nous ne soyons point chastiez de Dieu selon nos demerites, & selon la grauité de nos pechez. Laquelle faueur ie vous demande tant particulierement que ie sens en auoir plus de besoin.

Vous, beaucoup mieux que Iudith, ^{Iudith.} estes la gloire de Ierusalem, non seulement la terrestre, mais encores la celeste. Vous estes la resiouissance d'Israël & des Anges aussi: vous estes l'honneur de tout le peuple Chrestien: vous seule finalement, ô tres-excellente Dame auez surpassé toutes

556 PARADIS DES PRIERES,
les perfections & excellences de toutes les
autres femmes qui vous ont precedé : les-
quelles vous representoient & figuroient :
cār toutes les graces qui auoient esté diui-
sées & departies aux autres, ont esté toutes
concedées à vous seule, avec plus grande
plenitude & perfection : de sorte qu'il n'y
a eu iamais aucune autre femme, qui se
puisse égaller, & tant soit peu comparer à
vous, pource que vous surmontez en pu-
reté les Anges, & surpassez tous les saints
& saintes en perfection & sainteté.

Regardez, ie vous supplie, mes tristes
souspirs, & les continuels gemissemens
qui sortent de mon cœur triste & desolé
par ces larmes ameres que vous versastes,
avec tant de tristesse, quand vous veistes
vostre fils tres-aimé pendu & cloüé en
Croix entre deux larrons, espancher son
sang precieux en toute abondance, & ius-
ques à la derniere goutte, avec tres-gran-
de douleur. Et vous supplie par cette sien-
ne mort & passion, laquelle transperça de
douleur vostre ame tres-sainte, qu'il vous
plaise obtenir quelque rafraichissement &
soulas à ma miserable vie, laquelle va dé-
faillant parmy tant d'afflictions qui la sui-
uent & environnent.

Resiouïſſez vn peu, ô allegreſſe des Anges, de vòtre face gracieuſe l'ame de voſtre ſeruiteur, & faites ſonner voſtre tres-douce voix à mes oreilles, afin que par icelle vous me confortiez & viuifiez, & que ie commence à chanter vn nouueau Cantique à voſtre louange, racontant vos miſericordes, & vous beniffant ſans fin, avec toutes les generations qui vous appellent bien-heureuſe, de qui la beatitude & gloire inestimable durera en la terre & au Ciel, par tous les ſiecles des ſiecles, Ainsî ſoit-il.





CHAPITRE XII.

Contenant quelques deuotes
Oraisons aux Saints.

P R E F A C E.

Blosius,
ch. 12.
du Mi-
roir
spiri-
tucl.

L faut porter honneur & reueren-
ce aux Saints Citoyens de Para-
dis, comme à des Princes de grand
renom, & comme à des Roys & Roy-
nes, & ne prester l'oreille à ces heretiques de
nostre temps, lesquels avec audacieuse & su-
perbe temerité, disent que les Saints au Ciel
n'ont connoissance de nos Oraisons, & ne nous
peuvent aider, & que pourtant ne les faut in-
uoker. L'Eglise Catholique & Apostolique, la-
quelle est le pillier & le fondement de verité,
est d'opinion du tout contraire.

Certes la felicité des Saints au Royaume
des Cieux, n'admet aucune ignorance & im-
puissance, de laquelle les heretiques les accusent;
car en ce saint lieu tout y est parfait.

Les Saints au Ciel contemplent clairement
Dieu, le voyent entierement ainsi qu'il est: car
s'ils ne le voyoient & connoissoient ainsi, ils ne
seroient

seroient heureux. Les Saints donc voyans Dieu face à face, sont tres-excellemment vnis à Dieu: & d'autant qu'ils sont vn avec celuy qui sçait & peut toutes choses, eux aussi sçauent & peuuent en luy tout ce qui concerne & appartient à leur gloire & felicité. Ils sçauent donc, & peuuent tout ce qu'ils veulent au moyen dequoy ils connoissent non seulement les voix & paroles de nos Oraisons vocales; mais aussi nos saints desirs & deuotes pensées, par lesquelles nous parlons à eux, & les honorons, & avec grande fidelité aident à tous ceux qui deuotement les inuoquent.

Après auoir mis en cestuy nostre liure quelques Oraisons pour inuoquer & honorer la glorieuse Vierge Marie, il nous a semblé bon & bien à propos mettre consecutiuelement quelques Oraisons pour inuoquer les Saints. Lesquelles Oraisons sont faites en commun, à celle fin que la personne deuote les puisse adapter à qui il luy plaira, & à ceux qu'elle aura en singuliere deuotion, ou desquels l'Eglise solemnifera la feste.

ORAIISON DEVOTE AUX ANGES
& esprits celestes.

O Anges & Archanges de Dieu , ô vous tous esprits celestes , de quel-
 que ordre que vous soyez , ie vous honore,
 & à tres-iuste occasion vous faits la reue-
 rence. Car vous estes ces esprits bien-
 heureux créez de Dieu , lesquels il a faict
 Anges, ausquels il a commandé de me cō-
 seruer en toutes mes necessitez & dange-
 reuses tentations, de me conduire en tou-
 tes mes voyes, & me defendre contre mes
 ennemis, de peur que mon pied ne choppe
 à la pierre, & que mes aduersaires n'ayent
 quelque puissance & tyrannique domina-
 tion sur moy. Vous estes ceux que nostre
 Dieu a destiné pour faire le guet sur les
 murailles de la nouuelle Ierusalem , pour
 veiller sur les montagnes, & és environs
 d'icelles, & auoir soing sur sa bergerie & fi-
 dele troupeau , de crainte que ce lyon ru-
 gissant qui cherche incessamment de tous
 costés sa proye pour deuorer, ne rauisse nos
 ames, ne nous fasse moleste & fascherie.

Vous estes les Citoyens bien-heureux,
 de la glorieuse cité Ierusalem celeste no-

Tiré en
 partie
 du 27.
 ch. des
 Solilo-
 ques de
 S. Aug.
 Ps. 103.
 Ps. 90.

stre mere , qui est là-haut és Cieux , qui estes enuoyez pour le miniftre de ceux qui obtiendront l'heritage du falut eternal, afin que les deliuriez de leurs ennemis , que les gardiez & conduifriez fidelement en leurs voyes , que les confortiez, admonestiez, & presentiez deuant la face de la gloire de la tres-haute Majesté diuine , les prieres & oraisons de nous autres pauvres mortels.

Veritablement vous nous aimez d'une tres-grâde affection, cōme vos Concitoyēs & Bourgeois d'une mēme Cité ; car de nous vous efperez la restauration de vos ruines. Voila pourquoy vous nous secourez & aidez à toutes heures, & en tous lieux d'un grād soin & desir tres-feruēt nous donnez secours & faueur en toutes nos necessitez: & estes grandement soigneux de nous; allez & venez incessamment pour offrir à Dieu nos souspirs & nos larmes , pour luy presenter nos prieres & oraisons, à celle fin d'impetrer pour nous enuers sa diuine Majesté, vne recōciliation & propitiation de sa benignité & clemēce , & nous rapporter la tant desirée benediction de sa sainte grace.

Toutesfois & quantes que nous faisons quelque bien , vous vous en resiouissez à

562 PARADIS DES PRIERES,
plaisir : & au contraire , les diables en sont
marris & s'en courroucent. Que si nous
commettons quelque mal , nous gratifions
à Satan : & vous estes par nous frustrez , ô
Anges bien-heureux , de vostre desirée
liesse : car à la verité vous receuez vn bien
fort grand plaisir de la conuersion & peni-
tence d'vn pecheur. Obtenez pour moy
de Dieu , la grace que tousiours ie vous
puisse resiouir , à ce que par vous & en nous
soit à iamais louée sa tres-haute & diuine
Majesté , & qu'avec vous , qui estes benits
& remplis de tout bon- heur , nous soyons
ramenez au parc & sainte bergerie , à cel-
le fin qu'ensemblement d'vne mesme voix
& volonté , nous confessions & donnions
tous louange à son nom tres-sainct , & à la
grandeur de son excellence & Majesté.

Ie vous saluë donc maintenant , ô bien-
heureux esprits Angeliques , tres-nobles
& tres-excellens Princes , qui dès à present
iouïssiez de la tres-douce vision & presen-
ce de nostre Dieu , & des delices celestes
& incorruptibles , qui avec vne ioye & alle-
gresse ineffable : louiez & magnifiez inces-
samment ce mesme Seigneur. Ie rends
graces à Dieu vostre & nostre Seigneur ,
pour la beatitude & bien-heureuse felicité

qu'il vous a conseruée. Je vous supplie tres-affectueusement qu'il vous plaise prier pour moy, & me secourez selon vostre benignité accoustumée parmy tant de dangers, desquels ie suis entourné, afin que quelque iour ie puisse voir Dieu: & ensemble avec vous ie merite le louer à iamais par tous les siècles des siècles, Ainsi soit-il.

Oraison à vn Apostre.

IE vous saluë Monsieur saint N. Prince tres-noble & excellent de la sainte Eglise de Dieu. Je vous saluë, vaillant guerrier & bien expert Capitaine en la guerre spirituelle. Je vous saluë tres-braue champion de la Cour celeste, lequel Iesus-Christ nostre Sauueur a esleu & choisi du milieu du monde, afin que par vous vil & abiect de condition, foible de force, & peu versé es sciences, il abbaisast & mist en ruine les choses plus puissantes du monde.

O tres-excellent heraut & tres-fidele messager d'un Dieu viuant, qui n'avez pas seulement vescu & conuersé pour vous, mais aussi pour celuy qui auoit donné sa vie, & enduré la mort pour l'amour de vous, & aussi principalement à cause de nous pour l'amour d'iceluy: Car c'est pour nous qu'est vostre doctrine, vostre vie &

564 PARADIS DES PRIERES, .
vostre mort ; car vous nous avez donné
exemple de continence par vostre sainte
conuersation, vous nous avez enseigné la
vraye sapience, par vostre salutaire predi-
cation & doctrine : vous nous avez par vo-
stre mort & Passion monstté, quelle est la
vraye patience, & ne cessez encores ius-
ques aujourdhuy de nous eslargir, & don-
ner le quatriesme, comme estant remply
de pitié & misericorde, qui n'est autre cho-
se que le fruit de vos saintes prieres &
oraisons.

Je sçay pour certain, & le confesseray
tousiours, que vous qui avez eu beaucoup
de puissance estât encores sur la terre, estes
encores d'auantage puissant: estant desia au
Ciel deuant la diuine face de nostre Sei-
gneur: Car si viuant encores en ce monde,
en ce lieu de misere & corruption, vous
avez eu pitié & compassion des miserables
pecheurs, & avez tres-affectueusemēt prié
pour eux : à combien plus forte raison
prierez-vous maintenant Dieu pour nous,
que plus veritablement vous connoissez
nos necessitez & miseres? Cette bien-heu-
reuse & celeste patrie, n'a en rien changé ou
diminué vostre charité; mais au contraire
l'a de beaucoup augmenté : que mesme

elle a esmeu vos entrailles pleines de misericorde; à vous, disie, qui estes maintenant present, & sans cesse assistez deuant la source & fontaine de misericorde.

Pourquoy donc n'espereray-je? pourquoy n'auray-je confiance & espoir en vostre aide & secours? Pourquoy par deuotes oraisons ne vous supplieray-je de me fauoriser par vos saintes prieres? pourquoy n'imploreray-je avec souspirs & desirs remplis de ferueur & deuotion, que vous soyez mon intercesseur & aduocat en la presence de mon Dieu tres-equitable Iuge, & neātmoins tres-benin & misericordieux?

Je vous supplie donc maintenant tres-affectueusemēt, ô saint N. Apostre de Dieu, qu'il vous plaise prendre ma cause en main, estre mon aduocat, & faire ma legation pour moy deuant le throsne de la diuine Majesté & misericorde: octroyez moy vne vraye & stable foy, laquelle ne puisse estre rompuë, ou tant soit peu esbranlée parmy les tentatiōs & persecutions des diables & du monde; vne esperance ferme, qui ne soit deiettée & affoiblie en quelque tribulation que ce soit, vne tres-ardēte charité qui ne puisse s'esteindre & amortir parmy toutes les affaires & embrouillemens

566 PARADIS DES PRIERES,
de ce siecle peruers : vne finale perseue-
rance en toutes bonnes œuures : de sorte
que ie ne m'esgare, & voise à la dextre, ou
à la senestre; mais que ie chemine tousiours
par le chemin royal, iusques à tant que ie
paruienne à celuy qui vrayement est la
voye, la verité & la vie, Iesus-Christ no-
stre Dieu & Seigneur, lequel regne eter-
nellement bien-heureux avec le Pere & le
S. Esprit, Amen.

Iean. 1.

Oraison à vn saint Martyr.

O Glorieux Martyr de Dieu, ô tres-
fort & valeureux champion de Iesus-
Christ, ô soldat & guerrier inuincible de
l'Eglise, ô bien-heureux tesmoin de nostre
foy, saint, N. qui d'une constance admira-
ble & d'un esprit vrayemēt magnanime, &
sans frayeur d'aucunes peines & tourmens
auez publiquement & tres-constamment
confessé le nom du vray Dieu, qui par vo-
stre inuincible patience estes fortý vain-
queur, & auez remporté vn glorieux triom-
phe par vostre tollerance & force admira-
ble : iacoit que vostre corps tout froissé,
rompu & deschiré par les tourmens, soit
aucunement veu ceder & succomber apres
tant de diuerses sortes de supplices, par
la mort, toutesfois vostre ame triomphan-

CHAPITRE XII. 567

te, & remportante vne belle victoire est retournée ioyeuse à sa premiere origine, qui est Dieu.

Vous auez esté fait tres-fidele tesmoing de la verité, non seulement par asseurance, protestation & serment ; mais aussi par vostre sang, par vostre vie, & par l'aspreté des peines & tourmens insupportables. O que bien-heureuse est la langue qui a prononcé cette sainte voix de confession, laquelle l'air receuant a esté sanctifié, laquelle estant ouïe des Anges, les a grandement resiouï & fait sauteller de ioye, par laquelle le diable avec tous ses semblables esprits sataniques, a receu vne tres-fascheuse playe, & laquelle a esté soigneusement escrite & enroolée au Ciel, par nostre Dieu & Seigneur.

O tres-saint & glorieux Martyr de Iesus-Christ, Dieu vous a mis deuant nous, comme vn miroir & exemplaire, afin de tousiours dresser la visée de nostre esprit sur vous, & sur l'exēple que nous auez laissé, & que fussions sans fin entêtifs sur vous, & d'esprit & de pensée, afin que nous nous efforcions de vous imiter en vostre labeur, és traux & combats que vous auez enduré en ce monde, puis que nous

568 PARADIS DES PRIÈRES,
desirons vous suiure, & aller apres vous au
Ciel. Ce que ne pouuans faire de nous-
mesme & de nos propres forces; nous vous
supplions tres-affectueusement, ô Martyr
invincible, de prier & interuenir pour
nous deuant la diuine Maiesté, & d'obte-
nir cette grace, que nous appreniôs de vous
& par vostre exemple, d'acquérir la foy &
constance en la cherchant soigneusement,
la bien cultiuer par nostre bonne vie & re-
ligieuse conuersation: & la perseuerem-
ment conseruer en mourant: que nous re-
tenions de vous, de craindre d'auantage le
peché, que le glaïue tranchant des bour-
reaux, que nous apprenions à aimer plu-
stost la iustice pour la vie eternelle, que non
pas la vie corporelle & caducque, plustost
la foy & la crainte de Dieu, que non pas la
vie transitoire & gloire du monde.

Vous voyez & contemplez maintenant
la verité, qui est Dieu, à laquelle & par vo-
stre vie & par vostre sang, vous auez porté
tesmoignage: deuestu des tenebres, vous
estes entré dans vne lumiere & clarté eter-
nelle, & iouïssiez maintenant heureusemēt
du salaire & recompense de vostre combat
& glorieuse victoire. O que ie desirerois
& fouhaitteroïis grandement qu'il vous

pleust impetrer de nostre Dieu & Seigneur Iesus-Christ, vn tant soit peu de cette vostre constance & inuincible patience, vn eschantillon de cette prompte & resignée volonté d'endurer pour iceluy vostre tres-cher & bien-aimé, à celle fin que nostre ame fut incitée d'vn feruent desir de porter avec vous vostre Croix tant grande & excellente, & aussi afin d'embrasser ioyeusement & de prompte volonté, & sans murmure supporter les petites & legeres croix & contradictions qui nous arriuent durant la paix & tranquillité de nostre vie. Non pour autre raison, que pour & à celle fin de connoistre par experience, entant qu'il nous est concedé & permis, les peines temporelles, les angoisses, supplices & tourmens de Iesus-Christ, à ce qu'en fin nous puissions estre participans du Royaume celeste & eternal d'iceluy, lequel il nous a acquis par le moyen de sa Croix, par son sang, & par sa mort.

Ainsi soit-il.

Oraison à vn Confesseur.

IE vous saluë ornement de beauté de la Cour triomphante & glorieuse du Ciel:
 ie vous saluë, ô tres-sainct Confesseur,
 singulier amy de Dieu, & tres-claire

570 PARADIS DES PRIERES,
lumiere del'Eglise, saint N. ie vous fais la
reuerence, temple vif & tres-excellent du
S. Esprit, le chariot d'Israël, tres-fidele
conducteur d'iceluy: gardez & conseruez
tout le peuple fidele en sainteté & iustice,
prenant compassion de nous selon vostre
pieté & misericorde accoustumée, qui par-
my telle & si grandes miseres nous nous
ressouuenons de l'abondance vostre, &
demenons ioye pour la gloire dont vous
estes eternellement bien-heureux & iouis-
sant. O que la dispensation de la diuine pie-
té est grande & magnifique sur vous, la-
quelle vous a rendu vil & abiect deuant
vos propres yeux; mais tres-grand & ex-
cellent en sa presence diuine!

S. Ber-
nard au
Sermō
de la
vie de
S. Ma-
lachie.

Vostre vie est vne loy de discipline, de
sainte conuersion & de vie: vostre mort
est le port assésuré de la mort, & la porte de
vie: vostre memoire est remplie de toute
douceur & soüefuété, & pleine de grace,
vostre presence est vne couronne de gloire
en la main de nostre Dieu & Seigneur. O
oliue tres-fertile & fructueuse en la maison
de Dieu! ô huile de ioye & tres-douce li-
queur pour oindre & pour esclairer, nous
entretiens par benefices, & resplandis-
sant au monde par infinis signes & mira-

cles : faites en sorte que nous soyons participans de la lumiere & suauité de laquelle vous estes à present iouissant. O lys tres-odoriferant , qui à iamais & eternellement bourjonnez & croissez deuant la face du Seigneur , qui florissez & respandez par tout l'odeur viuifiante de vostre souëfueté & douceur , la memoire duquel est entre nous en toute benediction , & duquel la presence est en gloire & honneur parmy les troupes des Anges , & en la compagnie des Saints bien-heureux au Ciel: donnez, de grace , à ceux qui deuotement vous salüent , & implorent vostre intercession & faueur , de n'estre point priuez de la participation d'une telle & si abondante plenitude de merite & de grace !

O grande & excellente lumiere ! ô clarté esclairante parmy les plus obscures & espoisses tenebres par les rayons d'infinis signes & merites , illuminant la prison , & resiouissant la cité : dissipez & chassez de nos cœurs par la splendeur & clarté de vos saintes vertus , les tenebres de nos vices ! ô estoille matutinale & iournaliere , d'autāt plus claire & luisante que les autres , que plus proche & voisine du iour , & que plus sēblable au Soleil : nous vous suppliōs

572 PARADIS DES PRIERES,
tres-affectueusement qu'il vous plaise aller
deuant nous & nous preceder, afin que
nous aussi cheminions en la lumiere & au
iour de vostre splendeur, comme vray
ensans de lumiere, & non pas enfans d'ob-
scurité & tenebres.

O tres-belle & reluisante aurore, qui ap-
portez le iour sur la face de la terre: mais
bien plustost aussi clarté & splendeur du mi-
dy, qui perlustrez & tournoyez par toutes
les places & regiōs superieures du Ciel, re-
ceuez-nous en la société & participation de
cette lumiere & clarté, de laquelle estant il-
luminé, vous esclairez & reluisez par le de-
hors de tous costez, & au dedans vous brû-
lez & ardez doucement: nous accordant
& octroyant cecy, nostre Seigneur Iesus-
Christ la vraye & eternelle lumiere, qui
avec le Pere & le saint Esprit vit & regne
Dieu tout-puissant, par tous les siecles des
siecles. Ainsi soit-il.

Oraison à vne Vierge Martyre.

R Esiouïſſez-vous, ô Martyre inuinci-
ble de Iesus-Christ, Vierge tres-pure
& tres-saincte, N. laquelle nous deuons
honorer pour double tiltre & raison: à
ſçauoir pour la virginité: & pour le mar-
tyre: car vous ne vous estes pas contentée

de la seule virginité & intégrité : vous avez voulu adiouster à icelle la constance invincible du martyre.

En vous , iàçoit que fussiez de nature vn vaisseau plus fragile & infirme : Dieu a manifesté clairement sa puissance , surmontant & mettant à neant par vostre fragile & foible nature feminine , tous les Roys, Princes & Tyrans avec toutes les Tyraniques peines & supplices , tant du monde que des enfers , & tous les tourmens que pouuoient inuenter les hommes & les diables. Vous estant Vierge si tendre & delicate , n'avez eu aucune crainte & frayeur des Iuges iniques, & de leurs iugemens peruers ; vous avez mesprisé la sentence par iceux iettée contre vous ; vous vous estes mocquée de toutes leurs menaces , peines & tourmens.

Les Ministres & Bourreaux se lassoient de vous tourmenter , leurs bras & leurs mains aussi biẽ que leur courage defailloient en eux , & perdoient leurs forces , & leur cœur trop dur & adiamentin , se fondoit & couloit ne plus ne moins que la cire : mais vous au contraire , demeuriez plus ferme & solide que le diamant , qui ne se peut rompre ou briser , plus fort & robuste

574 PARADIS DES PRIERES,
qu'un Lion invincible, & autant immobile
& constante qu'un haut & inaccessible ro-
cher. Tous vos membres chastes estoient
brisez, desmis, froissez & desnoüez de
leur propre lieu, le sang en tres-grande
abondance ruisseloit de toutes les parties
de vostre corps: de sorte que vous estiez
toute vuide & espuisée de sang & d'hu-
meurs; mais vostre esprit demeuroit to-
talement stable & invincible: Car vostre
regard & vostre consideration n'estoit pas
pour regarder les tourmens, mais vous
aviez les yeux de vostre ame fichez en la
contemplation de la gloire & des triom-
phantes couronnes qui vous estoient pre-
parées au Ciel par vostre tres-cher Espoux
& Seigneur.

C'est pourquoy vous avez dignement
merité d'estre par les mains des Anges
bien-heureux, portée en la salle & au Pa-
lais Royal du Roy des Roys, & souverain
Seigneur, où maintenant couronnée, com-
me Royne & espouse du Roy, reluisez
entre les autres d'une gloire inestimable,
où plaisamment vous vous resjouïssiez par-
my les troupes des Vierges & chastes Pu-
celles, qui ont passé les ans & tous les iours
de leurs vies en bones & saintes mœurs, &
ont

C H A P I T R E X I I . 575

ont prins comme par force & sainte violence , par leur insuperable constance de foy , la palme & couronne de martyre.

Nous autres pauvres miserables , qui flottons & voguons encores parmy les ondes & tourmentez de cette mer furieuse & pleine de tempestes , sommes si fressles & debiles , tant infirmes & delicats , qu'une bien legere occasion , qu'un vent serain & un doux Zephire , qu'une petite commodité , qu'une sale cupidité , qu'une bresue & perissable volupté nous retire & separe de l'amour & charité de vostre Espoux bien-aimé Iesus-Christ : nous sommes , dis-je , si peu constans & tant fragiles , que pour des choses vaines & totalement pueriles , nous perdons la pieté , & delaissons la iustice.

A cette occasion , ô tres-sainte & glorieuse Vierge N. & du tout invincible aux tourmens , ie vous supplie tres-affectueusement par celuy qui vous a esleuë , qui vous a fait telle que vous estes , de la beauté & beatitude duquel vous estes maintenant rassasiée par l'immortalité duquel vous estes à present renduë immortelle ; soyez ie vous prie memoratiue , & ayez souvenance de nous , priez pour nous nostre

576 PARADIS DES PRIERES,
commun Dieu & Seigneur Iesus-Christ,
à ce qu'il nous donne vne ferme & inuinci-
ble constance de foy , & vne tres-arden-
te charité , de laquelle ne puissions estre
separez par aucune perte de biens tem-
porels , ny pour crainte d'une disgrâce
populaire , ny par aucune titillation de
plaisir & volupté , ny par cupidité , or-
gueil & perturbation d'esprit , mais vne
constance & charité qui puisse demeurer
entiere & immaculée entre toutes les me-
naces & frayeurs de ce monde , parmy
toutes les tentatiōs du diable, & au milieu
de toutes les titillations & sensualitez de
la chair, iusques à tant que nous paruien-
drons heureusement à cette patrie cele-
ste & eternelle , laquelle est tousiours en
bonne paix & bien tranquille laquelle ne
redoute point aucun ennemy , laquelle
n'a aucune apprehension & frayeur de la
mort ; mais se resiouit pour l'incorru-
ption d'une gloire & felicité perpetuel-
le , où avec Iesus-Christ vostre Espoux,
vous regnez & vivez à present , & regne-
rez à iamais par tous les siecles des siecles.
Amen.

Oraison à une Vierge, non Martyre.

IE vous saluë, tres-chaste & bien-heureuse Vierge sainte N. qui dès le berceau, s'il faut ainsi parler, & des vos premiers ans auez dedié & consacré vostre corps à Iesus-Christ, qui auez mené en la terre entre les hommes vne vie, non pas humaine, mais plustost Angelique, vivant en la chair, mais n'ayant aucun commerce & paction avec la chair: c'est aussi pourquoy nostre Dieu & Seigneur vous a esleuë pour son espouse. Vous auez mesprisé & foulé aux pieds toute la noblesse de ce monde, & la beauté des hommes; Mais cependant Iesus-Christ plus noble & plus beau que tous les hommes de race, & de dignité, & d'elegance, vous a donné les arres, & vous a fiancé avec l'anneau de sa foy.

Vous auez contemné & reietté toutes les pompes & richesses du monde; mais le Tout-puissant vous a embellie & ornée d'or, & de toutes sortes de perles & pierres precieuses.

Le Seigneur vous a préparé vne couronne pour iamais, & a mis en vous son siege Royal & son throsne diuin. Vous estes allées au deuât de luy avec la lampe ardëte, & avec abondance d'huile: & auez esté ad-

578 PARADIS DES PRIERES,
mise en Paradis avec les Anges pour assister aux nopces de l'Agneau, & à celle fin de le suiure par tout où il ira, & pour harmonieusement chanter le plaisant & diuin Cantique, que personne ne peut chanter, sinon ceux qui se sont soigneusement gardez & preseruez de toute souilleure & pollution de la chair.

✓ Bien grande & admirable a esté vostre foy, ô N. Vierge tres-saincte, grande a esté aussi vostre deuotion & ferueur; mais bien, sans comparaison, est plus grande la recompense que vous avez acquise en bataillant contre le monde, & le surmontant, de laquelle maintenant vous iouissez heureusement. O Vierge bienheureuse, obtenez pour nous par vos saintes prieres, la grace de celuy auquel vous avez tousiours fait humble & fidele seruice, entre les bras & amoureux embrassemens duquel vous vous reposez maintenant, doucement & delicatement: à celle fin que nous gardions avec toute diligence le Temple du saint Esprit qui est en nous, de crainte que nous ne le souillions par actions immondes, par cogitations deshonestes, & par paroles charnelles & impures.

Impetrez - moy tant de graces , ô Vierge très-chaste , que ie me puisse garder & conseruer libre de toute œuvre & action charnelle : à celle fin que si d'auanture ie ne puis arriuer au suprême degré de virginité , que pour le moins i'obtienne le plus proche , & qu'en mon impureté ie me conserue pur & sans macule , & me contienne dans les limites de la raison humaine : à ce que iamais ie ne paruienne à vne telle & damnable folie , que ma vie soit plus semblable aux bestes brutes & sans raison , qu'aux hommes raisonnables. Priez ie vous supplie , vostre Espoux Iesus-Christ pour moy , à ce qu'il luy plaise me donner la force & vertu , par le moyen de laquelle ie puisse assuiettir la chair à l'esprit , & mortifier en moy tous les desirs depravez d'icelle ; de sorte que ie ne viue & conuerse plus selon la chair , mais que ie viue & chemine selon l'esprit.

Ie sçay bien pour certain , que ce que ie demande est très-ardu & fort difficile , & totalement par dessus les forces & puissances de l'homme , neantmoins quand ie viens à considerer les biens & richesses , la noblesse , la beauté , la delicateffe , & la fleur de vostre aage , & toutes les autres

580 PARADIS DES PRIERES,
choses semblables qui vous pouuoient ser-
uir de tres-ample occasion & matiere de
pecher, & que ie viens à retourner les
yeux & la visée de ma consideration sur
vostre souueraine pureté de corps & d'es-
prit, & sur vostre constance insuperable,
de garder & conseruer vostre virginité, ie
ne perds point courage, & n'ay aucune
deffiance; mais au contraire, ie viens plu-
stost à augmenter mon cœur & ma con-
fiance, que vous qui estes d'une mesme
nature que moy: pourrez impetrer pour
moy, qui ay maintenant mon recours à
vos prieres & saintes oraisons, ce que
par cy-deuant vous auez bien peu obtenir
pour vous-mesme, du grand & souuerain
Dieu: à ce que la pureté & de corps &
d'esprit me soit donnée, pendant que ie
suis encores en ce monde & exil: & apres
cette vie la beatitude & felicité eternelle,
de laquelle vous iouïssiez maintenant heu-
reusement avec vostre Espoux & bien-ai-
mé Iesus-Christ nostre Seigneur, en tous
les siecles des siecles. Ainsi soit-il.

*Oraison à vne sainte Veuſue, ou à celle
qui n'est pas Vierge.*

Le Col-
lecteur.

Que vous estes belle & elegante de
face, mais encores plus belle & gra-

cieuse par la foy, ô sainte & bien-heureuse N. qui en sexe tant fragile auez estendu vos mains aux choses grandes & fortes: qui auez de telle sorte vescu & conuersé en ce monde, que iamais vous n'avez perdu & mis en oubly le desir de la celeste patrie: Vous auez de telle façon temperé les delices & voluptez de la chair, que vous n'avez aucunement fuy & euité les difficultez & aspretez de la vertu.

Pro. 31.

Vous estes la gloire de l'Eglise, la ioye & ließe des Anges, la magnificēce & l'ornement des cieux, & ce pour autant que vous auez virilement combattu estant au monde, que d'un grand & magnanime cœur vous vous estes comportée en toutes vos actions, & pour cela vostre courage a esté conforté, & a receu nouuelles forces. Vous auez ouuert aux pauures vostre main liberale, & auez estendu vostre bras avec dons & larges aumosnes, vers celuy qui estoit en necessité & disette: vous auez seruy d'un œil clair-voyant à celuy qui estoit aueugle, & de pied aux boiteux. Vous estiez la mere des orphelins, la consolatrice des pauures veufues, la tutrice des indigens.

Je supplie maintenant tres-affectueuse-

582 PARADIS DES PRIERES,
ment vostre ame bien-heureuse, par cette
charité qui a tousiours esté en vous, que
puis que vous estes assuree de vous mes-
me, vous soyez soigneuse de moy: vous
estes certaine & tres-assurée de vostre
gloire immarcescible: soyez ie vous prie
soudieuse de ma misere & pauvreté tant di-
uerse. Priez affectueusement dieu pour moi,
à ce qu'il coupe & retranche de moy tou-
te temerité peruerse & damnable, toutes
les émotions brutales & lubriques de la
chair, toute cupidité des plaisirs & voluptés
de ce monde: à ce qu'il oste de moy toute
nonchalance & torpeur, toute stupidité &
lourdesse d'esprit, tout auement d'un
cœur reuesche & obstiné, & toute deso-
beissance, repugnante à toutes bonnes ad-
monitions & saincts conseils.

Demandez à Dieu, qu'il me donne la gra-
ce de faire & accomplir les œuvres de mi-
sericorde, de m'exercer es actions & estu-
des de pieté, à ce que ie puisse compatir
aux affligez, que ie ne mesprise & contem-
ne personne, que ie suiue & imite les bons,
que ie me separe & fuye la société des mes-
chans: obtenez qu'il me donne & eslargis-
se patience es choses aduerses, continen-
ce & humilité es choses prosperes, que fi-

nalement il me face la grace de contemner & fouler aux pieds toutes les choses terrestres & caduques : que ie cherche & desire de tout mon cœur les choses celestes & éternelles, esquelles ie puisse en fin paruenir par vos prieres & merites, & ce par le moyen de nostre Seigneur Iesus-Christ, auquel est deu tout honneur & loüange par tous les siècles des siècles. Ainsi soit-il.

Oraison deuote à tous les Saints de Paradis.

IE vous saluë & fais la reuerence, ô bienheureux Saints & Saintes de Dieu, qui desia auez passé la mer furieuse de cette mortalité, & auez mérité paruenir au port de perpetuel repos, de seureté & de paix.

S. Aug.
ch. 14.
des Me-
dita-
tions.

Vous estes maintenant tout asseurez & tranquilles, ioyeux & remplis de toute lieffe, ie vous prie par la charité qui est en vous, puis que vous estes desia seurs & certains de vostre salut, aussi que soyez soigneux de nous, estans certains de vostre gloire incorruptible : souciez-vous maintenant du nombre infiny de nos miseres.

Ie vous supplie encores par iceluy mesme qui vous a esleus & faits tels que vous estes, de la beauté duquel vous estes délicieusement rassasiez, rendus immortels de son immortalité, iouïssans tousiours de sa


bien-heureuse vision, que vous ayez continuelle souuenance de nous pauvres miserables, & nous secouriez, estans de toutes parts agitez des flottantes vagues & tempestes de ce monde inconstant.

Et vous aussi tres-belles portes qui estes éleuées en hauteur admirable, aidez nous, qui sommes le vil & ord paué de ces bas lieux : prestez-nous la main, & releuez sur pieds les prosternez par terre, afin que reuenus d'infirmité en conualescence, nous soyōs rédus beaucoup plus roides & forts à la guerre, & à toutes sortes de cōbats. Priez & intercedez sans cesse pour nous pauvres & malheureux pecheurs tres-negligens, à celle fin que par vos saintes Oraisons & deuotes prieres nous soyons associez à vostre sainte & bien-heurese compagnie: car autrement ne pourrions estre sauuez.

Certainement nous sommes hommes grandement fragiles & de nulle vertu, animaux, esclaués du ventre & de la chair, esquels à grande peine y a-il vne seule petite apparence de vertu : & toutesfois arrestez en la confession de foy que nous auons en Iesus-Christ : nous sommes faits participans du merite de sa passion, encores que soyons voyageurs & vogans par cette

grande & spacieuse mer, où il y a vne infinité de bestes rampantes, de grands & petits animaux : où mesme est ce furieux & cruel dragon, tousiours prest, & la gueule ouuerte pour nous deuorer, où aussi sont des lieux fort perilleux comme Sylle, Carybde, & autres innombrables, esquels sont abyfmez & confondus les errans & douteux en la foy.

Or donc, bien-heureux Saints & Saintes de Dieu, priez affectueusement Dieu pour nous : & vous ô toutes les saintes troupes victorieuses assemblees, & plaisantes compagnies des bien-heureux : faites semblablement priere pour nous, à ce qu'estans aidez & secourus d'icelles, & de tous vos saints merites, nostre nef & nos bagues sauues, nous meritions paruenir au port de perpetuel salut, de tres-assuré repos, paix continuelle & seureté infinie : où nous puissions tous ensemble, & d'une mesme harmonie, louer nostre commun Seigneur, auquel seul est deuë toute gloire & loüange à iamais, par tous le siecles des siecles. Ainsi soit-il.



CHAPITRE XIII.

Contenant les Prieres & Oraisons
avec lesquelles nous prions Dieu
d'estre preseruez ou deliurez du
mal.

P R E F A C E.

LE plus euident signe de l'amour
de Dieu enuers les hommes, & la
marque plus asseuree d'election, est
lors que Dieu leur enuoye des an-
goisses tribulations & tentations : Mais pour
autant que bien souuent les contrarietez, fas-
cheries, persecutions & tentations, soit du dia-
ble, de la chair, ou du monde, perseuerent plus
longuement que nous ne desirerions ; il nous
faut auoir recours aux armes de l'Oraison ; car
ce sont les remedes plus asseurez & efficace
contre toute sorte d'anxieté & tentation.

Grena-
de au
Miroir
de la
vie hu-
maine.

Quand donc tu seras tenté de l'ennemy, le
meilleur remede est de recourir promptement à
Dieu par deuotes prieres & Oraisons, & de-
uotement embrasser la Croix de Iesus-Christ
des bras de l'esprit, si on ne le peut faire corpo-

rellement, & en icelle contempler le Sauueur du monde tourmenté, affligé, deschiré & defiguré, ietter vn ruisseau de sang hors de son corps: & te ressouuenir que la principale occasion pour laquelle il fut mis en Croix, a esté pour destruire le peché. A raison dequoy en toute tentation, tu luy supplieras deuotement qu'il ne permette point qu'en ton cœur, ny en ton corps regne vne chose si odieuse, laquelle il a voulu par vne si cruelle mort destruire, & luy pourras dire en cette sorte.

O Seigneur qui vous estes laissé cloüer sur le bois de la Croix, non pas seulement afin que ie ne peche point; mais encores afin que ie fuye & prenne en haine & horreur extreme le peche: ne permettez pas, ie vous supplie, par le merite de vos playes tres-sacrées, que ie sois abandonné de vous, mon Seigneur, puis que ie viens vers vous, & qu'en vous seul i'ay mis toute ma confiance & ma force, ains monstrez moy le port où ie me puisse sauuer & aborder plus facilement. Si vous m'abandonnez, que fera-ce de moy? où iray-ie? qui me defendra? Aidez-moy, Seigneur, aidez moy, mon Dieu, & defendez-moy de ce dragon furieux de cette tentation, & affliction, car ie ne puis rien sans vous.

Brefue
Oraisō
au téps
de la
tentation,

Il sera aussi fort bon de faire le signe de la Croix, ou pour le moins imprimer promptement ce signe salutaire en son cœur. Car par ce Moyen les tentations seront vaincues, & seront occasion de plus grande gloire & couronne, & feront bien souvent eslever le cœur & la pensée à Dieu, si que le diable qui estoit venu pour vaincre & remporter sa proye, s'en retournera tout confus à vuide, & sans rien auoir. Or afin que les personnes deuotes ayent diuerses Oraisons contre diuerses tentations & contrarietez, nous auons mis en ce present Chapitre quelques prieres contre les tentations plus communes du diable, du monde & de la chair.

Belle Meditation, à combien de tentations est exposée nostre vie; & combien de sortes nous auons besoin de l'aide & secours diuin.

Le Col-
lecteur,
prinse
des Me-
ditatiōs
de S.
Bern.
Pf. 38.
Iob. 10.

SEigneur, donnez-moy à connoistre
quelle est ma fin, declarez-moy, s'il
vous plaist, le nombre de mes iours. Ne
sera-ce point en bref que la misere de mes
ans prendra fin? car à la verité mon ame se
fasche & ennuye de cette miserable vie.
Mais quelle est cette presente vie, où n'y a
iamais faute de tribulations & continuelles
fascheries? qu'est-ce que cette vie remplie
de lacs, d'embusches & tromperies, où de

toutes parts font les ennemis ? à grand peine vne tentation a-elle cessé, que soudain vne autre plus fascheuse arriue: que mesme bien souuent le combat n'estant pas encores du tout finy, plusieurs autres ennemis & diuerfes batailles viennent inopinément comme à la foule.

Aidez moy donc, mon Seigneur & mon Dieu, pour autant que mes ennemis m'ont enuironné de toutes parts, & ont inuesti ma pauvre ame: car d'un costé le diable a mis son siege, d'un autre mon corps fait ses approches de plus prés: de ce costé-là le mode se prepare pour me liurer l'assaut, & me faire vne cruelle guerre. Ils font toute force de ruiner & accabler mon ame: car c'est elle seule qu'ils cherchent si cruellement, & la poursuient à mort.

De quelque costé que ie me tourne, il n'y a point aucune sureté: car la chair me fournit de toute delicatesse, le monde de vanité, & le diable d'amertume.

Toutes les fois qu'une pensée charnelle pousse & touche ma cogitation à manger, boire, dormir, & à toutes choses semblables qui sont de la chair, par trop mal aduisée qu'elle est, elle y consent facilement, & n'en fait aucune resistance.

Semblablement aussi quand vne vaine pensée agite mon cœur d'ambition mondaine, d'arrogance ou d'orgueil, ce sont les paroles du monde, qui me veut deceiver & tromper. Mais lors que ie suis provoqué à ire, courroux & perturbation d'esprit, c'est vne vraye suggestion diabolique, à laquelle il ne faut moins vertueusement résister qu'au diable mesme.

Ezech.
2. Vous voyez bien, Seigneur, que ceux qui sont & habitent avec moy sont infideles & trompeurs: ie fais ma residence avec des scorpions & serpens. Helas ! pourquoy
Ps. 112. est-ce que ma peregrination est si longuement prolongée: J'ay demeuré avec les habitans & citoyens de Cedar, par trop longtemps mon ame a esté exilée & voyagee.

Et cependant en si grand & ineuitable danger; ie ne trouue rien en moy, à quoy ie puisse auoir mon recours, & en quoy ie puisse mettre mon assurance: Car quand est de mon cœur, il est remply de vanité; il est vague & inconstant, plus mobile & instable que toutes les autres choses mobiles, estant facilement distrait & dispersé par plusieurs & diuerses choses, court inconstamment tantost deçà, tantost delà, & pendant qu'il va ainsi de costé & d'autre
sans

sans aucune stabilité, il ne peut trouuer aucune paix & repos.

Ayez donc pitié de moy, mon Seigneur, ayez compassion de ma pauvreté & misere : retirez-moy de la fange & de l'ordure de peché, de peur que ie ne sois enfoncé par trop auant au borbier, à ce que ie ne demeure tousiours veautré & deietté en la bouë. Mon Dieu, deliurez-moy de mes ps. 38. ennemis, & de tous ceux qui m'ont en haine, pour autant qu'ils se sont renforcez contre moy. Mais vous pouuez, Seigneur, nous deliurer des lacs & pieges de ces chasseurs infernaux, & nous faire libres de cette parole tant fascheuse & rude, que vous prononcerez contre les reprouuez.

Deliurez-nous donc, Seigneur, à celle fin que nous puissions confesser & donner louïange à vostre nom, en disant : Benist soit Dieu, qui nous a deliuré, & ne nous a point donné en proye & viande à la gueule de nos ennemis. Nostre ame est eschap- ps. 123. pée des lacs & filets des oyseleurs, ne plus ne moins que le petit passereau : Car leurs pieges & filets se sont rompus, & nous auons esté parfaictement deliurez, Amen.

S. Aug
ch. v.
des So-
liloques

Apoc. 18

Seigneur Dieu , Créateur & conserua-
teur de tout le genre humain, i'ay main-
tenant mon recours par deuers vous : car
voicy venir derechef ce terrible & effroya-
ble dragon ; ce serpent ancien qui est fort
du Paradis de volupté , qui de sa queue at-
tire avec soy la troisieme partie des estoil-
les du Ciel , lesquelles il fait tomber en
terre , qui corrompt de son venin tou-
tes les eaux de la terre , à celle fin que les
hommes , qui en boiront meurent sou-
dainement.

Et qui sera-ce qui me deliurera & defen-
dra des morsures pestiferées d'iceluy ? qui
me retirera de la gueulle ouuerte de ce
cruel dragon : si ce n'est vous , mon Sei-
gneur , qui luy auez rompu & brisé la teste ?

Je vous supplie tres-humblement, ô eter-
nelle bonté , prestez-moy vostre secours
& faueur : & estendez sur moy vos ailles fa-
uorables, à celle fin que ie fuye de deuant
la tres-hideuse face de ce furieux serpent
qui me poursuit à toute reste : aussi que ie
sois deliuré de l'outrageux effort de ses ef-
froyables cornes , par le moyen de vostre
bouclier fort bien esprouué. D'autant que
son desir & son estude continuel est de per-

dre & deuorer les ames que vous auez créés. Et pour cette cause, Seigneur Dieu, ie crie sans cesse apres vous, disant :

Deliurez-moy par vostre grace de mon ennemy ordinaire & iournalier : lequel, soit que ie dorme, que ie veille, que ie boiue ou mange, ou fasse quelque autre chose, est continuellement aux escoutes, & en embusches pour nui&ct & iour me surprendre par ses fraudes & artifices, tâtost appertement & à descouuert : & puis apres en cachette, cherchant tous les moyens qu'il peut de darder & descocher sur moy ses flesches empoisonnées, lesquelles il a de long-temps esguisées & préparées pour meurtrir ma pauvre ame.

Ie vous supplie tres-affectueusement, mon Seigneur, qui estes le Lyon inuincible de la race de Iuda, de me vouloir armer & fortifier cōtre celyon rugissant, qui ne demande que sa proye pour deuorer. Vous estes le serpent salutaire fiché & posé sur le bois, & hautement esleué : faites-moy la grace que ie puisse descourir les cautelles, ruses & fineses du serpent tres-cauteleux & remply de malice, afin d'euitter toutes ses embusches & filets. Vous estes l'Agneau pur & innocent, qui auez

594 PARADIS DES PRIERES,
brisé & réduit à neant toute la puissance &
tyrannie du diable: donnez à cette vostre
petite brebiette les forces de vostre esprit,
afin qu'estant par vous fortifiée (com-
bien que de sa nature elle soit fragile) elle
puisse surmonter toutes les oppressions de
satan: de sorte que mon ennemy n'ait de-
quoy se glorifier, ains que par vostre grace
& faueur la victoire me demeure, pour la-
quelle ie chanteray vos louanges, & ma-
gnifieray vostre misericorde, laquelle n'a-
bandonne iamais ceux qui mettent leur es-
perance & confiance en vous. Qui avec
le Pere & le S. Esprit, viuez & regnez sans
fin és siecles des siecles. Ainsi soit-il.

Oraison contre les tentations du monde.

SEigneur mon Dieu, voicy vn cruel as-
saut qui se presente, regardez, s'il vous
plaist, comme i'endure force & violence
de mon ennemy: venez, ô mon secours,
& me vangez de ce mien aduersaire, & me
deliurez des embusches trompeuses d'ice-
luy. N'est-ce pas vous qui auez dit: *Asséu-
rez-vous, & ayez bonne confiance, i'ay vain-
cu & surmonté le monde?* Si donc vous l'auéz
tres-vaillamment terrassé & mis par terre:
d'où luy viennent telles forces, de s'esleuer
maintenant à l'encontre de vos esleus &

seruiteurs fideles , & exercer la furie sur iceux : D'où vient qu'il a telle puissance & domination sur ceux que vous auez choisis & separez du monde, à ce qu'ils fussent vostres , & principalement sur la fin & vieillesse d'iceluy, en laquelle sa puissâce & vertu deuroit descroistre & amoindrir, & non pas s'augmenter; Les pechez & toutes sortes de vices regnent par tout , & ceux qui ne les veulēt pas suiure sont la risée & moquerie du monde, les mondains en font des fables & les monstrent au doigt : leur vie est estimée par folie , & leur fin sans honneur. Ils sont griefs & insupportables, mesmes à regarder seulement, pour autant que leur vie est dissemblable à celle du monde.

Telles choses bien souuent poussent & excitent nos esprits, ô Seigneur, & peur s'en faut que ne soyons esbranlez, & que nos pieds ne se bougent , pour delaisant les voyes dures & fascheuses de vos saints commandemens , nous mettre du costé du monde , qui promet toutes choses douces & heureuses , toutes choses ioyeuses & plaisantes , qui offre & presente auec vn visage riant, les richesses, honneurs & voluptez de ce siecle peruers : Mais ie vous supplie tres-affectueusement mon

Dieu, qu'il vous plaife me fegreger & retirer des tenebres, des fraudes & des abominables turpitudes de ce monde. Illuminez mes yeux de vofre diuine clarté, à ce que ie puiſſe voir & entendre combien eſt briëue, combien incertaine & trompeuſe, combien aueugle & perilleuſe la felicité & le bon-heur que monſtre & promet ce maiftre remply de toute fauſſeté & fineſſe. Conſeruez-moy touſiours en la reconnoiſſance & confeſſion de vofre nom tres-fainct, de crainte que ie ne ſois embrouïllé & veautré parmy les ſollicitudes & affaires mondaines & ſeculieres, leſquels ont accouſtumé d'empescher & retirer les ames deuotes des exercices de pieté, & d'eſteindre & ſuffoquer toutes les inſpirations & mouuemens ſpirituels, excitez par la grace du ſainct Eſprit.

Faites-moy tant de grace, mon-Seigneur, que le monde ſoit mort & crucifié pour moy, & reciproquement ie ſois mort & crucifié pour luy, que ie ne mette plus mon eſtude à luy plaire & aggréer, de peur qu'eſtant fait amy du monde, ie ne ſois vofre ennemy. Faites que i'eſtime peu toutes ſes malueillances & iniures, que ie contemne facilement tous ſes iugemens

temeraires & tres-peruers : ſçachant fort bien qu'il ne ſe faut glorifier en rien qui ſoit, ſinon en la croix de Ieſus-Chriſt mon Sauueur & Seigneur, qui auez tant enduré pour l'amour dè moy : c'eſt pourquoy vous viuez & regnez avec le Pere & le ſainct Eſprit par tous les ſiecles des ſiecles. Amen.

Oraisons contre les tentations de la chair.

O V eſtes-vous, ô bon Ieſus mon doux Sauueur, où eſtes-vous ? Voicy Ieſabel qui derechef me fait la guerre, voicy la chair qui ſe met en fureur, & iaçoit qu'elle me ſoit domeſtique, elle m'eſt toutesfois tres-cruelle & faſcheuſe ennemie. Aſſiſtez-moy, bon Ieſus, aſſiſtez-moy de voſtre preſence : venez promptement, & donnez ſecours à celuy qui vacile, & eſt en grand danger de tomber, à raiſon que les eaux de tentation & concupiſcence ſont entrées iuſques à l'interieur de ma pauvre ame, & pour autant que les deſirs de la chair m'oppreſſent, & me ſont violence, qui ſera celuy tant robuste & ſi fort qui pourra luy faire teſte, & batailler contre vn ennemy ſi puiffant, & qui meſmement monſtre ſemblant d'eſtre amy ? Seigneur, qui pourra ſouſtenir ſa fureur & ſes aſſauts ?

Pl. 28.

O tres-doux Iesus, mon secours & toute mon esperance ! vous n'estes pas ignorant, Seigneur, de mon infirmité, & du peu de force qui est en moy : vous connoissez bien combien est vieille ; imbecile, ruineuse & caducque la forteresse de mon cœur ; vous sçavez bien que necessairement elle tombera estant assaillie avec telle munition : & par tant de pieces de batterie, si ce n'est qu'elle soit munie & fortifiée de vostre secours & appuy, mon doux Sauueur.

Le crie donc maintenāt & hausse ma voix par deuers vous, vous inuoquant de tout mon cœur & de toutes mes forces. Donnez-moy vostre grace, mon Dieu, afin que ie ne suiue les concupiscences de ma chair, si chatoüilleuse & flatteresse : mais que vaillamment ie luy contredise & fasse resistance. Aydez-moy, à ce que ie puisse dompter mon corps, & le reduire sous le ioug & seruitude de l'esprit, de peur que ma chair lubrique ne vueille outrepasser les iustes limites, & les bornes de la raison : de crainte que mon cœur & mon corps ne soit pollué & contaminé par les vices charnels, par luxure, gourmandise, yron-gnerie, & autres voluptez illicites & dam-nables.

CHAPITRE XIII. 599

Sanctifiez-moy, mon Seigneur, & me gouvernez, afin que mes yeux soient bien conduits, que mes oreilles soient bouchées, que ie ne touche rien qui soit illicite, que ie fuye comme feu, tout ce qui est dangereux & nuisible, & encores que ie sois rudement picqué & sente l'aiguillon; que ie ne donne toutesfois aucun consentement: que ie nourrisse ma chair de telle façon, que par apres elle ne vienne à regimber, estant par trop grasse & à son aise, que ie la reprime en sorte qu'elle ne deuienne orgueilleuse & insolente.

Oùtroyez-moy, qu'en toutes choses & de telle façon ie puisse assujettir la chair à l'esprit, qu'en fin elle luy obeïsse, & ne vueille plus luy commander, comme dame & maistresse: mais qu'elle serue comme chambriere, à ce qu'entre les deux il y ait vn souuerain consentement & accord, vne paix desirée, vn continuel repos, & vne concorde perpetuelle. Amen.

Oraison contres les mauuaises pensées.

SEigneur mon Dieu, ne vous esloignez point de moy: Mon Dieu, prenez soin & garde à me secourir; car plusieurs pensées se sont esleuées dans moy, & diuerses angoisses qui tourmentent & affligent mon

Xau-
spis liu.
2. de
l'imita-
tion de
Iesus
Christ.

600 PARADIS DES PRIÈRES,
ame. Comment sera-il possible que ie passe sans recevoir quelque blessure : comment les pourray-je vaincre & leur briser la teste? Vous m'avez fait bonne & fidele promesse de me secourir, disant: J'iray & marcheray deuant toy en bataille, & abaisseray les glorieux & superbes de la terre. J'ouvriray les portes de la prison, & te donneray à connoistre les choses plus secretes & cachées. Faites donc Seigneur, cōme vous dites, & selon vostre promesse, à ce que toutes les mauuaises pensées & toutes les sales imaginatiōs fūient arriere de mon triste cœur, ne pouuant soustenir la presence de vostre diuine face: Car tout mō espoir & ma confiance, toute mon vnique consolation, c'est d'auoir mon refuge vers vous en toutes mes tentations & contrarietez, de me fier en vous, vous reclamer du plus profond de mon cœur, & attendre patiemment vostre consolation.

Mon Seigneur, clarifiez-moy de la clarté de vostre lumiere eternelle, & dechassez de l'habitation de mon cœur toutes les tenebres de peché & d'ignorance. Empeschez les dispersiōs & euagations de mes pensées, repoussez les tentations qui m'affaillent & me veulent forcer. Com-

CHAPITRE XIII. 601

battez vaillamment pour moy , & surmon-
tez par vostre puissante main ces bestes
cruelles & malignes ; ie veux dire , ces con-
cupiscences lubriques & dangereuses , afin
que par vostre grace la paix & tranquillité
tant désirée , se fasse dans mon cœur , à ce
que l'abondance de louange & de gloire
soit doucement entenduë en vostre Palais
sainct & Royal , c'est à dire , en la conscien-
ce pure & sans macule. Commandez aux
vents , orages & tempestes : dites à la mer,
repose-toy , cesse de t'esmouuoir ; dites à
la bise , qu'elle ne souffle plus : & faites
commandement à l'ennemy qu'il ne tour-
mente plus mon cœur par mauuaises pen-
sées & suggestions , & alors y aura vne
grande tranquillité. Amen.

Oraison contre l'impugnacion des vices.

TRes-pitoyable Seigneur Iesus Christ,
regardez des yeux de vostre clemen-
ce , celuy qui estant prosterné aux pieds de
vostre diuine misericorde , vous monstre
les playes , que luy-mesme a infligées à
son ame par peché , afin que vostre bon
plaisir soit de les guarir.

O Iesus tres-misericordieux , ayez pitié &
compassion de mon infirmité , de mes blef-
sures , & de ma miserable captiuité , qui

sont cause que ma pauvre ame ne cherche que les choses terriennes : de façon qu'elle est continuellement & de grande rudesse agitée de diuers desirs & affections. Je vous supplie, ô Iesus tres-debonnaire, par cette charité qui vous a liuré entre les mains des hommes pecheurs, pour estre lié & crucifié, & laquelle par l'espace de trois heures vous a beaucoup plus estroittement retenu en la Croix, que les cloux fchez dans vos mains & dans vos pieds, qu'il vous plaise rompre & délier le ioug de ma captiuité, & me deliurer aussi de crime, concupiscences & inclinations mauuaises.

Defendez-moy, Seigneur, de toutes les inclinations de mes aduersaires, & des embusches de mes ennemis mortels: soiez, ie vous prie mon protecteur & secours en toutes mes tentations. Arrachez de moy tout amour priué, esteignez en moy toutes mauuaises affections & passions desordonnées de toute procliuité & inclination à orgueil, ire, enuie, vaine-gloire, & autres vices; car vous estes seul qui me pouuez deliurer de tout cela. O bon Iesus, remplissez-moy de vostre grace & bonté, & de vostre tres-parfaicte charité : conseruez-moy aussi en tout bien. Faites-moy la gra-

ce de fuir & euitier toutes les occasions de pecher : faites-moy la faueur que ie puisse vaincre courageusement toutes les tentations , assubiectir la chair à l'esprit , & eua-der les cauteleuses astuces & tromperies de satan : Donnez-moy la force & vertu de ia-mais ne consentir à peché ; mais desirer sur toutes choses vostre honneur & vostre gloire , & m'employer du tout à faire vo-stre tres-saincte & diuine volonté. Ainsi soit-il.

Oraison quand la tentation perseuere.

MOn doux Seigneur Iesus-Christ , si ainsi vous permettez que moy qui suis pecheur , ord & abominable , ie sois contre ma volonté affligé par ces tenta-tions & pechez tant sales & detestables, vostre volonté soit faite.

Vous sçauiez combien ie suis indigne de receuoir aucune consolation de vous , & combien en vostre endroit ie suis desloyal en toutes choses , me sequestrant de vous , & adherant d'un amour desordonné aux creatures , qui est à mon aduis que ie suis liuré à telles passions : Parquoy , en me conformant à l'oblation par laquelle vous vous estes resigné à vostre Pere , & offert au supplice de la mort ; ie m'offre à vous ,

604 PARADIS DES PRIERES,
& me resigne entierement à tout ce qu'il
vous plaira m'enuoyer ; ie m'offre pour
estre persecuté ou tenté autant & en telle
sorte qu'il vous plaira.

Car vous connoissez trop bien, ô tres-
pitoyable Iesus ; combien ma puissance est
foible, & d'autre costé combien mon in-
constance & ma mauuaitié est grande :
c'est pourquoy ie me fie en vous seul, & me
deffie totalement de mes propres forces.
Mon Dieu, mon Seigneur, receuez-moy
par vostre misericorde, & par vostre puis-
sance & vertu gardez-moy, defendez-moy
par vostre grace, afin que ie soustienne &
surmonte toutes aduersitez, toutes tenta-
tions interieures & exterieures, & que du-
rant leur effort ie me tienne inseparable-
ment près de vous avec vne telle force, pa-
tience & fidelité, que ie ne donne iamais
consentement au peché, voire mesme s'il
falloit endurer la mort : Que ie ne cherche
consolation qu'en vous ; bref que toutes
tentations me soient profitables, pour aug-
menter en moy vostre grace, & que pas
vne d'icelles soit la cause de ma damnation
& ruine. Amen.

Oraison & action de grace apres que la tentation a cessé, ou qu'elle est vaincüe.

IE sçay & connois fort bien : mon Seigneur, vray amateur de nos ames, que tandis que mon pauvre cœur estoit en anxieté, & que mon ame estoit affligée par diuerses tentations, vous m'avez secouru & aidé, & vous m'avez esleué sur la pierre & sur le rocher inaccessible: & par apres, vous m'avez remis en la voye, Et ce pour autant que vous estes toute mon esperance, ma forteresse & mon rempart imprenable deuant la face de mon ennemy. Dorenavant ie me reposeray seurement en vostre tabernacle par tous les siecles, ie seray couuert & defendu sous l'ombrage de vos aisles, & ce pour autant que vous avez ouy & exaucé mon oraison, que ie vous ay présentée au temps de la tentation & de ma plus grande affliction.

Antio-
ch. ho.
24 de
ses Pan-
dectes.

Ie vous rends donc, mon Dieu, toutes les humbles actions de graces qu'il m'est possible pour cette victoire qui vient de vous, & non pas de ma force & industrie: apres vne longue & fascheuse tempeste, vous faites reluire vne douce & paisible ferenité: Car quant est de moy, ie pouuois infailliblement tomber, & fusse tombé

606 PARADIS DES PRIERES,
sans doute : mais ie suis maintenant victo-
rieux, à raison que i'ay mis en vous, qui
estes le secours & aide tres-fort, toute l'es-
perance de cette mienne victoire. m'estant
toufiours proposé deuant les yeux ces pa-
roles : Si Dieu est pour nous, qui se voudra
mettre à l'encontre, ie peux toute chose en
celuy qui me conforte & qui me donne
force.

Faites croistre & augmenter toufiours
de plus en plus cet espoir & confiance, afin
que de iour en iour ma foy venant à pren-
dre nouvelle force & accroissement, la for-
ce & vertu de mes ennemis vienne à de-
faillir & s'affoiblir, iusques à tant que vous
m'ayez retiré de ce lieu de combat, & mis
en lieu de seureté, où il n'y a point d'enne-
my ny de guerre, où il n'y a aucune crainte
de danger & peril, où l'on ne peut endurer
aucune angoisse & contrarieté ; mais en ce
lieu est vne perpetuelle paix & seureté,
lors que vous baillerez vostre Royaume
entre les mains de vostre Pere, avec lequel
vous viuez & regnez Dieu eternellement,
és siecles des siecles, Amen.

*Oraison contre les distractions & euagations
d'esprit au temps de l'Oraison.*

Dieu tout-puissant & eternal, qui con-
noissez apertement le cœur, & qui es-
pluchez les plus secrettes pensées d'iceluy.

Vous connoissez bien, Seigneur, mon
imperfection; ou pour mieux dire, ma tres-
grande lascheté & negligence, laquelle
me desplaist de tout mon cœur, & pour la-
quelle ie m'accuse & rends coupable en
vostre diuine presence: Mais qui pourroit
mieux regir & gouuerner ce mien cœur
que vous qui estes Dieu de mon cœur?

Leuez-vous, Seigneur, commandez aux
vêts des diuerses cogitations de mon ame,
& distractions de mon cœur, à ce qu'ils ces-
sent & se reposent, & qu'ils permettent
tant soit peu à mon triste cœur, de s'esse-
uer & hausser vers vous, par vne ardente
ferueur & deuotion, & de se joindre & vnir
parfaitement à vous sans empeschement,
entant qu'il est possible de se conjoindre &
vnir à vous durant cette vie presente. Ac-
complissez en moy, mon Seigneur, la pro-
messe que vous avez faite à l'ame deuote,
& me conduisez à la solitude; c'est à dire en
vous seul, avec vn cœur deuot & bien re-
colligé, afin que là vous parliez à moy

608 PARADIS DES PRIERES,
& à mon cœur, & que i'escoute ententiuement & obeïsse à vos saintes paroles: que ie me repose solitaire en ce lieu, estant ententif à vous seul, & que ie me hausse par dessus moy-mesme que ie vous embrasse estroittement des bras d'amour; ie vous tienne & ne vous laisse point aller & departir d'auec moy, que vous ne m'ayez donné vostre benediction.

O Dieu tres-aimable & tres-liberal, donnez-moy ce que vous auez promis à vostre peuple par la bouche de vostre Prophete Ieremie, & renouuellez vn esprit
Ier. 31.
Psal. 50.
nouveau & droit en mes entrailles. Ostez de moy le cœur de pierre & adamentin, & me donnez vn cœur mol, vn cœur de chair, vn cœur humain, afin qu'estant appuyé sur l'esperance que vous me donnez, & embrazé de vostre amour, ie puisse cheminer droit en la voye de vos commandemens, afin que ie garde & accomplisse vos iugemens & iustifications, en telle sorte que ie puisse estre enroollé & escrit au catalogue de vostre peuple, que ie sois vostre, & demeure tousiours vostre, mon Seigneur & mon Dieu. Et qu'il vous plaist m'accorder ce iourd'huy, & à tous les fideles par les merites de Iesus-Christ

vostre Fils, ce que ie vous demande : tout ainsi que par iceluy vous nous auez enseigné ce que seurement nous deuons & pouuons vous demander : Auec lequel, & auec le S. Esprit vous viuez & regnez par tous les siecles des siecles. Amen.

Oraison pour dire lors que quelque tribulation & aduersité te menace.

O Tres-doux & debonnaire Seigneur Iesus-Christ me voulant conformer à cette resignation & charité, par laquelle vous vous estes présenté à la mort de la Croix, ie vous presente maintenant & mon corps & mon ame, afin que vous fassiez de moy tout ainsi qu'il vous plaira. Tres-doux Seigneur, ie veux suiure en tout & par tout vostre tres-saincte & agreable volonté, quoy que i'apperçoie des grandes aduersitez & tribulations qui me menacent, me soumettant du tout à vostre diuine & tres-saincte prouidence : car i'espere que vous prendrez la conduite, tant de ma personne, que de toutes choses qui me concernent & appartiennent : ce que ie vous supplie tres-humblement vouloir faire, premierement à vostre plus grande gloire & honneur, à l'edification de mon prochain, & au salut de mon ame.

Lan-
sperge
au iiii.
intitulé
Pharce-
tra.

610 PARADIS DES PRIERES,
Oraison deuant l'aduersité & tribulation.

Lan-
sperge
au mes-
me lieu.

O Tres-bening & tres-patient Iesus, mon Seigneur, me conformant à toutes les aduersitez, peines & tribulations que vous auez innocemment endurées pour l'amour de moy; ie veux & desire aussi pour l'amour de vous, pâtir & endurer ces afflictions qui m'ont enuironnées, iacoit qu'elles ne soient pas des plus grandes & fascheuses, attendu mesmement que tel est vostre bon plaisir, & sainte volonté; car ie me reconnois digne de tous maux, & que i'ay meritè choses plus griesues & ameres que tout cecy.

O doux Iesus donnez-moy vne patience tres-parfaite, accompagnée de mansuetude, de benignité, & de vraye humilité, à ce que ie reconnoisse de tout mon cœur, que ie suis digne de tout mespris & peine: & faites que ie reçoie patiemment, volontairement & ioyeusement tous les accidens & tribulations qui se debandent sur moy, tant & si longuement qu'il vous plaira.

O Seigneur vrayement riche en misericorde, ie reçois de la main de vostre diuine prouidence & affection plus que paternelle, toute l'oppression & anxieté que i'en-

de presentement, estant mesme prest & resolu de la porter plus rigoureuse, si tel est vostre bon plaisir.

Ie vous rends graces immortelles, d'auoir de toute eternité ordonné ces trauaux & afflictions, pour le bien & auancement de nostre salut. Que puis-je dire sinon que i'ay merit   encores pis, & que ie suis indigne de toutes vos graces & saintes consolations? Partant    l'honneur de la Passion,    laquelle volontairement vous vous estes present   pour moy, ie me presente aussi pour soustenir cette aduersit  , avec deliberation de ne chercher autre consolation & deliurance, sinon en vous, & par vous, mon Seigneur, & selon qu'il vous plaira en ordonner.

Toutesfois ie vous supplie humblement de m'aider, & me donner tout ce qui m'est necessaire,    celle fin que ie puisse endurer, & en endurant satisfaire    vostre volont  . Et    la mienne volont  , Seigneur, que ie puisse souffrir pour l'amour de vous toute tribulation & contemnement de la part de tout le monde, afin de vous pouoir presenter quelque seruice agreable, tant pour les pechez des autres, que pour les miens propres. Amen.

612 PARADIS DES PRIERES,
*Oraison quand tu seras detenu en quelque fas-
cheuse maladie.*

Antoi-
ne Hi-
mert.
liu. 1.
des Pa-
rales.

S Eigneur Iesus-Christ, qui estes le salut
vnique des viuans, & la vie eternelle
des mourans, ie me soubmets du tout à vo-
stre sainte volonté, soit qu'il vous plai-
se que cette ame fasse plus long seiour en
ce mien corps, pour vous faire seruice,
soit que vous ordonniez son departe-
ment, m'assurant que tout ce qui vous
est commis ne peut perir: ie deposeray &
laisseray volontairement cette chair fra-
gile & miserable, s'il vous vient ainsi à
plaisir, pour l'esperance que i'ay de la resur-
rection future, en laquelle elle me sera ren-
duë douce & ornée de perfections grâdes.

Qu'il vous plaise, Seigneur, fortifier mon
ame de vostre grace, contre toutes les ten-
tations des ennemis. Couurez-moy con-
tre tous les assauts de Satan, du bouclier
de vostre misericorde, par laquelle vous
auez rendu les Martyrs inuincibles à l'en-
contre des tourmens horribles & espou-
uantables; ie sens qu'il n'y a rien en moy
dequoy ie me doie assurer: toute ma con-
fiance repose en vostre singuliere bonté. Je
n'ay aucun bon œuure ou merite, que ie
puisse alleguer deuant vous: hélas! ie

ne voy que par trop d'offenses; mais vne chose me console, c'est que par vostre iustice i'espere estre du nombre des iustes.

Vous auez prins nature humaine pour l'amour de moy; pour moy vous auez eu soif, pour moy vous auez enduré la faim; pour moy vous auez enseigné, prié & ieuné; pour moy vous auez fait tant de bonnes œuures durant vostre vie: & en fin auez liuré vostre ame precieuse à la mort pour l'amour de moy. Et attendu que vous vous estes donné totalement pour moy, plaïse vous me faire la grace que ie me resente maintenant des biens que vous m'auez par vostre largesse accoustumée si liberalement & auec telle affluence eslargy.

Faites, ô Seigneur Iesus-Christ, que vostre sang efface les souilleures de mes iniquitez, que vostre iustice couure mon iniustice, que vos merites soient faits miens deuant la face du iuge souuerain. En ce rengregement de mon mal, augmentez aussi vostre grace, afin que la foy ne vacile point en moy, que l'esperance ne s'affoiblisse, que la charité ne vienne à se refroidir, que l'infirmité humaine ne soit abbatuë par crainte de la mort, ains faites-moy cette faueur, ô tres-doux & pitoyable

614 PARADIS DES PRIERES,

Iesus, quand la mort aura occupé & fermé les yeux corporels, neantmoins que les yeux de l'esprit ne se destournent point de vous, & que quand elle m'ostera l'usage de ma langue, que mon cœur ne laisse cependant de crier & soupirer vers vous. Je recommande donc mon esprit entre vos mains, ô mon tres-debonnaire Seigneur, auquel soit honneur & gloire perpetuelle. Ainsi soit-il.

Oraison pour dire au temps de quelque grande affliction commune, comme au temps de guerre, de peste, ou de famine.

P Michel en
ses bou-
quets
spiri-
tuels.

Dieu eternal, pere de misericorde, Dieu de paix & de dilection, iusques à quand serez-vous courroucé contre vostre peuple, & ne retirerez de dessus nous vos verges paternelles, les guerres, la pestilence cruelle, & la grande necessité qui nous oppresse & enuironne de toutes parts? Regardez s'il vous plaist des yeux de vostre bonté & misericorde sur nous, & à nos afflictions: exaucez les souspirs & gemissemens des pauvres, que les larmes & cris continuels de vos creatures esmeuvent tant soit peu vos entrailles paternelles à nous aider & secourir.


Helas, Seigneur, ie confesse que tout

CHAPITRE XIII. 615

cela est iuste punition de nos pechez & offenses : nous auons peché & commis plusieurs iniquitez contre vous , qui estes la fontaine de vie ; nous vous auons delaisné, ô nostre vie & felicité. Nous vous auons contemnè, & nous sommes mocquez de vous par nos pechez : nous auons combattu & fait la guere contre vous & contre vos saints commandemens. Nous n'auons point gardé ces commandemens , par lesquels vous parlez en cette sorte : Si vous gardez mes preceptes, ils vous conserueront & garderont, que si vous ne les voulez obseruer, le glaïue de ma fureur vous deuorera & consommera. Remettez , remettez, Seigneur, le glaïue & l'espée sanglante de vostre iustice en son fourreau: commandez à l'Ange, qui est executeur de vostre volonté, qu'il cesse de frapper, de peur qu'il ne continuë cette vengeance iusques à vne parfaite consommation. Retournez-vous par deuers-nous, Seigneur tres-pitoyable, soyez exorable & propice à vostre peuple; ôtez de dessus nous ces guerres furieuses & cruelles, cette pestilence & corruption de l'air, & cette sterilité de la terre. Faites, Seigneur, que vostre main vengeresse cesse maintenant : c'est

616 PARADIS DES PRIERES,
assez, c'est assez, mon Dieu, afin que la
terre ne soit desolée & reduite en solitude,
& à ce que toutes les nations sçachent que
vous estes nostre Dieu & Seigneur, & que
vostre saint Nom est loüé & inuoqué de
nous, que vostre misericorde s'est esten-
duë dessus nous: & par ainsi, iouïssans d'v-
ne paix & tranquillité parfaite, d'un air
sain & temperé, d'une fertilité & abondan-
ce, à vostre plus grande gloire & honneur,
nous puissions perseverer en vostre service
en ce monde, & par apres reciter vos di-
uines loüanges au Ciel, sans fin par tous les
siecles des siecles. Ainsi soit-il.





CHAPITRE XIV.

Comprenant les Oraisons pour
demander les Vertus.

PROLOGE.

L*A perfection Chrestienne consiste en deux choses , comme dit le Prophete : à sçauoir à fuir & euitter le mal & faire le bien ; car tout ainsi que le champ retourneroit en son premier estat , si apres auoir esté defriché des ronces & mauuaises herbes , on ne semoit en iceluy quelque bonne semence , ainsi est-il de l'ame ; car de rien ne seruiroit auoir couppé les vices , si on ne fait diligence d'y planter la vertu. Apres donc auoir donné quelques Oraisons pour euitter le mal ; nous en mettrons consecutiuelement quelques-vnes les plus deuotes , pour demander & impetrer le bien & la vertu.*

*Oraison pour demander la grace
de Dieu.*

MOn Seigneur mon Dieu , qui m'avez créé selon vostre Image & semblance, donnez-moy vostre grace, laquelle m'est si grandement nécessaire à mon salut,, afin que ie puisse vaincre ma mauuaise nature, qui m'attire à peché & perdition: Car ie sens en ma chair la loy de peché, laquelle contredit à la loy de l'esprit & de ma raison, & me mene comme prisonnier pour obeir à la sensualité, & ne puis résister à ces passions, si vostre sainte grace ne me donne assistance & secours.

O mon Seigneur, combien vostre grace m'est-elle nécessaire pour commencer quelque bien, pour le poursuiure, pour le paracheuer & mener à perfection ! Car sans vostre grace, ie ne puis faire aucun bien ; mais estant assisté & renforcé d'icelle, ie suis fort & puissant à tout. O grace, vraiment celeste, sans laquelle ne peuvent estre aucuns propres merites, sans laquelle aussi ne sont à estimer aucuns dons de nature ! car nulles sciences, nulles richesses, nulle force ou beauté, nul enten-

dement & bien-disance ne profite enuers vous Seigneur, sans vostre grace: Car les dons de nature sont communs aux bons & aux mauuais: mais vostre grace & vostre amour est vn don propre & particulier aux esleuz, & ceux qui en sont marquez sont estimez dignes de la vie eternelle.

Cette grace de vostre amour est si excellente, que ny le don de Prophetie, ny la puissance de faire miracles, ny aucune contemplation des choses diuines pour hautes & profondes qu'elles soient, ne peut estre estimée sans icelle. Et qui plus est, ny la foy, ny l'esperance, ny aucunes autres vertus vous sont agreables sans vostre grace, & sans la charité.

O tres-heureuse grace, qui fais le pauvre d'esprit riche en vertus, & fais deuenir humble de cœur celuy qui est riche de beaucoup de biens! Viens & descends en moy, remply-moy dès le matin de ta consolation, afin que mon ame ne defaille par lascheté & secheresse de mon cœur. Je vous supplie, Seigneur, que ie puisse trouuer grace en vostre diuine presence, car il me suffit de vostre grace, encores que ie n'obtienne le reste que ma nature desire: Car combien que ie sois tenté &

620 PARADIS DES PRIERES,
fasché de plusieurs tribulations, si ne crain-
dray-je aucun mal, pourueu que vostre
grace soit avec moy.

Vostre grace est ma force, c'est elle qui
me donne aide & confort. Elle est plus
puissante que tous mes ennemis, & plus
sage que tous les sages de ce monde. Elle
est maistresse de verité, c'est elle qui ensei-
gne la discipline : elle est la lumiere du
cœur, le soulagement des oppressez,
nourrie de deuotion, elle chasse toute
crainte, & obtient les douces larmes de
componction. Que suis-je sans elle au-
tre chose qu'un bois sec, qu'une plante
inutile & digne d'estre arrachée ? C'est
pourquoy ie vous supplie tres-affectueuse-
ment, mon Seigneur, que vostre grace
me preuienne tousiours, & me suiue, & me
face continuellement ententif à bonnes
œuvres : & ce par vostre Fils unique Iesus
Christ nostre Sauueur. Ainsi soit-il.

Oraison pour demander la crainte de Dieu.

Grena-
de liu.
5. du
Memo-
rial.

TOut ainsi que vous seul, Seigneur,
meritez comme vray Dieu d'estre
adoré : aussi pareillement à vous seul est
deuë vne souveraine crainte & reuerence,
comme vous-mesmes l'avez tesmoigné,
quand vous auez dit : *Ne craignez point*

ceux qui tuent le corps; mais ne peuvent tuer ^{Matt.}
l'ame, ains plustost craignez celui qui peut ^{10.}
perdre & enuoyer à la gehenne, & l'ame, &
le corps.

Que mon ame donc, Seigneur, & mon cœur vous craignent, puis qu'en vous qui estes toute chose, n'y a moins de raison d'estre craint que d'estre aimé: car comme vous estes infiniment misericordieux, aussi estes-vous infiniment iuste: & comme les œuvres de vostre miséricorde sont sans nombre, aussi sont celles de vostre iustice: & ce que nous deuons plus craindre, est qu'il y a beaucoup plus de vaisseaux d'ire, que de miséricorde, estans les damnez en si grand nombre, & estant si petit celui des esleuz. Que ie vous craigne donc, Seigneur, pour la grandeur de celle iustice, & pour la profondeur de vos iugemens, & pour la hauteſſe de vostre Majesté, & pour l'immensité de vostre grandeur, & pour la multitude de mes pechez & presomptions, & sur tout pour la continuelle résistance que i'ay faite à vos saintes inspirations.

Que ie vous craigne donc & tremble en vostre presence, en la presence duquel trēblent les colonnes du Ciel, & tout cēt

622 PARADIS DES PRIERES,
vniuers. Mais qui sera iamais celuy qui ne
vous craigne, ô Roy des gens? Et si toutes
les créatures du Ciel & de la terre vous be-
nissent & craignent, que dois-je faire, moy
vil pecheur, poudre & cendre? Si les An-
ges tremblent quand ils vous adorent, &
chantent vos loüanges: pourquoy ne
tremblera mon cœur, quand il fait ce
mesme exercice? Ah! pauvre miserable
que ie suis, comment mon ame est-elle
deuenüe si aride, qu'elle ne iette vne seule
larme, quand le seruiteur parle à son mai-
stre, la creature à son createur, l'homme
avec Dieu, celuy qui est créé & fait de ter-
re, avec celuy qui a de rien tout créé?

Que ie vous craigne pareillement Sei-
gneur, pour la grandeur de vos iugemens,
& des choses que depuis le commence-
ment du monde iusques à l'heure presente
vous avez faites. Grand iugement fut ce-
luy de la cheute de cét Ange si excellent
& si beau; grand iugement fut celuy du
Gen. 3. deluge des eaux, pour le chastiment du
monde; grand iugement fut l'election de
Iacob, & la reprobation d'Esäu, l'abandon-
nement de Iudas, & la vocation de saint
Gen. 16. Paul: la reprobation du peuple des Iuifs,
& l'election du peuple des Gentils, avec
autres

CHAPITRE XIV. 623

autres semblables merueilles, qui suruiennent entre les hommes chacun iour, & que nous n'entendons. Et sur tout, cela est encores vn merueilleux & espouventable iugement, voir tant de nations sur la terre, demeurées & gisantes en la region & ombre de la mort, & és tenebres d'infidelité, cheminans de tenebres en tenebres, & de traux temporels aux peines eternelles.

Que ie vous craigne donc, pour la grandeur de tels argumens, attendu que ie ne sçay si ie seray point l'vn de ces reprouuez: Car si le iuste ne se sauue qu'avec grande difficulté, que pourra deuenir le meschant & miserable pecheur? Si Iob tres-innocent, trembla pour la fureur de vostre ire, comme pour l'impetuosité de la mer courroucée: comment ne craindray-je, moy qui suis si esloigné de telle innocence? Et si le Prophete Ieremie sanctifié au ventre de sa mere, ne peut trouuer lieu où se cacher, pour la grande crainte qu'il a de vostre ire, que fera celuy lequel est sorty avec peché du ventre de la sienne, & depuis ce temps iusques à present en a multiplié & accumulé tant d'autres?

Que ie vous craigne pareillement, Sei-

624 PARADIS DES PRIERES,
gneur , pour la multitude infinie de mes
maux & pechez , avec lesquels j'ay à com-
paroistre à vostre iugement , lors que ce
feu bruslant & deuorant sera deuant vous
avec cette grande tempeste , quand vous
vnirez le Ciel & la terre , pour iuger
vostre peuple. Et que là en presence de
tant de milliers d'hommes se descouuri-
ront toutes mes meschancetez , & qu'en
presence & assemblée de tous les Anges, se
publieront tous mes pechez commis, non
seulement de paroles & d'œuvres; mais en-
cores de pensées , où j'auray autant de Ju-
ges , comme il y en a qui m'ont surmonté
& precedé en bonnes œuvres: & y aura au-
tant de tesmoins contre moy , qu'il y au-
ra de ceux qui ont donné bon exemple,
mesme qu'attendant vn tel iugement, en-
cores ne puis-je refrener mes vices : mais
plustost ie me veautre dans la lie de mes
pechez.

Ah ! Seigneur , ne vueillez entrer en iu-
gement avec vostre seruiteur , car aupres
de vous ne se pourra iustifier homme qui
viue : & qui sera celuy qui se trouuera iuste,
si vous ne iugez sans pitié & misericorde?
Pour cette cause prosterné à vos pieds,
d'vn cœur contrit & humilié : ie pleureray

avec vostre Prophete, disât: Ne me repre-
nez, Seigneur, en vostre fureur, & ne me
vueillez point chastier en vostre ire. Tour-
nez-vous vers moy, mon Seigneur, & de-
liurez cette mienne ame, & me sauuez par
la grace de vostre bonté & misericorde:
Car en la mort du peché il n'y a celuy qui
se souuienne de vous, & puis en enfer, qui
est celuy qui vous louë & confesse iamais?
Aidez-moy donc, Seigneur, qui viuez &
regnez à tousiours és siecles des siecles,
Amen.

Oraison pour demander la foy.

PEre souuerain, Tout-puissant & eter-
nel, Dieu tres-benin & misericor-
dieux, ie vous supplie tres-affectueuse-
ment qu'il vous plaise m'eilargir la vraye,
droiëte & entiere foy Chrestienne & Ca-
tholique, laquelle soit sincere & sans cor-
ruption d'erreur & heresie, & sans aucune
macule de meschanceté & infidelité per-
uerse.

Faites-moy aussi la grace, que mes œu-
res soient correspondantes à cette foy,
afin que la foy ne soit polluë & contami-
née par œuvres meschâtes & dānables. De
peur qu'il ne semble que ie vous renie par
ma mauuaise vie & actions deshonestes,

626 PARADIS DES PRIERES,
que ie crois & confesse indubitablement
par la vraye & simple foy.

Oùtroyez-moy, ô Peretres-clement &
debonnaire, que ie vous serue avec vn
bon propos & intention, que ie m'em-
ploye à vostre seruice d'une franche &
prompte volonté, afin que ie puisse faire
& accomplir les œuvres de iustice, que i'ai-
me la misericorde & la verité, que ie fuye
& deteste le mensonge, que ie ne pense rien
qui soit vain ou faux, que ie ne profere au-
cune chose mensongere & erronée, à celle
fin que ie vous craigne seul, que seul ie
vous aime, reuere & adore, & que i'ac-
complisse vos saints commandemens.

Accordez-moy aussi cette grace, que
ie suiue tant seulement & confesse les cho-
ses que suit, croit & confesse vostre sainte
Eglise Catholique, Apostolique & Romaine,
laquelle est munie & enseignée du S.
Esprit, esprit de verité, iusques à tant que ie
paruienne à vous en vostre Royaume, où
la foy ne sera plus necessaire, puis que nous
verrons face à face ce que nous auons creu
par la foy estant encores en ce monde: ce
que ie vous prie nous vouloir conceder par
les merites de vostre fils vnique Iesus
Christ nostre Seigneur, Amen.

Oraison pour demander l'esperance.

DIEU de puissance & bonté incomprehenfible qui par œuures & de paroles nous commandez : iaçoit que vils & miserables pecheurs , d'esperer en vous , & d'attendre de vous feul les biens vrayz & eternels : Et de vray vous m'auiez bien monftré comme ie dois mettre en vous toute mon esperance , car m'ayant manifesté tant de fignes d'amour ; ie ne puis que ie ne vous aime : & comment vous aimeray-je fi ie n'efpere en vous ?

Toutes les mefmes caufes , Seigneur mon Dieu , qui m'obligent à vous aimer , m'obligent auffi , & incitent à mettre en vous toute mon esperance : car en qui dois-je esperer finon en celuy qui m'aime tant , qui a tant fait pour moy , qui a tant enduré pour moy , & tant de fois m'a appellé , m'attendant , fupportant , pardonnant & me deliurant de tant de maux ? En qui dois-je esperer finon en vous , qui eftes infiniment misericordieux , pitoyable , amoureux , benin , patient & plein de compaffion ?

En qui dois-je esperer finon en vous , qui eftes mon Pere , & Pere Tout-puiffant : Pere pour m'aimer ; & Tout-puiffant pour

628 - PARADIS DES PRIERES,
m'aider : Pere : pour vouloir ; & Tout-
puissant pour me faire bien : Pere qui auez
plus de soin de vos enfans spirituels, qu'au-
cun pere charnel n'a de ses enfans corpo-
rels ?

En qui finalement dois-je esperer, sinon
en vous, qui en toute la sainte Escriture
me commandez continuellement, que ie
recoure à vous, que i'espere en vous, me
promettant mille millions de faueurs & de
graces si ie le fais ainsi, me donnant pour
gages & arres de cecy la verité de vostre
parole : les biens-faits que i'ay receus &
reçois iournellement de vous, & les tour-
mens que vous auez enduré pour moy, &
vostre sang espandu en confirmation de
cette verité.

Que n'espereray-je donc d'un Dieu si
bon & si veritable, d'un Dieu qui tant m'a
aimé, que de se vestir de chair pour moy,
& pour moy supporter toutes sortes d'in-
iures & tourmens : & finalement d'un Dieu
qui pour moy s'est laissé crucifier, & a vou-
lu pour moy mourir à vne croix, & pour
moy a voulu estre contenu en vne hostie
consacrée ? Comment est-il possible que
vous fuyez de moy, Seigneur, quand ie
vous cherche ; puis que vous m'avez tant

cherché, lors que ie fuyois de vous? Comment me refuserez vous pardon quand ie le vous demande, veu que vous-mesme l'auez voulu meriter pour moy, quand ie ne le demandois? Comment le remede qui ne couste rien me sera-il maintenant denié de vous qui me l'auez procuré avec si grande sollicitude, lors qu'il vous coustoit si cher?

Or donc pour toutes les causes susdites i'espereray en vous, & au milieu de toutes mes necessitez & tribulations, ie chanteray hautement avec le saint Prophete, disant: Le Seigneur estant ma lumiere & mon salut, que dois-je craindre? Le Seigneur Ps. 92. estant protecteur de ma vie, pour qui dois-je trembler? Bien que les troupes & escadrons des ennemis viennent droit contre moy: si n'aura mon cœur aucune frayeur: & bien que la guerre & les assauts soient esleuez contre moy: si espereray-je tousiours en luy.

Faiâtes-moy donc la grace, ô Seigneur pitoyable, d'augmenter de plus en plus en moy cette confiance: afin qu'en toutes mies necessitez, perils & tribulations qui me peuuent arriuer durant cette miserable vie; i'espere & me confie en

630 PARADIS DES PRIERES,
vous seul: car à la verité vostre misericorde
est infinie, vos promesses comme elles sont
en tres-grand nombre, aussi sont-elles ve-
ritables: & les merites de vostre passion
sont sans prix & sans nombre, esquelles
principalement est toute mon esperance
maintenant & à tousiours. Amen.

*Oraison pour demander l'amour de Dieu, du
prochain & des ennemis.*

O Bon Iesus, ô salut de mon ame? quand
sera-ce Seigneur, que ie vous seray
plaisant en tout & par tout? Quand sera ce
que ie mourray à moy-mesme, & à toutes
les creatures pour vostre amour? Faites
moy misericorde, Seigneur, & aidez-
moy: Je me presente deuant vostre Maje-
sté, & saluë dès maintenant vos roses
& belles playes. Cachez-moy, Seigneur
en icelles, afin que ie sois parfaitement
nettoyé & enyvré de vostre amour. O
Seigneur mon Dieu, ô mon admirable
principe, ô tres-claire lumiere de mon en-
tendement, ô repos de ma volonté! Quand
sera-ce que ie vous aimeray tres-ardem-
ment? ô Seigneur, vous plaise blesser mon
ame des sagettes de vostre amour tres-

CHAPITRE XIV. 631

doux: ô tout mon desir, toute mon espérance, tout mon soulas: ô si mon ame estoit digne d'estre enflammée de vostre saint amour, afin que sa tepidité fust toute consummée par ce feu diuin! ô mon Sauueur, ie vous desire, & m'offre du tout à vous. Ie ne veux autre chose, ie ne desire autre chose, & ne demande autre sinon vous; pource que vous seul m'estes suffisant: vous estes mon Roy, mon Seigneur, mon gouverneur, mon Pere, & tout entierement ce que ie peux desirer. Vous estes tout aimable, tout delectable & fidele, Qui fut oncques si liberal que vous, qui pour vne vile creature vous vous estes donné vous-mesme? Qui se monstra iamais si humble que vous, qui auez si fort abaissé la grandeur de vostre Majesté?

O feu qui illuminez mon cœur, ô charité, qui enflammez mon ame: ô lumiere, qui illuminez mes tenebres; ô mon repos, ô amour, qui tousiours bruslez & ne mourez iamais! quand sera-ce, Seigneur, que ie vous aimeray parfaitement? quand vous embrasseray-je des bras nus de mon ame? quand sera-ce que ie mespriseray & moy & tout le monde pour vostre amour? quand est-ce que mon ame avec toutes ses forces

632 PARADIS DES PRIERES,
& puissances se verra vnies à vous? quand
est-ce qu'elle se verra plongée en l'abyssine
de vostre charité?

O tres-doux, tres-aimable, tres-beau,
tres-sage, tres-riche, tres-noble, tres-pre-
cieux, & tres-digne d'estre aimé & adoré:
O la vie de mon ame, qui pour me donner
la vie avez souffert & enduré la mort! rem-
plissez, ie vous prie, mon ame, mes sens &
toutes mes affectiōs d'une tres-ardente &
perpetuelle charité: à ce que ie vous aime
de tout mon cœur en toutes choses, & par
dessus toutes choses. Faites qu'en vous &
pour l'amour de vous i' aime mō prochain,
selon vostre bon plaisir & commande-
ment. Octroyez-moy que ie desire le salut,
l'aduancement & profit de tous les hom-
mes, que de tout mon cœur ie le cherche &
procure, que ie m'y employe du tout à la
gloire & louange de vostre nom tres-
sainct.

Donnez-moy aussi la grace d'aimer par-
faitement tous mes ennemis, non seule-
ment de bouche & de parole; mais aussi en
verité, & par œuvres. Ostez-moy, Sei-
gneur, toute amaritude, rancune, ire, in-
dignation, suspicion: enuie, & tout ce qui
me peut contrarier à la parfaite & entiere

charité, afin qu'en toute simplicité de cœur i'aye bonne opinion de tous; ie ne iuge temerairement personne, i'aime tous les hommes en vous, & pour l'amour de vous, d'une tres-douce affection. Faites moy viure en vous seul; c'est à dire, en vostre amour & en vostre obeissance, gardant fidelement vos preceptes, & les commandemens de mes superieurs: & faisant tousiours vostre sainte volonté. O bon Iesus, accordez-moy tout cecy par vostre amour & charité ineffable, avec laquelle vous nous auez aimez de toute eternité, afin que nous vous puissions rendre vn amour reciproque maintenant & à tousiours. Ainsi soit-il.

Oraison pour demander humilité.

MOn Seigneur, qui estes-vous, & qui suis-je? vous estes Dieu tres-grand, Seigneur du Ciel & de la terre, Dieu des Dieux, Roy des Roys, Seigneur des Seigneurs. Je suis vn ver, & non pas vn hōme, le rebut des hōmes, & le mespris du mōde.

Vous estes la souueraine bonté, souueraine douceur & beauté: vous estes la gloire des Saints, le thresor tres-riche, la tres-claire lumiere, la fontaine de vie, la vie de nos ames, la splendeur & ornement du Ciel.

& la lumiere du monde : Mais ie suis vn abyssine tenebreux , terre miserable , enfant d'ire , vaisseau de corruption & d'iniure , engendré en peché , & nay en miseres. Ie suis vn fumier sale & infect , plein de puantise & de corruption , malade , aueugle , boiteux , sourd & muet , pauvre & desnüé de tous biens , & remply de mille miseres : Mon commencement fut le peché , & ma fin sera la mort , laquelle aduiuent pour le peché.

Mais qui suis-je , ô mon Dieu ? qui ose prendre la hardiesse de parler à vous , veu que vous estes ce grand Dieu , ce Dieu ~~vray~~ , Tout-puissant , immense , eternel , incomprehensible & admirable aux Anges & esprits bien-heureux ? ô Seigneur , escoutez mes paroles , regardez mes larmes , fleurez l'odeur de mes tristes soupirs , & secourez mon ame. Que celle charité , qui vous a esmeu à me racheter , vous esmeue maintenant à m'escouter.

O haut & glorieux Seigneur , ne meprisez point celuy que vous auez créé à vostre image & semblance , gouuerné par vostre prouidence , & racheté par vostre sang. O mon doux Seigneur , donnez-moy des yeux afin que ie vous connoisse ; car celuy

CHAPITRE XIV. 635

qui vous connoist bien, vous aime: & celuy qui vous aime s'oublie soy-mesme. Cette-cy est l'occasion, Seigneur, qui fait que ie vous aime peu, parce que ie vous connois bien peu.

Mais i'obtiendray plus facilement la connoissance de vostre Majesté & grandeur, que plus grande sera la connoissance que i'auray de ma bassesse & vilité. Donnez-moy donc Seigneur, vne connoissance de moy-mesme, comme ie ne suis rien, & que ie n'ay rien de moy-mesme: mais si d'auanture il semble que i'aye quelque chose, elle vient de vous, non pas de moy.

Ie vous supplie de tout mon cœur, ô doux Iesus, exemplaire de toute humilité, qu'il vous plaise me donner la grace de m'humilier & reconnoistre ma vilité & mon neant, toutes les fois que mon esprit seroit sollicité de s'esleuer & en orgueillir. Octroyez-moy la grace d'humilité, mere & nourrice de toutes les vertus, par laquelle me connoissant & abbaisant moy-mesme, i'aye honte & frayeur de comparoistre en la presence de vostre diuine Majesté, qui ne suis que cendre & bouë, qui ne suis qu'un petit ver de terre: faites que par la vraye connoissance de moy-mesme ie m'estime tous-

636 PARADIS DES PRIERES,
jours plus vil & contemptible , & desire
estre reputé tel de tous les hommes.

Faites que ie reconnoisse vos biens-faits,
que ie vous rende grace ; puis que de vous
seul i'ay receu tout ce que ie suis : que vo-
lontairement ie me soumette à tous , que
ie ne pense & estime trop hautement de
moy-mesme ; mais que ie sois tousiours vil,
abject & contemptible en mes propres
yeux , en mon cœur & en ma pensée. Deli-
urez-moy , mon Seigneur , de toute per-
turbation d'esprit , & de tout peché , & prin-
cipalement de la peste d'orgueil , de vaine
gloire d'ambition , & de toute sorte d'ela-
tion , afin qu'estant libre de tous ces maux ;
ie puisse en toute humilité & soubmission
d'esprit , vous faire tres-agreable seruice ,
maintenant & à iamais. Amen.

*Oraison pour demander à Dieu vne parfaite
obeïssance.*

Lan-
sperge
au lu.
intitulé
Phare-
tra.

OTres-beau & tres-luisant miroir d'o-
beïssance & de toute vertu , Iesus-
Christ tres-aimable Seigneur : veu qu'on
ne peut arriuer au pais celeste , sinon par la
voye & par les sentiers d'obeïssance : sinon
par le chemin d'une simple & parfaite obe-
dience de vos saints Commandemens :
donnez-moy ie vous prie entendement à

ce que iour & nuit ie considere, ie cherche & accomplisse vostre loy avec le saint Roy & Prophete Dauid. Conduisez-moy donc à la voye de vos Commandemens; parce que ie les desire, ie les veux & souhaite, vers iceux ie souspire & aspire de tout mon cœur & affection: car ceux qui pechent & commettent iniquité, qui obeïssent à leurs desirs deprauez, & à leurs concupiscences charnelles, s'esloignent & se retirent bien loin de vous, & ne cheminent point en vos voyes. Que mon ame, Seigneur, n'entre point au conseil & en l'assemblée de telles gens, qui vous disent, si ce n'est de parole, c'est par œuvre & volonté. Retirez-vous arriere de nous, nous ne voulons point la science de vos voyes, pour autant que vous estes du tout contraire à nos estudes & affections, vos voyes sont iniques & peruerfes.

O Dieu tres-pitoyable, le vray foulas des affligez, le reducteur des errans & desuoyez: ne permettez que ie m'esgare & esloigne de vous iusques à la fin; mais soumettez mō col sous le ioug de sainte obeïssance, & abaissez mon front plus dur que le rocher, à l'execution & parfait accomplissement de vostre diuine volonté: faites

638 PARADIS DES PRIÈRES;

aussi que ie sois vrayement sujet & obeïssant à vos Vicaires, en toutes choses qui appartiennent à vostre seruice, gloire & honneur, au salut de mon ame, & pour l'utilité de mon prochain, illuminez aussi les yeux interieurs de mon esprit, à ce que iamaïs ie ne me separe de la vraye & sainte foy Catholique, que ie ne mesprise & contemne les ordonnances & cōstitutions des saints Peres de l'Eglise, & que ie ne me laisse iamaïs seduire par les persuasions des hommes peruers & corrompus de mœurs & doctrine. Amen.

*Oraison pour demander à Dieu la vertu de
pauvreté spirituelle.*

Iesus-Christ tres-parfait amateur & distributeur de la pauvreté, esclairez mon esprit, & illuminez mon cœur, afin que ie connoisse l'instabilité, tromperie & vilité de toutes choses temporelles & mondaines. A la mienne volonté, qu'il vous vint à plaisir d'imprimer en mon cœur inseparablement vn saint desir & affection d'une tres-parfaite & vraye pauvreté.

Ô tres-doux Iesus, qui pour l'amour de moy auez esté attaché tout nud à la Croix, qui n'avez pas eu où reposer vostre chef, iagoit qu'à vous appartienne le Ciel, la terre

&

CHAPITRE XIV. 639

& tout ce qui est contenu en iceux: donnez-moy la grace & vertu de fouler aux pieds, & contemner toutes les choses du monde, afin que ie puisse plus librement reposer nud entre vos bras nuds.

Soyez mon seul & vnique thresor, soyez toutes mes richesses, & la satieté de mon cœur contre l'appetit desordonné de toutes les autres choses qui sont sans vous, & hors de vous.

O Seigneur tres-aimable, donnez-vous vous mesmes pauvre, nud & crucifié, à moy vostre seruiteur, par vne saincte & bienheureuse eschange, & ce pour tout le monde que ie vous offre, & lequel ie desire de tout mon cœur laisser parfaitement pour l'amour de vous: Donnez-moy donc, Seigneur Dieu, vn mespris & contemnement de toutes les richesses temporelles, de toutes les pompes, delices & consolations, & de toutes les choses que les hommes mondains cherchent & desirent. Faites-moy tant de grace que de desirer avec affection tres-feruente, toute pauureté, necessité & disette, l'attendre avec amour, la chercher avec ioye, la receuoir & embrasser en toute diligence, & la conseruer soigneusement avec toute discretion.

Mon Dieu, beauté de mes yeux, assou-
uissement de mon cœur, mon vnique bien
& ma ioye bien-heureuse; n'estes-vous pas
suffisant à celuy qui vous aime, si estes ve-
ritablement. D'où vient donc que nous
nous esloignons de vous? Qu'est-ce que
nous desirōs que vous? Quelle chose cher-
chōs-nous hors de vous? Faites mon Dieu,
que rien ne me delecte & donne plaisir, si-
non vous, que rien n'attire à soy mon esprit
& affection pour vous delaisser & me sepa-
rer de vous. Que tout ce qui est sans vous,
& hors de vous, me soit à contre-cœur:
Faites que ie mesprise toutes choses; que ie
ne prenne repos en chose que ce soit, que
ie ne possede rien avec affection & amour;
mais que ie vous aime seulement, que ie
vous cherche; ie pense à vous, i'aye faim &
soif extrême de vous seul, que ie vous trou-
ue, & me resiouisse en vous, qu'en vous
seul ie me delecte & prenne tout mon plai-
sir: car vous seul estes ma vie, ma refe-
ction & nourriture, mon contentement,
ma ioye, mon repos, & ma derniere feli-
cité. Que toutes choses, Seigneur, me
soient ostées, que vous seul pour le moins
me demeuriez, que vous me possediez,
afin que possédé de vous, ie vous puisse pa-

reillement posseder dès maintenant & à jamais. Ainsi soit-il.

*Oraison pour demander la vertu de chasteté,
tant de corps que d'esprit.*

SEigneur & Redempteur Iesus-Christ, vraye fontaine de pureté, & tres-ardent amateur de chasteté qui vous repaissez entre les lys, qui estes blanc & vermeil, espoux de toutes les ames chastes. Je sçay biẽ & confesse que ie ne puis sans vostre grace speciale & particuliere garder sans dâger & corruption ce thresor tres-excellent, precieux & incomparable, lequel ayant receu dans le vaisseau fragile de mon corps, ie porte tousiours avec moy. Je sçay que mon corps est le tẽple du S. Esprit, lequel souiller & cõtaminer est vn tres-grâd sacrilege; mais d'autre-part, ie sçay que ie ne puis estre chaste & continent, si ce n'est mon Dieu, qu'il vous plaise m'en donner la grace, attendu que continuellement la chair convoite & s'esleue à l'encontre de l'esprit: & ne veut qu'à grand regret estre priuée de ses delices & voluptez.

Attendu donc que la chasteté est vn don special qui vient de vous, ô tres-pur & tres-feruent amateur des hommes; ie viens en toute humilité par deuers vous, vous

642 PARADIS DES PRIERES,
suppliant tres-affectueusement qu'il vous
plaise esteindre & amortir en moy toute la
flamme de volupté & luxure , me ceindre
les reins avec la ceinture de chasteté , &
brusler mon cœur du feu & brasier du S.
Esprit, pour & à celle fin que d'un cœur pur
& net ie vous plaise , & qu'avec un cœur
chaste ie puisse vous faire seruice.

Ie vous suplie , tres-benin & tres-aima-
ble espoux des ames pures , qui & de paro-
le & d'exemple nous auez enseigné en la
chair, de mener vne vie nō charnelle, mais
Celeste & Angelique; c'est à dire, chaste &
pure , qui auez voulu estre conçu , & nai-
stre d'une mere, non autre que Vierge tres-
pure & tres-chaste; ie vous prie, dis-je , par
l'abondance de vos misericordes, & par vo-
stre tres-ardente charité , laquelle vous a
fait tant endurer & mourir pour nous, qu'il
vous plaise me preseruer de toute concu-
piscence de la chair, & de tout peché char-
nel. Donnez-moy vne parfaite chasteté, &
de corps & d'esprit, vne claire discretion &
temperance au boire & au manger , sans la-
quelle la chasteté ne peut longuement per-
seuerer. Espandez en mon cœur la vertu
d'humilité, de mansuetude, patience, sim-
plicité, resignation, charité , & toutes les

autres aimables vertus, par le moyen desquelles v^{ost}re tres-saincte mere vous a pleu, & par lesquelles toutes les autres Vierges vos espouses, vous ont esté agreables, à celle fin que ie vous serue en toute pureté, que ie vous aime & vous louë à iamais, puis qu'à vous seul appartient tout honneur, gloire & louange. Ainsi soit-il.

Oraison pour demander la Vertu de patience.

O Tres-benin & tres-doux Agneau de Dieu, mon Seigneur Iesus-Christ, ie vous supplie par v^{ost}re ineffable douceur & m^{as}fuetude, & par v^{ost}re tres-douce patiēce, laquelle vous auez tres-parfaitemēt monstrée iusques à la fin, entre toutes les iniures, persecutions & tourmens qui vous ont esté faits, qu'il vous plaise illuminer mon cœur de v^{ost}re grace, & mortifier en moy toute amartude, dureté, colere & impatience, afin qu'à l'honneur de v^{ost}re mort ie recoiue avec vn grand & feruent desir toutes les iniures, derisiōs, detractiōs, mocqueries, confusions, reproches, persecutions, peines, & autres fascheries qui peuvent tōber, tant sur moy que sur les miens.

Faites, ô doux Iesus, qu'avec action de grace, ie prenne & recoiue tous les accidēs, & tout ce qui me pourroit arriuer, comme

venant de vostre main paternelle, & de vostre prouidence; & pour chose qui me puisse aduenir, ie ne perde la tranquillité de mon esprit; comme en rejetant l'occasion de mes tribulations, non sur moy qui en suis le principal autheur, mais sur autruy.

Ie vous supplie mon Sauueur, de ne point permettre que mon cœur soit infecté de haine, de rancune, & d'amertume, ains rendez-moy debonnaire & charitable, voire mesme enuers ceux qui ne m'aiment point, & ne me portent aucune affection. Donnez-moy vne bonne & prompte volonté de pâtir & endurer pour vous; car vous auez le premier enduré pour l'amour de moy. Donnez-moy vne patience & charité si grande, que iamais les afflictions ne me puissent de telle sorte affoiblir, que ie ne desire tousiours endurer les peines plus griefues & fascheuses pour la gloire de vostre tres-sainct Nom. Amen.

*Oraison de saint Thomas, pour demander
toute Vertu.*

SEigneur Dieu Tout-puissant & misericordieux, faites-moy la grace que mon desir soit enflammé de toutes les choses qui plaisent & sont conformes à vostre diuine

volonté : que prudemment ie les cherche, que vraiment ie les connoisse & que parfaitement ie les accomplisse, à la gloire & loüange de vostre tres-sainct Nom. Disposez, Seigneur, de l'estat de ma vie : donnez-moy tant de lumiere que i'entēde tout ce que vous requerez de moy, & force pour le mettre en execution en la maniere plus vtile & conuenable à mon salut.

Seigneur, rendez-moy le chemin pour aller à vous si assuré, si droit & si parfait, qu'és prosperitez & aduersitez de ce monde, ie ne vous puisse offenser : de façon qu'és prosperitez ie vous remercie, & que ie ne perde courage és aduersitez : ne m'esleuant pour les vnes, & ne me desesperant pour les autres. Que ie ne reçoie plaisir ou tristesse d'aucune chose, sinon de ce qui me fait approcher de vous, ou m'en fait separer : Que ie ne desire plaire, ou que ie ne craigne desplaire à autre sinon à vous.

Ostroyez-moy, que ie n'estime rien les choses transitoires pour l'amour de vous, & que i'aye en souueraine recommandation & estime toutes celles qui vous appartiennent ; & vous principalement, ô mon Dieu, par dessus toutes icelles. Que tous les plaisirs du monde me soient

646 PARADIS DES PRIERES,
ennuyeux sans vous, & que ie ne souhait-
te autre chose que vous. Que toutes les
peines & labeurs que ie sçauois prédre, ou
qui me pourroient aduenir pour l'amour
de vous, me soient plaisans & agreables: &
ennuyeuses toutes les peines que ie pren-
dray hors vostre occasion.

Faites-moy la grace que i'esleue souuent
mon cœur à vous, & si quelquesfois ie m'y
oublie, que ie recompense la faute par vne
soudaine repentance & proposition de n'y
plus faillir: Faites-moy mon Dieu humble,
sans hipocrisie: ioyeux, sans dissolution; tri-
ste, sans perturbation; graue, sans rigueur,
prompt à vostre seruice, sans legereté; ve-
ritable, sans duplicité & fausseté; chaste,
sans corruption; craintif, sans desespoir; &
courageux, sans presumption: Faites-moy
la grace de pouuoir corriger mō prochain,
sans fiction; de l'edifier de paroles & de bō-
nes œuvres sans orgueil, d'obeir à mes su-
perieurs, sans contradiction, & de suppor-
ter les traux sans murmuratiō.

Donnez-moy, Seigneur, vn cœur si vi-
gilant & bien aduisé, qu'aucunes distractiōs
de pensées ne le retirent de vous: vn cœur
si genereux, qu'aucun desir bas & mōdain
ne le retire apres soy: vn cœur si vaillant,

qu'aucun trauail ne le puisse surmonter: vn cœur si libre, qu'aucun ne le puisse forcer ou afferuir: vn cœur si droit & si ferme, qu'il ne puisse fleschir en aucune mauuaise intention.

Donnez-moy, ô tres-doux Seigneur & mon Dieu, vn entendement qui vous connoisse; vne affection qui vous cherche, vne sapience qui vous trouue; vne vie qui vous plaise, vne esperance qui se confie du tout en vous; vne perseuerance, qui heureusement vous puisse embrasser. Oûtroyez-moy finalement, Seigneur, que ie merite d'estre cloué en vostre Croix par penitence: & que i' vse de vos biens-faits en grace, & que ie iouïsse au Ciel de vos delices & consolations en gloire. Ainsi soit-il.

*Oraison pour demander la mort bonne
& heureuse.*

SEigneur Iesus-Christ, Fils de Dieu viuant, par celle angoisse tres-amere, qui vous meit en telles detresses au mont d'Oliuet, & par ce grand effroy & tremblemēt qui estonnerent vostre chair de telle sorte, qu'ils vous firent dire que vostre ame estoit tristes iusques à la mort; nous vous prions d'vne ame humble, d'vn cœur contrit & abbaisé, & ayās le corps prosterné en terre,

Grenade en la
2. partie
des additions
du Memorial.

Matt.
14.

648 PARADIS DES PRIERES,
qu'en l'heure dernière de nostre depart de
ce monde, lors que l'angoisse, la frayeur
& tremblement saisiront nostre cœur & en-
tendement, il vous plaise nous secourir,
nous fortifiant contre cette agonie, & nous
armant de la confiance de vostre sainte
misericorde.

Ah! Maistre tres-debonnaire, ne nous
abandonnez point en vn tel besoin, en vn
assaut & conflit si horrible, ains comme
vostre Pere vous enuoya vn Ange du Ciel
pour vous consoler, que vous nous accom-
pagniez aussi à celle heure de vostre Ange
sainct & fidele, afin qu'il nous fortifie &
defende contre tous les assauts de nos en-
nemis, & nous secoure en toutes choses. Et
ne permettez que les essais & efforts de
l'ennemy aient le dessus de nous, par ses
tentations, ou qu'il nous deçoieue avec per-
suasions mensongeres.

Armez encores nostre cœur, & le con-
firmez avec la vertu de vostre passion, &
souffrance, afin que pas vne aduersité ny
maladie, pour longue & violente qu'elle
soit, ne nous attire à impatience, desdain ou
murmure; mais qu'en tout & par tout no-
stre ame soit sujete à vostre volonté, soit
pour la maladie, soit pour la maladie, soit

CHAPITRE XIV. 649

pour la santé, tant pour l'aduersité que pour la prosperité, pour la mort, que pour la vie, de la mesme sorte que vous, Seigneur, post-posastes, & resignastes vostre volonté à celle de vostre Pere, disant : *Ne soit pas fait comme ie veux : mais selon vostre vouloir, ô mon Pere* : Nous ne priôs pas que vous nous donniez vne mort douce & sans trauail ou peine : & ne voulons de petites douleurs ou faciles maladies, laissant tout cecy à la disposition de vostre pieté & misericorde, afin qu'elle en dispose, non selon nostre desir, mais comme il luy semblera nous estre nécessaire & profitable.

La grace & faueur que nous vous requerrons, est qu'en tout euenement & desastre, il vous plaise nous donner celle force, laquelle ne succombera faix ou peril quelconque, ains faites que tousiours nous soïôs forts & fermes iusqu'au dernier moment & periode de nostre vie, afin que de la compagnie & societé que en ce monde nous auons avec vous par grace, nous meritions sortans de cette vie, passer à celle de laquelle avec vous iouïssent tous les saincts en la gloire eternelle. Ainsi soit-il.



CHAPITRE XV.

Contenant quelques Oraisons pour diuerses personnes & estats.

PREFACE.



A Charité Chrestienne nous oblige de prier, non seulement pour nous mesme, mais aussi pour les autres: Car comme dit le Sage, Dieu a donné charge & commandement à vn chacun d'auoir soin de son prochain. Or quel soin scaurons-nous auoir plus grand pour autrui, sinon de desirer & procurer son aduancement & salut? Ce qui se pourra faire facilement par le moyen de l'Oraison, selon le conseil de S. Iacques: Priez les vns pour les autres, dit-il, à celle fin que vous soyez sauuez.

Après donc auoir mis diuerses Oraisons pour nous mesmes & Chapitres precedens, il nous a semblé expedient adionster sur la fin de ces exercices de deuotion quelques Oraisons communes, pour diuerses personnes & estats, afin de pouuoir satisfaire à cette obligation, que nous auons de prier pour autrui.

Il faut que tu sois aduerty, que quelques-vnes se mettent en nombre singulier, & les autres pour vne pluralité, mais tu les pourras facilement changer selon ta deuotion, & selon le particulier ou la pluralité de ceux pour lesquels tu voudras faire priere, car en cela chacun suit sa deuotion.

Oraison pour l'Eglise.

PEre celeste, Tout-puissant & misericordieux, qui auez conjoint & espousé l'Eglise sainte & Catholique à vostre fils vnique & bien-aimé, lors qu'estant attaché à la Croix, il en fit le rachat par sa mort tant ignominieuse & tres-amere: de façon qu'il n'est pas seulement pour le present espoux de cette sainte Eglise: mais aussi le Chef d'icelle, qui aussi deuant que monter au Ciel, a fait bonne & fidele promesse de demeurer en icelle, & avec icelle, iusques à la fin & consommation du monde.

Nous donc membres de cette Eglise, vous supplions tres-affectueusement qu'il vous plaise tourner sur nous les yeux tres-benins & fauorables de vostre paternelle misericorde: & oster de nous toutes nos infirmités, lesquelles pour vray sont en tres-grand nombre, afin que clairement soit manifesté par la foy qui opere en nous,

652 PARADIS DES PRIERES,
quel est nostre Pere, & afin que chacun
connoisse de quel Pere nous sommes en-
fans, & de quel maistre nous sommes es-
coliers & disciples.

Or deuant toutes choses, nous vous prions
de conseruer la nacelle de saint Pierre au
milieu de cette mer turbulente & impe-
tueuse, entre tous les flots & furieuses
tourmentes, & parmy toutes les vagues
& inondations qui se pourroient eleuer
contre icelle, de peur qu'elle ne soit sub-
mergée & ne perisse. Defendez vostre ber-
gerie & vostre troupeau, de la morsure ve-
neneuse des loups fameliques & enragez, à
ce qu'ils ne trompent la closture & l'vtilité
d'icelles; & par ainsi estans entrez non par
la porte, mais par autre lieu, ils dispersent,
estranglent & deuorent vos oüailles, qui
sont en si petit nombre. Nous attendons
iournellement qu'il vous plaise retenir vos
fideles, à ce qu'il n'y ait vn troupeau, com-
me il n'y a qu'un Pasteur: mais hélas! nous
voyons tous les iours que le nombre des
oüailles se diminuë, nous en voyons pe-
rir plusieurs, & vostre bergerie estre en
grand danger: & au contraire le nombre
des loups rauissans croist & multiplie de
iour à autre, par nouuelles doctrines, er-

reurs & heresies : de sorte qu'ils ont destruit & rauagé tout vostre heritage, & la vigne que vostre dextre auoit si curieusement plantée & cultiuée.

Souueuez-vous, Pere celeste, que vous n'avez rien de plus cher, apres l'humanité de vostre Fils Iesus-Christ, que la sainte Eglise : ne permettez donc, pour nos offenses, que cette charité vostre à l'endroit de nous se vienne à esteindre, ou que selon nos pechez & demerites, nous tombions en vne foy & croyance corrompuë & erronée. Je vous prie, Seigneur, pour moy & pour tous ceux qui sont encores au giron de nostre mere l'Eglise, & sous les aisles d'icelle qu'il vous plaise nous faire tant de faueur, de ne permettre en aucune sorte que nous nous sepations de l'vnité d'icelle. Gardez-nous, & nous preseruez de ceux qui veulent renuerser sans dessus-dessous la foy & doctrine de S. Pierre, de tous les autres Apostres, saints Peres & Docteurs anciens de vostre Eglise ; & au lieu d'icelle, veulent y planter la doctrine des heretiques & faux Prophetes.

Ostez de nous toutes les occasions qui vous peuuent auoir prouoqué, ou vous incitent encores à present de vous falcher

& courroucer contre nous: monstrez-nous vostre benigne face, que le soleil de vostre grace & misericorde espanse ses clairs rayons dessus nous, que nostre foy tres-sainte croisse & s'augmente de iour en iour, estendez les fins & limites de vostre Eglise, amplifiez vostre Royaume. Rompez & aneantissez la puissance de nos aduersaires, qui avec tous les satelites & ministres, d'une conspiration meschante, & d'un mesme consentement, se iettent à la trauerse, de rage & de furie sur cette vostre Eglise, & vomissent contre icelle toutes les iniures, crimes & blasphemes qu'ils peuvent inuenter.

Conseruez-nous, Seigneur, à ce que nous perseuerions constamment en la sainte Eglise Catholique & Apostolique, laquelle n'est autre chose que la congregation & vnité des fideles de toutes nations par tout le monde en sincerité & vnité de foy, & conioincts par vne mesme confession & croyance. Sanctifiez-nous par vostre S. Esprit, afin que nos pechez nous estans de vostre grace pardonnez & remis, nous ne tombions plus en iceux, & dorenavant nous cheminions en nouueauté de vie: à ce que finalement sortans de cette

Eglise

CHAPITRE XV. 655

Eglise militante, nous puissions sans offenses & empeschemens passer & arriuer en l'Eglise glorieuse & triomphâte au Ciel, en laquelle vous regnez, &c.

Oraiso pour le Pape Eues. souverain de l'Eglise. Le Col-

SEigneur Iesus-Christ, Euesque & Pon-
 tife eternal, qui par vostre propre sang
 estes vne fois entré au sanctuaire & lieu
 Saint des Saints, ayant trouué & obtenu
 vne redemption eternelle: qui voulant mō-
 ter és Cieux, d'où vous estiez descendu,
 auez commandé à S. Pierre, & à ses legiti-
 mes successeurs Euesques de Rome, de pai-
 stre les oüailles de vostre troupeau, luy
 auez aussi baillé les clefs du Royaume cele-
 ste, & les auez tous ordonnez & constituez
 vos Vicaires sur la terre, de peur qu'il ne
 semblast à voir que le corps visible de l'E-
 glise fust sans chef, visible és choses dou-
 teuses & aduerses. Nous supplions tres-hū-
 blement vostre diuine bonté & clemence,
 de conseruer longuement en santé & bon-
 ne vie sans peril & aduersité, nostre S. Pere
 le Pape que vous auez donné pour souue-
 rain Pōtife, pour Pasteur & recteur de vo-
 stre espouse l'Eglise: & à celle fin que par-
 my tant de calamitez de ce temps misera-
 ble, & au milieu de tant d'erreurs & here-

lecteur.
 Heb. 6

Iean 10:

Matt.
 19.

fies il la puisse en toute pieté regir & gouverner, & sagemēt la preseruer & defēdre.

Esclairez & illuminez son esprit de la vraye lumiere & connoissance de vostre tres-saincte parole, afin qu'il enseigne à son troupeau les choses saintes & salutaires, & qu'il puisse paistre & nourrir ses oüailles de la pasture de doctrine sans erreur & corruption d'heresie. Suggerez luy tousiours bōs & equitables conseils: donnez-luy sapience, industrie & force d'esprit, à ce qu'il puisse retrancher de toute l'Eglise les heresies & fausses doctrines, de peur que l'on ne delaisse à nos successeurs, & à la posterité quelque occasion de faillir & errer en la vraye & salutaire doctrine de la foy, & qu'en ce faisant il soit aimé, respecté & receu benignement de tous les Roys & Princes Chrestiens vrayes enfans & nourrissons de vostre Eglise, & defendu par iceux cōtre toutes les impugnations, blasphemies & abois des ennemis heretiques & infideles, à ce qu'exerçant fidelement & saintement ce qui est de sa charge; nous puissions vous faire seruice, ô doux Iesus, en toute paix, vnité & concorde de volonté & d'esprit.

Qui vivez & regnez, &c.

*Oraison pour un Euesque, ou autre Prelat
de l'Eglise.*

Dieu souuerain, Pasteur & recteur de tous les fideles, qui auez de vostre grace appellé vostre seruiteur N. à la dignité & execution de la charge episcopale & Apostolique, afin de regir & gouverner cette Eglise que vous auez rachetée & acquise par le prix de vostre precieux sang: nous vous prions avec la plus grande deuotion, ferueur & humilité qui nous est possible: de luy donner vostre S. Esprit pour conducteur de sa langue, de ses paroles, & de toutes ses actions, à ce qu'il ait la vertu & puissance d'exhorter par sainte & veritable doctrine les fideles, reprendre & arguer tous ceux qui obstinément contredisent à l'Eglise & doctrine d'icelle.

Donnez-luy la grace qu'il puisse cheminer & viure dignement selon son degré & vocation, qu'il soit exemple à tout le peuple, à ce qu'il ne soit trouué errât & reprouué, & cependant qu'il enseigne les autres. Qu'il soit soigneux & attétif sur soy & sur son troupeau, qu'il marche en vostre presence en toute verité & iustice, & d'un cœur droit, qu'il soit sans aucun crime, qu'il soit hospitalier, misericordieux, aumosnier,

658 PARADIS DES PRIERES,
benin, sobre, iuste, saint & continent.
Faites-le vigilant & bien aduisé, afin que
courageusement il puisse chasser de son
troupeau les loups fameliques & rauissans,
& appaiser leur furieuse rage; car ce sont
eux qui dissipent, perdent & deuorent tou-
tes les oüailles de vostre sainte bergerie.

Octroyez luy vne langue diserte & vne
prudence, à laquelle personne ne puisse
contredire & resister: Qu'il admoneste &
reprenne deuant tous en public ceux qui
pechent & offensent publiquement, des-
quels les fautes sont notoires & manifestes,
sans acception de personnes, à celle fin
que par telle correction les autres ayent
crainte de faire le semblable, & par ainsise
retirent de leurs voyes meschantes & per-
uerfes. Que si d'auanture quelqu'un auoit
esté preuenü & surpris en quelque peché,
qu'il reprenne celuy-là, & luy remonstre
en toute douceur, & avec vn esprit de man-
fuetude, de peur que pas vne des ames de
son troupeau se perde & perisse; mais
qu'ensemble avec toute la bergerie & tou-
tes les oüailles à luy commises, il puisse par-
uenir à la vie bien-heureuse & eternelle.
Amen.

Oraison pour le Roy & pour son Royaume.

O Dieu tout-puissant, Roy des Roys, & Seigneur des Seigneurs, par lequel toute puissance & seigneurie est cy-bas ordonnée pour la bonne & paisible conduite de vos creatures ; nous vous remercions tous, & moy particulièrement de ma part, le mieux qu'il m'est possible, de la providence que de tout temps vous avez montrée vers cestuy nôtre Royaume François, luy pouruoyant de Princes & Roys, tels que nulle autre prouince l'aye en cecy aucunement deuancé.

Cen'a pas esté par nos merites que vous nous auez iadis enuoyé vn si grand nombre de saints & tres-religieux Monarques, qui n'ont pas moins enrichy ce Royaume de toute pieté & sainte religion, que de biens & honneurs qui sont en estime parmi le monde. Aussi pour monstrier combien sur tout & entre tous les autres ; vous auez tousiours cheri ces Princes, vous auez fait reuiure en eux à leur consecration, vne façon & maniere plus celeste & diuine, que non pas humaine.

Vous les auez accompagné de la grace & autorité de guarir d'vn mal, qui selon les forces de nature est incurable, chose qui

rend bien clair tesmoignage à tout le monde, en quelle estime vous auez tousiours eu la foy & religion d'eux & de leur Royaume. Aussi leur auez vous si bien assisté & tenu la main, que dés que le premier d'iceux fut baptisé & illuminé de vostre S. Esprit, ils ont si bien soustenu, par grace speciale, vostre querelle, & defendu vostre Eglise, qu'ils ont esté par le consentement de tout le monde nommez tres-Chrestiens.

Vostre main n'est pas abregée, Seigneur, vous estes aussi puissant que iamais : & n'avez en rien laissé esteindre l'amour que vous nous auez tousiours porté, & à ce Royaume: C'est donc pour le Roy & Prince d'iceluy que nous vous presentôs humblement cette requeste, à ce qu'il vous plaise luy estre tousiours pere & maistre, le preseruant de tous dangers, tant de corps que d'esprit: Donnez-luy bonne assistance, sage conseil, & bonne iustice: Faites que son peuple l'aime & luy obeïsse, que ses armes soient inuincibles en bonne & iuste guerre; car d'autre il n'en doit ny veult entreprendre: Rendez-le amiable & paisible avec les Princes estrangers: faites-luy son Royaume tranquille, sa maison assurée, & sur tout, maintenez-luy la

vie en longue santé & heureuse prosperité, fuiuant le vray fils & le cours de la foy qu'il maintient sous la douceur de vostre sainte Eglise Catholique, Apostolique & Romaine.

En cela, Seigneur, vous nous ferez vn bien & grace inestimable; car en ce on connoist que vous aimez vn peuple, quand vous luy dōnez vn bon & sage Prince. Cependant, Seigneur, qui estes le Roy des Roys, nous vous loüerons, & seront attentifs & prompts à receuoir les iustes commandemens de nostre Prince, selon que vous l'auiez ordonné, viuans sous sa conduite, non seulement quant aux affaires de ce monde & biens du corps, mais aussi de la religion & pieté, vous priant y ramener ceux qui par legereté s'en sont escartez.

Exaucez-nous, Seigneur Dieu & Pere tres-benin, par Iesus-Christ vostre Fils mon Sauueur, à la gloire & loüange de vostre tres-saint Nom, à la tuition & aduancement de la foy, & de vostre sainte Eglise Catholique, Amen.

PEre celeste, Dieu souuerain & eternal, ayant desia par longue experience appris en combien d'angoisses, perils & dangers nous sommes iournellement en ce mode & en cette vie presente, par vne compassion & charité fraternele, ie vous i nuoque tres-affectueusemēt, ô mon Dieu pour N. mon amy tres-cher & feal, le salut, prosperité & santé duquel ie desire grandemēt & de tout mon cœur, à ce qu'il vous plaise dorefnauant le prendre en vostre tutelle & sauuegarde, le garder de tout inconueniēt, & estēdre sur luy les yeux de vostre diuine prouidence, ne plus ne moins que feroit vne mere pitoyable vers son enfant, qu'elle aime tendrement d'un amour maternel.

Ne permettez, Seigneur, qu'il chemine & viue selon la chair; mais plustost selon l'esprit; de peur qu'il ne soit souillé & rendu immonde par l'ordure & contagion de ce monde peruers; mais qu'il puisse goûster la douceur & suauité de vostre esprit, & que selon iceluy il puisse iuger de toutes choses, n'estimant autre plus grande perte & detrimēt, que d'estre separé de vostre amour & charité, ny autre plus grand & riche gain, que d'adherer & estre insepara-

blement vny avec vous , iacoit que pour cela il fust besoin endurer quelque tribulation , angouisses & iniure, necessité ou maladie, voire la mort mesme. Je vous prie le confirmer, Seigneur, en toutes saintes cogitations & pensées : donnez luy vne foy ardente, & l'incitez à faire bonnes œuures, & à embrasser la vertu. Faites & paracheuez en luy ce que vous y auez commencé, augmentant vos dons & vos graces : & au contraire, ostez & effacez de sa conscience toutes les fautes & pechez, esquels il peut estre tombé, à ce que son cœur vous puisse estre habitation plaisante & agreable. Donnez luy les choses necessaires pour viure, afin qu'il ne conuoite ou desrobe le bien d'autruy ; mais que plutoft il donne & distribue le sien à celuy qui est en necessité. Assistez luy tonsiours en tout peril & danger : seruez luy de rempart & de forteresse à l'encontre de tous ses ennemis , à ce que paisiblement & en tranquillité il vous puisse faire bon & fidele seruice. Et quand le iour approchera, auquel vous auez déterminé le retirer de cette vie miserable, ne vous esloignez point de luy , & ne le delaissez au besoin : mais son ame sortant de la prison de ce corps plein de miseres , conduisez-là, &

664 PARADIS DES PRIERES,
la receuez en la beatitude celeste, où vous
viuez & regnez, &c.

*Oraison pour les ennemis, & pour ceux qui
nous font tort ou iniures.*

O Pere tres-debonnaire, vous nous
auez donné commandement de vous
prier pour ceux qui nous veulent mal, qui
nous font tort & iniure, & qui nous tra-
uailent tant qu'ils peuuent, ce que vous
auez ordonné, non seulement par paroles;
mais aussi par œuvres, que vous nous auez
proposées pour imiter.

Nous vous requérons humblement,
qu'il vous plaise espandre sur nous l'esprit
de vostre douceur & charité, en la force
duquel nous puissions patiemment porter
la mal-veillance, detraction & oppression
de nos ennemis, comme nous auons en-
tendu que vous auez fait, & experimentons
tous les iours que vous en vsez encores de
mesme en nostre endroit.

Faites-nous tât de graces, que nous n'en-
treprenions point de nous venger de nos
ennemis, ny par paroles, ny de fait: & que
le desir de vengeance ne soit point en no-
stre cœur; mais que nous en soyons tant
esloignez que mesmement nous leur ai-
dions selon nostre pouuoir. Que fassions

prieres pour eux, & desirions leur salut; c'est à dire, qu'il vous plaise leur donner vne bonne & droicte volonté, & les choses que vous connoissez leur estre profitables, afin que soyons vraiment vos enfans; car nous sçauons que vous enuoyez la pluye sur les iustes & iniustes, & que vous auez prié vostre Pere pour ceux qui vous crucifioiēt. Ne les perdez pas; ô Seigneur, pour la haine & mal-veillance qu'ils nous portent, ains plustost gardez-les par nos prieres & intercessions. Nous desirons grâdemement, ô Seigneur, leur correction & amandement, & non point leur perdition.

Faites que nous estans conioints en ce monde par charité mutuelle, nous entrons d'un mesme accord au chemin qui conduit au Royaume celeste, où nous puissions en vostre charité auoir fruition les vns des autres à iamais, & iouissance de vostre gloire & beatitude eternelle. Amen.

Oraison pour les bien-faiteurs.

O Dieu Tout-puissant, collateur & retributeur de tous biens, auquel seul appartient, & la puissance & la misericorde, auquel l'ingratitude est grandemēt desplaisante & à contre-cœur: Faites, Seigneur, qu'il vous plaise me donner vn esprit gra-

666 PARADIS DES PRIERES,
cieux, & se ressouuenant des benefices re-
ceus: vn esprit, & vn cœur qui ne mette
aucunement en oubly les graces, faueurs &
plaisirs que i'ay receus abondamment, tant
de vostre part & liberalité, ô mon Dieu,
que des hommes: de peur que m'oubliant
en cette sorte au vice detestable & abomi-
nable d'ingratitude.

Oùtroyez-moy, Seigneur, que selon ma
puissance & petits moyens, ie puisse re-
connoistre & satisfaire pour les benefices
que i'ay receu d'autrui, & que ie sois tous-
jours gracieux & reconnoissant, non seu-
lemēt de parole, mais aussi en verité par ef-
fect & action. Que si les benefices & gra-
ces que i'ay receus des hommes sont plus
grands que ne sont mes forces; de façon
que ie ne puisse dignement satisfaire pour
iceux, comme il est vray que ie ne peux, ie
vous prie tres-affectueusement pour telles
persōnes, mō Seigneur: faictes leur biē pre-
sentemēt en ce monde, & par cy-apres en la
resurrection des iustes. Rēdez pour moy la
pareille, & donnez retribution à ceux qui
m'ont engendré, nourry, esleué, institué,
& auancé en quelque sorte & maniere que
ce soit, & tous les autres qui m'ont fait quel-
que grace & faueur, qui ont accompli en

mon endroit les œuvres de miséricorde, & les offices d'humanité, qui m'ont obligé à eux par mille sortes de benefices & biē-faits.

Je vous recommande tous ceux-là, Seigneur, le plus deuotement qu'il m'est possible par cette oraison & priere : vous suppliant de donner vostre benediction sur eux & sur leur famille, que tout ce qu'ils font puisse prosperer entre leurs mains, qu'ils soiēt preseruez de tout mal & aduersité, tant du corps comme de l'esprit. Que s'il vous plaist les retirer de ce monde : Faites que l'aduersaire ne puisse preualoir & auoir puissance sur eux, ains que par vostre miséricorde ils meritent d'estre receus de vous en la vie & beatitude eternelle : que si vous les laissez encores viuans en ce monde : faites par vostre bonté & miséricordieuse grace, qu'ils puissent sous vostre protection de telle sorte instituer & passer leur vie en toute vertu & bonnes mœurs, qu'apres la mort ils reçoient de vous heureusement les biens & richesses eternelles : & à tousiours estre iouissans de cette gloire & felicité, en laquelle vous vivez & regnez par tous les siècles des siècles. Amen.

Oraison pour les pecheurs.

Seigneur tres-clemēt & misericordieux, qui auez enuoyé vostre Fils vnique en ce monde, à celle fin de racheter & sauuer les pauures pecheurs, de chercher les brebis esgarées du troupeau, & afin de nettoyer, son peuple, le rendre à vous plaisant & agreable, sectateur des bonnes œuvres. Vous voyez, Seigneur, combien la charité est maintenāt refroidie : & en quelle abondance croist & s'augmente l'iniquité. Vostre peuple boit le peché & l'iniquité, comme si c'estoit de l'eau : ils ont tous failly, & se sont separez de la droicte voye, & se sont rendus inutiles, il n'y en a pas vn qui fasse bien, il n'y en a pas vn seul : c'est pour cette occasion que vostre ire & fureur s'est espanduë sur nous : à cette occasion la famine, la peste & le cousteau tranchant de la guerre, deuore & consomme vostre peuple, & les tribulations nous oppressent & nous accablent, comme feroit quelque furieux deluge.

Mais vous estes si bon, Seigneur, que vous ne voulez point la mort du pecheur, ains plustost qu'il se conuertisse & qu'il viue : parquoy faites misericorde, pardonnez à ce peuple que vous auez rachet épar

le prix de vostre sang precieux. Donnez, ie vous prie, mon Dieu, telle grace & misericorde aux pecheurs, à ce qu'estans illuminez en leurs esprits du rayon de vôtre clarté, ils puissent obtenir vne parfaite cōnoissance de leurs fautes & pechez: & espouuantez de l'enormité & multitude de leurs offenses, ils craignent & redoutent vos iustes iugemens & vostre ire, & les peines eternelles preparées aux pecheurs, afin qu'ils puissent se deliurer des liës du diable qui les tient captifs, & en fait à sa volonté.

Ostez toute l'obstination & dureré de leurs cœurs: & leur donnez vn cœur & vn esprit nouueau, ostez & brisez en pieces leur cœur de pierre, & leur baillez vn cœur de chair, & mettez vostre esprit en leurs entrailles, à ce que delaisans & abandonnans toute impieté, & les desirs mondains, ils puissent viure sobrement, iustemēt & pieusement en ce monde, attendans l'esperance bien-heureuse, & l'aduenement de la gloire de Dieu tres-haut, & de nôtre Seig. Iesus-Ch. qui avec vous vit & regne, &c.

Vous auez vne oraison generale pour toutes sortes de personnes & estats, contenue au Chapitre III.

670 PARADIS DES PRIERES,
Oraison pour les malades.

Dieu Tout-puissant & misericordieux, entre les mains duquel sont la mort & la vie, qui mortifiez & viuifiez quand il vous plaist, qui auez par le passé prolongé la vie au bon Roy Ezechias, qui vous en supplioit deuotemēt, & adiousté à ces iours l'espace de quinze ans, reuoquant la sentence de mort que vous auiez donnée contre luy: ie vous supplie, par vostre Fils unique Iesus-Christ, de restituer la santé à cestuy vostre seruiteur, N. detenu d'une longue & fascheuse maladie, afin que par cy apres ayant amēdé & corrigé sa vie, il vous plaise en toutes choses, & fasse vostre volonté diuine.

Mais pareillement me ressouuenāt de la charité Chrestienne, que deuons auoir les vns enuers les autres; ie ne vous prie pas seulement pour celuy-là; mais aussi pour tous les malades, estans detenus & oppressez de langueurs & maladies, en quelque lieu que ce soit par tout le monde: soyez enuers eux propice & secourable, & principalement aidez à ceux qui estans en agonie de la mort, cōbattent contre plusieurs tentations. Dōnez leur la grace de connoistre que leurs douleurs & maladies ne viennent

viennent point sur eux par casfortuit; mais qu'elles sont paternellement enuoyées de vous, afin de les ramener à penitence & amendemēt de vie, ou pour les tenir & cōferuer en leur deuoir. Consolez, Seigneur, consolez ces pauvres affligez & desolez, donnez leur confort au plus aspre & dangereux combat de leurs pauvres consciences: que la viue & ferme esperance de vostre paternelle pieté & misericorde leur assiste. Ostez de leurs corps & de leurs membres les langueurs & infirmitéz qui les affligent, ou pour le moins addoucissez & temperez quelque peu leurs griefues douleurs. Ie vous prie les remettre en leur bōne & pristīne santé, & medeciner leurs playes & maladies, selon qu'il est le plus agreable à vostre diuine volonté, & profitable au salut de leurs ames.

Or quant à ceux ausquels selon vostre bō plaisir, il est expedient qu'ils meurēt & passent presentement de vie à trespas; ie vous prie les confirmer de vostre esprit, afin que la foy ne vacile aucunement en iceux, que l'esperance ne soit esbranlée, & que la charité ne soit diminuée & refroidie: & aussi de peur que l'infirmité humaine ne soit abatuë & espouuātée, par la crainte & appre-

672 PARADIS DES PRIERES,
héliſion de la mort. Abbregez, s'il vous plaît,
leurs peines & tourmens : & apres que la
mort aura occupé toutes les parties du
corps, & bouché les yeux corporels : faites
que les yeux de l'esprit ne s'eſloignent de
vous, & ne vous perdent de veüe, & lors
qu'elle aura oſté l'vſage de la lāgue & paro-
le, que le cœur toutesfois crie & ſouſpire in-
ceſſammēt à vous, diſant: Seigneur ie recō-
mande entre vos mains mō esprit, & qu'en
cette ſorte ils puiſſent paiſiblement & ſans
grandes douleurs paſſer de ce monde, &
dormir en I. C. & que leur triſteſſe & angoiſ-
ſe ſe puiſſe tourner en vne ioye perpetuel-
le, qui ne ſe peut oſter à iamais. Amen.

Oraiſō pour la perſōne eſtāt à l'agonie de la mort.

OTres-benin & miſericordieux Sei-
gneur I. C. qui auez biē daigné mou-
rir pour nous en l'arbre de la Croix, ie vous
ſuplie tres-affectueuſemēt, qu'il vous plaiſe
offrir & preſenter à voſtre Pere tout-puiſ-
ſant toutes les angoiſſes, douleurs & ama-
ritudes, que vous auez tres-patiēment ſup-
portées pour l'amour de nous, lors que
vous eſtiez cloüé au bois, & principalemēt
celles que vous enduraſtes, quand voſtre
ame tres-ſaincte & bien-heureuſe ſortit de
voſtre corps tres-pur & tres-chaſte: preſen-

CHAPITRE XV. 673

tez, dis-je, tout cela à vostre Pere celeste cōtre toutes les peines, douleurs & angoisses qu'encoure cette vōtre creature, & plaise la vous deliurer en ce si estroit & dange-reux passage de toutes les peines & satisfactions qu'elle craint auoir encouru & merité pour ses pechez & offenses.

O Seigneur Iesus, qui nous auez racheté par vostre sang tres-precieux, ayez pitié de cette vostre facture, qui vous a fait fidele seruice: & faites que son ame soit participāte de vostre tres-saincte & sacrée Incarnation, douloureuse Passion, tres-glorieuse Resurrection, & Ascension triomphante.

Faites là participante, ô Seigneur, de vos tres-sacrez mysteres & Sacremens, de toutes les oraisons & bōnes œuures qui se font en vostre sainte Eglise, de toutes les benedictions, loüanges, actions de graces, merites & ioyes bien-heureuses de tous vos esleus, lesquels vous ont esté plaisā & agreables, depuis le commencement du monde, iusques à maintenāt, & luy faites tant de faueur & de grace, qu'elle puisse ensemblément avec tous vos saints & esleus, se res-iouir en vostre presence eternellement & sās fin. Deliurez-là maintenāt des peines & douleurs qu'elle endure, que par vne viue

674 PARADIS DES PRIERES,
foy elle surmôte ses ennemis, & vueillez lui
donner issue salutaire à la vie eternelle. En-
uoyez vos saincts Anges pour la receuoir
& conduire en vostre presence, & en la cõ-
pagnie de tous vos esleus & bien-heureux,
Ainsi soit-il.

*Oraison pour vne personne qui recentemente est
decedée de ce monde, ou mesme la mettant
en sepulture.*

EScoutez, Seigneur, selon vostre bonté
accoustumee, nos oraisons & prieres:
inclinez vos pitoyables oreilles, s'il vous
plaist, vers nos souspirs & supplicatiõs, pour
& à celle fin que vous nous exauciez du
throsne & siege royal de vostre diuine Ma-
jesté, & qu'il vous plaise admettre en vostre
paternelle presence les Oraisons que tres-
humblement nous vous presentons. Nous
vous inuoquons donc & supplions tres-af-
fectueusement, ô Seigneur tres-sainct, Pere
tout-puissant, Dieu eternel, pour l'ame de
vostre seruiteur, laquelle il vous pleut ap-
peller (ce iourd'huy) par deuers vous, la fai-
sant sortir de ce monde, & de ce corps cor-
ruptible: à ce qu'il vous soit agreable, Sei-
gneur, de cõmander que son lieu luy soit
preparé en la ioye de vostre Paradis, & que
la flamme de l'enfer ne luy puisse faire tort,

ny luy nuire en quelque sorte que ce soit.

C'a esté la cause pourquoy nostre Seigneur Iesus-Ch. vostre Fils a bien daigné endurer la mort en l'arbre de la Croix, afin que toutes les ames qui auoient contracté peché, & auoient aucunement peché en la trāsgression de nôtre premier parēt Adam, fussent deliurées des peines infernales par la sainte resurrection. Que les portiers des enfers soient confus : que tous les bourreaux & ministres de Satan s'ensuyēt avec leur courte honte. Que les puissances Angeliques la portent & cōduisent au sein des Patriarches Abraham, Isaac & Iacob, nos Peres anciens. Qu'elle obtienne par vostre misericorde la ioye & felicité que par vôtre puissance vous avez préparé à vos esleus, & qu'elle se resiouisse ayant receu son heritage & son lieu à la dextre, afin que quand ce iour redoutable de vostre tres-iuste iugement sera venu puisse ressusciter à pardon & à gloire, & non pas pour endurer peine: que son corps, dis-je, puisse ressusciter ensemble avec tous vos saincts & esleus en la gloire de vostre Majesté: Ne permettez que cette ame, laquelle a esté nettoyée & renduë pure par l'eau viue du Baptisme, & oincte du chresme salutaire, soit tourmētée

676 PARADIS DES PRIERES,
& punie par l'ardeur des peines eternelles:
mais plust oft qu'il vous plaise la deliurer,
Seigneur, & estant libre l'admettre & in-
troduire en vostre Paradis, selon vostre
pieté & misericorde accoustumée, pour au-
tant qu'elle n'a iamais, estant encores en ce
monde, nié vostre clemence; mais l'a tous-
jours creu, esperé & confessé. Et ce par no-
stre Seigneur Iesus-Christ, qui avec vous &
le saint Esprit vit & regne, &c.

Autre Oraison pour les trespassez.

Dieu Tout-puissant & eternel, Dieu &
Seigneur de la vie & de la mort, iuge
tres-equitable des viuans & mourans, qui
auez par vostre bonté admirable ordonné
& constitué entre tous vos fideles vne cō-
munion & participation, non seulement de
la grace que tres-abondamment vous nous
cōmuniquez; mais aussi d'une mutuelle in-
tercession, d'un aide & secours fraternel.

Je vous supplie tres-affectueusemēt; par
vostre tres-amere passion & mort ignomi-
nieuse: & pareillement par vostre descente
aux enfers, & par vostre glorieuse Resur-
rection de mort, qu'il vous plaise benigne-
ment, selon vostre misericorde & pieté na-
turelle, admettre nos supplications & prie-
res, de nous, qui sommes encores en ce

monde iouïssans de cette vie mortelle, & enteriner au parquet de vostre grace & pieté, les Oraisons que nous vous presentons, pour les ames de nos peres & meres, parés, amis, & bien-faïcteurs: & generalement de tous les fideles Chrestiens qui reposent en Iesus-Christ: à ce que celles qui sont encores detenus és prisons & peines du Purgatoire, puissent receuoir de vostre clemence & pieté, la consolation qu'elles attendent, & la remission parfaite de toutes leurs offences, comme elles ont tousiours esperé, & esperent encores maintenant.


Ie vous prie, mon Dieu, les deliurer des peines & afflictions griefues qu'elles endurent en ce lieu de purgation: à ce qu'estans ainsi libres & quittes de toutes debtes & de tout mal, elles soient conduites au repos & en la ioye du Royaume celeste, auquel ie vous supplie les vouloir receuoir bien-tost, & nous aussi finalement, afin de ne vous louer eternellement, & iouir bien-heureux de vostre diuine presence, qui viuez & regnez par tous les siecles des siecles. Amen.

*Acheué d'imprimer à Paris, le dernier de
Iuillet, de l'année 1631.*

Par CLAYDE CALLEVILLE.

LES SEPT PSEAUMES
DE LA PENITENCE DV PRO-
phete Royal Dauid.





LES SEPT PSEAUMES
de la penitence du Prophete
Royal Dauid.

*Le pecheur conuertyparle à nostre
Seigneur.*

PSEAVME I. *Domine ne.*



SEIGNEVR, ne me vueille rechercher selon la rigueur de ta Iustice, & ne me chastie cy apres comme i'ay merité, de peine infernale.

2 Mais tres-cher Seigneur, aye pitié de moy, car ie suis malade: ô Seigneur, guarry-moy, car toutes les forces de mon ame sont troublées par mon peché.

3 Et ma pauvre ame est grandement troublée: mais ô tres-cher Seigneur, iusques à quand diffères-tu la santé d'icelle ?

4 O Seigneur conuertoy-toy à moy, & deliure mon ame des grands tourmens que ie crains auoir merité par mon meffait, & sauue-moy par ta grande misericorde.

5 O Seigneur haste-toy; car apres la mort, il n'y aura souuenance meritoire, & en Enfer on ne te rendra point graces ou loiianges.

6 J'ay fort trauaillé par gemissemens de mes pechez, ie purgeray le liect de ma conscience, en l'auant de mes larmes chacun de mes pechez à part.

7 O Seigneur, ma connoissance interieure est si fort troublée de ton courroux; car ie suis enuielly,

Le pe- avec l'accroissement de plusieurs pechez.

cheur 8 Retirez-vous de moy vous tous qui commet-
cōuert y parlez pechez, car le Seigneur a exaucé mes prieres.

sa com- 9 Le Seigneur a exaucé ma priere, & mon orai-
pagnie son luy a esté agreable.

du tēps 10 O Seigneur, fay que mes ennemis ayent hon-
passé. te de leurs pechez, & qu'ils soient incontinent
Le pe- conuertis.

cheur 11 Gloire & loüange soit au Pere, & au Fils, &
conuer- au saint Esprit.

ty parle 12 Comme elle estoit au commencement, & main-
au Sei- tenant, & tousiours, & dès à cette heure iusques
gneur. en eternité. Amen.

PSEAVME II. *Beati quorum.*

1 **O** Que bien-heureux sont ceux ausquels leur meffait est pardonné, & desquels les pechez sont conuertis par œures de Penitence: A la mienne volonté, Seigneur, que ie fusse du nombre d'iceux.

2 O que la personne est heureuse, de qui le Seigneur ne demande aucun peché, & en l'esprit duquel n'y a point de tromperie.

3 Car quand i'ay celé mon peché sans le confesser en temps opportun: mes os & mes sens interieurs ont esté chargez & appesantis, & neantmoins ie me suis iournellement réputé deuant les hommes pour personne iuste & vertueuse.

4 Mais ie suis retourné en moy-mesme par la verge de ton chastiment, comme par tribulations,

maladies, & autres fascherics qui m'ont esté enuoyées par ta bonté, reconnoissant mon malheur par le remors de ma conscience.

5 O Seigneur, mon peché est connu deuant toy, & n'ay point celé mon iniustice.

6 O Seigneur debonnaire, i'ay proposé de confesser mon peché, & soudainement tu m'as par ta grande bonté pardonné ma coulpe & l'iniquité de mes pechez.

7 Tous les gens de bien prierôt pour la remission des pechez, en ce temps conuenable de grace.

8 Mais les meschans qui sont noyez & enfondrez en desirs charnels, demeurant en tel estat n'approcheront de toy.

9 O Seigneur tu es mon refuge & mon recours en toutes mes tribulations qui m'ont enuironné de tous costez : ô Seigneur, en la consolation duquel ie me resiouis, defend moy de mes ennemis, qui me veulent attirer aux anciens pechez.

10 O cœur contrit, ie te donneray entendement & connoissance pour cheminer en la voye de Iustice, & accomplir mes commandemens: ie ficheray mes yeux de misericorde en toy, & ne les destourneray de toy.

Le Seigneur
parle au
cœur
contrit.

11 O pauvres pecheurs & miserables, ne soyez fiers & orgueilleux comme le cheual, & paresseux en l'accomplissement des cōmandemens de Dieu comme le cheual & le mulet, auxquels n'y a point d'entendement, ne reconnoissance de Dieu.

Le pecheur
contrit
parle au
autres
pech.

12 O Seigneur, vueilles angoisser ces gens retifs & obstinez par la bride & contrainte de ta verge & chastiment, & romps l'orgueil & l'endurcissement de ceux qui ne desirent de toy approcher.

Les pecheurs
conuertis à
Dieu.

13 Combien de verges & de fleaux sont apprestez

aux pecheurs obstinez ; mais la misericorde de Dieu enuironnera ceux qui mettent leur espoir au Seigneur.

14 Vous iustes resiouissez-vous en vos cœurs au Seigneur, & monstrez aussi resiouissance exterieurement. Et vous qui auez le cœur droit sans feintise, loüiez Dieu tout-puissant, & attribuez le tout à luy, remerciant le Seigneur duquel tout bien procede, en disant : Gloire soit au Pere, &c.

PSEAVME III.

Domine ne.

1 **O** Seigneur, ne me vueille eternellement condamner selon la rigueur de ta Iustice feuer, & ne me vueille temporellement chastier selon mes merites.

2 Car beaucoup de miseres, que i'ay retenu du vieil Adam nostre premier Pere, ont navré mon ame & mon corps, & tu as confirmé sur moy la main de ton chastiement.

3 O Seigneur, la fragilité de mon corps est si grande, & ce par le premier peché d'Adam, & n'y a point de repos en mon ame par l'ennuy & tentation de la chair.

4 O Seigneur, ma foiblesse est si grande de ce que le peché a retenu seigneurie en moy, & m'opprime comme vne charge & fardeau pesant.

5 O Seigneur, aye esgard à ma misere & fragilité, car par ma grande sottise & vanité, mes vieux pechez qui m'ont vne fois esté pardonnez, sont derechef retournez en ma memoire, & les ay puis apres accomplis par ceuvre.

6 O Dieu tout-puissant, que ie suis pauvre creature ! car ie suis chargé de l'inclination des pechez iusques à la mort, qui me causera grande tristesse tous les iours de ma vie.

7 O Seigneur, ma sensualité est si asprement combatuë par la têtation de l'ennemy, à cause dequoy mon corps est si fragile & miserable pour faire du bien.

8 O Seigneur, ie suis outre mesure tres-miserable; mais ie crie à tøy du profond de mon cœur, pour auoir en tout temps misericorde de mes pechez avec le Publicain.

9 O Seigneur, demonstre ta misericorde enuers moy; car tu sçais bien mon desir, & le gémissement de penitence pour mes pechez, ne t'est point inconnu.

10 O Seigneur, mon cœur est si troublé; car mon entendement a cōsenty aux tentations du Diable, & la force & vertu de patience m'a abandonné, & ne treuve en moy le iuste iugement de ma droicte raison.

11 O cœur contrit, addonne-toy à moy, en pre- Nostre
nant exemple de patience; car ceux qui de raison Sau-
deuroient estre mes amis, ont conspiré contre ueur
moy pour me mettre à mort. parle au
cœur

12 Et ceux qui se deuoient adioindre à moy, se contrit
sont alienez de moy, & ont vsé de force contre
moy, me voulant oster la vie.

13 Et comme ils me recherchoient pour trouuer cause de mort en moy, que toutesfois ils n'ont sceu trouuer, ils m'ont accusé de mensonge, & ont controuué & pensé toute tromperie & fausseté.

14 Mais comme vn muet, ie n'ay point respondu & comme vn sourd endurant patiemment, ie n'ay point dit vne mauuaise parole.

15 Et par ainsi, suis esté semblable aux sourds & muets, comme si ie ne les eusse sceu reprendre ou confondre: ce que toutesfois estoit bien en ma

puissance, combien que ie ne l'aye accomply.

16 Mais, ô Pere celeste, i'ay patiemment enduré tout cecy, parce que i'auois mis ma fiance en toy, comme en vn Iuge equitable : & ie sçay bien, ô Pere celeste, que tu m'exauceras.

17 Car ie t'ay prié qu'apres cette grande tristesse & tribulation tu me glorifiasses, & clarifiasses par la gloire de la Resurrection, afin que les Iuifs ne se mocquaient de moy pour ma mort, & ne s'esjouissent en icelle (à sçauoir mes Apostres, qui ont porté ma doctrine par tout le monde) ont esté disperséz à cause de ma Passion.

18 O Pere celeste, i'ay esté appresté à souffrir toute passion : & toutesfois ie sçay bien que ie n'ay point souffert pour ma coulpe ou mes merites.

19 Mais dautant que ie me cōfesse que les pechez de mon peuple ont esté la cause de ma passion, i'ay reputé que i'en porterois la peine, & payerois pour effacer leurs meffaits.

20 Mais, ô Pere celeste, lors que i'estois en celle griefue peine & tourment, neantmoins mes ennemis les Iuifs, se sont resiouïs en leur vie, & m'ont persecuté d'un cœur endurcy, & le nombre de ceux qui me laissoient a esté fort multiplié.

21 O Pere celeste, ils m'ont recompensé le bien que i'ay fait en eux par le mal, & m'ont encore detracté, qui ne leur ay iamais fait que bien.

22 O Pere celeste, ne me vueille abandonner estât en cette tribulatiō, & ne te depars arriere de moy.

23 Mais, ô Seigneur Dieu, de qui tout salut procede, sois maintenant ententif à mon aide & assistance. Gloire soit au Pere, &c.

PSEAVME IV. *Miserere mei Deus.*

1 **O** Dieu aye pitié de moy, ô Seigneur debonnaire, fay-moy misericorde, selon ta grande & infinie misericorde.

2 O Seigneur, selon la grande multitude de tes misericordes, efface le grãd nōbre de mes pechez.

3 O Seigneur, ie connois qu'il ne suffit de prier vne fois par ta misericorde; mais ie te prie encore vne fois, & te prie derechef, laue-moy tres-bien del'iniquité de mes pechez, & nettoye-moy de mon meffait.

4 Car ie ne cache point mes pechez deuant toy, mais ie les recorde tousiours en la tristesse de mon cœur.

5 O Seigneur, aye pitié de moy; car c'est toy seul que i'ay offensé, comme mon Seigneur & mon Iuge, & ay perpetré beaucoup de mal deuât toy. O Seigneur mōstre-moy ta misericorde, afin quel'on trouue tes paroles iustes, esquelles tu promets misericorde à ceux qui se cōuertissēt à toy: & aussi afin que tu vainques, & faces cōfus ceux qui disent que tu n'es misericordieux enuers les pecheurs.

6 O Seigneur, tu vois & sçais ma nature peruerse: car ma mere m'a conceu en peché originel, d'où me procede toute inclination à mal.

7 O Seigneur, i'ay ferme esperance que mes pechez seront pardonnez: Premièrement, pource que tu es la verité eternelle, & que tu aimes la verité: Secondement, car tu m'as annoncé par le S. Esprit, & la sainte Escriture plusieurs choses secretes. Et entre autres, ie suis bien asseuré, que par ton sang precieux, tous les pechez du monde vniuersel peuuēt estre effacez, en appliquant le merite infiny d'iceluy.

8 Parquoy tres-aimable Seigneur, ie sçay bien que tu me feras participât des merites de ton sang precieux, & que ie seray mondifié de mes pechez, & i'auray alors vne conscience outre mesure resplandissante.

9 O Seigneur, quand i'auray entendu que mes pechez sont pardonnez, tu me dōneras ioie & liesse, & lors les os, qui sont les puissances de mon ame, qui estoient auparauât oppressez du pesant fardeau de pechez, se resiouiront.

10 O Seigneur, destourne ta face arriere de mes pechez, & efface toutes mes iniquitez.

11 Et quand tous mes pechez seront pardonnez, vueille alors créer en moy vn cœur pur & net, & respans ton droit esprit és puissances de mon ame, moiennant lequel ie puisse estre affectionné à toutes choses celestes.

12 O Seigneur, ne me reiette arriere de ta face, & ne m'oste point ton saint Esprit, par lequel ie suis venu à la connoissance & cōtrition de mes pechez.

13 O Seigneur, rends-moy la ioye & liesse en ton Fils vnique, duquel nous procede tout nôtre salut: & vueille-moy fortifier & confermer par le saint Esprit en toutes vertus.

14 O Seigneur, quand tu m'auras exaucé, i'enseigneray alors tes commandemens aux pecheurs, lesquels ils pourront cheminer: & par ainsi ils seront conuertis à toy.

15 Mais Seigneur, afin que ie puisse bien accomplir cecy, vueille-moy deliurer de mes pechez, ô Seigneur duquel seul i'espere mon salut; alors i'annonceray ta iustice & bonté.

16 O Seigneur tu me donneras la grace de parler, & alors ie diuulgueray ta loüange, touchât la grāde misericor-

misericorde & bonté que tu as sur moi demōstrée.

17 Et ie te rendray louanges & actions de graces; car si tu eusses voulu des sacrifices, comme l'on te souloit offrir en l'ancien Testament: i'estois prest à te les offrir, mais telle offrande ne te seroit agreable.

18 Mais le sacrifice qui t'est receuable & agreable, est vne ame qui a douleur amere & vraye contrition de tous ses pechez: donc Seigneur debonnaire, tu ne mespriseras iamais vn cœur contrit & humilié.

19 O Seigneur, fay ta misericorde selon ta bonté diuine, avec la sainte Eglise Chrestienne, trauillant icy sur la terre, afin que les places dont Lucifer avec ses anges est tombé, puissent estre remplies au Ciel.

20 Cecy estant par ta bonté aduenü, le tres-souuerain & tres-digne sacrifice de Iustice, qui est Iesus-Christ ton Fils, qui t'est iournellement offert au saint Sacrement de l'Autel, te sera offrande agreable, & par ce sacrifice tu receuras aussi nostre sacrifice, & l'offrande de nos cœurs contrits: & alors nous offrirons sur l'autel de la foy vne offrande viuante qui te sera agreable.

Gloire soit au Pere, &c.

P S E A V M E V.

Domine exaudi.

1 **O** Seigneur exauce mon oraison, & permets que la clameur procedant du profond de mon cœur te soit agreable.

2 Et ne te destourne point de ma penitence: mais quand ie seray oppressé tourne ta face deuers moy, me donnant ton aide & assistance.

3 O Seigneur, quand ie t'inuoqueray, exauce-moy hastiuement.

4 Car les iours de ma vie sont infructueusement

passiez comme la fumée : & les puissances de mon ame sont taries par faute d'humilité de deuotion.

5 O Seigneur, mes iours sont passez, & suis soudainement flestri de viellesse comme l'herbe qui est fauchée, & non seulement le corps : mais mon ame est aussi flestrie par la seicheresse de mes pechez; pour ce que ie n'ay tenu compte de me recreer du pain de la contemplation diuine, en quoy consiste la vie eternelle.

6 Et par grande sollicitude des choses terriennes, mon entendement raisonnable a consenti à ma sensualité, & a demeuré vainqueur.

7 Mais à present, ô Seigneur tres-aimé, i'ay par grande vergongne abandonné toute ma vieille compagnie, & ne suis point comparu.

8 Je suis esté sur ma garde, & me veux dorenavant reigler selon les choses diuines & celestes: moyennât quoy ie suis semblable au pellican & au hibou, & au passereau solitaire, se reposant en la hauteur du toit.

9 Mais, ô Seigneur tres-aimé, cela faisant mes ennemis viuans selon le monde, se sont mocquez de moy : & ceux qui me souloient priser & louer, ont conluré contre moy.

10 Mais encore qu'il me falloit ouïr ce reproche, ie n'ay point laissé ma penitence, ains i'ay souffert cette irrision avec grande humilité, & si ay avec grande abondance de larmes eu desir à toutes les choses celestes.

11 O Seigneur, quand ie considere ton grand courroux, que i'ay merité par mes pechez enormes; ie deurois avec abondance de larmes desirer toutes ces choses. O Seigneur, ie suis surpris de tres-grand peur, à cause que tu m'as fait creature

raisonnable : car les creatures irraisonnables ne craignent point l'Enfer, & ne sauorent la misere du peché.

12 Les iours de ma vie sont hastiuement passez comme fumée, & ie suis flestry & seiché comme le foin.

13 Mais toy Seigneur tout-puissant, tu demeures eternellement, & ne nous oublieras iamais.

14 Mais tu nous feras misericorde en ta puissance? car le temps de ta misericorde est venu & accôply.

15 Car il y en a en la generation des Iuifs, qui ont pleu aux Apostrestes seruiteurs, en receuant la foy Chrestienne, & ont debonnairement enseigné le peuple des Iuifs en preschant & faisant miracles.

16 Et non seulement n'est ton Nom annoncé au peuple & generation des Iuifs; mais aussi les Gentils te craindront, & tous les Roys & Seigneurs de la terre reuereront ta puissance.

17 Car le Seigneur a edifié la sainte Eglise des deux nations susdites sur le fondement des Apostres: & encore qu'elle soit fort persecutée de plusieurs hautains Seigneurs, elle sera toutesfois tenue de beaucoup d'humbles Princes en grád honneur & reputation.

18 Il en aduiendra ainsi; car le Seigneur exauce les prieres des cœurs humbles, & ne les a point mesprisées.

19 Fay que ces choses soient escrites, afin que la posterité puisse connoistre que les Prophetes ont preueu, & qui est accomply en eux, & lors le peuple qui renaistra par la vertu du saint Esprit, & le Sacrement de Baptisme, loüera le Seigneur.

20 Voicy ce qu'on escrira, que le Seigneur tout-puissant gouuernât le Ciel, a eu esgard au pecheur,

qui estoit empestre des choses terriennes.

21 Et qu'il a ouy les gemissemens des anciens Peres, qui estoient detenus au lymbe d'Enfer, afin de deliurer & resueiller ceux qui gisoient morts & enfondrez en leurs pechez.

22 Afin que les hommes annoncent le Nom du Seigneur sans crainte & peur en sa sainte Eglise.

23 Afin que le peuple dispersé par tout le monde, puisse estre assemblé en la sainte Foy Catholique, & que les Roys & Seigneurs, qui aupara-
uant estoient idolatres, soient obeïssans au Seigneur tout-puissant qui demeure au Ciel.

Le peu- 24 O Seigneur, donne-moy à connoistre la brie-
ple ueté de ma vie, afin que le sçachant, ie l'employe
Chre- plus diligemment au salut de mon ame.
stien &

fidele 25 Et ne me vueille trop haster en ma vie; mais
perfeu- souffre que i'accomplisse mon temps en viuât ver-
rant cō- tueusement, afin qu'apres cette vie transitoire, ie
stammēt puisse estre participant de ton eternité; car tes ans
& accō- & ton essence dure de generation en generation
plissant
la do- eternellement.

ctrine 26 O Seigneur, tu es eternal sans fin ou commen-
des A- cement; car tu as créé le Ciel & la terre dès le com-
postres, mencement, & tu es le commencement,
respond

ainsi. 27 Le Ciel & la terre seront changez; mais tu de-
meures ferme sans aucun chāgement en toute eter-
nité: mais les autres creatures s'enuieillissent com-
me l'habillement.

28 O Seigneur, tu changeras tous les elemens de
leur estat & qualité: mais tu demeures tousiours
fondé en vne mesme essence, & ton temps durera
eternellement.

29 O Seigneur, j'espere que iamais ne seray for-
clos de celle eternité: car les bons Chrestiens &

Catholiques, qui sont enfans de Dieu demeureront illec, & la semence des bonnes œuvres semée en ce monde sera là sus au Ciel gardée eternellement. Gloire soit au Pere, &c.

P S E A V M E VI. *De profundis.*

I **O** Seigneur, Seigneur misericordieux, ie ne crie point de bouche seulement, mais i'ay aussi crié à toy du profond de mon cœur: ô Seigneur exauce mon Oraison.

2 O Seigneur, fay que les oreilles de ta clemence escoutent le desir de ma priere.

3 Car si tu nous veux iuger selon nos iniquitez: ô Seigneur, qui est celuy qui le pourra supporter?

4 Mais ie sçay bien que tu es misericordieux & debonnaire: & à cause de ta promesse, d'autant que tu as promis ta grace & assistance au pecheur contrit, i'ay patiemment attendu ta consolation diuine.

5 Les paroles du Seigneur ont reconforté mon ame: & i'ay mistoute ma fiance en toy.

6 A la mienne volonté, que toutes bonnes gens depuis l'enfance iusques à la mort, mettent leur esperance au Seigneur.

7 Car il est fort debonnaire, & nous a racheté d'un gage de prix inestimable & infiny, à sçauoir de son sang precieux.

8 Par lequel il deliurera tout son peuple fidele, de toutes ses iniquitez. Gloire soit au Pere, &c.

P S E A V M E VII. *Domine exaudi.*

I **O** Seigneur, i'ay prié tres-souuent, & te prie derechef, que tu vueilles exaucer mon oraison, & que des oreilles de ta debõnaireté, tu escoutes ma complainte en ta verité: car tu as promis au pecheur contrit misericorde: & me vueille encore exaucer selon ta iustice, laquelle requiert, que

tu ne condamneras le pecheur contrit, quand il se iuge soy-mesme, & desire faire penitence pour ses pechez.

2 Pour cela ne vueille iuger ton seruiteur d'une sentence rigoureuse, car selon ta sentence seuer, ne sera homme reputé iuste en ta presence.

3 O Seigneur, aye compassion de moy; car l'ennemy a asprement persecuté mon ame, & a incliné ma vie à toutes choses transitoires.

4 Il a rendu peine pour me mener en toutes les tenebres de peché, & pour viure selon le monde: ce que i'ay apperceu, & craignant le danger i'ay esté angosté en mon esprit, & mon cœur a esté fort troublé, ne me sçachant comme ie pourrois tels perils euer.

5 Mais i'ay amené en memoire tes faits admirables du tēps passé, esquels i'ay trouué consolation: c'est à sçauoir en toy; car ie treuve que ceux qui ont mis leur espoir en ta misericorde, trouuent aide & secours en toy.

6 Et par cēt espoir ay mis toute ma fiâce en toy, & mon ame a eu affection en toy, pour fructifier en vertu, comme la terre aride sans eau, qui ne peut produire fruct.

7 O Seigneur, exauce-moy hastiuemēt, & respāds en moy la pluye de ta grace diuine: car sans ta grace il me conuient demeurer comme vne terre infructueuse & sterile.

8 O Seigneur, ne destourne ta face de misericorde arriere de moy, comme celuy qui est offensé de mon peché; car sans ta misericorde il me conuient demeurer comme ceux qui sont tresbuche en la fosse du peché.

9 Mais fai moy bien-tost iouir de ton ineffable de-

bonnaireté ; car i'ay mis mon esperance en toy , & non point en autruy.

10 O Seigneur, monstre-moy la voye en laquelle ie dois cheminer , car mon esperance est totalement en toy.

11 O Seigneur, ie viens à toy , deliure-moy de tous mes ennemis, & fai moy accomplir ta volonté diuine, car tu es mon Dieu & mon Seigneur.


12 O Seigneur, ie sçay que tu feras cecy ; car ton bon esprit me guidera par ton Nom, au droit chemin de salut, dautant que tu es nommé nostre Sauueur, & ne me viuiras point par mes merites; mais avec la vie de ta grace : car ta verité requiert que ceux qui s'humilieront soient exaltez.

13 O Seigneur, quād ta volonté aduiēdra, tu deliureras mon ame hors des tribulatiōs de ce mōde, & par ta misericorde tu disperseras tous mes ennemis.

14 Et aneātiras tous ceux qui trauaillent mon ame; car ie te desire loialement seruir à tousiours, & iamaïs ne t'abandonner, afin que par ta grace diuine ie puisse paruenir à la gloire eternelle.

A laquelle me vueille conduire avec mes parens viuās & trespassez; & tous les ames fideles, Dieu le Pere, Dieu le Fils, & Dieu le S. Esprit. Amen.

L I T A N I E S.

 SEIGNEVR, ne reduis en memoire nos fautes, ne celles de nos parens, & ne te venge point de nos pechez.

Seigneur, aie mercy de nous.

Christ, aie pitié de nous.

Seigneur, aie merci de nous.

O Seigneur, escoute nous.

O Iesus-Christ, exauce - nous.

O Dieu le Pere des Cieux, fais-nous misericorde.

O Dieu le Fils Redempteur du monde, fais-nous
misericorde.

O Dieu le saint Esprit, fais-nous misericorde.

O sainte Trinité vn seul Dieu, fais nous miseric.

Sainte Marie, prie pour nous.

Sainte Mere de Dieu, prie pour nous.

Sainte Vierge des Vierges, prie pour nous.

Saint Michel, prie pour nous.

Saint Gabriel, prie pour nous.

Saint Raphaël, prie pour nous.

Tous les Saints Anges & Archanges, priez pour n.

Tous les saints Estats des Anges & Esprits bien-

heureux, priez pour nous.

Saint Iean Baptiste, priez pour nous,

Tous les saints Patriarches & Prophetes, priez
pour nous.

Saint Pierre, prie pour nous.

Saint Paul, prie pour nous.

Saint André, prie pour nous.

Saint Iacques, prie pour nous.

Saint Iean, prie pour nous.

Saint Thomas, prie pour nous.

Saint Philippe, prie pour nous.

Saint Barthelemy, prie pour nous.

Saint Matthieu, prie pour nous.

Saint Simon, prie pour nous.

Saint Thadée, prie pour nous.

Saint Matthias, prie pour nous.

Saint Barnabas, prie pour nous.

Saint Luc, prie pour nous.

Saint Marc, prie pour nous.

Tous les Saints Apostres & Euangelistes, priez p.

Tous les Saints Disciples du Seigneur, priez p. n.

Tous les Saints Innocens, priez pour nous.

Sainct Estienne,	prie pour nous.
Sainct Laurent,	prie pour nous.
Sainct Vincent,	prie pour nous.
Sainct Fabien,	prie pour nous.
Sainct Sebastien,	prie pour nous.
Sainct Cosme & saint Damien,	priez pour nous.
Sainct Geruais & S. Prothais,	priez pour nous.
Tous les Saincts Martyrs,	priez pour nous.
Sainct Siluestre,	prie pour nous.
Sainct Gregoire,	prie pour nous.
Sainct Ambroise,	prie pour nous.
Sainct Augustin,	prie pour nous.
Sainct Hierosme,	prie pour nous.
Sainct Martin,	prie pour nous.
Sainct Nicolas,	prie pour nous.
Tous les Saincts Euesques & Confesseurs,	priez p.
Tous les Saincts Docteurs,	priez pour nous.
Sainct Benoist,	prie pour nous.
Sainct Anthoine,	prie pour nous.
Sainct Bernard,	prie pour nous.
Sainct Dominique,	prie pour nous.
Sainct François,	prie pour nous.
Tous les Saincts Moynes & Hermites,	priez p. n.
Tous les Ss. Prestres & Leuites,	priez pour nous.
Saincte Marie Magdeleine,	prie pour nous.
Saincte Agathe,	prie pour nous.
Saincte Lucs,	prie pour nous.
Saincte Cecile,	prie pour nous.
Saincte Catherine,	prie pour nous.
Saincte Anastase,	prie pour nous.
Toutes les saintes Vierges & Vefues,	priez pour.
Tous les Saincts & Sainctes de Dieu,	priez pour.
Sois misericordieux,	Pardonne-nous Seigneur.
De tous maux,	deliure-nous Seigneur.

De tous pechez, deliure nous Seigneur.
De ton ire, deliure-nous Seigneur.
De mort soudaine, & despourueü, deliure-nous.
Des ruses & aguets du diable, deliure-nous Seig.
De toute ire, rancueur, & de male volonté, deli.
De l'esprit de fornication, deliure-nous Seig.
De la gresle & tempeste, deliure-nous Seigneur.
De la mort eternelle, deliure-nous Seigneur.
Par le mystere de ta sainte Incarnation, deliure.
Par ton Aduent, deliure-nous Seigneur.
Par ta Natiuité, deliure-nous Seigneur.
Par ton Baptisme & ton saint Ieufne, deliure.
Par ta Croix & Passion, deliure-nous Seigneur.
Par ta Mort & Sepulture, deliure.
Par ta sainte Resurrection, deliure.
Par ton admirable Ascension, deliure.
Par l'aduenement du saint Esprit consolateur, del.
Au iour du iugement, deliure-nous.
Nous pecheurs te prions, escoute-nous.
Que tu nous espargnes, nous te priôs escoute nous.
Que tu nous pardonnes, nous te prions.
Que tu nous vueilles amener à vraye Penitence,
nous te prions.
Que tu daignes gouverner & conseruer ta sainte
Eglise, nous te prions.
Que tu daignes conseruer le Seigneur Apostoli-
que, & tous les Estats Apostoliques en ta sain-
cte Religion, nous te prions.
Que tu daignes humilier les ennemis de la sainte
Eglise, nous te prions.
Que tu daignes donner Paix & vraye concorde
aux Roys & Princes Chrestiens, nous te prions.
Que tu daignes donner paix & vnité à tout le peu-
ple Chrestien, nous te prions.

Que tu nous daignes conforter & preseruer en ton
sainct seruice, nous te prions.

Que tu adresses nos desirs à choses celestes, nous.

Que tu vueilles deliurer nos Ames & celles de nos
freres, prochains & bien-faicteurs de la damna-
tion eternelle, nous te prions.

Que tu nous daignes donner & conseruer les fruits
de la terre, nous te prions.

Que tu donnes à toutes les Ames des fideles tref-
passez le repos eternel nous te prions.

Que tu nous daignes exaucer, nous te prions.

O Fils de Dieu nous te prions, escoute-nous.

Agneau de Dieu, qui oste les pechez du monde,
Pardonne-nous Seigneur.

Agneau de Dieu, qui oste les pechez du monde,
Exauce-nous Seigneur.

Agneau de Dieu, qui oste les pechez du monde,
Fais-nous misericorde.

O Iesus-Christ, Escoute-nous.

O Iesus-Christ, Exauce-nous.

O Iesus-Christ, Fais nous misericorde.

O Iesus-Christ, Fais-nous misericorde.

O Seigneur, Fais-nous misericorde.

Nostre Pere qui es, &c. *secrettement & tout bas.*

Verset. Et ne nous induis point en tentation.

Respons. Mais deliure-nous du mal.



TABLE DV CONTENV EN CE LIVRE.



Elle doctrine
en forme de
prologue , des
fruits de l'O-
raison & des
conditions qu'elle doit avoir
pour estre agreable à Dieu.

CHAPITRE I.

Contenant vne deuote expo-
sition ou paraphrase sur
l'Oraison Dominicale di-
uisée en sept Meditations
ou Oraisons.

Preface	page 1.
Premiere Meditation sur l'Oraison Dominicale.	5
Deuziesme Meditation.	28
Troisiesme Meditation.	31
Quatriesme Meditation.	37
Cinquiesme Meditation.	41
Sixiesme Meditation.	47
Septiesme Meditation.	50
Medit. sur l'Aue Maria.	50
Deuote Med. de F. Loys de Grenade sur les œuvres de Dieu.	75

CHAPITRE II.

Lequel contient les Prieres
quotidiēnes, que l'o pour-
ra adapter à certaines heu-
res tant du iour que de la
nuict.

Admonitiō pour le matin. 85
Oraison pour le matin, diui-
sée en 4. parties. 87

Oraison pour dire le matin,
en laquelle nous demādōs
à Dieu & aux Saincts tout
ce qui nous est necessaire,
& à nos prochains. 96

Admonition de ce que l'on
doit faire auant que sortir
de la maison , pour aller
en public. 99

Oraison deuant que sortir de
la maison. 100

Admonition. 103

Admonition du pere Orige-
ne , comment il faut soi-
gneusement escouter la pa-
role de Dieu. 108

Oraison deuant que commen-
cer quelque chose. 111

Aspiration, ce pendant qu'on
commēce ou fait quelque
chose, 113

Action de grace apres auoir
paracheué quelque œu-
re. 114

Oraison quand on entend
sonner l'horloge, 119

Oraison deuant le repas : &
quelques aspirations deuot-
es pour dire ou méditer en
beuuant & mangeant. 120

T A B L E.

Oraison apres la reſectiō. ibi.	Au Graduel, & au Traict. 166
Admonition pour les prieres du ſoir. 127	Au Cantique. Allel. 167
Cōfeſſion pour le ſoir, apres l'examen de conſciēce. 132	Al'Euangile. 168
Aduertiffement de ce que il faut faire apres l'examen de conſcience. 135	Au Symbole. 170
Action de grace pour le ſoir, par laquelle nous remer- cions Dieu des benefices receus le long de la jour- née. 136	Oraison pour dire à l'Offer- toire de la Meſſe. 172
Quelque aduertiffemēt pour le ſoir & pour la nuit. 144	Admonition deuant la Prefa- ce. 173
CHAPITRE III.	Oraison à la Preface. 174
Contenant les Oraisons litur- giques, que l'on peut dire & reciter deuant le S. Sa- crifice de la Meſſe	Al'Hymne des Anges, San- ctus. 175
Prologue. 147	Durant le ſacré Canon. 176
Meditation deuote pour pre- parer l'ame à reuerence & deuotion enuers le ſacrifi- ce de la ſaincte Meſſe 148	Adoration à l'elevation du S. Sacrement de l'autel. 181
Oraison & adoration à Ieſus- Chriſt, & à tous ſes mem- bres, laquelle pourra eſtre recitée deuant l'image du Crucifix, en attendant que le Preſtre accedera à l'Au- tel. 153	Oblatiō du Fils au Pere, pour nos pechez, laquelle ſe pourra faire apres l'Eleua- tion du S. Sacrement. 183
Oraison pour dire à la Con- feſſion generale. 156	Al'Oraison Dominicale 187
Al'Introite de la Meſſe ibid.	Oraison quand le Preſtre fait la fraction Sacramētale. ib.
A la Litanie. Kyrie eleiſō. 157	A l'Agnus Dei. 189
Al'Hymne des Anges, Glo- ria in excelsis Deo. 160	Au baiſer de la paix. 190
Aux Oraisons ou collectes. 162	Auis pour la Communion ſpirituelle. 191
Al'Epistre. 164	Oraison deuant la Commu- nion ſpirituelle 193
	Aux oraisons ou collectes, qui ſe diſent apres la Commu- nion. 197
	A la benediction. 200
	Litanie tres-deuote pour dire à la fin de la Meſſe. 204
	CHAPITRE IV.
	Contenant les oraisons des penitens, pour impetrer la verru de contrition, & la remiſſion des pechez.
	Preface. 211
	Premiere oraison, pour mettre

T A B L E.

en l'ame la compunction & desplaisance de ses pe- chez. 215	me deuote se peut seruir deuant & apres la Com- munion.
Autre oraison pour demander contrition parfaite, & par- don des pechez commis. 219	Prologue, lequel enseigne les moyens, comment la personne pourra dignemēt communier. 269
Troisieme Oraison pour de- mander desplaisance & par- don des pechez. 221	Meditation auant la sacrée Cōmunion pour exciter en l'ame vne crainte & amour de ce tres-saint Sacre. 276
Oraison pour demander à Dieu pardon de ses offenses cōmises, laquelle se doit re- citer deuant la Confession sacramentale. 239	Seconde Medit. pour ce mes- me sujet. 284
Autre Oraison. 241	Premiere oraison deuant la sainte Communion. 290
Oraison briefue apres la Cō- fession sacramentale. 247	Seconde oraison 292
Oraison en laquelle tous les travaux & merites de Iesus Christ, sont offerts au Pe- re celeste, pour obtenir pardon des pechez, & la grace diuine: elle se pour- ra commodēmēt dire apres la Confession. 248	Troisieme oraison 297
CHAPITRE V.	Admonition pour le temps de la Communion. 301
Contenant les Oraisons de ceux qui veulent amender & corriger leur vie, par lesquelles ils demandent à Dieu ce qui est requis pour la nouueauté de vie, & meilleure conuersation	Oraison en receuant la sain- cte & sacrée Hostie. 304
Preface. 253	Aduertissemēt de ce qu'il faut faire apres la sainte com- munion. 305
Premiere oraison. 254	Troisieme Medit apres la communion du S. Sacre- ment 324
Seconde oraison. 259	CHAPITRE VII.
Troisieme oraison. 265	Contenāt quelques Oraisons à la sainte Trinité.
CHAPITRE VI.	Oraison à la sainte Trinité. 341.
Comprenant les Meditations & Oraisons, desquelles l'a-	Oraison au Pere. 349
	Oraison au Fils 361
	Oraison au S. Esprit. ibid.
	CHAPITRE VIII
	Contenant 7. belles & deuo- tes Oraisons, pour deman- der à Dieu son amour.
	Preface. 365


T A B L E.

Oraison premiere.	368	Cinquiesme.	490
Seconde.	375	Sixiesme.	496
Troisiesme.	379	Septiesme.	503
Quatriesme.	385	Oraison deuote du saint nom de Iesus.	508
Cinquiesme.	390	CHAPITRE XI.	
Sixiesme.	396	Contenant 7. Oraisons de- uotes, & vn Rosaire à la glorieuse Vierge Marie.	
Septiesme.	401	Preface.	511
CHAPITRE IX.		Premiere oraison & premier dixain du Rosaire	515
Auquel sont contenuës diuer- ses actions de graces pour les benefices receus de Dieu.		Seconde oraison & deuxies- me dixain du Rosaire	518
Prologue.	410.	Troisiesme oraison, & di- xain du Rosaire.	523
Premiere action de grace, pour le benefice de crea- tion.	411	Quatriesme oraison & dixain	530
Deuxiesme action de grace, pour le benefice de conser- uation corporelle.	417	Sixiesme oraison à nostre Dame.	546
Troisiesme action de grace pour le benefice ineffable de nostre redemption.	425	CHAPITRE XII.	
Quatriesme action de grace pour le benefice de voca- tion & iustification	433	Contenant quelques Orai- sons communes, & bien de- uotes aux Saints.	
Cinquiesme action de grace pour le benefice des Sacre- mens.	442	Prologue.	558
Sixiesme action de grace pour le benefice de conser- uation spirituelle.	440	Oraison aux Anges.	560
CHAPITRE X.		A vn Apostre.	563
Contenant 7. oraisons de la vie & passion de nostre Sauueur Iesus Christ.		A vn Martyr.	566
Prologue	463	A vn Confesseur.	569
Oraison premiere.	466	A vne Vierge & Martyre	572
Seconde.	472	A vne veufue ou autre sain- cte, non Vierge.	580
Troisiesme.	478	Oraison deuote à tous les bien heureux Saints & sainctes de Paradis.	583
Quatriesme.	484	CHAPITRE XIII.	
		Contenant les Oraisons pour prier à Dieu d'estre preser- uez ou deliurez du mal.	
		Preface.	586

TABLE.

Belle Meditation des miseres de nostre vie, & combien nous auons besoin de la grace de Dieu.	588	Pour demander l'amour de Dieu	630
Oraison contre les tentations du diable.	592	Pour demãder l'humilité	633
Contre les tentations du mō- de.	594	Pour demãder parfaite obeis- sance,	636
Contre celles de la chair.	597	Pour demander la vertu de pauvreté spirituelle.	638
Contre les mauuaises pen- sées.	599	Pour demander la vertu de chasteté de corps & pureté d'esprit.	641
Contre l'impugnation des vic- ces	601	Pour demander la vertu de patience.	
Quand la tentation perseue- re.	603	Pour demander toutes vertus.	644
Oraisons contre les distra- ctions d'esprit au temps de l'Oraison.	607	Pour demander la mort, bō- ne & heureuse.	647.
Pour dire lors que quelque tribulation ou aduersité te menace		CHAPITRE XV.	
Durant l'aduersité.	610	Contenant quelques Oraisi- pour diuerſes personnes.	
Quand tu seras detenu de quelque fascheuse mala- die.		Preface.	650.
Pour dire au temps de quel- que grande affliction commune	614	Pour l'Eglise.	ibid.
CHAPITRE XIV.		Pour le Pape.	655
Contenant les Oraisons pour demander les vertus.		Pour le Roy.	659
Prologue.	617	Pour vn amy.	662
Pour demander la grace de Dieu,	ibid.	Pour les ennemis.	664
Pour demãder sa crainte.	620	Pour les bien-faicteurs.	665
Pour demander la foy	625	Pour les pecheurs.	669
Pour demander l'esperance.		Pour les malades.	670
		Pour vne personne qui re- centement est decedée de ce monde.	672
		Les sept Pseaumes neniten- tiaux.	679

FIN.



GEO. TEABODY

242

8

L9684

1631

C.1

6118852

7JY16

